



BIBLIOTECA NAZ.
Vittorio Emanuele III

XXIII

C

40

MA LI





EDUARDI CORSINI

EX CLER. REG.

SCHOLARUM PIARUM

INSTITUTIONES

PHILOSOPHICÆ.

Cū animus Cælum, Terras, Mārīa,
omniūque rerum naturam perspe-
xerit, in hac ille magnificentia re-
rum, quā ipse se noscet, quā
pro nihilo putabit ea, quæ vulgo
dicuntur amplissima?

Cic. Leg. I. c. 23.

INSTITUTIONES
PHILOSOPHICÆ

· A D U. S U M,
SCHOLARUM PIARUM

TOMUS TERTIUS

CONTINENS LIBROS

DE COELO, & MUNDO.



FLORENTIÆ. MDCCXXXII.

CUM APPROBATIONE.



INSTITUTIONES

M. U. S. U. D. A.


*Curiosum nobis Natura ingenium de-
dit, & artis sibi, ac pulchritudinis
suae conscia spectatores nos tantis spe-
ctaculis genuit, ut per haec, quae ob-
tulerat oculis, cupiditatem faceret
etiam ceterorum.*

Sen. de Otio Sap. c. 32.





I N D E X.



PHYSICA PARTICULARIS.

Præfatio. Pag. 1.
PHYS. PART. TRACT. I. pag. 3.

PHYS. PART. TRACT. I. DISP. I.

De Mundo in communi. pag. 5.

Cap. I. De nomine, unitate, magnitudine, figurâ, perfectione, & animâ Mundi. pag. 6.

Cap. II. De Mundi origine. pag. 20.

Cap. III. De sphaerâ armillari. pag. 49.

Cap. IV. De parallaxi, aspectibus, & distantia siderum. pag. 61.

Cap. V. Præcipua corporum cælestium phænomena, & Veterum hypotheser. pag. 67.

Cap. VI. De systemate Ptolemaico. pag. 74.

Cap. VII. De systemate Copernicano. pag. 80.

Cap. VIII. De systemate Tichonico. pag. 101.

PHY.

PHYS. PART. TRACT. I. DISP. II.

De Cœlo, & Corporibus Cœ-
lestibus. pag. 115.

Cap. I. De Cœli substantiâ. pag. 117.

Cap. II. De Sideribus. pag. 134.

Cap. III. De Sole. pag. 151.

Cap. IV. De Lunâ. pag. 168.

Cap. V. De Calendario, & illustra-
ribus Epochis. pag. 177.

Cap. VI. De Mercurio, & Venere. pag. 218.

Cap. VII. De Marte, Jove, & Sa-
turno. pag. 221.

Cap. VIII. De Planetarum orbitâ,
periodo, distantia, & magnitu-
dine. pag. 227.

Cap. IX. De causâ motûs siderum. pag. 241.

Cap. X. De luce siderum. pag. 270.

Cap. XI. De eclipsibus siderum. pag. 280.

Cap. XII. De Cometis. pag. 288.

• PHYS. PART. TRACT. I. DISP. III.

De Corporibus sublimibus, seu
Meteoris. pag. 310.

Cap. I. De Elementorum numero, na-
turâ, ordinè, & loco. pag. 312.

Cap. II. De Igne, & Aere. pag. 325.

Cap. III. De Aquâ, & Terrâ. pag. 335.

Cap. IV. De Exhalationibus, & va-
poribus. pag. 341.

Cap. V. De Meteoris igneis. pag. 348.

Cap. VI. De Meteoris aqueis. pag. 363.
Cap.

Cap. VII. De Ventis .	pag. 376.
Cap. VIII. De Iride, alisque emphaticis Impressionibus . . .	pag. 388.

PHYS. PART. TRACT. I. DISP. IV.

De Corporibus Terrestribus. pag. 404.

Cap. I. De Terra loco, & quiete .	pag. 406.
Cap. II. De Terra figurâ, & magnitudine, juxta Veteres .	pag. 412.
Cap. III. De Zonis, Climatibus, seu divisione Astronomicâ Terra .	pag. 420.
Cap. IV. De Terra figurâ, juxta Recentiores .	pag. 430.
Cap. V. De divisione Geographicâ Terruris .	pag. 441.
Cap. VI. De Montium origine, structura, & magnitudine .	pag. 448.
Cap. VII. De Salibus .	pag. 458.
Cap. VIII. De Succis terrestribus .	pag. 465.
Cap. IX. De Lapidibus .	pag. 470.
Cap. X. De Metallis .	pag. 478.
Cap. XI. De Igne, & calore subterraneo .	pag. 489.
Cap. XII. secundo. De Magnete .	pag. 595.
Cap. XII. De Terramotibus .	pag. 496.
Cap. XIII. De Maris colore, falsedine, alisque accidentibus .	pag. 551.
Cap. XIV. De vario motu, ac praesertim de aestu Maris .	pag. 530.
Cap. XV. De Fontium origine .	pag. 554.
Cap. XVI. De Aquarum Virtutibus .	pag. 563.

*Errōres sic corrigas, amico Lector, & Cap. XI.
de Magnetis ad calcem libri reiectum suo
loco restituas.*

Pag. 2. ver. 4. *lege illa, quæ* p. 37. v. 29. *l. Anaxa-*
goram. p. 43. v. 27. *l. 5736.* p. 66. v. ult. *l. Fig. xvii.*
p. 78. v. 21. *l. bis absolvit.* p. 100. v. 17. *l. quàm*
Isaias. p. 143. v. 11. *l. 370.* p. 147. v. 25. *l. in supe-*
riori. p. 154. v. 1. *l. de Saturnus.* p. 145. v. 10. *l. quæ*
circa polum. p. 178. v. 10. *l. h. 23.* 56. 14. 116. 111 p. 182.
v. ul. *l. Fig. III.* p. 184. v. 11. *l. eo Menie.* p. 186. v. 20.
l. vel additus. p. 191. v. 32. *l. ex quo.* p. 202. v. 32.
l. & illi. p. 206. v. 3. *l. superius expolitam.* p. 214.
v. 6. *l. 5493.* annos. p. 223. v. 8. *l. peragat 4* 56. 11
26. 11 v. 27. *l. at inerrantia.* p. 274. v. 2. *l. recipe-*
ret. p. 291. v. 1. *l. erumpentes.* v. 2. *l. congloba-*
tæ. p. 292. v. 28. *l. detegantur.* p. 306. v. 6. *l. Co-*
metas. p. 309. v. 24. *l. non rideat.* p. 355. v. 37.
l. colore tincti. p. 364. v. 33. *l. verò humiles.* p. 365.
v. 36. *l. Alcmanus.* p. 371. v. 25. *l. pulverulentæ.*
p. 400. v. 22. *l. quin simul.* p. 411. v. 14. *l. infen-*
sibile est. p. 414. v. 18. *l. magis gravitent.* p. 513.
v. 12. *l. altitudine.* p. 521. v. 25. *l. demonstrabit.*
p. 550. v. 14. & 17. *l. minuta 810.* seu gr. 12. cum
Lunad.

P H Y S I C Æ
P A R T I C U L A R I S
T R A C T A T U S P R I M U S .



DISPUTATIO PRIMA

De Mundo, vel Universo in communi.



Erspicius rerum ordo, vel accurata cognitionum series requirit, ut communia primùm, ac universalia contemplati, universam nempe corporum omnium compagem, ejusque originem, & accidentia, singulas deinde ipsius partes, aut singula corporum genera complectamur. In hac itaque prima Disputatione *de Mundo*, vel *Universo in communi* ita loquemur, ut exposito prius illius nomine, unitate, magnitudine, figurâ, perfectione, & origine varia deinde systemata, vel Philosophorum hypotheses circa ordinem, quo singulæ Universi partes dispositæ fuerint, explicentur,

C A P. I.

*De nomine, unitate, magnitudine,
figurâ, perfectione, & animâ
Mundi.*

I.



Pythagoras omnium primus hanc
universorum complexionem, ob
elegantem rerum digestionem,
Mundum vocavit: nam quem
Græci κόσμον nomine ornamen-
ti appellaverunt, eum nos per-
fectâ, absolutâque elegantîâ Mundum dicimus
(a). Veteres autem, qui ante Pythagoram flo-
ruerunt, hanc ipsam rerum omnium compa-
gem *Omnis*, *Totius*, vel *Universi* nomine signi-
ficabant; quod posteris etiam temporibus sæ-
pius usurpatum esse videmus. Itaque nihil al-
iud est Mundus, ut optimè ab Aristotele de-
finitur, quàm *Compages ex Cælo, Terrâque co-*
agmentata, atque ex iis naturis, quæ inter ea
continentur (b), quæ definitio, cum iisdem fe-
rè verbis expressa fuerit a Possidonio Stoico
apud Laertium (c), argumento cum ceteris
esse solet librum illum, non Aristoteli, cui
falsè adscriptum omnes fatentur, sed Possido-
nio tribuendum esse. Atque hæc eadem defini-
tio, quæ a Philosophis omnibus admitti solet,
potest etiam egregiè ex sacris Literis illustrari.
Moyses enim, ut ostenderet Mundum, aut Uni-
versum initio temporis a Deo creatum esse, di-
xit

(a) *Plut. Plac. II c. 1.* (b) *Lib. de Mundo c. 2.*
vid. Epic. apud Laert. IX. seg. 88. (c) *Lib. VII. seg.*

xit *In principid creavit Deus Cælum, & Terram* (a), quod nimirum solo Cæli, & Terræ nomine Universum ipsum, vel Mundus optimè intelligatur. Neque mirari quis debet, quod in hac celebri definitione Terra solum, exigua adeo Universi pars, quæ Cælo comparata tenuissimum veluti punctum haberi soleat, expressè nominetur (b), sidera verò, vel cetera cælestia corpora, quæ magnitudine, ac splendore longè nobiliora putari poterant, reticeantur; cum enim Terra nobis proximior, & cognitioni nostræ subiecta maximè sit, si cum ipsâ Cæli amplitudine, atque cælestibus corporibus procul a nostra cognitione dissitis comparetur, dignior quodammodo, ac nobilior ipsis videtur; cum præsertim cælestia corpora, ut inferius ostendetur, in ministerium hominum facta, ac veluti Terræ lumina, ac ornamenta communiter habeantur; sive Terra, Cælumque clariùs, & expressiùs memoratur, quod illa hominibus, hoc ab ipso Deo incolatur, ut eleganter inquit Scriptura, *Cælum Cæli Domino, Terram autem dedit filiis hominum* (c), & etiam Cicero Mundum vocavit quasi communem quandam Deorum, hominumque domum, aut Urbem (d). *

II. Sed, ut illustriùs adhuc appareat superior Mundi definitio, aliqua de Mundi unitate ex veterum, recentiorumque Philosophorum sententiâ dicenda sunt, ut faciliè deinde intelligi possit.

(a) *Gen. c. 1. ver. 1.* (b) *Sen. Proem. Nat. Quæst.*
 (c) *Psal. 113. v. 15* (d) *Cic. divin. II. vid. Platon. in Symp. & Tim.*

* Quare magna Deum mater, materque ferarum, Et nostri generis hæc dicta est corporis una.
Lucr. II. vers. 598.

8 PHYS. PART. TRACT. I.

possit quâ ratione hæc definitio Mundo conveniat. Atque, ut ordine progrediamur, memorandi nobis occurrunt Philosophi, qui Planetas omnes, atque ipsa sidera, quæ nobis apparent, habitari dixerunt; ut Xenophanes *habitari ait in Luna, eamque esse Terram multarum Urbium* & *montium* (a); quam Xenophanis, & Anaxagoræ quoque opinionem egregiè illustravit Hugenius in *Cosmotheoro*, sive *Conjecturis de Terris cælestibus*, aliique complures, ut alibi dicitur. Hæc autem opinio, ut faciliè apparet, non plures quidem Mundos constituit; sed singulas solùm unius, ejusdemque Mundi partes Telluri nostræ similes, & incolis exornatas esse arbitratur. Hinc eadem Mundi definitio adhuc ab illis usurpari posset, ut quemadmodum respectu nostri Mundi est *Compages ex cælestibus corporibus*, & *Terrâ nostrâ composita*, ita quoque respectu illius ex: gr. qui Lunam incoleret, esset *Compages ex cælestibus corporibus* (inter quæ Tellus ipsa numeraretur) & *ex Lunâ*, veluti ex Terrâ, *coalescens*.

III. Heraclitus autem, & Pythagorici quævis stellam dixerunt esse mundum ipso athere infinito, qui Terram, aerem, atheremque contineat. Hæc opinio etiam in Orphicis perhibetur; nam Orphici sectatores singulas stellas esse Mundos dicunt (b). Hanc olim Xenophanis, nuperrimeque clariss. Viri Renati Cartesii (c) sententiam, vel hypothesein esse fusiùs, & opportuniùs alibi demonstrabitur: quemadmodum enim ille Planetas omnes, atque inter ceteros Terram
cirea

(a) Cic. Acad. II. (b) Plut. II. c. 13. & Lact. IX.
(c) Princ. part. III. n. 53.



PHYSICA PARTICULARIS.

PRÆFATIO.



Communia corporum omnium principia, causas, originem, proprietates omnes, & accidentia in prima Physicæ parte contemplati jam sumus; admirabilis quædam, ac infinita rerum varietas nunc observanda, vel explicanda nobis occurrit in alterâ Physicæ parte, quam, cum singulas illorum corporum species uberrimè complectatur, quæ nostris oculis obverſantur, *Physica Particularis* nomine decorari jam diximus. Atque incredibile est cerè quanta sit rerum varietas, quanta sit dignitas, & amplitudo, quæ in hac uberrimâ, jucundissimâque Physicæ parte tum a recentioribus, tum a veteribus etiam Philosophis pertractantur. Quècumque enim oculos in hoc amplissimo rerum theatro circumferimus, siue cælestia, siue terrestria corpora contemnemur, aliquid

2 IN PHYS. PART. PRÆF.

semper, & ubique nobis occurrit, quod ad Physicæ Particularis cognitionem pleno quodam jure spectare debet. Duo sunt tamen corporum, rerumque genera, ad quæ cetera omnia, quæ innumera propemodum sunt, revocari faciliè poterunt, ut exinde Physicæ Particularis divisio, vel rerum dicendarum ordo satis accommodè deducatur. Alia nimirum corpora ingenitum habent motûs principium, vegetant, adolescunt, sibi que simile producunt, eaque corpora *viventia*, vel *animata* dicuntur, ut Plantæ, Bruta, atque homines ipsi; alia verò omni prorsus intrinseco motu destituta, atque inertia sunt, ut sidera, metalla, lapides &c. & *inanimata* corpora, seu *vita expertia* vocari solent. Hanc itaque corporum divisionem sequuti quæ ceteris accuratior, & opportunior videtur, Physicam Particularem in duas Partes, sive Tractatus dividimus; quorum alter sit *de rebus inanimatis*, sive *de Cælo, & Mundo*; alter verò *de rebus viventibus*, & *animatis*, qui *de Animâ* communiter inscribi solet. Utrumque verò Tractatum ita complectemur, ut neque ab institutâ methodo, vel propositâ brevitate recedere, neque muneri huic nostro in re præsertim, quàm quæ maximè jucundissimâ, ac necessariâ deesse videamur.



P H Y S I C Æ

P A R T I C U L A R I S

T R A C T A T U S P R I M U S

De Cælo , & Mundo .



Corpora inanimata , quorum naturam , & accidentia nunc explicanda suscipimus , vel Cælo , vel Terrâ , vel , qui utrumque coniungit , Aère continentur . His etenim partibus omnis illa rerum compages , quam *Universi* nomine designamus , componitur . Hinc omnis de *Universo* quaestio in *Cælestia* , *Sublimia* , & *Terrestria* dividitur . Prima pars naturam siderum scrutatur , & magnitudinem ; solidumne sit Cælum , an ex subtili , tenuique materia nexum , & cetera his similia . Secunda pars tractat inter Cælum , Terramque versantia , ut nubila , imbres , nives , & humanas motura tonitrua mentes ; hac autem sublimia dicimus , quia editiora imis sunt . Tertia illa pars de Terris quarit , & de omnibus , quæ solo continentur (a) . Antequam tamen singulas ejusmodi partes aggrediamur , plura de

A 2

Mun-

(a) *Sen. Quæst. Nat. lib. I. c. 1.*

4 PHYS. PART. TRACT. I.

Mundi origine, figurâ, ac systemate dicenda nobis videntur, ut deinde ex universalibus ad singularia progrediendo clariùs intelligantur quæ illa de singulis Universi partibus explicanda contigerint. Hunc itaque primum Physicæ • Particularis Tractatum in quatuor partes, sive Disputationes dividemus, in quarum primâ de Mundo, vel Universo in communi; in alterâ de corporibus celestibus; in tertiâ de Meteoris, sive aëre, sublimitibusque; in quarto denique de terrestribus corporibus differetur. Nihil est verò cur hanc Physicæ partem, quæ omne hoc, cui Cæli, Mundique nomen indidimus (a), Universum nempe complectitur, ceteris omnibus vetustiore, longeque jucundiorē esse dicamus, cum id semel, atque iterum in ipso Physices limine nos opportunè ostenderimus. Id unum meminisse par fuerit, ut illius amore vehementiùs adhuc animus incendatur, nihil esse, quod accuratissimis studiis uberius amplificatum, quod innumeris fere observationibus, & experimentis diligentius illustratum, quod mirâ prorsus, & incredibili voluptate a sapientissimis Viris fuerit explicatum. Et sanè, si, ut optimè inquit Cicero, *sunt e Terrâ homines non ut incolæ, sed quasi spectatores superarum rerum, atque celestium* (b), licet melioris naturæ, quàm ut Anaxagoræ, atque Chrysippo Mundi inspicendi causâ geniti viderentur (c), quid dulcius otio literato esse poterit, iis dico literis, quibus infinitatem rerum, atque Naturæ, & in hoc ipso Mundo Cælum, Terras, Maria cognoscimus (d)?

PHY-

(a) Pompon. Mela Geogr. I. c. 1. (b) Nat. Deor. II. (c) Cic. ibi Laer. II. & Laët. Inst. II. c. 9. (d) Cic. Tuscul. V.

Maxima tanten vis, & auctoritas esse poterit locorum, quæ ex sacris Literis afferuntur, nisi quis liberioris adeo, & pervicacis ingenii sit, qui, ut illorum robur eludat, temere, ac impudenter affirmet Scripturam, & homines hujus Mundi nihil de alterius Mundi incolis sollicitos esse oportere; cum præsertim singula a sacris Literis edoceri non debuerimus, sed plurimum fortasse decuerit, ut aliqua forent, quæ nos omnino laterent; qui universum quidem genus humanum, a quo Terræ nostræ superficies incolitur, ab Adamo derivatum velit, alterius verò Mundi incolas ab aliq̃ natos existimet; qui denique Scripturas alias, alios Apostolos, Mundos alios comminisci non vereatur: quæ quidem, ut evidentissimè apparet, *portenta, & miracula non differentium Philosophorum, sed somniantium* (a) censerī debent.

VII. Quamvis itaque multiplicem Mundorum numerum *hæresim* vocare cum Alberto Magno (b), eamque opinionem *inter hæreses ab Apostolis, & Sanctis Patribus damnatas* (c) enumerare cum Divo Isidoro, non audeamus, certò tamen, constanterque defendimus unicum esse Mundum; meritoque Jordanem Brunum, qui id negaverat (d), Romæ damnatum; cum plurima exinde inferri possint, quæ Fidei decretis adversarentur: quemadmodum olim anathemate prohibitum fuerat ne quis Antipodas existere arbitraretur (e), quòd exinde rudiores homines decipi, & absurda quædam sacris Literis contraria deduci solerent.

VII.

(a) Cic. Nat. II. (b) II. par. sum. de hom. (c) Esym. VIII. (d) Vid. Kepl. Astr. Coper. (e) Decr. 24. quæst. 3. cap. Quidam autem.

VIII Nunc ipsa rerum affinitas exigit, ut aliqua de Mundi magnitudine, vel extensione dicamus. Hanc infinitam esse Archelaus (a), Leucippus (b), Seleucus, Diogenes (c), Plinius (d) existimarunt. Indefinitam verò Cartesius (e) quòd ipsa quoque spatia, quæ a nobis *imaginaria* dicuntur, trina extensione prædita, adeoque corpora esse putaverit. Sed, ut alibi demonstravimus, celebris illa Cartesii opinio de corporis essentiâ defendi non potest; deinde nihil est, aut esse potest in rerum naturâ, quod propriè *indefinitum* dici possit, si enim terminos habet, & a quibusdam finibus actualiter continetur, tunc simpliciter, & absolute finitum erit; si verò actualiter fines omnes excedit, & terminis caret, absolute, ac simpliciter infinitum vocari debet. Mundus autem, quamvis a Deo infinitus creari potuerit, certos tamen limites habet, suisque terminis circumscribitur, ut expressè in sacris Literis erudimur Deum omnia fecisse *in numero, pondere, & mensurâ* (f); unde communis est Theologorum, & Philosophorum omnium sententia nihil infinitum in rerum naturâ creatum esse.

IX. Quanta verò sit extensio Mundi, quantum Mundi latera, vel extrema illius superficies a Tellure nostra distet, is solum novit, qui admirabili prorsus consilio cuncta creavit, Artifex Deus. Nobis verò, tantum abest, ut illa scrutari, vel mente complecti

li-

(a) *Laer. II seg. 17.* (b) *Laer IX seg. 31* (c) *Plut. II. c. 1.* (d) *II. c. 1.* (e) *Prin. par. II. n. 21 & Epist. par. I. ep. 75; vid. Lucr II v. 1047 & I. ver. 957. & Cic. Div. II. c. 50.* (f) *Sapient. c. II. ver. 21.*

liceat, ut tenui vix conjecturæ locus supersit. Id unum verisimiliter suspicari possumus tantam fore Cœli, Mundique extensionem quantam siderum motibus peragendis par esse possit, quemadmodum olim Empedocles dixit *Solis conversione Mundum circumscribi, huncque esse ejus finem* (a). Communis est enim opinio sidera omnia, non in vacuo, ut opinabatur Gassendus, sed in tenuissimâ cœlesti substantiâ moveri, nihilque aliud inter sidera, & extremos Cœli, Mundique terminos contineri, quàm æternam. Beatorum sedem, hoc est Cœlum illud, quod ab igneo splendore *Empyreum* vocatur (duplex enim crystallinum, & primum mobile, de quibus alibi differetur, hic reticemus). Cum igitur siderum motus, distantia, magnitudo, ex accuratissimis Astronomorum observationibus innotuerit, facile quoque divinare possumus quæ maxima Cœli magnitudo censeri debeat. Atque, ut innumeras inter Astronomorum opiniones eam complectamur, quæ ceteris accuratior videtur, & quam recentiorum Astronomorum facile princeps Hugenius adhibuit, dicimus Syrii, aliorumque siderum primæ magnitudinis distantiam à Tellure esse milliarium Italicorum 221312000000. ideoque Cœli axim, seu longitudinem, quæ duplo major est, atque insuper terrestrem diametrum, milliaria nempe 7270., continet, futuram milliarium Italicorum 442624007270. Quàm verò major futura est Cœli amplitudo si non omnia sidera æqualiter à Terrâ distent, sed, quæ minora nobis apparent, remotiora censeri debeant? Quid
fi

(a) *Plut. II, c. 1.*

supra sidera ; quæ nobis ope^e telescopi conspicua sunt , ingens aliorum numerus exspatiatur , & oculos nostros effugiat ? Quid si Cometas cum Pythagora , Cassino , Bernoullio nihil aliud esse dicamus , nisi Planetas , sive Satellites , qui immensâ quadam periodo circa Planetam aliquem primarium , ob infinitam ferè distantiam nobis invisibilem , torqueantur ? Certè in hac hypothesi longè verissimillimâ tanta foret Universi amplitudo , ut omnem prorsus imaginationis vim , & fidem etiam excedere videatur . Ut aliquâ tamen ratione intelligi , vel concipi possit enormis adeo distantia , juverit cum Hugenio Hesiodi Poetæ exemplum adhibere , qui altitudinem Cœli , & Tartari profunditatem æquis spatiis definiens novem dierum , noctiumque lapsu ferream incudem e Cœlo demissam decimâ tandem die ad Terram pervenire dixit ; indeque æquali temporis intervallo ad Tartarum ferri . Nos itaque , supposita superiori siderum distantia , atque inito calculo dicimus , quod si globus ferreus , qui ex tormento bellico emissus , unico minuto secundo temporis , hoc est arteriæ pulsu , 350. circiter Florentinas ulnas , vel centum hexapedas Parisienses conficit , ut ex experimentis apparet , semper eâdem velocitate continuò moveretur , nonnisi post vigintiquinque annos perveniret ad Solem ; ut proinde septingenta annorum millia insumpturus sit globus ille in tantâ suâ celeritate priusquam ad proximas stellarum inerrantium regiones perveniat . Quid si ad ultima sidera , ad Cometarum regiones , ad Empyreï spatia , ad Universi limites properaret ?

circa Solem, veluti centrum Vorticis, perenni motu torqueri existimat, ita quoque alias Terras, & Planetas alios esse arbitratur, qui circa sidera, veluti centra aliorum Vorticum, moveantur. Quo certè posito unicus Mundus ægrè defendi poterit; quamvis, ut ingenuè loquamur, diversè potiùs ejusdem Mundi, vel Universi partes, aut Vortices haberi possint quandiu cœlestia, & terrestria corpora, quæcunque forent, eadem compage, superficie, iisdemque finibus coercerentur.

IV. Non defuere tamen Philosophi, qui plures, ac infinitos etiam distinctos, sejunctosque Mundos paullo liberiùs effingerent; ut Anaximander, Anaximenes, Anaxagoras, Archelaus (a), Zeno Eleates (b), Xenophanes, & Epicurus

*Cujus vivida vis animi pervicit, & extra
Processit longè flammantia mœnia Mundi,
Atque Omne immensum peragravit mente, animoque;*

*Unde refert nobis victor quid possit oriri,
Quid nequeat (c).*

Mœnia Mundi

*Discedunt: totum video per Inane geri res,
Nec Tellus obstat quin omnia despiciantur
Sub pedibus quacunque infrâ per inane geruntur (d).*

Inanis autem nomine celeberrima Epicuri *Intermundia* intelliguntur, spatia nimirum, quæ inter Mundos vacua relinquerentur. Democritus etiam, & Metrodorus absurdum esse unicam *vacui*

(a) Ap. Stob. Ecl. Phys. (b) Laër. IX. sec. 29.
(c) Lucr. I. ver. 73. (d) III. ver. 201. vid. Empyr.
I. adv. Phys.

2 IN PHYS. PART. PRÆF.

semper , & ubique nobis occurrit , quod ad Physicæ Particularis cognitionem pleno quodam jure spectare debet . Duo sunt tamen corporum , rerumque genera , ad quæ cetera omnia , quæ innumera propemodum sunt , revocari faciliè poterunt , ut exinde Physicæ Particularis divisio , vel rerum dicendarum ordo satis accommodè deducatur . Alia nimirum corpora ingenitum habent motûs principium , vegetant , adolescunt , sibi que simile producant , eaque corpora *viventia* , vel *animata* dicuntur , ut Plantæ , Bruta , atque homines ipsi ; alia verò omni prorsus intrinseco motu destituta , atque inertia sunt , ut sidera , metalla , lapides &c. & *inanimata* corpora , seu *vita expertia* vocari solent . Hanc itaque corporum divisionem sequuti quæ ceteris accuratior , & opportunior videtur , Physicam Particularem in duas Partes , sive Tractatus dividimus ; quorum alter sit *de rebus inanimatis* , sive *de Cælo , & Mundo* ; alter verò *de rebus viventibus* , & *animatis* , qui *de Animâ* communiter inscribi solet . Utrumque verò Tractatum ita complectemur , ut neque ab institutâ methodo , vel propositâ brevitate recedere , neque muneri huic nostro in re præsertim , quàm quæ maximè jucundissimâ , ac necessariâ deesse videamur .



PHYSICÆ PARTICULARIS TRACTATUS PRIMUS

De Cælo, & Mundo.



Corpora inanimata, quorum naturam, & accidentia nunc explicanda suscipimus, vel Cælo, vel Terrâ, vel, qui utrumque coniungit, Aëre continentur. His etenim partibus omnis illa rerum compages, quam *Universi* nomine designamus, componitur. Hinc omnis de *Universo* quæstio in *Cælestia*, *Sublimia*, & *Terrestria* dividitur. Prima pars naturam siderum scrutatur, & magnitudinem; solidumne sit Cælum, an ex subtili, tenuique materia nexum, & cetera his similia. Secunda pars tractat inter Cælum, Terramque versantia, ut nubila, imbres, nives, & humanas motura tonitrua mentes; hæc autem sublimia dicimus, quia editiora imis sunt. Tertia illa pars de *Ternis* quarit, & de omnibus, quæ solo continentur (a). Antequam tamen singulas ejusmodi partes aggrediamur, plura de

A 2

Mun-

(a) *Sen. Quæst. Nat. lib. I. c. 1.*

Maxima tanten vis, & auctoritas esse poterit locorum, quæ ex sacris Literis afferuntur, nisi quis liberioris adeo, & pervicacis ingenii sit, qui, ut illorum robur eludat, temere, ac impudenter affirmet Scripturam, & homines hujus Mundi nihil de alterius Mundi incolis sollicitos esse oportere; cum præsertim singula a sacris Literis edoceri non debuimus, sed plurimum fortasse decuerit, ut aliqua forent, quæ nos omnino laterent; qui universum quidem genus humanum, a quo Terræ nostræ superficies incolitur, ab Adamo derivatum velit, alterius verò Mundi incolas ab alio natos existimet; qui denique Scripturas alias, alios Apostolos, Mundos alios comminisci non vereatur: quæ quidem, ut evidentissimè apparet, *portenta, & miracula non differentium Philosophorum, sed somniantium* (a) censerī debent.

VII. Quamvis itaque multiplicem Mundorum numerum *hæresim* vocare cum Alberto Magno (b), eamque opinionem *inter hæreses ab Apostolis, & Sanctis Patribus damnatas* (c) enumerare cum Divo Isidoro, non audeamus, certò tamen, constanterque defendimus unicū esse Mundum; meritoque Jordanem Brunum, qui id negaverat (d), Romæ damnatum; cum plurima exinde inferri possint, quæ Fidei decretis adversarentur: quemadmodum olim anathemate prohibitum fuerat ne quis Antipodas existere arbitraretur (e), quòd exinde rudiores homines decipi, & absurda quædam sacris Literis contraria deduci solerent.

VII.

(a) Cic. Nat. II. (b) II. par. sum. de bon. (c) Erym. VIII. (d) Vid. Kepl. Astr. Coper. (e) Decr. 24. quæst. 3. cap. Quidam autem.

VIII. Nunc ipsa rerum affinitas exigit, ut aliqua de Mundi magnitudine, vel extensione dicamus. Hanc infinitam esse Archelaus (a), Leucippus (b), Seleucus, Diogenes (c), Plinius (d) existimarunt. Indefinitam verò Cartesius (e) quòd ipsa quoque spatia, quæ a nobis *imaginaria* dicuntur, trina extensione prædita, adeoque corpora esse putaverit. Sed, ut alibi demonstravimus, celebris illa Cartesii opinio de corporis essentiâ defendi non potest; deinde nihil est, aut esse potest in rerum naturâ, quod propriè *indefinitum* dici possit, si enim terminos habet, & a quibusdam finibus actualiter continetur, tunc simpliciter, & absolute finitum erit; si verò actualiter fines omnes excedit, & terminis caret, absolute, ac simpliciter infinitum vocari debet. Mundus autem, quamvis a Deo infinitus creari potuerit, certos tamen limites habet, suisque terminis circumscribitur, ut expressè in sacris Literis erudimur Deum omnia fecisse *in numero, pondere, & mensurâ* (f); unde communis est Theologorum, & Philosophorum omnium sententia nihil infinitum in rerum naturâ creatum esse.

IX. Quanta verò sit extensio Mundi, quantum Mundi latera, vel extrema illius superficies a Tellure nostra dissideat, is solum novit, qui admirabili prorsus consilio cuncta creavit, Artifex Deus. Nobis verò, tantum abest, ut illa scrutari, vel mente complecti

li-

(a) *Laer. II seg. 17.* (b) *Laer IX seg. 31* (c) *Plut. II. c. 1.* (d) *II. c. 1.* (e) *Prin. par. II. n. 21 & Epist. par. I. ep. 75; vid. Lucr II v. 1047 & I. ver. 957. & Clc. Div. II. c. 50.* (f) *Sapient. c. II. ver. 21.*

liceat, ut tenui vix conjecturæ locus supersit. Id unum verisimiliter suspicari possumus tantam fore Cœli, Mundique extensionem quantam siderum motibus peragendis par esse possit, quemadmodum olim Empedocles dixit *Solis conversione Mundum circumscribi, huncque esse ejus finem* (a). Communis est enim opinio sidera omnia, non in vacuo, ut opinabatur Gassendus, sed in tenuissimâ cœlesti substantiâ moveri, nihilque aliud inter sidera, & extremos Cœli, Mundique terminos contineri, quàm æternam. Beatorum sedem, hoc est Cœlum illud, quod ab igneo splendore *Empyreum* vocatur (duplex enim crystallinum, & primum mobile, de quibus alibi differetur, hîc reticemus). Cum igitur siderum motus, distantia, magnitudo, ex accuratissimis Astronomorum observationibus innotuerit, facile quoque divinare possumus quæ maxima Cœli magnitudo censeri debeat. Atque, ut innumeras inter Astronomorum opiniones eam complectamur, quæ ceteris accuratior videtur, & quam recentiorum Astronomorum facile princeps Hugenius adhibuit, dicimus Syrii, aliorumque siderum primæ magnitudinis distantiam à Tellure esse milliarium Italicorum 221312000000. ideoque Cœli axim, seu longitudinem, quæ duplo major est, atque insuper terrestrem diametrum, milliaria nempe 7270., continet, futuram milliarium Italicorum 442624007270. Quàm verò major futura est Cœli amplitudo si non omnia sidera æqualiter a Terrâ distent, sed, quæ minora nobis apparent, remotiora censeri debeant? Quid

fi

(a) *Plut. II. c. 1.*

supra sidera ; quæ nobis op^e telescopi conspicua sunt , ingens aliorum numerus exspatiatur , & oculos nostros effugiat ? Quid si Cometas cum Pythagora , Cassino , Bernoullio nihil aliud esse dicamus , nisi Planetas , sive Satellites , qui immensâ quadam periodo circa Planetam aliquem primarium , ob infinitam ferè distantiam nobis invisibilem , torqueantur ? Certè in hac hypothesi longè verissimillimâ tanta foret Universi amplitudo , ut omnem prorsus imaginationis vim , & fidem etiam excedere videatur . Ut aliquâ tamen ratione intelligi , vel concipi possit enormis adeo distantia , juverit cum Hugenio Hesiodi Poetæ exemplum adhibere , qui altitudinem Cœli , & Tartari profunditatem æquis spatiis definiens novem dierum , noctiumque lapsu ferream incudem e Cœlo demissam decimâ tandem die ad Terram pervenire dixit ; indeque æquali temporis intervallo ad Tartarum ferri . Nos itaque , supposita superiori siderum distantia , atque inito calculo dicimus , quod si globus ferreus , qui ex tormento bellico emissus , unico minuto secundo temporis , hoc est arteriæ pulsu , 350. circiter Florentinas ulnas , vel centum hexapedas Parisienses conficit , ut ex experimentis apparet , semper eâdem velocitate continuò moveretur , nonnisi post vigintiquinque annos perveniret ad Solem ; ut proinde septingenta annorum millia insumpturus sit globus ille in tantâ suâ celeritate priusquam ad proximas stellarum inerrantium regiones perveniat . Quid si ad ultima sidera , ad Cometarum regiones , ad Empyreï spatia , ad Universi limites properaret ?

circa Solem , veluti centrum Vorticis , perenni motu torqueri existimat , ita quoque alias Terras , & Planetas alios esse arbitratur , qui circa sidera , veluti centra aliorum Vorticum , moveantur . Quo certè posito unus Mundus ægrè defendi poterit ; quamvis , ut ingenue loquamur , diversę potiùs ejusdem Mundi , vel Universi partes , aut Vortices haberi possint quādiu cœlestia , & terrestria corpora , quæcunque forent , eādē compage , superficie , iisdemque finibus coercerentur .

IV. Non desuere tamen Philosophi , qui plures , ac infinitos etiam distinctos , sejunctosque Mundos paullo liberiùs effingerent ; ut Anaximander , Anaximenes , Anaxagoras , Archelaus (a) , Zeno Eleates (b) , Xenophanes , & Epicurus

*Cujus vivida vis animi pervicit , & extra
Processit longè flammantia menia Mundi ,
Atque Omne immensum peragravit mente , animoque ;
Unde refert nobis victor quid possit oriri ,
Quid nequeat (c) .*

————— *Menia Mundi*

*Discedunt : totum video per Inane geri res ,
Nec Tellus obstat quin omnia despiciantur
Sub pedibus quacunque infrā per inane geruntur (d) .*

Inanis autem nomine celeberrima Epicuri *Intermundia* intelliguntur , spatia nimirum , quæ inter Mundos vacua relinquerentur . Democritus etiam , & Metrodorus absurdum esse unicam na-
sci

(a) Ap. Stob. Ecl. Phys. (b) Laër. IX. sec. 29.
(c) Lucr. I. ver. 73. (d) III. ver. 201. vid. Empyr.
I. adv. Phys.

*sci spicam, & in infinito unicam Mundum existisse perinde absurdum; esse autem infinitos numero Mundos inde liquere, quod infinita sint causa, Individua, aut Elementa (a), hoc est Atomis, quas Epicurei infinitas esse dixerunt. Horum doctrinam sequutus est Anaxarchus ille Abderites, quem de infinito Mundorum numero differentem audiens Alexander flevisse dicitur, dignum flere existimans, quod, cum Mundi sint infiniti, nondum unius dominus foret. (b) * Sed melius sibi, ceterisque consuluit Diogenes Cynicus, qui cum fortè in Philosophum quendam de pluribus Mundis, ac Intermundiis seridè, graviterque loquentem incidisset, ab illo quæsiuit quamdudum de Cælo venisset? ex quoto nimirum die de Mundis illis, vel intermundiis advenisset, unde factas sibi res obvias ita memoriter referret; & quâ erat liberiori irridendi, mordendique licentiâ, inanem, ac portentoso similem opinionem traduxit (c). Et certè, quamvis, ut sapientissimi Viri arbitrantur, neque certâ ratione, nec fidei decreto unicum esse Mundum ostendi possit; temere tamen, ac impudenter plures effingerentur, cum nullum ejus rei argumentum habeatur, Mundique hujus externa indagare nec intersit hominum, nec capiat humanæ conjectura mentis. Furor est itaque mensuram ejus quosdam animo agitasse, atque prodere ausos. Alios rursus occasione hinc sumptâ, aut his data innumerabiles tradidisse Mundos: furor*

(a) *Plut. I. c. 5. & II. c. 1.* (b) *Plut. de tranquill. ani. & Val. Max. VIII. c. 5.* (c) *Laert. VI. sèg. 39.*

* *Unus Pelleo juveni non sufficit Orbis.*

Aestuat angusto conclusus limite Mundi.

Juven. Sat. X. ver.

ror est egredi ex eo; & tamquam interna ejus cuncta plane jam cognita sint, ita scrutari externa (a).

V. Verisimilius est igitur unicum esse Mundum, unicam nempe compagem ex iis corporibus, quæ in Cælo, vel Terra continentur, quod Thales (b), Plato (c), Pythagoras (d), Stoici (e), Empedocles (f), Parmenides (g), Heraclitus (h), Anaxagoras (i), Aristoteles (k), aliique complures existimarunt,

1. Id etiam innuere videntur auctoritates Scripturæ, quæ communiter afferri solent, quibus asseritur fecisse Deum ex uno (hoc est Adamo) omne genus hominum inhabitare super universam faciem Terra (l); Mundum per ipsum factum esse; Apostolos in universum Mundum ivisse, ut predicarent Evangelium omni creatura (m), aliisque similibus, quæ Mundum unicum singulari numero exprimunt, nec uspiam aliorum hominum, vel alterius Mundi mentio in sacris Literis reperitur, quod facile fieri debuisset, si revera daretur,

2. Ipsa deinde Artificis, vel Creatoris unitas, ut est a Platone (n) observatum, Mundi unitatem arguere videtur; cumque Mundus sit opus, imago, & regnum unius Dei, unicus esse debuit, ut illi similis foret,

3. Congruum quoque fuerat unicum esse Mundum, ne de multorum numero plures illorum Opifices asstimerentur (o). Quod a Trimegisto usur-

pa-

(a) Plin. II c. 1 (b) Laer. I. seg. 27. & Plin. II. c. 1. (c) In Soph. (d) Ap. Plat. Tim. (e) Plus I. c. 5. (f) Plus. & Laer. loc. cit. (g) Laer. IX seg. 8. (h) Laer. II. (i) III. Phys. 1. 4. & de Cælo I. c. 8. & 9. (k) Al. c. 17. ver. 26. (l) Joann. c. 1. ver. 10. (m) Mat. 24. v. 14. (n) In Timæo. (o) Atban. erat. con. Idol.

X. Hæc qui secum ipse perpenderit, nullus vereor, quin tacitâ quadam admiratione defixus infinitam primum Dei potentiam, majestatemque veneretur exclamans cum Propheeta *Ob Israel quàm magna est domus Dei* (a) ! deinde verò subirascatur, & ægrè ferat Philosophos, ac Theologos quosdam turpiter adeo desipuisse, ut eam Universo magnitudinem tribuerent, quæ non solum a superiori calculo; sed etiam a veritate quamque maximè abhorreat. Cum etenim in Apocalypsi legissent *Civitatem Dei in quadro positam* (b) esse, ad Cælum Empyreum id literaliter pertinere putantes, exteriorem illius, adeoque Universi, superficiem quadratam esse dixerunt, [quod eadem quoque figura quieti, ac æternæ Beatorum sedi congruere videretur] neque illud, ut æquum certè, ac facile fuerat, observarunt, quod, cum eodem loco cœlestis illius urbis circuitus *duodecim millia stadiorum esse dicatur, ejusque longitudo tanta est, quanta & latitudo*, inde fieri oporteret, ut Empyreï, vel Universi longitudo foret milliarium Italicorum 375. quanta nimirum est illa distantia, quæ Mediolanum inter, & Neapolim reperitur. Quo certè nihil absurdius dici, nihil ineptius excogitari fortasse potuit. •

XI. Quandoquidem verò de Universi figurâ mentionem fieri contigit, prætereundum nobis non est veterem esse, & celeberrimam quæstionem de figurâ Mundi, ut ex diversis Philosophorum Placitis, quæ apud Plutarchum, & Ciceronem memorantur, apparet: quamvis enim communior, longèque verisimilior opinio

Tom. IV. B fue-

(a) Baruch. c. 3. vers. 24. (b) Apoc. c. 21. vers. 16.

fuerit Mundi figuram sphæricam esse, non de-
 fuere tamen alii, qui turbinis; quidam, qui ovi
 figuram Mundo assignant (a), atque inter cete-
 ros (b) Empedocles, & Orphici (c); quemad-
 modum Epicurus fieri posse putavit, ut Mundus
 desinat in extremum aut rarum, aut densum;
 aut circumactum, aut quiescens; in rotundum,
 aut triangulare, aut figura cujuslibet; cum ni-
 bil sit rerum apparentium, quod refragetur: ne-
 que liceat comprehendere in quid reuera desinat
 Mundus (d). Nonnulli etiam ex veteribus Ec-
 clesiæ Patribus non Sphæricam esse Cœli figu-
 ram, sed in modum pellis, sive tentorii ex-
 tensam existimarunt, quod semel, atque ite-
 rum in sacris literis dicatur Deum extendisse
 Cœlos sicut pellem (e); & expandisse Cœlos
 sicut tabernaculum ad habitandum (f); atque
 inter ceteros Chrysostomus (g) illos arguit,
 qui Cœlum Sphæricum esse putaverint; id-
 que a catholicâ disciplinâ alienum esse Proco-
 pius (h) affirmat. Sed præclara est, atque
 hic obiter exscribenda videtur Augustini Sen-
 tentia, ut optimè intelligatur quid hac in-
 parte ille senserit, & quâ lege sacrarum lite-
 rarum testimonia in his rebus adhiberi posse
 docuerit. Is itaque quomodo, inquit, non est con-
 trariam iis, qui figuram Sphæra Cælo tribuunt,
 quod scriptum est in libris nostris, qui exten-
 dit Cœlos sicut pellem? Sit sanè contrarium,
 si falsum est quod illi dicunt. Hoc enim magis
 ve-

(a) *Plut. II. c. 1.* (b) *Stob. Ecl. Phys.* (c) *Apud Tat. in Arati Phen. vid. Plut. II. Sympb. quæst. 3.* (d) *Lært. IX. seg. 88 ex interpr. Gass. vid. Plut. Tat. loc. cit. & Macr. Sat. VII. c. 17.* (e) *Psal. 103 ver. 3.* (f) *Isai. 42. ver. 5.* (g) *Hom. 14. & 17. in Epist. ad Hebr.* (h) *In Gen. c. 1. & 7.*

verum est quod divina dicit auctoritas quàm illud, quod humana infirmitas coniicit. Sed si fortè illud talibus documentis probari potuerit, ut inde dubitari non debeat, demonstrandum est hoc, quod apud nos de pelle est dictum, veris illis rationibus non esse contrarium. In rebus itaque obscuris, & a nostris oculis remotissimis si qua inde scripta, etiam divina, legerimus, qua possint, salvâ fide, quâ imbuimur, aliis, atque aliis parere sententiis, in nullam earum nos præcipiti affirmatione ita proiciamus, ut si fortè diligentius discussa veritas eam rectè labefactaverit, corruamus; non pro sententia Divinarum Scripturarum, sed pro nostrâ ita dimicantes, ut eam velimus scripturarum esse, qua nostra est; cùm potius eam, que scripturarum est, nostram esse velle debeamus (a). Verum plus æquo ab institutâ quæstione digressi sumus.

XII. Pythagoras (b) itaque Egyptii (c), Thales, Stoici, Zeno (d), Plato (e), Aristoteles (f) Sphæricam esse Mundi figuram arbitrantur ejusque formam in speciem orbis absoluti globatam esse nomen in primis, & consensus in eo mortalium orbem appellantium, sed & argumenta rerum docent (g).

1. Atque illud in primis afferri solet, quod circularis figura omnium perfectissima, capacissima, & pulcherrima sit. Quid enim pulchrius eâ figurâ, qua sola omnes alias figuras complexa continet, qua nihil asperitatis habere potest (b) quaque omnium perfectissima, sibi que

B 2

ipsi

(a) Aug. de Gen. ad lit c. 18. (b) Laër. VIII. seg. 25.
(c) Laër. proe seg. 11. (d) Plus II c. 1. (e) Laër. III.
seg. (f) De Cælo I. (g) Plin. II. c. 2. (h) Cic. Nat. 11.

*ipsi simillima est (a) ? Sphæricam itaque Deus Mundo figuram dedit & decoram, & ipsi congruam, quoniam consentaneum erat, ut quod omnia in se continere deberet, eâ figurâ esset, quâ omnes figura continentur *.*

2. Deinde verò cùm siderum forma perfectè sphærica sit, cùm eadem sidera perenni motu ferantur, ut in orbem redeant, & circulos describant, longè verisimillimum est, Cœlos ipsos, in quibus ii motus peraguntur, & Universum, quod illa corpora complectitur, sphæricam figuram habere: neque enim aliter cœlestes illæ sphæræ liberè moveri possent.

3. Addi postremò potest in corporibus omnibus, quæ universam hanc Mundi molem constituunt, fortasse reperiri vim quandam, quâ ad punctum aliquod, veluti centrum, nitantur; eo prorsus modo, iisdemque legibus, quibus terrestria corpora gravitatis impetu ad Terræ centrum feruntur, quod si liberè id concedatur, ut facilè concedi poterit, exinde quoque sphæricam esse Mundi figuram non infeliciter probaretur.

XIII. His, aut certè similibus argumentis hæc opinio probari solet. Sed, ut ingenuè loquamur, non ea certè sunt, quibus invictè res ostendatur, & quibus facilè dissentiri non possit. Quid enim prohibet aliquem inveniri, qui cum Vellejo admiretur eorum tarditatem, qui Mundum rotundum esse velint, quòd eâ formâ ullam esse neget pulchriorem Plato, cum si
bi

(a) *Plat. Tim.*

* Per simile est moli contornatæ undique Sphæræ
Omnibus a centro radiis distantibus æquè;
Nil quippe est majus, nil firmitus.

Arist. de Xenoph. c. 2. 4.

bi vel cylindri, vel quadrati, vel conì, vel pyramidis videatur esse formosior (a)? Sed etiam si concedatur figuram sphæricam omnium perfectissimam, pulcherrimam, sibique simillimam fore, quâ tamen ratione hanc potius ab ipso Deo in creatione Mundi usurpatam esse probabitur? Ceteris quidem isoperimetris figuris rotunda capacior est; atque in illa figuræ ceteræ continentur: sed ipsa quoque circularis figura in aliis polygonis amplioribus continetur; neque suaderi poterit materiam Artifici defuisse quin cubicum, ovatum, aut alterius figuræ Mundum creare potuerit, quàm quamlibet Mundi rotundi magnitudinem excederet. Quid si deinde Cœlos immotos esse; sidera non in eâdem superficie collocata fore; neque rotundam habere figuram, neque circulariter moveri; neque extrema Mundi corpora existimari dicatur; sed ultra fixorum siderum, & Empyrei limites immensam adhuc Universi molem superesse; neque singulas Universi partes, sed solum terrestria corpora ad Terræ centrum descendere, quæ tamen omnia vero proxima putari poterunt? Corrueret sanè tota vis, ac veri species, quam præferre videntur rationes illæ omnes, quas in asserendâ sphæricâ Mundi figurâ adhibuimus; atque apertissimè ostenderetur, quàm pauca sint, quæ nobis certò innotuerint; nobisque præclare, ac liberaliter agi putaremus, si modò conjecturis aliquid assequamur.

XIV. Explicatis autem iis, quæ de Mundi nomine, unitate, magnitudine, figurâ dicenda fuerant, id unum postremò quærendum super-

B 3

est,

est, utrum hoc Universum perfectum, & absolutum censeri debeat? Qua quidem in re facile, ac meritò dici potest, quod, quamvis hic Mundus non omnium rerum genera, quæ possibilia sunt, complectatur, & alius longè nobilior, & perfectior a Deo creari possit; perfectus tamen, atque pulcherrimus haberi debet. Etenim Universi perfectio nonnisi ex ordine, varietate, & integritate partium oriri potest; hæc autem omnia in illo mirificè reperiri manifestissimè ostendunt tot sidera suis disposita locis certâ periodo revoluta, temporum vicissitudines constanti lege redeuntes, innumera serè volucrum, piscium, plantarumque genera diversis adedò coloribus, figurâ, proprietatibus prædita, ut ab humanâ mente quidpiam illustrius, aut magnificentius excogitari vix possit. Certè infinita vis, ac potestas sapientissimæ, perfectissimæque causæ ex admirabili Mundi perfectione maximè, & invictè demonstratur, & ipsa quoque Mundi perfectio ex optimi, sapientissimique Artificis perfectione probari potest; ut meritò proinde dixerit Thales -- *pulcherrimum esse Mundum, cum a Deo factus sit* (a); quemadmodum nos a sacris literis erudimur quod *Dei perfecta sunt opera* (b); atque ubi Divinus Artifex die septimo Creationis cessavit ab omni opere, quod pararat, vidit cuncta, quæ fecerat, & erant valde bona (c) Quo certe fieri oportuit, ut veteres omnes, recentioresque Philosophi hac in parte mirè consentiant, & ingenuè fateantur, *optimum* (d) *perfectissimum* (e) esse Mundum, ut

(a) *Loisr. I. seg. 34.* (b) *Deus 32. ver. 4.* (c) *Gen. c. 2. ver. 2.* (d) *Aug. de quant. an. c. 3.* (e) *Dionys. div. Nom. s. 4.*

ut uberius adhuc & opportuniùs demonstravimus in *Physicâ Generali* Tract. II. c. 3. cum de Providentiâ ageremus.

XV. Quin etiam plerique ex veteribus Mundum divino quodam spiritu plenum, & animatum esse dixerunt; quam sententiam a Trismegisto (a), Pythagorâ, Platone (b), Stoicis (c), aliisque compluribus traditam elegantissimis versibus expressit Virgilius cum ait:

Principio Cælum, ac Terras, camposque liquentes,

*Lucentemque globum Luna, Titaniaque Astra
Spiritus intus alit, totamque infusa per artus
Mens agitat molem, & magno se corpore miscet* (d).

Quemadmodum etiam Boetius animam Mundi commemorans inquit

*Tu triplicis mediam natura cuncta moventem
Connectens animam per consona membra resolv;*

*Qua cum secta duos motum glomeravit in orbes,
In semet reditura meat, mentemque profundam
Circuit, & simili convertit imagine Mundum* (e).

Non eadem tamen singulorum opinio, vel explicandi ratio fuit. Alii nimirum, ut antea dicebamus, singulas Universi partes eadem animâ animatas esse dixerunt; ita ut Mundus ipse magnum veluti animal videretur, cujus oculi forent sidera, Sol pro corde, Luna pro jecore &c. Alii verò nobiliores solum Universi partes, Cœlos, ac sidera, diversis animabus animata putarunt, quod ab

B 4

Ægy-

(a) In *Paman.* (b) In *Tim.* & *Plur.* (c) *Cic. Nat. I.*
(d) *Ænead. VI.* ver. 724. (e) *Conf. III.* metro. 9.

Ægyptiis, Chaldaïs, & Græcis etiam constanter adeo, ac religiosè defendebatur, ut Anaxagoras veluti religionis violatæ reus in iudiciam vocatus fuerit, quòd Solem, non Deum, aut Animal, sed ignitum lapidem esse diceret.

Quid quod Origenes (a) corporibus cœlestibus animam concessit, & sidera virtutis, ac vitii capacia putavit? & Augustinus hac in re ancipitem adeo se ostendit, ut nec illud certum se habere dixerit; utrum ad eandem. (Beatorum) mentium societatem pertineant Sol & Luna, & cuncta sidera; quamvis nonnullis lucida corpora esse sine sensu, & intelligentiâ videantur (b). Hieronymus autem explicans illud Ecclesiastæ 1. Oritur Sol, & occidit, & ad locum suum revertitur, ibique renascens gyrat per Meridiem, & flectitur ad Aquilonem: lustrans universa in circuitu pergit spiritus, & in circulos suos revertitur (quæ verba solem animatum esse innuere videntur) ait Scripturam solem ibi spiritum nominasse, sive quòd animet, & spiret, vigeat, & annuos orbis cursus expleat; sive quòd

Lucentemque globum Luna Titaniaque astra
Spiritus intus alit, totamque infusa per artus
Mens agitat molem.

Denique D. Th. (c) non solum expressè docuit Aristotelem in eâ fuisse opinionem, ut Cœlos animatos esse crediderit ab intelligentiâ, a quâ moventur, sed insuper opinionem illam a fide non alienam, & probabilem, esse dixit.

XVI.

(a) Perior. VII. (b) De Gen. ad lit. 11. c. 18. & Enchir. c. 18. 58. (c) Cont. Gent. c. 70. 90. & quæst. de An. ar. 8. vid. Arist. II. Anim. t. 29. & II. Cal. t. 13. & XI. Meta. t. 35.

XVI. Attamen hæc opinio, quamvis nullâ certâ ratione refelli fortasse possit, atque iis præsertim, quæ communiter afferri solent; attamen non nisi temere, & imprudenter defendi potest. Quæ enim argumenta suppetere unquam possunt, quæ vitam sideribus inesse probent, cum operationes omnes illorum sine vitâ peragi, & explicari optimè possint? Illorum certè motum, qui maximum, atque unicum foret indicium vitæ, ab aliis, & quidem innumeris causis oriri posse fusiùs alibi demonstrabitur, cum de siderum motu res erit.

Id optimè noverant ceteri Patres, qui Mundum ejusque partes omni prorsus animâ carere docuerunt. Sic D. Joan: Damascenus *Nul-
lus*, inquit, *Cælos, aut sidera animata existi-
met; anima quippe, ac sensu carent* (a); idem-
que D. Basilus (b) aperte confirmat. Epipha-
nius (c) autem, & Irenæus (d) opinionem il-
lam inter Marcosianorum hæreses ab Ecclesiâ
damnatas enumerat; quemadmodum Nice-
phorus (e) refert inter alios Origenis erro-
res a quintâ Synodo anathematis sententiâ
notatos hunc etiam fuisse, quod ille sideri-
bus, ac Cœlis animam concesserit. Origenis
errorem hac in parte sequutum esse D. Hiero-
nymum affirmat D. Th. (f) Verùm sententiâ
hanc a D. Hieron. vel numquam expressè tra-
ditam, vel certè seridè retractatam esse mani-
festissimè demonstratur, cum ille in Epistola
ad Avitum, & Pamachium Origenem repre-
hen-

(a) *De Fide* II. c. 6. (b) *Hexam. hom.* 3. (c) *Papay.
libr. II.* (d) *Cont. bar.* 3. (e) *Histor. Eccl.* XVII. c. 27.
(f) *I. par. quas. 70. art. 3. Et quas. 6, de pos. art. 6.*

hendat quòd Solem Lunam, & sidera animata putaverit; & in illa Scripturæ verba *audite Cæli, quæ loquor &c.* (a) & in caput 45. Isajæ omnem prorsus animam Cœlestibus corporibus adimat. Similiter D. Aug. lib. 1. Retract. cap. 5. quæ de Anima Mundi in lib. *De immort. anima* scripserat, temere scripta esse fatetur; & alibi (b) docet muscam sole nobiliorem esse quia *hæc animatur, & vivit*: Denique lib. 11. earundem Retract. c. 6. quæ olim de Mundi animâ scripserat, per tropum, & figuram intelligi posse docet.

XVII. Neque aliâ certè ratione, vel sensu, quàm allegorico plerique ex veteribus Philosophis Cœlos, & sidera divino quodam spiritu regi, mente moveri, animâ denique gaudere putarunt; quemadmodum enim vis, ac principium illud, quo corporis nostri membra foveantur, ac moventur, dicitur *anima*, ita, cum singulas Universi partes a Deo veluti principio disponi, regi, foveri, & admirabili quadam vi in suos effectus impelli viderent, Deum ipsum mentem, spiritum, atque animam Mundi, vocarunt; iisque nominibus usi sunt, quibus inexplicabilis quidam, ac infinita Dei natura satis non exprimitur, sed iis tamen, quibus nobiliora, aut meliora reperiri vix possint. Sic Stoici communiter censent Deum esse ignem artificem universas seminales rationes in se complectentem, per quas omnia fato fiunt, spiritum insuper per Universum quidem Mundum diffusum appellationes verò mutantem, per universa, quæ pervadit, natura confinia. Deum etiam Mundum, & Stei-
las,

(a) Deuter. c. 32. (b) De duab. anim. c. 4.

Ias, & Terram, supremamque omnium in æthere mentem (a) &c. Nec Stoici solùm Deum asserunt esse mentem, quæ totius aspectabilis molis Cœli nimirum, ac Terræ, ceterarumque rerum veluti corporis anima sit (b), sed etiam Thales Deum Mundi mentem vocavit. Nihil est autem cur Pythagoram, & Platonem in hac sententiâ fuisse dicamus, cum innumera sint argumenta, quibus id ostendi potest. Illi nimirum; ut ait Virgilius,

*Esse apibus partem Divina mentis, & haustus
Æthereos dixere; Deum namque ire per omnes
Terrasque, tractusque Maris, Cælumque pro-
fundum:*

*Hinc pecudes, armenta, viros, genus omne
ferarum*

*Quemque sibi tenues nascentem arcessere vi-
tas (c).*

Hos imitatus est Zeno Stoicorum Princeps, qui ideo Mundum animatum esse putavit quod anima nostra inde veluti avulsa fuerit (d). Quemadmodum eandem animam ætheris avulsionem vocavit (e) Pythagoras *.

XVIII. Hæc autem omnia, quamvis ingeniosè, magnificè etiam dicta fuerint; cavendum est tamen ne nos, quibus divinum Fidei lumen affulsit, iis nominibus abutamur (quod ab Ethnicis Philosophis factum esse dolemus) atque aliquid minùs rectè, vel indecorè de Deo sentire, vel loqui videamur. *Quod si
Deus*

(a) *Plut. I. c. 3.* (b) *Ap. Lact. II. c. 5. & Empyr. I. adv. Phys. & Epiph. her. 7.* (c) *Georg. IV. vers. 219.* (d) *Lact. VII. seg. 156.* (e) *Lact. VIII. seg. 28.*

* Ut corpus nostrum corporis mundani pars est, ita & nostra anima pars est animæ Mundi. *Plotin. Ennead. IV. lib. 4. c. 7.*

Deus per singulas Mundi partes ubique splendet, atque adeo se notum præstat, ut non intelligere modò, sed manibus etiam ipsis, ut ita dicam, contrectare liceat, cum undique nostris oculis ejus obversetur, seque obiciat, & inculcet imago; si nihil est in rerum natura, quod non aliquam præferat divinitatis imaginem (a); si denique in ipso vivimus, movemur, & sumus (b) liberè quidem ejus agendi vim maximam, & infinitam veneremur, qua singulis rebus intimè præsens easdem regit, ac effectivè solùm, ut inquirunt, ac eminenter, non verò formaliter animat, eamque, si libeat, animam allegoricè dicamus, quandoquidem nihil illustrius, aut accommodatius nobis occurrat; ingenuè tamen fateamur Deum non esse verè animam Mundi; &, si divinam hanc vim, & providentiam exceperis, nullam animam effingi posse, quæ Cœli, sidera, vel Mundus ipse regatur.

XIX. His auctoritatibus, & argumentis uti feliciter poterunt ii, qui Cœlos inanimatos esse defendant: dicere enim Cœlos, & sidera carere animâ, quia oculis, manibus &c. carent, & cibos sumere, nutrirî, sibi que simile producere nequeant, ceteraque id genus argumenta, ea sunt, quorum Philosophos pude-
re debeat; eosque præsertim quibus admirabilis animalium structura, varietas perspecta fuerit.

Atque hætenus quidem partim verisimili conjecturâ, partim divinando de Mundi unitate, figurâ, magnitudine, perfectione hæc dicta sint: Nunc ea prosequamur, quæ paulo

(a) *Trism. in Paman.* (b) *Act. c. 17. ver. 28.*

lo certiora videntur, Mundique originem explicemus.

CAP. II.

De Mundi Origine.

I.



On alio fortasse loco clariùs intelligi, vel meliùs usurpari posse videtur egregium illud Ciceronis effatum: *Auctoribus uti optimis in omnibus causis valere plurimum, & primum quidem ab omni antiquitate, qua quò propius aberat ab ortu, & divinâ origine hoc melius ea fortasse, qua erant vera, cernebat* (a), quàm ubi de Mundi origine disseratur.

Communis est enim Philosophorum omnium opinio, qui ante Aristotelem floruerunt, Mundum non ab æterno extitisse, sed potius aliquando genitum, ut ipsi loquuntur, sive in tempore productum esse. Ita nimirum expressè docuit Trismegistus ille, ex cujus fontibus universa Græcia bibisse dicitur; ita Musæus, Linus, Orphæus, Epicharmus, Zoroastres, Hesiodus, & Homerus, qui rerum naturam, ut alibi diximus, elegantissimis versibus illustrarunt; ita Phærecides, Empedocles, Anaxagoras, Heraclitus, Anaximander, Anaximenes, Stoici, Archelaus, Diogenes, Leucippus, Democritus, illustriora certè veteris sapientiæ lumina, existimarunt; quibus, ut Ægyptios, & Brachmanes omittam, Pythagoras Phærecidis

(a) *Tusc. I.*

cidis auditor addi poterit (a), quamvis alibi (b) hic ingenitum dixisse Mundum feratur.

II. Sed paullo difficilior, & obscurior esse videtur opinio Platonis; sive quod ille non satis eam exprefferit, sive potius quod illi tenebras, ut fieri interdum solet, Interpretes ipsi inter se nimium dissidentes offuderint. Complures enim existimant, ut Alcinous, Proclus, Apulejus, Crantor, qui Platonem ipsum audivit, Plotinus, Jamblicus, alique Platonem posuisse Mundum ingenitum, & ab æterno existentem. Oppositam verò sententiam placuisse Platoni non solum Cicero (c), Plutarchus, Atticus, Philo, & ex veteribus Ecclesiæ Patribus Platonem sequutis Justinus, Clemens, Theodoritus, Augustinus, alique longè plures existimant; sed etiam ex illius operibus manifestissimè demonstratur, quibus ille eleganter adeo, copiosèque de Mundi origine disseruit, ut ipsum in tempore genitum expressè dixerit. Locus illustris est in Timæo ubi Mundi originem explicaturus Plato: *Primum, inquit, consideremus quod in omni quaestione ante omnia investigari debet, utrum hoc Universum semper fuerit sine ullo generationis principio, an genitum sit ab aliquo principio sumens exordium. Id profecto cernitur, tangitur, & corpus habet, omnia vero hujusmodi sensus movent: qua sensus movent opinione per sensus percipiuntur; hac verò talia esse constat, ut gignantur, & genita sint. Patrem Mundi*
inve-

(a) Vid. Laër, præf. seg. II. Plut. II. cap. 4. Strab. XV. Diod. II. Censor. c. 4. Spæb. (b) Ap. Tertul. Apol. c. . . .
 (c) Acad. II.

invenire difficile, & cum jam inveneris predicare in vulgus nefas.

III. Reponere quidem solent ii, qui Platónem priori sententiæ addictum volunt, hæc a divino Philosopho dicta fuisse in Timæo non quod aliquando Mundum genitum fuisse crediderit, sed doctrina gratiâ; ut discentes melius percipiant (a); ut assumptâ nimirum veluti hypothesi quadam divinam Providentiam clariùs ostenderet.

Sed hæc explicandi ratio ab ingenuo Platonis sensu maximè abhorret, ut meritò dixerit Philo eos, qui illam temere effinxerunt, sophisticè agere. Quî enim fieri potuit hypothesein aliquam in re gravissimâ a Platone confictam esse, eo præsertim in loco, in quo non de Providentiâ, sed ex professione de Mundi origine loquebatur? Quid quod iisdem ferè verbis eandem sententiam in Critiâ, in libris de Rep. aliisque in locis expressit? Omnem verò dubitandi locum, si quis fortasse superesset, præcludit Aristoteles, qui cum *Mundum genitum ab omnibus admitti* dixerit (b), Mundique æternitatem a se primùm demonstratam esse gloriatur ac tempus, & Cœlum ex Platonis sententiâ genitum asserit; quemadmodum auctor libri de Mundo, qui Aristotelis nomine circumfertur, *veterem esse sermonem*, ait, & *a majoribus traditum omnia a Deo, & post Deum extitisse*. Hinc Aristoteles ipse fateatur se apud Hierophantum sacerdotem accusatum esse quòd unicum Deum contra patrias leges, ac ritus veneraretur; Mundum verò ingeni-

(a) *Arist. I. Calo tex. 104, & Plut. I. c. 22.* (b) *I. Calo tex. 102. c. 10.*

genitum, & sempiternum contra communem Græciæ sententiam assereret.

IV. Et sanè quod Aristoteles Mundi æternitatem contra veteres omnes Philosophos docuerit; quod illam innumeris locis aperte, constanterque defenderit, evidens adeo censeferi debet, ut jure, meritòque mirari liceat fuisse nonnullos, & adhuc esse, qui labem hanc ab Aristotele avertere se posse confidant; qui nempe illum non ferid, & ex animi sententia loquutum existimant, sed solum ut veterum Philosophorum opiniones everteret, qui nimia, ut illi videbatur, constantiâ Mundum in tempore creatum esse docebant.

*Quis enim tantum non omnino rudis, & ignarus scriptorum, & doctrina Aristotelis legens VIII. librum Phys. 1. lib. de Cælo, extremam partem lib. II. de Gen. posteriorem item partem lib. XI. Metaph. aperte non videat, si quod est dogma apud Aristotelem, & Peripateticos veteres certum, & exploratum, firmum, ratum, & constitutum, hoc de æternitate Mundi esse quamquod maximè; cui uni veluti fundamento nititur tota doctrina, quam is de Cælo, de Intelligentiis, & Deo tradidit (a)? ut egregius ille Aristotelis Interpres Aphrodisæus ex innumeris opinionibus Aristotelis hanc unâ de æternitate Mundi sibi maximè placere dixerit, quod in illâ perpetuò sibi constet, illamque semper acerrimè tueatur *?*

V. Quod

(a) *Perer de Princ. init. lib. XV.*

* Veniet orationis aureum flumen fundens Aristoteles, qui (Stoicum Mundi originem asserentem) desipere dicat; neque enim ortum unquam esse Mundum, quod nulla fuerit, nullo consilio inito tam præclari operis incœptio. *Cit. Atad. II.*

V. Quod si Aristoteles alicubi dicat *multa fore Problemata, qua in utramque partem disputari possunt, utrum ex. gr. Mundus fuerit ab aeterno (a)*, non ideo putandum est, quod Mundi æternitatem a se necessariis rationibus demonstratam esse non existimaverit; cum hoc alibi sæpius expressè dixerit, sed solum quia plures, ac illustriores Philosophos in aliâ sententiâ fuisse noverat, adeoque de hoc problematicè, idest in utramque partem, disputatum esse fatebatur. Ineptum verò, ac prorsus iniquum est, *omissis iis, qua permultis aliis in locis, ex professo, distinctè, affirmatè, & copiosè docuit Aristoteles, illud unum asserere, quod uno, & alio in loco, quod obiter, quod exempli tantùm causâ dictum est (b)*; cum præsertim in exemplis, ut Aristoteles ipse docuit, veritas non requiratur (c).

VI. Sed quæcunque tandem Platonis, aut Aristotelis sententia fuerit (neque enim illam prolixius inquirere decet) quæcunque demum de Mundi æternitate Xenophanes, Parmenides, Melissus, Philolaus, Ocelus, Aristæus, Chaldæi, & si qui fuerint alii, qui hanc asserere videbantur, docuerint (d), certissimum tamen est Mundum non ab æterno, sed in tempore creatum esse.

Hoc apertè nobis ostendunt sacrarum Litterarum testimonia, quæ plurima afferri possunt. Sic in Proverbiis dicitur: *Dominus possedit me in initio viarum suarum antequam quidquam faceret a principio; ab aeterno ordinata sum, antequam Terra fieret (e)*. Clari-

Tom. IV.

C

fica

(a) De Munda (b) Perer. loc. cit. (c) I. Prior. c. 39.
(d) Vid. Pius. II. c. 4. & Censor. de die nat. c. 4. Diad. II.
(e) Prover. 8. ver. 23.

fica me Pater claritate, quam habui priusquam Mundus fieret (a). Sed ceteris illustrius est illud, quod habetur in libro Genesis, ubi docemur, quod *in principio creavit Deus Cælum, & Terram* (b). Quamvis enim illâ voce *principium* aliquando principium temporis, aliquando verò principium æternitatis intelligatur, ut cum dicitur *In principio erat Verbum* (c), attamen hoc loco de solo principio temporis intelligendum esse Patrum omnium consensus (d), & ipse scripturarum contextus apertè docet. Cum etenim in eodem libro Genesis accuratissimè numerentur anni Patriarcharum, qui ab Adamo ad exitum populi de Ægypto floruerunt; deinde verò pluribus aliis in locis exprimantur anni, qui ab exitu populi ad Salomonem, & a Salomone ad Christi nati tempora fluxerunt, manifestissimè apparet quod illorum numerus, etsi apud diversos auctores diversus ponatur, tamen finitus est; adeoque Adam non ab æterno, sed in tempore creatus est. Cum igitur Mundi origo sex tantum diebus Adami creationem præcesserit, ut habemus a Genesi, hæc æterna dici non potest.

Æterna quidem est origo Verbi quia *Verbum erat apud Deum, & Deus erat Verbum* (e), adeoque necessariò Deus, & Verbum ipsum æternum esse debebat; Mundus verò, cum liberè, & contingenter a Deo creatus fuerit, principium temporis habere potuit; &, cum illius ætas revera finita sit, ut antea dicebamus,

in

(a) *Joan. 17. ver. 5.* (b) *Gen. 1. ver. 1.* (c) *Joan. 1. ver. 1.*
 (d) *Vid. Ambr. Hex. I c. 3. 4. Basil. Hex. hom. 1. Chrysost. hom. 2. in Gen. (e) Joan. 1. ver. 1.*

in principio temporis creatus dici debet. *Firma* igitur *fide*, ut in Lateranensi Concilio ab Innoc. III. celebrato definitum est, *credendum est Deum ab initio temporis simul utramque de nihilo condidisse naturam spiritualem, & corpoream, angelicam, & mundanam* (a).

VII. Hæc autem veritas, & opinio de Mundi origine, quamvis divinæ revelationi maximè innitatur, atque inter illa meritò numeretur, quæ, cùm a liberâ Dei voluntate pendeant, a Deo discenda sunt; aut a nullo, ut ait Tertullianus, plurima tamen argumenta esse solent, quibus naturali lumine verisimiliter ostendi posse videtur Mundum in tempore creatum esse, etsi ab æterno quoque creari potuerit, ut in Metaphysicâ demonstrabitur.

1. Maximo in primis argumento esse poterit, quod illustriores omnes Philosophi, ac tota ferè antiquitas in hoc mirificè convenerit Mundum aliquando incœpisse. Si itaque cunctarum gentium aliquâ de re consensus naturæ lex putari debet, atque unanimis sapientum omnium auctoritas maximam vim habere solet, ut Aristoteles ipse fatetur, quid de Mundi origine affirmari poterit, in quâ assensu Veteres omnes conveniunt?

2. Præterea si nulla fuit genitalis origo Terrarum, & Cæli, semperque aterna fuere, Cum supera bellum Thebanum, & funera Troja
Non alias alii quoque res cecinere Poeta?
Quo tot facta Virum toties cecidere, nec
usquam

(a) Cap. firma fide de sum. Trinit.

36 PHYS. PART. TRACT. I.

*Æternis fama monumentis insita florent ?
Verùm, ut opinor, habet novitatem sum-
ma, recensque*

*Natura est Mundi, neque pridem exordia
cœpit (a).*

3. *Quare etiam quadam nunc artes expolium-
tur,*

*Nunc etiam augeſcunt, nunc addita na-
vigiis sunt*

*Multa: modò organici melicos peperere so-
nores.*

*Denique natura hac rerum, ratioque re-
perta est*

*Nuper, & hanc primus cum primis ipse
reperitus,*

*Nunc ego sum, in patrias qui poſſim ver-
tere leges (b) ?*

4. Quàm verò argumentorum ejusmodi vis illustrior adhuc appareret, si plurimarum artium originem, quæ post Lucretii, vel Macrobiani tempora inventæ sunt, adderemus? Quis enim ignorat admirabilem usum pyxidis nauticæ, quâ immensos Oceani fluctus traicere, novum orbem, novos homines invisere licuit; Telescopium, quo nova sidera, novos Planetas, novam ferè rerum naturam contemplati sumus; Engyscopium, quo innumera animalium genera Veteribus prorsus incognita deprehensa sunt; Typographicam artem, quâ nihil utiliùs; bellicam quoque, si nova tormentorum genera consideres, paucis ab hinc annis inventam esse? ut ceteras omnes omittam, de quarum origine, ac inventori-
bus

(a) *Lucr. V. v. 325.* (b) *ver. 333. Vid. Macr. Somn. II. c. 10.*

bus plurima a Plinio (a), Diodorò (b), Strabone (c), aliisque compluribus, præsertim verò a Polidoro Virgilio (d), accuratissimè scripta sunt.

5. Pluribus etiam, & accuratissimis experimentis compertum est montium juga paulatim deprimi, eorumque molem decrescere; cum alterâ ex parte fluminum alvei, valles, & subjecta loca sensim repleti, & elatiora fieri videantur: quod in iis præsertim mœnibus admiramur, quæ, cum in montium verticibus infra Terræ superficiem olim collocata fuissent, nunc, solo sensim disfluente, aeris sunt exposita; in veterum autem ædificiorum strata, quæ in acclivi loco constructa fuerant, per plures etiam gradus descendere consueverimus. Cujus quidem effectûs causa, & origo nonnisi maxima aquarum vis esse potest, quæ cum assiduo motu eorundem montium latera alluere, &, si vehementiores sint, abradere soleant, non mediocrem terræ partem inde secum abripiunt, quæ, cum in decliviori loco subsederit, alveum augeat, ut in Nilo, Mæotide palude, Rhodano, Pado, &c. contigisse memoratur. Quin etiam celebre est oraculum illud de Pyramo Ciliciæ fluvio,

Tempus erit, rapidis olim cum Pyramus Andis

In sacram veniet congesto litore Cyprum (e),
& Anaxagoras percontanti an Lampsaceni montes mare essent aliquando futuri? dixisse ferunt, ita sanè, nisi tempus defecerit (f): atque Pythagoras apud Ovidium cecinit:

Quodque fuit campus vallem decursus aquarum

C 3

Fe-

(a) VII. c. 56. (b) II. c. 2. (c) Lib. vii. (d) De invent. rerum. (e) Ap. Strab. I. (f) Laer. II. sig. 10.

Fecit, & eluvie mons est deductus in aquor (a).

Cum itaque singulis annis aliqua terræ pars ex montium mole recedat, manifestissimè apparet, quod, si Mundus ab æterno extitisset, & infinitus annorum numerus jam transiisset, infinita quoque terræ quantitas abrasa fuisset; ut nulla propemodum illorum vestigia superessent.

Cujus equidem argumenti vis maxima videri potest; nisi quis fortasse temere prorsus, ac impudenter effinxit montes quidem in tempore creatos esse a Deo, vel ex Terræ visceribus prodiiisse, ante montes tamen extitisse Mundum, qui montibus omnino careret, vel certè alios montes haberet, qui diuturnâ sæculorum injuriâ paulatim defecissent. Verùm, si montibus careat Mundus, habitari certè non posset; nec verisimile est, ut alibi contra Heraclitum, Stoicos, Origenem (b), Epicurum ostendetur, Mundum senescentem, phœnicis instar juvenescere, ac instaurari.

6. Quemadmodum verò ex jugi montium decremento origo Mundi probari posse videtur, ita plerique arbitrantur (c) id ex ipsorum hominum decremento confirmari posse: existimant enim humani corporis vim, ac staturam paulatim debiliorem, ac breviorē fieri, cum veteres olim homines proceræ staturæ, diuturnæque ætatis fuisse memorentur; sed nullam esse hujus argumenti vim ostenditur, cum de Mundi duratione, & animalium vita differetur.

VIII.

(a) *Metam. XV. ver. 265.* (b) *Periar. II. vid. Hieron. ep. 6. & Bafil. Hexa. hom. 4.* (c) *Aug. Civ. XV. cap. 9. Plin. VII. c. 16. Agell. III. c. 10.*

VIII. Hæc autem omnia sufficere possunt, ut aliquâ ratione, non certâ quidem, ut antea dicebamus, sed verisimili, & quæ conjecturæ fines non egrediatur, Mundum non ab æterno, sed in tempore cæpisse demonstretur: præsertim verò cum ii, qui oppositam sententiam amplectuntur, nullam aliam verisimiliorem rationem afferre possint, quâ opinionem hanc ab illustrioribus Philosophis semper probatam evertant.

Quod enim, exem. gr. Deus ex necessitate operetur, adeoque coævum sibi Mundum produxerit; quod major inde gloria Creatori resultasset; quod alioquin invidus, & imperfectus videretur, si tanto tempore creaturis existentiam invidisset; quod Mundus ideæ sui, quæ in mente Divina fuerat ab æterno similis & coæternus esse debuerit; quod denique intelligi nequeat quomodo longo adeo tempore, vel spatio Deus ab omni opere cessaverit, deinde verò repenti consilium hoc de Universi creatione sinè ullâ sui mutatione suscepit, aliaque id genus plurima, quæ a Proclo, & Aristotele afferri solent, facile solvuntur; cum partim quidem ex veris principiis, sed vitiosâ illatione deducta, partim verò ex falsis etiam principiis absurdè, & iniquè contorta sint. Sed hoc illustrius alibi demonstrabitur cum de Deo Creatore in Metaphysicâ disseretur.

IX. Reliquum jam foret, ut aliqua de Mundi ætate, quod ipsa ferè loci opportunitas exigere videtur, hîc adderemus; certusque annorum numerus exhiberetur, qui a primæva Mundi origine ad hæc usque tempora fluxerunt. Cum verò incredibile sit quanto opinio-

nio-

nionum dissidio inter se differant illustriores etiam Historici, eorumque hypotheses accuratius examinare non ad Physicam, sed ad Chronologiam, sive doctrinam temporum, pleno quodam jure pertineat, hinc nos pressius, quàm illi soleant, rem certè gravissimam, & jucundissimam ex illorum fontibus hauriemus, & celebriores omnes Veterum, Recentiorumque sententias complectemur.

X. Ad Veteres quidem, quod attinet, mirum est certè, quàm Mundi ætatem liberius auxerint, ut illorum opinio a Sacris literis quamquod maximè abhorreat. *In quò, quia se posse argui non putabant, liberum sibi crediderunt esse mentiri (a)*, atque ut Urbium suarum originem longè antiquiorem esse demonstrarent, plurima conjiciendo, divinando, fabulando, tantùm non somniando dixerim, de illà commenti sunt, ut optimè dixerit Livius, „ *Datur hac venia antiquitati, ut miscendo humana divinis augustiora faciat Urbium suarum primordia (b)*. Quid enim aliud affirmari meritò poterit de Dynastiis Ægyptiorum, qui se antiquissimos esse gloriabantur, ut illorum prima circa ea tempora contigisse debuerit, quæ veram Mundi originem duobus saltem annorum millibus præcesserunt (c)? Quid de Regum ipsorum successione, quæ quatuor millibus septingentis annis perpetua, neque interrupta duravit (d)? Quid de novem annorum millibus, quæ a Solonis ætate ad ea usque tempora numerantur, quibus Minerva Saim Ægypti Urbem,

que-

(a) *Last. VII. c. 4.* (b) *Liv. Dec. 1. lib. 1.* (c) *ex Seneg. II. Canon. Isagog.* (d) *Diod. 1.*

quemadmodum post annos mille Athenas ipsas, ædificavit (a)? Quid de tresdecim annorum millibus, quæ Pomponius (b) commemorat; aut etiam quindecim millibus, quæ a Dionysio, vel Baccho ad Amasim Regem fluxisse refert Herodotus (c). Quid de viginti tribus millibus, quæ ab Osiride ad Alexandrum, vel quadraginta novem millibus, quæ a Vulcano Nili filio ad eundem Alexandrum, memorantur, addito etiam numero eclipsium Solis, & Lunæ, quæ eo temporis intervallo contigerant (d)? Quid denique, ut cetera omittamus, de centum millibus (e), aut etiam quadringentis septuaginta millibus annorum existimari debet, quibus se cœlestium corporum motus observasse referunt Ægyptii (f), easdem insuper observationes ingressio Babylonem Alexandro ostendentes: qui certè numerus *incredibilis* Diodoro (g) [quamvis ipse solum quadraginta tria millia referat] *infnitus* etiam Macrobio (h) meritò videbatur? Non aliud certè fabulosis illis hominibus responderi poterit, ut antea dicebamns, quamquod illis impunè, ac liberè ingentem adeo annorum numerum comminisci licuit, quòd a nullo facile revinci poterant; quamvis ipsa eadem opinionum diversitas argumento esse debeat illas omnes incertas esse, quemadmodum plurima continent, quæ aut omnino falsa, aut certè fabulosis simillima apparent.

Dici etiam poterit, quod Scriptores plurimi in Ægypto antiquissimum ferunt annum bimestrem fuisse; deinde a Pisone Rege quadrimestrem

(a) *Plat. Atl. vel Critia*. (b) *c. 9.* (c) *lib. 11.*
 (d) *Laer. proe. seg. 2.* (e) *Aug. Civ. XVIII. c. 40.*
 (f) *Cic. Divin. I. 1. 1.* (g) *lib. 11.* (h) *Senn. 2. c. 10.*

stem factum ; novissimè ad menses 12. & dies 5. productum (a) : quemadmodum Plinius commemorat Ægyptios annum olim menstruum habuisse ; itaque apud eos aliqui singula millia annorum vixisse produntur (b) . Certè Diodorus traditum esse , inquit , Reges singulos mille , & ducentis annis regnasse ; & cursus lunares , solaribus nondum plenè inventis annos confecisse (c) , quod apud Chaldæos etiam floruisse testatur , si tamen hæc quoque supputandi ratio veteribus illis concedatur , enormis adhuc annorum numerus supererit , qui ad certos veluti fines a Sacris literis præscriptos revocari non poterit .

XI. Quid itaque si conicere libeat , quod sicuti cognitâ , ac definitâ jam siderum periodo eclipses , aliaque id genus accuratissimè prædici possunt , ut Tabulæ construi possint , quibus eclipses omnes notentur , quæ centum millibus annorum sunt futuræ , si Mundus , eademque sidera tandiu conservabuntur , ita quoque Assyrii Tabulas construxerint , quibus eclipses illæ viderentur , quæ 470000. annorum spatio contigissent , in hypothesi , quod Mundus ipse , & sidera ab æterno extitissent .

XII. Ceterùm rejectis fabulis , & opinionibus , quæ circa Mundi ætatem nugaciter a Veteribus proditæ sunt , sententias illas subjiciamus , quæ ex Sacris literis ab Interpretibus maximo studio deductæ sunt .

Communis Ecclesiæ sententia est , ut in Martyrologio Romano describitur , Mundum creatum esse 5199. annis ante Christi Nativitatem .

(a) *Censor. de die nat. c. 4.* (b) *VII. c. . .* (c) *lib. 1.*

tatem; ita ut anni Christi numerari debeant a Kal. Januarii ineunte anno a Creatione Mundi 5100. atque a Mundi origine ad hæc usque tempora, quibus hæc scribimus, fluxerint anni 6932. Quæ sententia Baronio, aliisque compluribus maximè probatur.

Recentiores tamen, & accuratiores Historici, & Chronologi pluribus argumentis egregiè demonstrant longè minorem esse Mundi ætatem, quippe qui ante Christum natum quatuor circiter annorum millibus a Deo creatus fuerit. Petavius quidem anno 3983. ante communem Æram Christianam, Keplerus 3963. Gassendus 3950. Gordonus 4001. Salianus 4052. Pagius autem, Usserius, Lancelotus, alique innumeri 4004. hac tamen lege, ut vera Christi Nativitas communem Æram Christianam quatuor annis præcedere debeat, adeoque Christus exeunte anno Mundi 4000. natus dicatur.

XIII. Ex his opinionibus longè communior, & verisimilior apparet illa, quæ ponit Mundum creatum esse 4000. annis ante Christum anno scilicet 710. Periodi Julianæ, ut alibi demonstrabitur, ita ut a prima Mundi origine ad hunc annum, quem agimus, numerentur anni 5732.

Maximum verò discrimen, quod in ætate Mundi supputandâ inter Interpretes ipsos reperitur, ex ipsâ Scripturarum varietate dependet. Textus enim Græcus LXX. Interpretum longè plures annos Veteribus Patriarchis attribuit, quàm in Hæbraico Textu numerentur, adjectis nimirum illorum vitæ aliquando 100. aut etiam aliquando pluribus annis; unde ingens illa varietas oriri debuit, quæ
in-

inter utrumque textum observatur; Quod autem hac in parte Textus Hæbraicus purior sit, ac plurimi errores in Textum Græcum irrepperint, manifestissimè demonstratur ex plurimis absurdis, quæ inde sequerentur; sic, ex. gr. in Græco Textu Mathusalem vixisse, dicitur annis 969. ætatis autem anno 167. genuisse Lamech, qui cum ageret annum 188. genuit Noe, cujus anno 600. contigit diluvium; unde a Nativitate Mathusalem ad diluvium fluxissent anni 955. adeoque Mathusalem 14 annis diluvio superstes fuisset, quod Sacris literis apertè repugnat. Hæc, aliaque id genus innumera nos ferè cogunt, ut Hæbraicis ex fontibus Mundi originem repetamus, in eumque annum conjiciamus, qui 4004. annis communem Æram Christianam præcesserit, & 4000. Christi Nativitatem, quæ, ut alibi ostendetur, quadriennio vulgarem Æram præcedit.

XIV. Quo verò anni tempore, quove ordine Mundus a Deo creatus, ac dispositus fuerit, definiri vix poterit, cùm plurimùm Auctores inter se differant.

Complures existimant id autumno contigisse, tum quòd apud Ebræos ante Moyſis tempora annus ab autumno incipiebat, ut ex cap. 13. & 34. Exodi deducitur, ubi festum *Scanopegia*, mense Septembri in exitum anni, vel *redeunte anno* celebrandum præcipitur. Moyſes autem anni principium in mensem Nisan, seu Martium tranſtulisse dicitur; tum etiam quòd homini, & animalibus cibis, & tertæ fructus parandi erant, quòd solo autumni tempore fieri poterat.

Opinionem hanc sequutus videtur Petavius, qui

qui addit primam Mundi diem, si tamen hæc anni forma tunc extitisset, futuram 26. Octobris; Usserius autem, & Lancelotus Mundi Creationem contigisse arbitrantur initio notis antecedentis diem Dominicum 23. Octobris.

Alii vero sunt opinati Mundum verno tempore dum Sol in Ariete versaretur conditum fuisse, quodd illa temperies jucundior, nascentis Mundi primordiis accommodatior, fovendis, recreandisque animalibus recens productis aptissima videatur, quod ex Epicuri præsertim sententiâ elegantissimè expressit Virg. cum ait :

*Non alios primâ crescentis origine Mundi
Illuxisse dies, aliumve habuisse tenorem
Crediderim; ver illud erat, ver magnus agebat*

*Orbis, & hybernis parcebant flatibus Euri:
Cum primùm lucem pecudes hausere virûm-
que*

*Ferrea progenies duris caput extulit arvis;
Immissaque fera silvis, & sidera Cælo.
Nec res hunc tenera possent perferre laborem
Si non tanta quies iret, frigusque, calorem-
que*

*Inter, & exciperet Cæli indulgentia Ter-
ras (a).*

XV. Qui denique fuerit ordo, vel temporis spatium, quo singulæ Mundi partes creatæ, vel dispositæ fuerint, non aliunde clariùs, quàm ex Sacris literis intelligi poterit; Veteres enim Philosophi, qui solo rationis lumine

(a) Georg. II. v. 334.

mine id scrutati sunt, non inter se solùm, sed etiam a veritate plurimùm dissident.

Atque, ut illos hic omittamus, qui temere, & impudenter ex fortuitâ atomorum concursione singulas Universi partes formatas esse dixerunt, de quo alibi sæpius dictum est, eosque etiam, qui cum Empedocle, Herâclito, & Stoici Mundum phœnicis instar ex alijs Mundi cineribus oriri putarunt, ipsam quoque Cartesii hypothesim de Mundi origine, quam *Tract. 1. disp. 3. c. 4.* Physicæ Generalis ostendimus: memoranda solùm videtur illorum opinio, qui initio quidem extitisse volunt rudem, confusam, informem materiam, quæ deinde a Deo, veluti sapientissimo artifice, suas in partes digesta, ornata, perfecta-que fuerit. Id expressè docuit Plato, Hypocrites, Hesiodus, Orphæus, aliique Theologi, qui omnia ex nocte genuisse dicuntur ab Aristotele; præsertim verò Linus Thebanus, qui Mundi generationem carmine scripsit, & hoc Operi suo fecit initium.

Tempus erat, quo cuncta simul sunt condita quondam;

Qua sequutus Anaxagoras simul facta omnia asseruit, eaque mente accedente disposita omnia, inquit, simul erant, deinde accessit mens, eaque composuit (a). Quod Linum, Hesiodum, & Anaxagoram imitatus elegantissimè describit Ovidius initio Metamorphoseon.

Ceteras autem hypotheses Pythagoræ, Empedoclis, Stoicorum, Heracliti, Metrodori, Leucippi, Epicuri (b), Cartesii (c), Leibnizii

(a) *Laer. II. seg. 67. & Cic. Acad. II. II. c. 2. Gassen. Princ. III. par. n. 40.* (b) *Vid. Plut. an. 1691.* (c) *Acta Lips.*

nitii (a), Wisthoni (b), Hartsoeckeri (c), & Dickinsoni, de ordine, quo partes ejusdem Chaos secretæ, & ab invicem sejunctæ fuerint, libenter præterimus, cum faciliè aliunde intelligi possit; neque plurimum ab Ovidio dissentiant.

XVI. Quin etiam communis illa, & celeberrima opinio de Chao ex ipsis Sacris literis desumpta videri poterit, cum ibi dicatur: *In principio creasse Deum Cælum, & Terram; Terram autem fuisse inanem, & vacuam, & tenebras fuisse super faciem abyssi &c.* (d) quibus certè verbis innuitur primò substantiam illam a Deo creatam fuisse, in quâ Elementa singula mixta forent; quamque deinde suas in partes sequentibus diebus digereret; quemadmodum alibi dicitur Deum *creasse omnia simul*; & fecisse orbem *ex materia invisâ* (e), vel invisibili, informi scilicet, nullâque sensibili specie decorâ, quemadmodum ipsum quoque Chaos nomen ab Ecclesiâ usurpatum esse videmus, cum ait de Christo transfigurato, *Illustre quiddam cernimus, quod nesciat finem pati sublime, celsum, interminum, antiquius Cælo, & Chao*. Locus illustris est etiam apud Augustinum, quo id egregiè confirmatur. *Informis ergo illa materia*, inquit, *quam de nihilo Deus fecit, appellata est primo Cælum, & Terram, & dictum est in principio creavit Deus Cælum, & Terram, non quia jam hoc erat, sed quia esse poterat* (f).

XVII. Atque utinam quidem pari felicitate egregius ille Doctor explicasset ordinem, quo
fin-

(a) Ibi an. 1697. (b) Princ. Physic. s. 3. (c) Physic. Veter. c. 6. (d) Gen. c. 1. ver. 2. (e) Eccl. 18. 1. (f) De Gen. contra Manich. I. c. 7.

singulæ Mundi partes a Deo dispositæ sunt. Quamvis enim ille Philonem sequutus ingeniosè accuratam sex dierum distinctionem, quæ a Sacris literis memoratur, non literaliter, sed allegoricè intelligendam existimet, ut dierum nomine actus illi exprimantur, quibus Angeli res a Deo creatas cognoscebant, cognitione quidem vespertinâ, vel obscuriori, dum illas in se ipsis intuebantur, matutinâ verò longè clariori, dum easdem res in Deo veluti speculo contemplabantur, longè verisimilius est tamen omnia sex dierum spatio, & eo quidem ordine creata fuisse, qui expressè adeo a Sacris literis exhibetur.

Deus itaque primo die Cœlum, & Terram, sive Chaos, creavit, ac postremò lucem.

Secundo Aquas ab aquis, pluvias scilicet a fluvialibus, interposito firmamento, vel aere, separavit.

Tertio Aquas ipsas, quæ universam Telluris superficiem obduxerant, ab Aridâ, seu continente sejunxit, ut Maria, & Continentia apparerent. Plantas insuper, quibus Telluris facies ornaretur.

Quarto Sidera, & Planetas omnes produxit, sive jam primâ die creatos novâ luce, motu, vel affectionibus illustravit.

Quinto Pisces, & Aves ex aquæ substantiâ creavit.

Sexto Pecudes, & Hominem ipsum eduxit.


Septimo demum cessavit ab omni opere, quod patrarat.

Sed hæc, aliaque id genus plurima apud Ecclesiæ Patres, & Scripturæ Interpretes videri poterunt; ut etiam difficultates aliquæ expédiantur, quæ contra hunc ordinem a Moyse

se memoratum afferri solent; nefas est enim Philosophum soli rationis lumini innixum admirabilem divini Artificis solertiam aliunde scrutari, aliumve ordinem, aut hypotheses comminisci, quibus ille pulcherrimum hoc opus perfecерit.

C A P. III.

*De Sphærâ Armillari, sive Principiis
Cosmographiæ.*

I.  Um de Universi nomine, figurâ, magnitudine, origine, aliisque similibus plurima in superioribus Capitibus dicta fuerint, nunc ordo rerum postulat, ut illius descriptionem, quo fieri poterit accuratiùs, exponamus; hoc est Elementa, sive Principia *Cosmographiæ* tradamus, in quibus prima veluti *Geographiæ*, & *Astronomiæ* semina continentur.

Hæc autem omnia feliciter exhibentur in illâ sphærâ, quæ *Armillaris* vocatur, quod illius superficies pluribus circulis, veluti armillis, dividatur, in quibus diversi gradus, & puncta distingui solent: quo certè nihil ad observandos siderum motus accommodatius excogitari potuisse videtur.

II. Quis verò pulcherrimum opus illud invenerit incertum est. Nonnulli ferunt *Athlancem Astrologiæ* fuisse peritissimum, deque sphærâ primum inter homines disputasse; quâ ex re visus est Cælum suis humeris sustinere, locum,
Tom. IV. D pra-

præbente fabulis sphæra inventione (a). Hercules verò Cœlo humerum supposuisse dicitur, quodd sphæram omnium primus in Græciam intulerit, ut auctor est Plinius (b). Non defuere tamen, qui hanc gloriam Anaximandro Milesio tribuerent, qui Olympiade 58. Servii Tullii ætate Terra, Marisque circuitum descripsit, & sphæram insuper construxit (c). Quemadmodum Democritus, Anaximandri civis descriptionem Cæli edidisse fertur. Memoratur etiam illustris ille Philosophus Architas Tarentinus,

Quem maris, & terra, numeroque carentis arena

Mensorem (d).

Veteres admirati sunt. Communis est tamen, longèque verisimilior opinio, sphæram ab Archimede repertam esse; quod Cicero (e), Maternus, aliique complures existimant, atque inter ceteros Claudianus; cujus ea de re Epigr. 18. & Carmen 68. legitur.

Nisi fortasse dicendum fuerit Archimedem, quidem crySTALLINAM sphæram arte elaborasse, in quâ siderum motus exprimerentur; Veteres tamen in ipso Cœlo distinxisse polos, & circulos, in quibus sidera moverentur. Cum etenim Pythagoras (f), sive, ut alii volunt, Parmenides primus deprehenderit idem esse, sidus, quod Hesperum, & Phosphorum dicimus, cum Hypparchus stellas numeraverit (g) cum primus gnomonem, ac horologia Lacedæ-

(a) Diod. lib. IV. & Aug. Civit. XVIII. c. 8. (b) II. cap. 8. (c) Laer. II. seg. 2. (d) Hor. I. Od. 28. (e) Nat. II. (f) Plin. II. c. 8. (g) Plin. II. c. 12. & Laer. VIII.

dæmone construxerit Anaximander (a), aut Anaximenes (b); cum Palamedes annum apud Græcos disposuerit, Eclipsis originem noverit (c); cum denique Thales Olymp. 48. futuram eclipsim prædixerit (d); *Mundi principia, siderumque motus diligenter observaverit Zoroastres (e)*; Assyrii, Chaldæi cœlestium rerum cognitione floruerint (f), manifestissime apparet, hos omnes Archimede vetustiores aliquam Mundi descriptionem habuisse, quâ in siderum periodo supputandâ, eorumque motibus describendis uterentur. Salomon certè, ut a sacris Literis erudimur, *dispositionem orbis terrarum cognovit, anni cursus, & stellarum dispositiones (g)*; atque apud Arabes, ut in libro Job memoratur, siderum motus, & ordo ab antiquissimis usque temporibus observabatur. Atque istâ quidem de sphaeræ nomine, ac inventione dicta sint: nunc singulas illius partes breviter, & accuratè exponamus.

III 1. *Sphæra*, ut a Geometris definitur, est corpus solidum unicâ superficie contentum, in cujus medio punctum reperitur, a quo si lineæ ducantur ad eandem superficiem, omnes æquales sunt: unde fieri, vel generari concipitur sphaera, cum circulus aliquis circa diametrum suam revolvitur.

2. *Centrum* sphaeræ est punctum illud, a quo lineæ semper æquales ad sphaeræ superficiem ducuntur.

3. *Poli* sunt illa puncta, circa quæ revolvitur sphaera; sive sunt extremitates illius dia-

D 2

me-

(a) *Laer. II. seg. 1.* (b) *Plin. II. c. 76.* (c) *Philos. in Brot.* (d) *Laer. I seg. 35 & Plin. II. c. 12;*
(e) *Iust. 1.* (f) *Cic. Div. 1. & Herodot. II. (g) Sap. 6. 7. 19.*

52 PHYS. PART. TRACT. I.

metri, circa quam revolvitur circulus dum sphaera producitur.

4. *Axis* est linea, quæ per centrum transiens utrumque polum conjungit.

5. Dum verò sphaera circa duos quoscunque polos, & axem convertitur, in illius superficie plurimi circuli describi possunt, ex quibus alii sunt *maiores*, alii *minores*.

6. Majores circuli in sphaerâ dicuntur illi, qui per centrum sphaeræ transeunt, eamque in duas æquales partes, vel hemisphæria dividunt.

7. Minores verò circuli sunt illi, qui sphaeram ipsam in duo segmenta, vel inæquales partes dividunt; neque per ejusdem sphaeræ centrum transeunt: & quò polis sphaeræ proximiores, eò minores sunt.

8. Circuli in sphaerâ *paralleli* dicuntur illi, qui æquidistantes sunt; sive qui describuntur in sphaerâ, dum circa eodem polos convertitur.

9. *Obliqui* verò, qui inæqualiter distant; sive qui describuntur a sphaerâ dum circa diversos polos ipsa revolvitur.

IV. His explicatis intelligi faciliè poterunt illa, quæ in cœlesti sphaerâ descripta, & faciliùs adhuc, si Armillaris aliqua sphaera oculis subjecta fuerit. Supponimus autem Universum ipsum sphaeræ figuram habere, & sidera in eadem veluti sphaericâ superficie contineri; quod quamvis incertum sit, ut in 1. capite ostendimus, faciliè tamen ut hypothesi assumi poterit.

1. Cœlestis itaque sphaeræ, vel Mundi centrum est Terra, quæ sideribus, ac Coelo comparata, veluti punctum haberi potest; sive
Uni-

Universi centrum est centrum ejusdem Terræ.

2. Duo sunt etiam Mundi poli, seu *cardines*, aut *vertices*, circa quos perenni motu Mundus ipse convertitur spatio 24. horarum. Ex his alter dicitur *Arcticus*, seu *Borealis*, quodd illi constellationi proximus sit, quam Græci *Arcton*, nos *Ursam* dicimus, & borealem Mundi partem respiciat; alter *Antarcticus*, sive *Meridionalis*, qui Arctico diametraliter opponitur, atque in meridianâ Mundi parte continetur. Arcticus ille semper a nobis, qui Europam incolimus, videtur, Antarcticus verò conspici non potest, ut eleganter ait Virgilius:

*Hic Vertex nobis semper sublimis; at illum
Sub pedibus Styx atra videt, manesque pro-*
fundi (a).

3. Axis verò Mundi, ut antea dicebamus, est illa linea, quæ a nobis concipitur per Terræ centrum, aerem, & Cælum ad utrumque polum ducta, unde nonnulli finxerunt Mundum ab axe sustineri, quemadmodum ait Cicero Terra, qua trajecto axe sustinetur, atque eò respexisse videtur Lucanus, cum ita Cæsarem alloquitur

*Ætharis immensi partem si presseris unam,
Sentiet axis onus librati pondera Cæli* (b).

4. Præter hæc puncta alia duo in sphaerâ concipi solent; quorum unum capiti nostro imminet, & Arabicè vocatur *Zenith*; aliud verò illi oppositum pedibus nostris subjicitur, & appellatur *Nadir*.

5. Circuli quoque decem in sphaerâ distinguuntur, sex majores, *Æquator*, *Meridia-*
nus,

nus, *Horizon*, *Zodiacus*, & duo *Coluri*; quatuor verò minores, duo nimirum *Tropici*, & duo *Polares*.

V. *Æquinoctialis*, vel *Æquator* est circulus major, quo sphaera in duas æquales partes australem, & borealem dividitur; *Æquinoctialis* autem, & *Æquator* dicitur, quòd cum Sol in illo bis in anno movetur, dies, noctesque pares, aut æquales efficiat. In illo non solum terrestris longitudinis gradus, ut alibi dicitur, sed etiam Solis, ac siderum motus numerari solet: cumque 360. gradus, hoc est circulus integer spatio 24. horarum moveri debeat, singulis horis 15. gradus supra horizontem ascendunt, vel infra horizontem deprimuntur.

Horizon, sive *Finitor* est circulus ille, qui superiorem, nobisque conspicuam Mundi partem ab inferiori invisibili dividit; ut si in plano, patentique loco oculos circumferamus, dimidia solum Cœli pars nobis apparet, quæ Telluri conjungi, & fornici instar insidere videtur.

Meridianus est ille, qui per utrumque polum, per *Zenith*, & *Nadir* transit; & supra horizontem perpendiculariter insistens sphaeram dividit in partem orientalem, & occidentalem. *Meridianus* autem vocatur, quòd cum illum Sol attigerit, medius jam effulserit dies. In illo notantur gradus latitudinis, vel altitudinis Poli, ut inferius explicabitur.

Ex his verò circulis, ut patet, *Æquator* immobilis, & unicus esse debet respectu omnium regionum, cum poli Mundi, circa quos ille describitur, sint ubique iidem, quia verò puncta *Zenith*, & *Nadir* in singulis re-

gionibus diversa sunt, etiam Meridianus, qui per illa transire debet, mutatur: mutatur etiam horizon, supra quem meridianus perpendiculariter insistere debet.


Cum verò Solis, aliorumque Planetarum motus ita fieri videatur, ut non solum diurno motu circulum Æquatori parallelum ex Oriente in Occidentem illi describant, sed insuper aliquando ab Æquatore hinc inde deflectant, aliquando nempe ad Austrum, vel ad Boream accedant, hinc alter circulus, vel Zona in cœlesti sphaerâ concipitur, in quâ proprius Planetarum motus peragatur.

Zodiacus itaque est circulus ille major, aut zona, quæ sphaeram ambit: hæc Æquatorem obliquè bifariam secat, & ab illo vicissim in duas æquales partes dividitur, quarum altera ad polum Arcticum declinat, altera verò ad Antarcticum: maxima verò utriusque partis declinatio ab Æquatore est gr. 23. cum dimid. quam omnium primus deprehendisse fertur Anaximander (a). Hinc etiam poli Zodiaci, puncta nimirum illa, circa quæ rotari concipitur sphaera, ut in illâ Zodiacus describatur, gradus 23. cum dimid. a polis Mundi recedunt. In Zodiaco media linea reperitur, quæ *eclipticâ* vocari solet, quòd in illâ Planetarum, & Solis Eclipses contingant. Hanc semper insitit Sol dum annuo motu per Zodiacum movetur, & singulis diebus singulos ferè gradus in illa percurrit. Ceteri verò Planetæ hinc inde ab Eclipticâ, vel a Zodiaci medio ad Austrum, vel Boream excurrunt, & per plures gradus ab Eclipticâ

(a) Laer. II. seg. 1.

recedunt; undè, hujusmodi zona 16. fere, vel ut aliis videtur 20. graduum latitudinem habet.

Hæc eadem Zodiaci superficies, vel longitudo in 12. æquales partes dividitur, in quibus totidem *Signa*, vel *Asterismi*, vel *Constellationes* continentur his versibus expressæ ab Aufonio



Sunt Ariet, Taurus, Gemini, Cancer, Leo, Virgo,
Libraq; Scorpis, Arcitenens, Caper, Amphora,
Pisces.

quæ signis, aut characteribus superimpositis indicantur; hinc Zodiacus *signifer*, vel *signorum ordo* appellatur unde Virgilius.

Obliquus qua se signorum vertitur ordo (a).

Puncta illa in quibus, ut antea dicebamus, Zodiacus Æquatorem secatur, & ab illo mutuo secatur, *Æquinoctialia Arietis*, vel *Libra* dicuntur; illa verò, in quibus maxima est declinatio, vel distantia Zodiaci ab Æquatore, *Solstitialia Cancræ*, vel *Capricorni*, accepto nimirum nomine a proximâ constellatione, juxta illos versus

Hæc duo Solstitium faciunt, Cancer, Capricornus;

Sed noctes aquant Ariet, & Libra diebus.

ex quo ceteri sphaeræ circuli facile describuntur; circulus enim ille, qui per utrumque polum, & ejusmodi puncta Æquinoctialia ducitur, *Colurus Æquinoctiorum* vocatur. Ille

ve-

(a) Georg. lib. I. ver. 239.

verò, qui transit per utrumque polum, & puncta solstitialia, dicitur *Colurus Solstitiorum*; ideo verò hi duo circuli Coluri, vel *mutili* dicuntur, quia cum per utrumque polum transeant, & alter ex polis, ut antea dicebamus, infra horizontem deprimatur, & a nobis videri nequeat, uterque ille circulus ab horizonte secatur, ac veluti mutilatur.

Circuli, qui *Æquatori paralleli* per polum Zodiaci transeunt, sive qui describuntur a polis Zodiaci dum sphaera circa proprium axem, seu polos Mundi, convertitur, *pola-res* vocantur, *Arcticus* quidem, qui circa arcticum, *Antarcticus* verò, qui circa Antarcticum.

Circuli denique *Æquatori paralleli*, qui per puncta solstitialia ducuntur, sive describuntur a punctis solstitialibus, dum sphaera circa Mundi polos rotatur, *Tropici*, vel *revertentes* dicuntur, quia, cum Sol recedendo ab *Æquatore* ad illos pervenerit, ferè sistitur, & rursus ad *Æquatorem* ipsum revertitur, & accedit. Qui polo Arctico proximior est, *Tropicus Cancræ* dicitur; *Tropicus Capricornæ*, qui ad polum Antarcticum accedit, & ex Constellationibus Cancræ, & Capricornæ, quæ in iis locis reperiuntur, nomen sortiuntur.

VI. Dicendum postremò remanet de triplici sphaeræ situ, vel nomine, quod ex diversâ inclinatione, vel positione *Æquatoris* supra horizontem desumitur. Si circulus *Æquatoris* per Zenith transeat, & horizonti perpendiculariter insistant, tum uterque polus in horizonte reperietur, & sphaera dicetur *recta* quod æquator, & circuli a Sole descripti ad rectos angulos insistant horizonti. Si verò
cir-

circulus *Æquatoris* est horizonti parallelus, sive cum eodem horizonte confunditur, tunc polus locum Zenith occupat, & sphaera *parallela* vocabitur, quod sol quotidie circulos horizonti, vel æquatori parallelos describat. Postremò si circulus *Æquatoris* obliquè super horizontem inclinetur, & polus inter Zenith, & horizontem reperiatur, tunc sphaera erit *obliqua* quod & æquator, & circuli a Sole descripti obliquè secantur ab horizonte.

Qui sphaeram habent rectam, ii. toto anni tempore noctes diei æquales habere debent, hoc est in perenni æquinoctio versari. Qui verò sphaeram parallelam habere dicuntur, noctem unicam, atque unicum diem sex mensium habent. Qui denique in sphaera obliqua reperiuntur, duos solum dies noctibus æquales habere possunt, & ceteros inæquales.

Quod, ut intelligi possit, supponendum est interim, duplicem esse motum, quo sol quotidie movetur; alter, quo ab oriente in occidentem spatio 24. horarum velocissimè abripitur, & circulos *Æquatori* parallelos describit, qui motus *raptus*, vel *diurnus* dici solet; alter proprius, quo ab Occidente in Orientem supra *Zodiacum* sensim progreditur, ut singulis diebus unicum ferè gradum, & unius anni spatio integram periodum conficiat.

Cum igitur sol singulis diebus motu proprio novum in *Zodiaco* locum acquirat, non poterit semper diebus omnibus motu diurno eundem circulum æquatori parallelum describere, sed potius diebus singulis novum, distinctum circulum peraget, ut proinde inter *Tropicos* *Cancris*, & *Capricorni* 182. circuli, sive

sive spiræ in se redeuntēs intelligi debeant, quarum quælibet, bis singulis annis a sole percurratur. Hi verò circuli, quamvis inter se inæquales sint, æquali tamen tempore, spatio nimirum 24. horarum, quo dies, & nox comprehenditur, peraguntur, velociori quidem motu majores, tardiori minores.

His itaque suppositis demonstrabitur facillè id, quod de diversis sphæræ proprietatibus propositum fuerat.

Diei nomine nihil aliud intelligitur, nisi temporis spatium, quo sol supra horizontem movetur, & aliquam circuli partem percurrit; quemadmodum *nox* est spatium illud temporis, quo sol infra horizontem moratur, residuamque circuli partem peragit: ejusmodi verò spatia temporis optimè cognoscuntur a partibus circularum, quibus ita correspondere debent, ut major circuli pars nonnisi majori, vel longiori tempore peragatur, & minor minori.

Cum itaque in sphærâ rectâ *Æquator*, & omnes circuli, qui paralleli sunt *Æquatori*, & peraguntur a sole, perpendiculariter supra horizontem insistant, altera, sive dimidia illorum pars supra horizontem, altera infra ipsum reperitur; æqualia sunt igitur semper spatia, vel circularum partes, quæ à sole supra horizontem diei tempore, vel infra horizontem noctu percurri debent; adeoque noctes diebus æquales erunt.

Quia verò iidem circuli in sphærâ obliquâ obliquè (& si *Æquatorem* exceperis, qui utpote circulus maximus ab alio circulo maximo, vel horizonte bifariam semper dividi debet) inæqualiter etiam ab horizonte secantur,

tur, inæqualia erunt spatia noctu, vel interdiu a sole peragenda; noctesque diebus inæquales: & quod circuli polo sublimi vel supra horizontem elevato proximiores erunt, eò major quoque illorum pars supra horizontem videbitur, diesque longiores erunt; quod verò propius ad polum infra horizontem depressum, accedent; oppositum sequetur.

Postremò cum circuli, qui describuntur a sole in sphaerâ parallelâ, sint æquatori, simulque horizonti paralleli; & altera Zodiaci pars supra horizontem existat; altera verò, & æqualis infra horizontem, quamdiu sol supra horizontem reperietur, spatio nimirum sex mensium, semper conspicuus erit, diemque efficiet; quamdiu verò infra horizontem positus circulos alios, aliamque Zodiaci partem percurrat, hoc est sex reliquis anni mensibus, occultus erit, & nox apparebit. Sed de his satis.

VII. Innumera deinde sunt, quæ communiter inferri solent de vario ortu solis, de anni tempestatibus, de Crepusculis, de Zonis, quæ nos institutæ brevitatis memores libenter omittimus, cum aut ex iis, quæ nuperimè dicta sunt, facile deducantur; aut ubi sphaeram ipsam oculis subjectam intueri contigerit, ultrò se se oculis, & animo exhibeant; aut certè commodiori loco explicari debeant.

CAP. IV.

*De Parallaxi, aspectibus, & distantia
siderum, & Refractionibus.*

I.



Lurima nunc simul uno, brevioriq; Capite complectimur, non solum quodd illa clara, & facillima sunt, verum etiam quodd ipsa ferè dicendorum series, & ordo postulat, ut hæc omnia facem veluti præferant, sine quibus vix, ac ne vix quidem cetera intelligi possent, quæ paullo inferius sæpissimè dicturi sumus. Quis enim fieri posset, ut certâ methodo siderum ordinem, ac magnitudinem exponeremus, nisi singulorum distantiam certâ quadam ratione exploratam haberemus, diversos etiam aspectus, quibus invicem Astra disponuntur, ceteraque id genus, quæ sideribus ipsis accidere plerumque solent? Dicendum est itaque primum de siderum distantia, & magnitudine, sive de methodo, quâ ab Astronomis definiri illa potest; deinde verò de Refractione, & variis illorum aspectibus est differendum.

II. Ut alicujus Planetæ, vel sideris distantia a Terrâ deprehendi possit, duo necessario cognosci debent, ipsius nempe Telluris diameter, ac peripheria; deinde ejusdem sideris Parallaxis, his etenim cognitis Stellæ distantia manifestissimè demonstratur. Diameter

62 PHYS. PART. TRACT. I.

meter verò Telluris, ut accuratiùs alibi ostendatur, juxta Picartum, a quo nuperrimæ Academiæ Parisiensis observationes minimùm differunt, est leucarum Parisiensium $3269\frac{6}{20}$. sive milliarium Florentinorum $7267\frac{3}{4}$. Perimeter verò, circumferentia, vel æquator ejusdem Terræ leucarum $10270\frac{4}{5}$. sive milliarium Florent. 22806. ejusque semidiameter, quo plerumque uti solemus, leucarum $1634\frac{1}{5}$. sive milliarium $3633\frac{1}{5}$.

III. Cognitâ deinde Telluris semidiametro, Planetæ Parallaxis facilè inquiritur. Supponatur enim Terra $A B C^*$, cujus centrum T ; circulus $F G H I$ sit firmamentum, ubi fixa, vel inerrantia sidera conspiciuntur, & Luna ex. gr. cujus parallaxis inquiritur, sit in E . si aliquis in T , vel in C positus, cujus horizon sit $I L$, Lunam in meridiano positam intueatur, videbit illam in F , qui locus *verus* vocatur, in quo nimirum Luna videtur è centro Terræ; Si verò eodem tempore alius in eodem meridiano positus cujus horizon sit $K H$, intueatur Lunam ex D , videbit illam in G , qui locus *apparens* dicitur, quòd in illo Luna juxta diversam aspicientis positionem appareat. Arcus autem ille $F G$, & angulus $G E F$, vel æqualis ipsi angulus $T E D$, qui ab utroque radio visuali comprehenditur, *Parallaxis* Lunæ vocatur, quæ cùm semel cognita fuerit, ipsam quoque Lunæ distantiam, sive rectam $T E$ evidenter ostendit.

IV. Ita verò angulus ille $G E F$ inquiritur, ut angulus $C T D$ cognitus supponatur
ex

* Fig. XVI.

ex dimensione terrestris arcûs $C D$, qui ex Geographiâ constat; angulus etiam $H D E$, sive elevatio Lunæ, vel Stellæ G supra horizontem visibilem $H K$ ex Astronomiâ operis quadrantis manifestus est, adeoque adjecto angulo recto $H D T$ cognitus erit integer angulus $E D T$; ergo etiam reliquus $T E D$, sive $G E F$, cognoscetur ex. gr. unius gradûs. Cognitis autem in triangulo $T E D$ duobus angulis, & uno latere $T D$, facillè cognoscitur ex Trigonometriâ proportio laterum $T E$, & $T D$, sive $T C$, & dividendo, proportio lineæ $C E$, ad lineam $C T$, sive lunaris distantiae ad semidiametrum Terræ; quæ cum aliunde cognita supponatur, cognoscetur etiam distantia Lunæ $C E$.

V. Ubi denique sideris alicujus distantia perspecta fuerit, & apparens illius diameter ex Astronomicis observationibus innotuerit, facillè demonstratur vera illius diameter; Cumque sphaerarum superficies sint in duplicatâ ratione diametrorum, corpora verò ipsa, sive soliditates in triplicatâ, nullo negotio deducitur quanta sit omnium siderum magnitudo, vel moles; quot etiam vicibus unum in altero contineatur. Hinc autem facillè apparet, quod sidera, sive Planetæ, quod minorem habent parallaxim, eò sublimiora, vel a Terrâ remotiora esse debent; ut ex ipsâ figurâ satis demonstratur. Sic Lunæ parallaxis est unius gradus, in Mercurio, Venere, ac Sole minorum 10. $\frac{1}{2}$ in Marte perigæo, dum nempe Telluri proximior est ipso Sole 25. $\frac{1}{2}$, in aliis verò superioribus Planetis ferè nulla, ac insensibilis est (a). VI.

(a) Hist. 1706.

VI. Quamvis tamen ex ipsâ siderum Paralaxi manifestissimè demonstretur illorum ordo, sive minor, aut major distantia illorum à Terrâ, plurima tamen sunt, quæ accuratissimas etiam observationes inficere solent, nisi cautè prohibeantur. Ejusmodi præsertim est radiorum *refractio*, ex quâ miri prorsus aliquando effectus, & inæqualitas parallaxis oriri solet.

Nihil est autem aliud *Refractio*, ut etiam in *Physicâ Generali* diximus, quàm *inclinatio radii dùm ex variori medio in aliud densius immergitur*: tunc enim radius ipse ita inflectitur, & inclinatur, ut ad perpendicularem magis, aut minus pro majori, vel minori medii densitate accedat. Ut ex. gr. si radius ex aere in aquam incidat, & ingrediatur, non rectâ tendet, sed inclinabitur, & accedet ad perpendicularem; quod si perpendiculariter incideret, nulla reflexio, vel *refractio* oriretur. Cum igitur siderum radii ex purissimo æthere in aerem puriorem, deinde paulatim, ac successivè in crassiorem, & densiorem, denique in atmosphæram Telluri circumfusam ingrediantur, sensim, ac successivè refringuntur; ut a Sole ex. gr. ad Terram descendentes, non rectam aliquam lineam, sed lineam semper magis, ac magis inclinatam peragant, atque describant; quam Cycloidem esse ex nuperis Hiræi observationibus erudimur (a).

VII. Ex ejusmodi verò radiorum lucis refractione oritur, quod sidera ferè nunquam in eodem loco sint, in quo videntur; & aliquan-

(a) *Hist. Acad.* 1702. 1714.

quando nobis supra horizontem appareant etiam aere sereno, dum reverà infra horizontem minutis 34. reperiuntur quod Belgæ in novâ Zemblâ anno 1596. observarunt, dum Solem 24. die Januarii conspexere, quem juxta Astronomiæ leges, vel sphaeræ parallelæ proprietates ante undecimum Februarii diem redituum non sperabant.

Hinc etiam manè, antequam sol horizontem ascendat, aut vespere etiam cum infra horizontem descenderit, nobis apparet, quòd illius radii in Athmosphærâ refringantur, & solis speciem oculis nostris exhibeant.

Ex ipsâ denique siderum refractione oriri potest, quod manè, vel in horizonte sidera majora, & ellipticæ figuræ videntur, minora in meridiano: quamvis aliæ quoque admirabilis hujus effectûs causæ afferri soleant, ut alibi ostendetur.

Vix itaque certa siderum parallaxis, magnitudo, distantia definiri poterit, nisi refractionum error, & labes subtiliter, accuratissimèque detrahantur, quod, quia non veteres modò, sed aliqui etiam ex recentioribus neglexerunt, mirum est certè quàm inter se differant, & ab ipsâ rei veritate abhorreant. Atque ista quidem de siderum Parallaxi.

VIII. Quod ad varios illorum aspectus pertinet, cum errantia sidera, sive Planetæ inæquali periodo, seu velocitate ferantur, dum proprio motu Zodiacum peragunt, necessariò sequitur, ut unus alteri proximior aliquando, aliquando remotior, aliquando conjunctus, aliquando oppositus videatur; unde ex diversis gradibus, quibus duorum Planetarum distantia deducitur, diversi quoque il-


lorum aspectus desumuntur. Sic ex. gr * si Sol existat in A Luna in B, in eâdem veluti rectâ lineâ videbuntur ex Terrâ T, Lunaque Soli adhærens apparebit; unde in *conjunctione* posita, vel soli *conjuncta* dicetur. Si Luna a Sole digrediat in C. per 60. gradus, sive per sextam circuli partem, erit aspectus *sextilis*, si perveniat in D. post 90. gradus, vel peripheriæ quadrantem, erit in *quadraturâ*, vel in aspectu *quadrato*: post 120. gradus, tertiam nimirum circuli partem, erit in aspectu *trino* in E; ubi denique pervenerit in F. per integram semipheriam, vel 180. gradus digressa a Sole, erit in *oppositione* cum ipso Sole. Ex his autem aspectibus præcipui, & ad explicanda plurima cœlestium corporum phœnomena maximè necessarii sunt Oppositio, & Conjunctio, (quæ Græco nomine *Sygizia* dicuntur) & *Quadratura*, ut suis in locis intelligi poterit, cum de siderum motibus disferetur.



CAP.

C A P. V.

Præcipua Corporum Cælestium Phænomena, & Veterum Hypotheses.

I.  UÆ de variis siderum motibus, & phænomenis hæcenus dicta sunt; constanter aded, atque uniformi lege in Cælis fieri videntur, ut faciliè fuerit illorum causas inquirere; unde mirandum non est, si in illis explicandis omnes conveniant. Longè difficiliora sunt illa, quæ deinde ab accuratioribus Astronomis observata sunt, quæque omnium ferè ingeniorum vim, & Astronomiæ leges eludere videntur; ut plurimæ proinde Hypotheses, sive Systemata excogitari debuerint; quibus admirabilis illa phænomenorum varietas, quo fieri poterat illustriùs explicaretur.

II. Nihil est igitur aliud Hypothesis, sive Systema, quàm *constitutio*, vel *dispositio* *quædam* *hujus Universi*, *ejusque partium*, *explicandis motibus*, & *phænomenis cælestibus accommodata*. Cum enim homines constantes adeo siderum motus admirarentur, illorum causas inquirere cupiebant; sed, cum neque propiùs illa intueri, neque de illis aliquid certò definire se posse intelligerent, multa de illis conicere, varia supponere, plura fortasse comminisci cæperunt, & hypotheses constituere, quibus admissis, sive suppositis, illa phænomena consequi, & explicari possent.

III. Hinc autem faciliè apparent duo, quæ

animadverti plurimum debent. Primum quidem, quod in hypothefi veritas non requiritur; sed solum, ut verifimilia, five non repugnantia supponantur, ex quibus deinde vera sequi possint; ut inter ceteros egregie observavit D. Thomas asserens, quod *Astrologorum suppositiones, quas invenerunt ad explicandos siderum motus, non est necessarium esse veras.* (a). Deinde verò quod hypothefis illa melior, felicior, ceteris omnibus accuratior est, in quâ, cum nihil inverifimile absurdum, & repugnans supponatur, omnia phœnomena feliciter, & accuratè explicantur.

Hujus principii lumine, quod etiam, cum de rerum Principiis ageremus, adhibuimus, intelligi faciliè poterit quænam hypothefis ex pluribus illis, quæ inventæ sunt, accuratior censeretur; illa nimirum ut melior, & opportunior est eligenda, quæ phœnomenis omnibus explicandis par esse possit.

1. In singulis itaque hypothefibus, ut ordine progrediamur, admitti, & explicari debet, quod sidera fixa, & Planetæ singuli motu diurno circa Tellurem certâ quadam periodo, ac tempore moveantur.

2. Ipsa deinde sidera, quæ fixa, & inerrantia vocari solent, lento quodam motu in Orientem ferri veteres observarunt. Hipparchus enim 130. annis ante Christum, cum Spicam Virginis, quæ ante 100. annos a Timocharide, & Aristillo a puncto autumnalis Æquinoctii 8. gradibus distans visa fuerat, 6. solum ab illo distare comperisset, suspicatus est ipsa quoque sidera fixa, Planetarum instar,

(a) In It. Phys. lect. 17.

star, in Occasum ferri, ut 100. annis unicum gradum conficerent; quod Ptolomæus post 165. annos ex plurimis observationibus inter se comparatis uberrimè confirmavit: ut tota proinde periodus siderum annis 36000. absolvi debeat, sive aliâ majori, vel minori, ut opportuniùs alibi, & accuratiùs demonstrabitur.

3. Præter hos motus sæculo XIII. Thebitius Arabs, & Alphonsus Castellæ Rex, sicuti sæculo XIV. Peurbachius, & Regiomontanus, tertium quemdam motum in ipsis sideribus observarunt, quo, veluti libratione quadam modò ad Orientem, modò ad Occidentem per grad. 2. & min. 20. accederent; quem motum *librationis* vocarunt, cujus *anomaliam*, vel *irregularitas* 1717. annis Ægyptiis, quorum singuli 365. integros dies continent, restitueretur. Alii denique simili motu aliquando sidera ad Austrum, aliquando ad Boream accedere viderunt 14. min. intervallo, qui motus *trepidationis* dictus est; cujus anomalia duplo tardiori tempore hoc est 3434. annis absolveretur.

4. Singulis quoque Planetis proprius motus inesse debet, ut ex Occidente in Orientem diversâ periodo, & inæquali tempore ferantur. Saturnus quidem annis 30. Juppiter 12. Mars 2. Venus, & Mercurius 1. Luna 30. diebus.

5. Interim verò dum periodum peragunt, magnitudinem mutare videntur, ut idem Planeta aliquando major, aliquando minor videatur.

6. Illud est etiam admiratione dignissimum, quod idem Planeta, Sole tamen excepto, aliquando quiescere, aliquando velocior ex Occidente in Orientem excurrere, aliquando verò

regredi in Occasum videtur; ut meritò *directus*, *stationarius*, *retrogradus* appelletur.

7. Quos quidem motus hac lege fieri conspiciamus, ut longè frequentiores sint retrogressiones in Jove, quàm in Marte, in Saturno, quàm in Jove; quemadmodum diuturniores in Saturno, quàm in Jove; & in Jove, quàm in Marte: atque Planetæ, quò remotiores sunt a Tellure, eò minores arcus, vel firmamenti partes retrogradi excurrunt.

8. Omnes etiam Planetæ, dum retrogradi sunt, majores, & velociores apparent; minores verò, & tardiores, dum directi.

9. Luna tamen dum directæ est, ac in plenilunio, vel novilunio reperitur, major, & celerior apparet; minor, & tardior in quadraturis.

10. Quamvis autem Sol numquam directus stationarius, vel retrogradus sit, non æquali tamen temporis spatio Zodiaci signa percurrit, sed in borealibus signis dies 187. moratur, in australibus verò 178. ut sit discrimen 9. ferè dierum

11. Veneris sidus constanter adeò motum. Solis sequitur, ut ab illo nunquam recedat plusquam gradibus 48. quamvis illum aliquando sequi, aliquando præire videatur, unde Phosphori, & Hesperii nomen accepit.

12. Maxima quoque Mercurii distantia a Sole est grad. 28....

IV. Hæc itaque præcipua sunt siderum, & Planetarum Phænomena, quæ plurium sæculorum spatio accuratissimis observationibus a sapientissimis viris deprehensa, illustrata, & luculentissimè probata sunt; quæque proinde a Philosophis, & Astronomis omnibus admit-

mittuntur. Cetera siquidem, quæ a compluribus, & illustrioribus etiam, sed non ab omnibus admitti solent, suis in locis commodius afferentur.

Nunc adeundæ nobis, & exponendæ sunt hypothesēs illæ, quæ, ut antea dicebamus, Phænomenis hisce explicandis admirabili prorsus ingenii vi, & egregio quodam audaciæ genere a pluribus inventæ sunt.

V. Atque, ut a Veteribus exordiamur, nulla ferè hypothesis apud Ægyptios, & Chaldaeos, qui omnium primi sidera contemplari, eorumque motus describere cœperant, fuisse legitur, ut expressè Interpretes Aristotelis (a), & Proclus (b) testatur, quin etiam Ramus in votis habere se dixit (c), ut aliquis illorum instar Astronomiam ab hypothesibus, & innumeris difficultatibus liberaret.

Sed hoc optari facilè potest, vix tamen sperari; cum siderum motus irregularibus aded, occultisque legibus fiat, ut certa quædam periodus definiri non possit; quod evidentissimè demonstratur, tum ex innumeris Astronomorum opinionibus, quæ inter se plurimùm dissident, tum ex ipsâ rei difficultate, quæ maxima certè esse solet.

Quod si Chaldaei, & Ægyptii hypothesibus caruerunt, rudem quoque, & imperfectam Astronomiæ cognitionem habuerunt, quæ deinde solùm a Græcis perfici potuisse videbatur. *Difficile est quidem*, ut inquit Plato, *modum invenire, quo hæc omnia aded involutæ explicentur; verùm magna est, præclaraque*

E 4

spes,

(a) In II. de Cal. & XII. Metaph. (b) In Timeum.
(c) Proem. Mathem.

spes, ut ista praeclariùs, meliùsque, quàm a Barbaris traducta fuerint, constituentur (a).

VI. Sed, ut ingenuè loquamur, Ægypti quoque suam hypothesim habuerunt, quæ non a Vitruvio solùm, Martiano Capella, Macrobio, Bedâ probata olim fuit; sed nostris etiam temporibus *Systematis Ægyptii* nomine a pluribus defendi solet.

In hac autem hypothesi omnia sidera, & Planetæ circa Terram in centro Universi positam moventur; Mercurius tamen, & Venus eodem tempore circa Solem veluti centrum feruntur. Cum verò ceteri Tellurem immotam supponerent, circa quam sidera periodum suam absolverent, Argolus, immotis sideribus, Telluri motum concessit.

Credibile est etiam Veteres, qui Ægyptium Systema defendebant, Cœlorum substantiam tenuem, ac fluidam posuisse; cùm certè Democritus, qui apud Ægyptios, & Chaldaeos fuisse legitur, existimaverit liberam esse cœlestem regionem; quamvis Anaximander putaverit moveri sidera a Cœlis, quibus inhærent (b).

VII. Eudoxus verò, qui cum Platone in Ægyptum descendit, omnium primus hypothesim de cœlestium sphaerarum soliditate excogitavit; quodd, ut inferiùs dicetur, plures, atque inter se oppositi motus eidem corpori, sive Planetæ tribui non posse videntur: unde quot motus in ipsis sideribus observabantur, tot etiam Cœlos, vel Cœli partes effinxit.

Primum itaque Cœlos octo constituit solidos

(a) *In Epinom.* (b) *Plut. II. c. 16.*

dos Telluri concentricos , a quibus sidera cum æquali semper a Telluri distantia circumducerentur . In supremo Cœlo sidera fixa , in septem verò inferioribus Planetas hoc ordine disposuit , ut supra Lunam immediatè existeret Sol , supra Solem Mercurius , deinde Venus , Mars , Iupiter , & Saturnus ; quamvis aliqui supra Solem , & infra Mercurium Venerem collocaverint . Singulos deinde Planetarum Cœlos in quatuor partes , sive alios Cœlos similiter Terræ concentricos Eudoxus divisit , excepto tamen Sole , & Lunâ , quibus tres solum concessit . Ex his quatuor Cœli partibus prima , & suprema motum firmamenti obsequebatur , & Planetam motu diurno ex ortu in occasum abripiebat ; secunda motu proprio in ortum secundum Eclipticam movebatur , unde motus Planetæ proprius oriebatur . Tertia , quâ Sol , & Luna carebant , libratione quadam agebatur , ut Planeta *directus* , aliquando *stationarius* , vel *retrogradus* videretur : quarta denique , vel tertia respectu Solis , & Lunæ , obliquè ad Eclipticam movebatur ; unde Planetarum latitudo desumebatur . Cui verò ex his Cœli partibus Planetam affixerit Eudoxus , incertum est : credibile est tamen hanc infimam fuisse , ut illi faciliùs superiorum omnium motus imprimi posset .

VIII. Hanc hypothesim Plato , Callippus , Aristoteles complexi sunt ; nisi quod Plato Telluri motum circa se ipsam concessit ; Callippus verò Planetis singulis quinas sphæras concessit , quaternas Jovi , ac Saturno ; ita ut omnes simul sphære Planetariæ forent 33 . Aristoteles denique , ut irregularem adhuc


Astro-

Astrorum motum corrigeret, alias addidit, ut omnes simul sphaeræ essent §6. Cum verò plurima a Veteribus ipsis in hac concentricorum hypothese meritò reprehenderentur, præsertim verò quod inæqualis Planetarum magnitudo in illâ explicari non posset, meritò rejecta fuit, ut, si Averroem, Alpetragium exceperis, nemo illam defenderit.

Nuper tamen Fracastorium novitatis amor impulit, ut illam instauraret, additis aliis sphaeris; ut omnes denique forent 72. Inæqualem verò siderum magnitudinem ex inæquali cœlestis substantiæ densitate oriri posse putavit, quod alio nos in loco distinctius exponemus, reiiciemusque.

C A P. V I.

De Systemate Ptolemaico.

I.  Eteras inter Hypotheses, quæ ad explicandos siderum motus inventæ sunt, illa priori loco nobis occurrit, quæ *Ptolemaica* dici solet, non quòd veterum Astronomorum Ptolemæus facile Princeps omnia docuerit, quæ in illâ communiter exponi solent, cum certè plurima a sequentibus Astronomis adjecta fuerint, sed quia ab illo præcipuum veluti lumen, ac nomen ipsum accepit.

II. Itaque, cum vetus illud Eudoxi, Calippi, Platonis, & Aristotelis Systema, in quo circuli Terræ concentrici ponebantur, nullâ ratione defendi posse videretur, veteres

res omnes Astronomi, qui ante Ptolemæum floruerunt, Cœlos excentricos cogitarunt, in quibus astra inæquali distantia a Terrâ moverentur. Eorum nomen, qui hac in re studium, atque operam collocarunt, ignoratur; solus Apollonius Pergæus a Ptolemæo ipso ingenuè memoratur, qui sidera in circulis excentricis moveri omnium primus fortasse docuerit. Sed quicumque demum is fuerit, qui hanc hypothesein primus invenerit, meritò tamen Ptolemæo tribui solet, qui accuratissimis observationibus illam uberrimè illustravit.

III. In hac hypothese, quæ figurâ I. describitur, tota Cœlorum substantia in 12. partes, aut Cœlos dividitur, quorum supremum, ex communi Patrum sententiâ, *Cælum Cœlorum*, vel *Empyreum* vocatur, tum duo CrySTALLINI, primum mobile, firmamentum, in quo sidera fixa, & inerrantia moventur; deinde septem Planetarii, in quibus Planetæ singuli circa Tellurem hoc ordine moventur, ut infra Cælum sidereum sit Cælum Saturni, deinde Jovis, tum Martis, tum Solis, Veneris, Mercurii, postremò Lunæ. Ex his verò duodecim Cœlis solum Empyreum Dei, Beatorumque sedes immobile est; aliorum verò singuli motum aliquem habent phænomenis omnibus explicandis accommodatum.

1. Diurnus itaque siderum, & Planetarum omnium motus ex ortu in occasum in hac hypothese a primo mobili omnibus cœlis inferioribus imprimitur.

2. Motus proprius siderum ab occidente in orientem a Firmamento.

3. Motus librationis a primo CrySTALLINO,
feu

seu nono cœlo ; motus trepidationis a secundo crySTALLINO, vel decimo , supremoque deducitur.

4. Singulorum verò Planetarum motus ab occidente in orientem a proprio cœlo ; ita ut horum omnium periodus illo temporis spatio absolvatur, quod ex astronomicis observationibus in Planetis singulis definitur.

5. Ut inæqualis verò Planetarum magnitudo, & distantia, hoc est illorum excentricitas salvaretur, singulos cœlos in tres veluti partiales cœlos ita secuerunt Ptolemaici, ut concava, vel interior infimi cœli superficies, quemadmodum etiam convexa, vel exterior supremi, Terræ concentrica foret ; convexa verò, vel exterior infimi cœli, & concava, vel interior supremi, hoc est utraque mediæ superficies omninò foret excentrica *. Orbis ille medius, & omninò excentricus *deferens* vocatur ; quod ab illo infixus sibi Planeta deferatur hac lege, ut si Planeta sit in superiori parte, tunc in *Apogæo*, sive *auge*, vel *apside* superiori, hoc est in maximâ distantia, vel excentricitate dicatur esse ; si verò sit in puncto opposito, dicatur esse in *Perigæo*, sive *auge*, vel *apside* inferiori.

Hinc autem faciliè apparet, quod si Planeta fuerit in Apogæo A, longè minoris magnitudinis apparebit, tardiorque motu ferri videbitur, quàm si fuerit in Perigæo P. Quod si Planeta M videretur ex I centro circuli, vel orbis excentrici, seu deferentis, semper æquabili, ac uniformi motu ferri videretur ; unde motus ille *medius*, & locus N, in quo

cer-

* Fig. II.

cerneretur ex I, *locus medius* vocatur; locus autem O, in quo videtur ex Terrâ, est *locus verus*; differentia denique N O inter locum verum, & medium *postaphæresis* dicitur, sive *aquatio*, quæ per additionem, vel subtractionem fieri solet: per additionem quidem in primâ parte circuli *anomalía*, sive irregularitatis, hoc est ab Apogæo A in Perigæum P; per subtractionem verò in alterâ parte circuli ex Perigæo in Apogæum, quia in primo casu postaphæresis O N subtrahi debet, ut ex medio motu A N colligatur verus A O; addi verò debet in secundo postaphæresis R S, ut ex motu medio P R cognoscatur motus verus P S.

6. Explicanda superest irregularitas illa motûs, quâ Planetæ singuli, excepto Sole, retrogradi, stationarii, & directi dicuntur. Itaque præter excentricum Orbem, Epicyclum etiam excogitarunt, qui veluti rota in deferente infixus circa seipsum gyraret, & Planetam sibi affixum aliquando directum, retrogradum, seu stationarium exhiberet.

Sit Epicyclus A B C D E affixus orbi deferenti M A Z P, qui moveatur in superiori parte ex B per D in C *in consequentia*, vel juxta signorum seriem, hoc est ex occasu in ortum, secumque Planetam ex B in C abripiat, tunc Planeta velocius moveri videbitur, quodd duplici motu, nimirum orbis deferentis, & Epicycli moveatur in eandem partem, unde directus vocabitur; si verò Planeta in Epicyclo transeat in inferiori parte, ex C per E in B, retrogradus apparebit, quodd motus Epicycli motui deferentis opponatur, & contra signorum seriem, vel in
ante-

antecedentia versùs occidentem moveatur. In punctis verò B, & C, sive descendendo, vel ascendendo ferè quiescens, vel stationarius dicetur, quòd in eodem ferè Firmamenti loco nobis appareat.

7. Retrogradationes frequentiores in Jove, quàm in Marte, & in Saturno, quàm in Jove esse debent, quia tardiùs in Epicyclo movetur Mars, quàm Jupiter, & Jupiter, quàm Saturnus.

8. Dum retrogradi sunt Planetæ, si Lunam exceperis, majores apparent, majorique velocitate ferri videntur, quòd omnes retrogradi sunt in inferiori partē Epicycli, adeoque, cum nobis proximiores sunt, Lunā tamen exceptā, quæ in inferiori parte, nobisque proximiori ab occidente in orientem movetur.

9. Luna major, & celerior in conjunctione, & oppositione videtur, quàm in quadraturis, quia periodum suam in Epicyclo absolvit spatio dierum ferè 29. ut in novilunii tempore reperiatur in inferiori parte Epicycli, post septem dies, sive in primā quadraturā, in superiori, post alios septem dies, sive in plenilunio, rursus in inferiori, denique post alios septem in superiori, donec ad inferiorem Epicycli partem, ac novilunium revertatur.

10. Sol irregulares ejusmodi motus non habet, quòd Epicyclo careat; diutiùs verò in Borealibus, quàm Australibus signis immoratur, quia orbis deferens inæqualiter ab horizonte X Z secatur, ut major sit pars X A Z, quæ Borealibus signis correspondet, parte X P Z, quæ Australibus. Porro diameter

ter Solis in quinto Geminorum gradu Ptolemæi temporibus minor apparebat, maxima in Sagittario, quia tunc ibi Apogæum, hic Perigæum reperiébatur; quemadmodum etiam Sol diutiùs, hoc est octo ferè dies in signis Borealibus, ab Ariete ad Libram immorari videbatur, quàm in Australibus a Librà ad Arietem, quia Terra infra centrum reperiébatur orbitæ Solis; quæ nostris etiam temporibus, ut diximus, observantur, etsi Apogæum Solis in septimum circiter gradum Cancri deflexerit, & Perigæum ad septimum Capricorni.

11. Veneris a Sole distantia nunquam excedit gradus 48. quia æquali ferè tempore, hoc est anni spatio, utrumque sidus motu proprio circa Terram movetur. Aliquando verò Solem præcedere, aliquando sequi videtur, quod in Epicyclo suo revoluta (cujus diameter est graduum 96.) Solis locum in Firmamento præcedere, aut sequi debeat.

12. Similiter etiam Mercurius nunquam a Sole remotior ex gradibus 28. cum ipse quoque eandem ferè periodum habeat cum Sole, & Epicycli illius diameter gradus 36. contineat.

IV. Dicendum postremò, quod, etsi celebris hujus hypothesis auctor Ptolemæus nihil de Cœlorum substantiâ definierit, solida ne potius, an tenuis haberi debeat (nisi fortasse verisimiliùs tenuem illam existimaverit) posteriores tamen Astronomi, qui illam amplexi sunt, atque omnium primus Georgius Peurbachius sæculo XIV. Cœlos solidissimos esse voluerunt, ut admirabilis illa in siderum motibus constantia salvari posset. Vix enim fieri

fieri posse putabant, ut sidera, si in tenui, ac spirabili ætheris spatio moverentur, circuitus suos certâ periodo absolverent; non verò potius turbato, atque fortuito quodam impetu raperentur. Cùm tamen Ptolemæus ipse monuisset: *Nemo existimet operosas esse hujusmodi hypotheses, dum ad nostras hæc Machinulas attendit; neque enim decet humana cum divinis conferre, neque rerum tantarum fidem ex dissimillimis petere exemplis (a).* Sed hæc alibi.

C A P. VII.

De Systemate Copernicano.

I.



Uis facile terminos humanæ mentis ingenio definiri posse putaverit, quos illa excedere vereatur; cùm potius ita plerumque fieri videamus, ut si aliquâ in parte feliciter illa progredi, & veritatem assequi nequeat, moræ, & angustia veluti impatiens alterâ ex parte liberius expatietur? Veteres certè, quos primos Cœli suspiciendi, agnoscendique siderum motûs amor incenderat, cùm immotæ Telluri insistentes oculos in Cælum converterent, arcanos siderum motus, eorumque causas gravi, diuturnoque studio inquirerent, & occultas illorum leges, atque periodos omnem ingenii vim, hypotheses omnes eludere comperissent, miro quodam, & incre-

(a) *Almag. III. 2.*

credibili audaciæ genere Tellurem ipsam, quæ in medio Universi loco fixa, & immobilis videbatur, perenni quodam motu circa seipsam, vel circa Solem torqueri putarunt; ut hac saltèm hypothesi cœlestium corporum motus exponere niterentur.

Atque ista quidem hypothesis, quæ priscis illis temporibus portento simillima censeripotuit, accuratioribus deinde studiis illustrata, celebris adeo evasit, ut illustriora veteris, recentiorisque sapientiæ lumina eam mirificè complexi fuerint.

II. *Digna res itaque est contemplatione, ut sciamus, in quo rerum statu simus, pigerrimam fortiti, an velocissimam sedem; circa nos Deus omnia, an nos agat (a), & celeberrimam hanc hypothesim ex ipsâ velut origine, primisque fontibus repetentes, meliori, quo poterit, rerum ordine exponamus; ut inde facillè intelligi possit, quid in illâ probari, quid reprehendi fortasse debeat. Antequam verò id operis aggrediamur, notari plurimum debet, duas veluti in classes satis accommodè distinguì posse Philosophos veteres, ac recentiores etiam, qui Telluri motum concesserunt. Complures enim ex illis Terram in centro Universi positam, ibi quiescere existimarunt, ut interim tamen diurno motu ex occasu in ortum circa seipsam, vel proprium axem converteretur. Eiusmodi certè sententiæ fuit Heraclides Ponticus, Ecphantès Pythagoræus, qui motum Terræ tribuunt, non ut loco suo excedat, sed rota instar circa axem circumvertatur ab occasu versùs ortum circa*

Tom. IV.

F

suum

(a) Sen. VII. c. 2.

suum centrum (a) . Nicetas etiam Syracusius Cælum , Solem , Lunam , Stellas , supera denique omnia stare censet , neque prater Terram ullam in Mundo moveri , qua cùm circum axem se summâ celeritate convertat , & torqueat , eadem effici omnia , qua si stante Terrâ Cælum moveretur (b) . Atque hoc etiam Platonem in Timæo dicere quidam arbitrantur , sed paullo obscuriùs . Hanc tamen opinionem Platonis fuisse demonstratur manifestissimè ex eo , quod Plato dixerit , Terram esse diem , noctisque effectricem (c) ; quemadmodum Aristoteles (d) Timæum Locrensem , quem imitatus est Plato , inter illos enumerat , qui Tellurem in medio Mundi positam circa seipsam torqueri putarunt ; Laertius denique singulas opiniones a Platone traditas accuratè referens , ceteras inter hanc quoque numerat Terram , cum in medio sit , circa medium moveri (e) . Quamvis hanc opinionem Plato solùm , dum junior erat , docuerit ; ipsum enim jam natu grandem pœnituisse ferunt , quod Terram priùs in Universi medio , non verò in suo loco collocasset ; eumque jam senem alio in loco Terram constituisse , medium verò domicilium , tamquam dignius præcellentiori cuiquam attribuisse (f) .

III. Quod autem in hac hypothesi motus Lunæ , Soli , Sideribus ademptus esse dicatur , intelligi debet de diurno siderum , & Planetarum motu , qui Tellure circa proprium axem revolutâ , fieri , & explicari poterat , non verò de motu annuo ; neque enim , ut
facile

(a) *Plat. Timæo* . III. c. 12. (b) *Cic. Acad.* II. (c) *In Timæo* . (d) *II. de Cael.* c. 12. — (e) *Laer.* III. seg. 75. (f) *Plus.* in *Numa* , & *quest. Platon.*

facile apparet, dierum varietas explicari posset, si prorsus immoti Planetæ, vel sidera quiescerent. Movebatur itaque in illorum sententiâ Terra diurno motu circa seipsam, sed interim tamen cœlestia corpora motu proprio ex occasu in ortum ferebantur, quod expressè docuit Lencippus, cum ait, *Solem in circulo majori circa Lunam ferri; Terram vehi, ac circa medium verti (a)*; neque alia fuit Heraclidis opinio, ut ex Gemino apud Simplicium (b) satis apertè colligitur. Atque, ut veteribus recentiores etiam Philosophos adjungamus, Origanus ipse, Longomontanus, Gilbertus, & Argolus hoc idem Systema defenderunt, in quo diurnus motus Telluri in centro positæ, proprius verò singulis Planetis circa Terram revolutis tribuitur.

IV. Alii duplicem motum Telluri inesse putarunt, quorum altero velociori circa se ipsam spatio 24. horarum converteretur; altero verò longè tardiori circa Solem in centro Universi positum annuâ periodo torqueretur. Id expressè fatetur Aristoteles, eamque opinionem Pythagoricis, qui in Italiâ floruerunt, tribuit, quo præsertim Philolaum Crotoniatem indicare videtur excellentis adeo ingenii Virum, ut ex illius monumentis Timæi doctrinam Plato excerpisse memoretur (c). Itaque Philolaus cum in medio poneret Ignem, quem & Universi larem, & Jovis domicilium, & Matrem Deorum, & Aram vocabat, cœlestia decem corpora circa illum moveri voluit

(a) Lact. IX. seg. 30. (b) In II. Phys. comment. 18.
(c) Lact. VIII. seg. 85.

Cælum, sphaeramve inerrantium, quinque errantia sidera, Solem, Lunam, Terram, ac postremò Antisthona, hoc est aliam Terram nobis ex adverso sitam, nobis inconspiciam, quòd Terra hujus motum sequuta ex adverso nobis, sive inferius semper sit (a); ejusmodi verò Terræ motum in Zodiaco peragi ex Philolai sententiâ testatur Plutarchus, cum ait, Philolaum, igni medium detulisse locum, quòd sit, quasi focus Universi, & Terram in orbem circumferri circum ignem obliquo circulo in morem Solis, & Luna (b), hoc est illâ periodo, quâ Sol, & Luna circa Terram ferri putabantur.

V. Philolaum sequutus est Aristarchus Samius, qui, ut auctor est Archimedes in libro de Arena numero, cum Veterum scripta accuratissimè perpendisset, hypotheses excogitavit, quibus supposuit inerrantia sidera, & Solem non moveri; Terram verò ferri in gyrum circa jacentem in medio Solem, quod & Plutarcho (c) similiter memoratur. Diversus itaque ab Aristarcho Samio censerì debet (nisi per jocum, & ironicè hæc dicta fuerint) Aristarchus ille, qui Cleanthem Samium putavit violatæ Religionis a Græcis debuisse postulari, tamquam si Mundi lares, Vestamque loco suo movisset, quod ea, quæ in Cælis apparent, tutari certis rationibus conatus, posuisset Cælum quiescere, Terram per obliquum volvi circum, & interim circa suum axem versari (d), quasi nimirum Cleanthes Tellurem mobilem docens, violatæ Religionis reus haberi debuerit

ab

(a) Stob. Ecl. Phys. 25. Plut. III. 11. Simpl. de Cælo.

(b) Plut. II. c. 13. & c. 11. (c) Plut. in Numa.

(d) Plut. de facie in ore Luna.

ab Aristarcho, qui & ipse Telluri motum tribueret. Communis tamen, & vulgaris erat opinio, quod

Stat vi Terra suâ, vi stando Vesta vocatur (a).

etsi Numa Pompilius Pythagoram, ut ajunt, sequutus rotundum Templum Vestæ construxerit, in cujus medio collocavit Ignem, ut illud Universi imago videretur, in cujus centro Pythagorici collocant Ignem, *Ipsamque, & Vestam, & Unitatem nominant, cum Terram, neque immobilem, neque in medio sitam putent; sed circum Ignem in gyrum suspensam (b)*; ideoque cum Philolaus primus dixisse fertur Terram in orbem moveri (c); intelligi solum debet, quod ille clariùs, & expressiùs id ostenderit, cum Pythagorici obscuriùs loqui consueverint.

VI. Atque hæc hypothesis a tot, tantisque viris in pretio olim habita, ab Aristotelis usque temporibus ferè omnino obsoleverat, cum omni literarum, & dignitatis splendore celebris Nicolaus Cusanus S. R. E. Cardinal. illam instaurare cæpit, eamque rudiores adhuc, & imperfectam exacto ferè unius sæculi spatio Nicolaus Copernicus Torunensis, & Varmienensis Ecclesiæ in Poloniâ Canonicus jugi 30. annorum studio ita illustravit, auxit, omnique observationum genere perfecit, ut jure, meritoque hæc ab illo nomen acceperit. Hanc Copernicus ipse Romæ innumeris ferè Auditoribus, qui ultra duo millia confluere ad ipsum solebant, exposuit, & Paulo III. Pontif.

F 3

(a) Ovid. Fast. VI. ver. 300. (b) Plut. in Numa.
(c) Læz. VIII. fig. 85.

tis. Max. dicavit. Deinde verò tantum splendoris est consecuta, ut illustriores omnes Astronomi illam mirificè amplexi fuerint, Ræthicus, Mæsthlinus, Rheinoldus, Gilbertus, Keplerus, Galilæus, Bullialdus, Hugenius, Gassendus, atque inter alios innumeros etiam Cartesius, qui plurima ex principiis propriis illi adjecit, ut suam veluti fecerit. Juvertit tamen hypothesim illam loco isto exponere ferè ut ab ipso Copernico tradita fuerat: quæ verò feliciter a Keplero, Cartesio, aliisque adjecta sunt, opportuniùs, & accuratiùs alibi explicabantur.

VII. In hac hypothesi, quæ Figura IV. conspicitur, Sol veluti centrum, & cor Universi, in ejus medio collocatur. Circa ipsum Mercurius trium ferè mensium spatio convertitur. Deinde sequitur Venus octo mensium periodo circa Solem ipsum revoluta; tum orbis ille magnus, quem annuo motu circa Solem peragit Terra. Hunc excipit Cœlum Martis, qui 2. annis movetur. Hoc immediatè sequitur Cœlum Jovis 12. annorum tempore revolutum. Omnium denique Planetarum supremus Saturnus 30. annorum spatio circulum peragit. Postremò sidera fixa, vel inerrantia prorsus immota quiescunt, etsi circa Solem ipsum lento motu ferri videantur, ut 36000. annis integram periodum absolvant.

VIII. Quemadmodum verò Luna non circa Solem, sed circa Tellurem ipsam intra mensem movetur; ita quoque satellites, aut Lunulæ quatuor Jovem motibus suis coronant, & quinque Saturnum, quorum periodus, & magnitudo accuratiùs alibi definietur.

Cum

Cum ceteri verò Planetæ unico solùm motu ex occasu in ortum, juxta Copernicum, moverentur, triplex in solâ Tellure distinguitur; diurnus nimirum circa seipsam, vel proprium axem: annuus per eclipticam circa Solem, & motus *Parallelismi*, vel inclinationis, juxta quem axis Terræ sibi constanter parallelus eandem semper Cœli partem respiciat: non dissimili ferè ratione, quâ globus aliquis ita super planum rotari, aut etiam supra curvam rotæ superficiem circumduci potest, ut interim circa seipsum moveatur, & axem semper sibimetipsi parallelum retineat; ut vulgare exemplum turbinis omittam, qui dum celerrimè circa seipsum torquetur, lentiori quoque motu circulum, aut aliam figuram in Terrâ describere fortasse poterit, ut semper tamen illius axis perpendiculariter insistat Terræ, adeoque sibi parallelus perseveret.

IX. Incredibile est autem, quàm facilè, atque feliciter a Copernicanis ex triplici Terræ motu sinè ullis excentricorum orbium, & epicyclorum ambagibus phœnomena singula explicari soleant, quæ in siderum motibus, distantia, magnitudine sunt observata.

1. Cum itaque Terra perenni, & æquabili motu ex occidente in orientem spatio vintiquatuor horarum circa seipsam rotatur; Sidera, Sol, & ceteri Planetæ juxta notissimas Opticæ leges diurno motu ferri videntur ex ortu in occasum.

2. 3. 4. Interim verò non sidera fixa, sed Planetæ singuli motu proprio ex occasu in ortum feruntur, si Solem exceperis; qui licèt immobilis in medio perseveret, moveri ta-

men & ipse videtur. Cùm enim Terra, dum circa proprium axem movetur, tardiori etiam motu per orbem magnum, sive Zodiacum, sensim progreditur juxta signorum seriem, vel ex occasu in ortum, ut unicum serè gradum singulis diebus, omnemque periodum unius anni spatio conficiat, unde nobis apparet, quod Sol per eadem signa moveatur; hac tamen lege, ut cum Terra in aliquo signo reperitur, ex. gr. in *Ariete*, Sol in opposito signo *Libra* videatur; cum Terra in *Cancro* moratur, Sol *Capricornum* occupet.

5. Deinde verò, cùm Terra interim dum circa Solem annuâ periodo circumfertur, modò accedat, modò recedat a Planetis, debent illi modò majores, modò minores videri, propriam nimirum magnitudinem, lucemque mutare.

6. Similiter stationes, directiones, & retrogradationes Planetarum mirâ facilitate explicantur, cùm illa motûs irregularitas in hac hypothesi non Planetis ipsis conveniat, sed solum ex annuo Telluris motu oriatur, nobisque cum Terrâ circumductis appareat.

Circa Solem S Fig. VI. in centro positum describatur circulus A B C D, quem annuo motu Terra percurrit, sitque circulus alter E F G, quem aliquis Planeta superior, ex gr. Saturnus F, motu proprio 30. annorum peragit. Si Terra ponatur in A, Saturnus apparebit sub aliquo puncto, vel sidere Firmamenti in M, si Terra progrediatur in B, & C, Saturnus apparebit in N, & O; unde moveri videbitur Planeta ex oriente in occidentem, & *retrogradus* vocabitur. Cum verò Terra ex C descendet in D, Planeta sub eodem veluti
Fir-

Firmamenti loco consistere, ac quiescere videbitur, unde *Stationarius* dicetur. Quamdiu verò Terra ex C in D, & A movebitur, Planeta, ejusque locus in Firmamento progredietur ex O in N, & M juxta signorum seriem unde *directus* optimè dici poterit. Eo quidem tempore, quo circa Solem Terra movetur, etiam Planeta versùs easdem partes movebitur, cum tamen Terra longè velociùs moveatur sub ipso, vel inter ipsum, & Solem. aliquoties transire debet, adeoque directiones, stationes, & retrogradationes efficere. Eadem serè ratio de inferioribus quoque Planetis Mercurio, & Venere adhiberi facile poterit, qui cum celerius periodum suam circa Solem perficiant, inter Solem, & Terram ipsam aliquando reperiuntur, unde retrogradi, directi, stationarii videbantur.

7. Hinc autem facile apparet, frequentiores esse oportere retrogradationes in Jove, quàm in Marte; in Saturno, quàm in Jove, quia Terra pluries inter Saturnum, & Solem transit, quàm inter Jovem, & Solem; frequentius adhuc inter Jovem, & Solem, quàm inter Martem, & Solem ipsum; antequam enim Saturnus integram periodum suam 30, annorum absolvat, Terra subter ipsum trigies transire debet, duodecies sub Jove, bis sub Marte. Venus similiter singulis octo mensibus, & Mercurius singulis tribus retrogradus esse debet, cum eo tempore inter Terram, & Solem celeriori motu, quàm ipsa Terra transeant. Arcus similiter, quem Planetæ retrogradiendo percurrunt, eò minor esse debet, quò Planeta superior est, ut ex legibus Parallaxis superius explicatis, & ex figurâ manifestissimè demonstratur. 8. Quia

8. Quia verò Planetæ retrogradi sunt, cum inter illos, & Solem interponitur Terra; salvatur optimè, quòd, ubi retrogradi sunt, Soli opponantur. Quemadmodum etiam ubi retrogradi sunt, velociore, & ampliores apparere debent, quia immenso veluti spatio Telluri proximiores sunt.

9. Luna verò, quæ circa Terram convertitur, ellipsim describit, in cujus proximiori parte reperitur in novilunio, ac plenilunio, in remotiori verò in quadraturis, adeoque tunc major, & celerior apparet, nunc verò tardior, ac minor.

10. Quod autem Sol inæqualis interdum appareat, & in signis Borealibus diutius immoretur, quàm in Australibus, explicari faciliè poterit, si aut annua Telluris orbita circa Solem eidem Soli excentrica dicatur esse, ut ipse Sol infra centrum orbitæ constitutus signis Australibus proximior sit; sive dicantur Planetæ, & ipsa Terra non circulos, verùm ellipses circa Solem in altero umbilico positum describere, ut accuratè postmodum ostendetur.

11. Veneris fidus nunquam a Sole remotius est 48. gradibus, quia totidem gradus habet semidiameter orbitæ, quæ ab illo circa Solem describitur.

12. Maxima distantia quoque Mercurii a Sole grad. 27. non excedit, quia circulum peragit circa Solem, cujus semidiameter occupat gradus 27. in Firmamento.

Atque istâ quidem ratione, quæ ceteris omnibus simplicior, clarior, atque faciliior haberi poterit, ex duplici Terræ motu implicationiora siderum phænomena exponi solent.

X. Di-

X. Dicendum postremò de tertio Telluris motu, quem illi Copernicus admirabili prorsus ingenio concessit. Axis itaque Terræ, quamvis ab ipsâ Terrâ, dum hac circa Solem convertitur, circumducatur; semper tamen sibi ipsi, & axi Mundi, vel Æquatoris parallelus concipi debet. Alioquin, si foret axi Zodiaci, vel Eclipticæ parallelus, nulla dierum inæqualitas, nulla tempestatum varietas admitti posset, nam in tali casu eadem, semper Terræ pars eodem modo respiceretur a Sole, qui utrumque Terræ polum quotidie illuminaret, ut in sphærâ rectâ contingit. At verò, si axi Mundi constanter parallelus sit, adeoque ad planum Eclipticæ ita inclinetur, ut cum illo contineat angulum gr. 66. 30. omnia feliciter explicabuntur, quæ supposito Solis, & siderum motu, in immotâ Terrâ superius exposuimus. Quemadmodum enim tempestatum varietas, & inæqualitas dierum in Tellure quiescente salvantur, cum axis ejusdem Terræ in eandem semper Cœli partem respiciat, & Sol Zodiacum percurrans circa ipsam convertitur; ita quoque salvari poterunt in hypothesi, quæ Telluri per Zodiacum motum concedit, si semper axis Terræ in eandem Mundi partem dirigatur. Ista quidem clariùs, & expressiùs adhuc in sphærâ intelliguntur, sed faciliè tamen concipi poterunt, si advertamus, quod illa dierum, tempestatumque varietas non aliunde oritur, quàm ex diverso modo, quo Sol obliquè circa Terram immotam movetur, eamque diversis temporibus respicit. Cùm igitur Copernicana hypothesis modum illum, quo Terra a Sole respicitur, conservet, ac solum tran-

sse-

sferat in Terram motum, qui Soli concedebatur ita, ut tamen Terra eâdem prorsus velocitate, obliquitate, & inclinatione circa Solem moveatur, illumque respiciat, quâ circa Terram Sol movebatur, & illam illuminabat, manifestissimè sequitur, quod permanente eâdem causâ, iidem quoque effectus, sive eadem phænomena salvari debeant.

XI. Id unum objici, & scrupulum injicere fortasse poterit, quod in hac hypothesi, quamvis aliquando Terra superior Sole, aliquando verò inferior sit, nunquam tamen poli Mundi locum mutare, deprimi, aut asurgere videantur; quemadmodum etiam dimidia semper, atque eadem Cœli pars, & siderum numerus appareat. Sed nedum hunc facilè dirimunt Copernicani asserendo, quod axis Terræ, quamvis per magnum orbem annuâ periodo circa Solem deferatur, adeoque modò Sole superior, & altior, modò verò Sole inferior, atque depressior sit, cum tamen sibi ipsi semper parallelus existat, in quocumque loco positus eandem Cœli partem respicere, in eandem Mundi partem sensibilibiter dirigi semper debet, hoc est in polum; cumque ea sit visûs nostri proprietas, & affectio, ut duæ lineæ, quæ inter se parallelæ sint, in mediocri distantia, sensim inter se accedere, atque invicem conjungi videantur, ita, cum serè infinita sit illa distantia, quâ poli Mundi, hoc est sidera fixa, a Tellure dissident, mirum esse non debet, si axis Mundi in diversis subinde locis collocatus versus eundem Mundi polum accedere, ac tandem in ipsum desinere videatur. Præsertim, cum non Terra solùm, sed ipse quoque circulus, a
Ter-

Terrâ circa Solem descriptus, si cum Firmamenti ambitu comparetur, veluti punctum haberi possit, ut proinde ascensus ille, sive descensus Telluris per orbem magnum respectu siderum, vel Firmamenti sit, insensibilis.

XII. Ejusmodi verò motus constantia, quâ axis Terræ sibi parallelus ubique sit, ita intelligi debet, ut illa directio paullulum immutetur, & axis ipse tardissimo quodam motu annorum scilicet 25816. Ægyptiorum circa polos Zodiaci contra signorum seriem, hoc est ab ortu in occasum circulum describat, cujus diameter sit gr. 23. 40. Inde verò fieri oportuit, ut mutux Æquatoris, & Eclipticæ intersectiones, vel puncta æquinoctialia simili motu contra signorum seriem in præcedentia transferantur; unde meritò motus ille *præcessio Æquinoctiorum* a Copernico vocatur, neque aliâ de causâ sidera fixa juxta signorum seriem ab occasu in ortum ferri videntur, ut ipse arbitratur, nisi quodd Æquinoctialia puncta ab ortu in occasum progrediuntur. Qui quidem Æquinoctialium punctorum motus, cum irregularis, ac minimè constans sit, mirum esse non debet, si ipse quoque siderum motus ab occasu in ortum inæqualis appareat. Inæqualitas tamen illa, vel Anomalia in punctis æquinoctialibus, vel præcessione Æquinoctiorum juxta Copernicum restituitur annis Ægyptiis 1717. Aliam verò, quæ dicitur *Anomalia obliquitatis Ecliptica*, quæ duplo tardiori tempore annorum Ægyptiorum 3434. restituitur, ita explicavit, ut polus Terræ a Boreâ in Austrum accederet, & recederet per spatium 24. sicuti ab oriente in occidentem, & vicissim per gr. 2. 20.

XIII.

XIII. Hæc est celeberrima Copernici opinio, hæc est hypothesis illa, quam recentiores Philosophi amplexi sunt, quam accuratissimis observationibus illustrarunt, quam denique explicandis siderum motibus unice adhiberi posse contendunt. Ac mirum est certè, quàm sibi de hac hypothesis gratulentur, qui ceteris omnibus repudiatis hanc unam arctissimè complectuntur, quo rerum, verborumque splendore hujus commoda prædicent, quàm denique constantiam hanc omnium pulcherrimam, simplicissimam, veram denique affirmant.

1. Quid enim, inquit, simplicius illà hypothesis effingi potest, quæ unico Telluris motu plurimos, ac implexos adeo motus feliciter explicat, quibus Planetæ, & ipsa sidera torquerentur? Certè si Ptolemaicos audiamus, non solum diurnus ille motus Planetis tribuitur, quo circa Terram æquabili motu ferantur, sed alius insuper huic oppositus effingitur, quo ex occasu in ortum ferantur, alius denique maximè irregularis, quo nunc directi, nunc stationarii, nunc quoque retrogradi appareant. Atque, ut hæc omnia explicentur, primum mobile, orbis eccentrici, epicycli, ceteraque id genus effinguntur; at in hypothesis Copernicanâ cœlestia corpora ab ejusmodi motuum ambagibus liberantur, & singula clarè, simpliciterque expediuntur.

2. Ipsa deinde incredibilis, ac immensa, ferè velocitas, quæ sideribus tribuitur, argumento esse potest, Ptolemaicum systema ab ipsis Naturæ legibus, quæ compendio operatur, plurimum abhorrere. Si etenim Stella in Æquatore posita circa Terram 24. horarum

rum spatio moveretur singulis horis ex Riccioli calculo milliaria Italica 1987883000. conficere, minuto primo 33131383., minuto secundo, vel arteriæ pulsu 552186. E contra verò, si Terra circa proprium axem moveatur, singulis horis milliaria Italica 950. percurreret, minuto primo 16., minuto secundo passus circiter 266. (a).

3. Neque aliam ferè hypothesim ipse ordo rerum exigere videtur, ut siderum motus certâ quadam lege, & proportionem peragantur. Quid enim verisimilius censerî poterit, quàm si minora corpora circa aliud majus, veluti centrum moveantur; si quò proximiora sunt Soli, mole minora, ac celerius mota breviori periodo Solem coronent, si denique inter tempora, quibus Planetæ periodos suas absolvunt, eorumque distantias a communi centro aliqua proportio reperiatur, quæ certè singula in hypothesi Copernicanâ mirificè salvantur, ut alibi demonstrabitur, in ceteris autem perturbata maximè apparent?

4. Quid si innumeræ fere difficultates hîc afferantur, quæ contra hypothesim Ptolemaicam communiter fieri solent, ut phænomena illa enumerentur, quæ illi manifestissimè repugnant? Certè, ut ipsi quidem existimant, vix digna videri illa poterit, quæ cum Copernicanâ hypothesi, si illius ambages, & confusionem consideres, comparetur. Atque ista quidem Copernicanæ hypothesis assertores.

XIV. Plurima tamen sunt, quæ contra Copernicanum systema a Ptolemaicis, & Ticho-

(a) Vid. *Grand. Phys. Par. VI. c. 3.*

chonicis partim ex Physicâ, partim ex Astronomicis observationibus, partim denique ex sacris Literis afferuntur.

1. Cum itaque ex singulis Terræ regionibus dimidia Cœli pars semper appareat, necessarium est, ut Terra in Cœli, vel Universi centro reperiatur, alioquin, si a sideribus ipsis inæqualiter distaret, modò major, modò minor stellarum numerus, vel Cœli pars apparerët.

2. Terra deinde, cum corpus gravissimum, & mutationi subjectum sit, in infimi Universi loco immobilis esse debet, non inter cœlestia corpora transferri, quæ gravitatis, & corruptionis expertia sunt.

3. Deinde si rapido motu Terra circa seipsam gyraret, vehemens adeo foret aeris agitatio, ut ventum percipere deberemus; ipsa quoque ædificia nutarent; & concepto impetu disjicerentur, quemadmodum circumactâ Rotâ corpuscula, quæ in illius superficie fortasse reperiantur, celeriter dissiliunt.

4. Nubes ipsæ, & corpora in aere pendula celerrimè ex ortu in occasum ferri viderentur; hinc autem volucres ad nidum redire, lapis sursum projectus in locum, ex quo projectus fuerat, perpendiculariter decidere non posset; dum enim nubes, volucres, & lapis in aere penderet, aut moveretur, inferior Terræ pars interim subduceretur, ac celeri motu ex occâsu in ortum transiret.

5. Quod si globum ex tormento bellico versùs orientem explodi contingerit, minùs ille excurret, quàm, si versùs occasum dirigatur; in primo etenim casu machina Telluri insistent, atque in ortum properans, globum in-

se-

sequeretur, in secundo verò ab illo recederet.

6. Postremò plurimæ authoritates ex sacris Literis afferri solent, quibus expressè, ac manifestissimè demonstratur Tellurem immobilem esse; sic in Ecclesiaste (a) *Generatio advenit, generatio præterit; Terra autem in æternum stat. Pl. 103. Qui fundavit Terram super stabilitatem suam, non inclinabitur in sæculum sæculi. Quod verò sidera, atque præsertim Sol ipse circa Terram immobilem moveatur, celebre illud imperium Josue testatur, Sol contra Gabaon, ne movearis - - . flectitque Sol &c. (b) Similiter etiam Isaïæ 38. reversus est Sol decem lineis: Eccl. 1. Oritur Sol, & occidit, gyrat per Meridiem, flectitur ad Aquilonem &c. unde hæc opinio a S. R. E. Cardinalibus Fidei Inquisitoribus meritò damnata, fuit sub Paulo V. anno 1616. atque iterum sub Urbano VIII. anno 1633., eamque Galilæus, qui illam profitebatur, & singulari Opere luculentissimè probaverat, solemniter velut erroneam, sacrisque Literis contrariam, ejuravit, ut nostris hisce temporibus nonnisi ab iis, quos a Catholica Ecclesiæ sinu innovandi cupiditas avulsit, defendatur.*

XV. Hæc, aliaque id genus plurima ab iis apponi solent, qui vel Religionis zelo, vel rationum vi a Copernicanâ hypothesi abhorrentes Ptolemaicæ, vel Tichonicæ adhæserint. Quàm verò feliciter ejusmodi argumenta solvere videantur Copernicani, inferius ostendetur. Singulis certè reponunt.

I. Perperam itaque, ac inutiliter ad Astro-
Tom. IV. G no-

(a) Eccl. 1. ver. 4. (b) Josu. 6. 10. ver. 13.

nomiæ leges se provocari existimant Copernicani. Quamvis enim revera Tellus, aliquando Sole superior, aliquando inferior sit, eadem semper, ac dimidia Cœli pars nobis apparere debet, quod circulus ille, qui circa Solem a Terrâ describitur, ob infinitam ferè siderum distantiam, veluti punctum haberi possit; quemadmodum in Ptolemaico systemate Terra ipsa veluti centrum respectu Cœli haberi solet.

2. Incertam esse arbitrantur Tellurem in medio Universi loco positam esse, cum id nullâ certâ ratione, vel experimento probari possit. Quod enim corpora gravia (quæ certè ad Terræ centrum feruntur) ad Universi medium descendere debeant, adeoque commune, & idem sit Telluris, & Universi centrum, quamvis ab Aristotele traditum fuerit, facile tamen, ac meritò negari poterit; ut enim alibi diximus, cum de gravitatis naturâ, & origine res foret, certissimum quidem est omnia corpora terrestria vi gravitatis ad Terræ centrum descendere; sed hanc in Universi centro consistere inde probari non potest; nam etiamsi in alium locum transferatur, & Telluris, Lunæque locus mutetur, terrestria tamen corpora, vi gravitatis semper ad Terram accederent. Deinde facile suspicari quis poterit Telluris naturam a Lunæ, Mercurii, Veneris, aliorumque Planetarum substantiâ, non adedò dissimilem esse, ut si totum corpus Lunæ neque grave, neque iners, neque indignum putetur, quod inter cœlestia corpora numeretur, & perenni motu Tellurem ipsam illuminet, ipse quoque Terræ globus circumferri possit; cum præsertim.

Ter-

Terra, si e Lunâ videretur, eandem ferè sui speciem exhiberet, quæ nobis Telluri insistentibus a Lunâ exhibetur. Partes quidem Telluris graves sunt, & ad Terræ centrum feruntur, cum ingenitam habeant vim illam, quâ ad Terræ centrum nitantur, sed integer Terræ globus gravis esse non debet, nisi ad punctum aliquod extra se positum ferri dicatur, quod omnino repugnat.

3. Nulla verò aeris agitatio ex rapido Terræ motu oriri, vel a nobis sentiri debet, quodd aer ipse cum Tellure, quam ambit, pari velocitate ex occasu in ortum circumferatur; eo prorsus modo, quo nullum aeris motum percipere potest ille, qui intra cubiculum in navi celeriter motâ continetur.

4. Hinc etiam nubes, volucres, aliaque corpora in aere posita, cum Telluris motum participant, & accuratè sequantur, eodem in loco consistere, nidosque repetere debent.

5. Quod autem de lapide sursum projecto, de globo ex tormento bellico versùs occasum, vel ortum exploso opponitur, explicari faciliè poterit ex iis, quæ de motu a motore translato, sive de communicatione motûs dicta sunt alibi. Hic obiter meminisse sufficiat, quod, si argumenta ejusmodi vim ullam haberent; ostenderent etiam impossibilia esse, quæ de lapide ex mali vertice demisso, de homine, qui ex puppi in proram, vel è contra, aut ex uno in aliud transtrum navis celerissime excurrit, ibi fusè exposita sunt, quæ tamen accuratis observationibus, & evidentibus experimentis invictè probari solent.

6. Maximum itaque robur, quo Coperni-

cani premi, & urgeri solent, est auctoritas scripturarum. Hanc quoque tamen eludere, ejusque vim enervare conantur. Complures enim existimant Telluris quietem, & motum Solis articulum Fidei non esse, ut opposita illi sententia hæresis censeretur; cum id non a Romano Pontifice, cujus divina auctoritas falli non potest, sed a solâ Cardinalium Congregatione sancitum fuerit.

Alii liberius respondent scripturæ loca non maximam vim habere, quod illa sæpissime juxta communem hominum opinionem, & ad captum vulgi loquatur; unde solem moveri dixit, quod ea communis, & vulgaris foret omnium opinio: quemadmodum certè Copernicus ipse solem moveri dixit, neque aliâ ratione solem allocutus fuisset Isaias, ac Josue; intelligens tamen motum illum revera Telluri tribuendum esse.

Quod si maxima Scripturæ auctoritas esse debet, cavendum fore arbitrantur, ne illius sensu, qui multiplex esse potest, abutamur. Cum itaque Scriptura dicit *Terram in æternum stare*, non de locali quiete intelligendum esse opinantur, sed de permanentiâ quadam, quâ eadem ferè rerum varietas, substantiarum ordo, tempestatum vicissitudo perenni quodam tenore perseveret; præsertim, cum ibi Scriptura Terræ statum, vel quietem opponat motui rerum genitarum; ideoque sicuti, cum præmittit *Generatio advenit, generatio præterit*, non loquitur de motu locali, sed de solâ mutatione, vel corruptione rerum, ita quoque cum *Terram stare* subjungit, de solâ permanentiâ, sive diuturnitate debet intelligi. Ceterum plura scripturarum loca as-
ferri

ferri possent, quæ, si literaliter intelligi debeant, Telluri motum concederent, ut illud Job de Deo, *Qui commovet Terram de loco suo (a), & columna ejus concutuntur.*

Cartesius autem aliâ ratione sibi consuluit, dum motus localis naturam in translatione unius corporis ex vicinâ quorundam corporum circumstantium in viciniam aliorum positam existimaverit; adeoque cum Terra, dum circa solem in proprio vortice circumfertur, nunquam ab aere, quo ambitur, recedat, immobilem adhuc illam esse defendit. Sed verbis ludere, aut certè nobis imponere voluit Cartesius, ut alibi ostendimus, cùm definitionem ejusmodi rejiceremus.

Plurimi denique longè verisimiliùs fatentur opinionem hanc veluti Thesim proscriptam esse, non verò ut hypothèsim; adeoque nullâ quidem ratione defendi posse Terram moveri; licere tamen asserere, quod, si fortasse Terra moveretur, clarius, faciliùs, & accuratiùs siderum motus, & cetera phænomena explicarentur. Et certè quamvis S. R. E. Cardin. acriter adeo Thesim de actuali Telluris motu damnaverint, alio tamen decreto ann. 1620. edito concesserunt opinionem illam veluti Hypothèsim explicandis siderum motibus accommodatam adhiberi posse.


XVI. Hæc igitur in utramque partem maximo ingeniorum dissidio ab iis, qui Copernicanam hypothèsim arctissimè amplectuntur, & iis etiam, qui illam acerrimè insequuntur, opponi solent. Quid verò tanquam verisimilius admitti, defendique possit, inferiùs ostende-

(a) Job. c. 9. ver. 6.

102 PHYS. PART. TRACT. I.
 demus, cum Tichonis etiam hypothesi ex-
 posita, vel explicata jam fuerit.

C A P. VIII.

De Systemate Tichonico.

I.  Icho Braheus nobilis Danus, qui Astronomiæ studio Christiani IV. Daniæ Regis ætate aded excelluit, ut communi sapientum iudicio totius avi memoriâ dignissimus (a) habeatur, cum plurimum a Systemate Ptolemaico, ejusque ambagibus abhorreret, & Copernicanam etiam hypothesim averfaretur, quod illa Telluri motum tribueret, in *Huenam* insulam secessit, extructâque ibi arce, quam ad observandos siderum motus adhibuit, & *Uraniburgum*, sive *caelestem arcem* vocavit, longo, diligentique studio, & accuratissimis observationibus novam hypothesim excogitavit, quæ plura quidem cum ceteris, & Copernicæanâ potissimum communia haberet, non iisdem tamen incommodis premeretur.

II. Hæc itaque hypothesi, quæ ab auctore Tichonicæ nomen obtinuit, Tellurem in centro Universi collocat, * circa quam veluti centrum diurno motu in circulis æquatori parallelis, ex ortu in occasum, atque etiam interim inæquali periodo ex occasu in ortum, ferantur juxta Zodiaci obliquitatem Luna, Sol, & sidera fixa; Luna quidem unius mensis

(a) *Gaßen. epist. ad Galium.*

* Fig. V.

sis spatio, Sol annuo; sidera fixa 25000. annorum. Ceteri verò Planetæ circa Solem veluti centrum inæquali similiter temporis spatio moventur; Mercurius soli proximior trium mensium, deinde Venus octo, Mars biennio, Jupiter annis 12. Saturnus denique 30. hæc tamen lege, ut Mercurii, & Veneris orbita circa Solem non complectatur Terram, et si complectatur illam Saturnus, Jupiter, & Mars, qui solis orbitam, ita intersecat, ut aliquando Sole remotior, aliquando proximior nobis videatur. Sed hæc illustrius apparent in Figurâ V.; ex quâ etiam intelligi facile poterit, quod antea dicebamus, Tichonis Hypothesim non aliud esse, quàm Hypothesim Copernicanam, ita inversam; ut Sol, & Terra locum mutaverint. Si enim sideribus, & Planetis diurnus circa Terram motus adimatur, relicto solum motu proprio circa Solem, & Sol omnino immobilis concipiatur, & circa ipsum moveri intelligatur Terra in circulo punctis notato, dum interim singulis diebus circa seipsam rotatur, manifestissime apparet, quod Copernicana hypothesis restituitur, nisi quod Cælum sidereum ita paululum transferri debet, ut non amplius Terræ, sed ipsi Soli concentricum fiat.

III Neque hac solum in parte Copernicus Tichoni præluxit, sed plurima quoque sunt a Copernico excogitata, quæ maximo Tichoni adjumento esse poterant, quamvis ingenue Astronomi omnes fateantur, longè accuratius cœlestium corporum motus a Tichone, quàm a Copernico observatos esse.

Sic uterque Cœli substantiam tenuem, ac fluidam ponit, in quâ tum sidera, tum Pla-

netæ liberè moveantur. Sed Ticho præsertim hanc laudem sibi vindicat, quod veterem opinionem de crystallinâ Cœlorum soliditate, quæ altè omnium animis infederat, omnium primus accuratissimis observationibus everterit.

Primus etenim cometas per æthereæ spatia moveri, Martem aliquando proximiorē, aliquando verò remotiorē a Terrâ, quàm sit ipse Sol, Mercurium denique, ac Venerem, periodum suam circa Solem peragere gravi, diuturnoque studio luculentissimè demonstravit. Deinde in utroque Systemate Lunæ circa Terram, aliorumque Planetarum motus proprius circa Solem æquali temporis spatio definitur, atque feliciter explicatur.

Maximum verò discrimen, quod inter illas hypotheses reperitur, est motus ille, quo sidera, Sol, & Luna circa Tellurem 24. horarum spatio simul cum ceteris Planetis ex ortu in occasum ferantur, quique a Copernicanis, ut antea vidimus, diurno Telluris motu explicatur. Hoc autem a Tichonicis ita exponi solet; ut Lunam quidem Solem, & sidera secundùm Zodiacum lentâ periodo superiùs expositâ ex occasu in ortum moveri velint, interim tamen illi singulis diebus circa Terram ex ortu in occasum circulos æquatori parallelos describant. Dum verò Sol circa Terram 24. horarum spatio convertitur, Planetas omnes secum circumvehit, & abducit, ut ipsi quoque eodem tempore circa Terram circulos excentricos peragere videantur. Atque ita quidem diurnus siderum, & Planetarum omnium motus circa Tellurem, & proprius circa Solem, & Terram ipsam, inæqualis

lis etiam magnitudo, vel distantia Planetarum a Terrâ in hac hypothefi explicantur.

IV. Sed explicandum adhuc supererat, quâ ratione directiones, stationes, retrogradationes Planetarum fierent, & cetera phœnomena sequerentur, quæ in Planetis deprehenduntur.

Itaque egregium illud superioris sæculi decus, Mathiæ, & Maximiliani Cæsarum Astronomus, Joannes Keplerus, cum animadverteret duplicem motum in hac hypothefi Planetis concedi, alterum quidem, quo circa Terram abducerentur a Sole, alium verò, quo interim certâ quadam periodo circa solem moverentur, ex utroque motu *abductionis* a Sole circa Terram; & *Conversionis* circa Solem, tertium veluti motum componi ostendit, qui spiralis, aut certè spirali similis foret, cujusmodi Figurâ VII. exhibetur.

Tellus itaque in centro T posita sit, circa quam moveatur Sol in circulo A B C D, secumque abripiat Jovem circa Terram, dum ille interim lentiori motu circa Solem moveatur; facile apparet, quod si Jupiter ex F tendat in G, celerius moveri videbitur juxta signorum seriem, quod ibi duplici motu, proprio nimirum, & alio, quo a Sole abripitur, versùs eandem partem feratur, adeoque *directus* vocabitur; si ex G in H, *stationarius*, quòd ibi ferè quiescat, & sub eodem Firmamenti loco appareat; si denique ex H moveatur in I, *retrogradus* erit, videbitur enim ex ortu in occasum regredi.

Cùm itaque singulis annis unicam convolutionem, vel spiræ partem Planetæ circa Solem describant, neque tamen integram periodum suam circa ipsum, vel circa Terram singulis

gulis annis perficiant; necessarium est, ut integra spira, quæ ex. gr. circa Solem a Jove describitur, antequam iterum ad oppositionem, vel conjunctionem cum sole, ex quò spiræ initium incœperat, revertatur 12. convolutionibus componatur; spira Saturni 30. unde frequentiores esse debent retrogradationes in Jove, quàm in Marte, & in Saturno, quàm in Jove; sicuti cum spiræ, sive convolutiones minores sint, angustioresque, quò Planetæ lentiores, altioresque fuerint, arcus, qui a Planetis retrogradis in Firmamento peragi videntur, minores sunt, quò Planeta superior fuerit.

Quæ cum ita sint, intelligi poterit Tichonis Hypothesim cum severioribus Astronomiæ legibus mirificè coherere, cum phænomena omnia, quæ ad siderum motum, distantiam, magnitudinem pertinent, satis feliciter in illa explicantur,

V. Communis est tamen opinio illam a Physicæ legibus abhorreere, cum plures in illâ, & oppositi motus eidem corpore concedantur; Soli nimirum, Lunæ, & fixis sideribus, ut diurno motu circa Tellurem ex ortu in occasum ferantur, eodemque tempore certâ periodo juxta Zodiaci obliquitatem ex occasu in ortum progrediantur; unde eadem redeunt argumenta, quæ contra Ptolemaicos fieri paullo superius ostendimus.

Sed quod omnem ferè imaginationis vim superare, & Tichonicum Systema prorsus evertere videtur, est incredibilis ille motus, quo Sol, dum Tellurem suâ periodo coronat, Planetas omnes secum circumvehit. Quæ enim tanta vis esse poterit, ut Sol ingentia cor-

corpora nullo veluti fœdere, ac vinculo sibi conjuncta per tenuissimum ætheris spatium perenni, constantique motu secum abripiat; interim tamen illa æquabiliter circa Solem ipsum proprio quodam impetu moveantur? Quod si Tichonici, ut hujus argumenti vim solvant, nullam inesse arbitrentur corporibus cœlestibus gravitatem, quæ Solis impetum extinguere, vel minuere possit, quin Planetæ facilè illius motui obsequantur, eâdem ferè ratione, quâ Jupiter, dum circa Solem, sive Tellurem movetur, quatuor satellites circa se rotatos, ita secum abripit, ut ipsi quoque circa Solem, sive Tellurem circulum describant, suspicari fortasse, quis poterit Terram ipsam, quæ Planetarum vorticibus continetur, eodem impetu abreptum, aliðque circulariter translatum iri, cùm ipsa quoque gravitate careat, & sit ad motum maximè comparata. Unica est denique, ad quam Tichonici, veluti ad aram confugiant, voluntas Creatoris, quæ Tellurem inter vortices illos celerrimè agitados immobilem constituerit. Sed viderint illi, quo jure id sibi liberius arrogent, ut arcanam Dei voluntatem se assequutos esse glorientur; cum præsertim Tellus immobilis esse possit, etiamsi longè diversus fuerit cœlestium corporum ordo, quàm, qui a Tichonicis defenditur.

VI. Sed quænam Hypothesis, inquires, demum supererit, quam in explicandis siderum motibus amplectamur, si illustriores illæ, quæ superius expositæ sunt, vitiis non carent, sed plurima in illis desiderari, vel etiam corrigi debent? Communis hæc esse solet, ac vetus illorum querela, qui Veritatis amore ad Philo-

loso-

loſophiæ ſtudio accellerint , quandoquidem ceteri , qui temere , & inconſultò Copernicam Hypotheſim , Ptolemaicam , ſive Tichonicam adamaverint , illam accerrimè tueri ſolent . Cui quidem facilè , & accuratè reſponderi poſſe videtur , ſi *Theſim* ab *Hypotheſi* , ut par eſt , diſtinguamus , neque alterutram promiſcuè confundamus , quod a compluribus quidem factum eſſe videmus , ſed ſinè maximo errore fieri certè non potuit .

Hypotheſis igitur nomine nihil aliud intelligitur , quàm illa ſuppoſitio , quæ fit a nobis circa ſiderum ordinem , motum , &c. ut nimirum certo quodam ordine , periodo , diſtantiâ a nobis conſtitutâ , omnia deinde cœleſtium corporum phœnomena clarè , ac feliciter explicentur . Hinc in Hypotheſi non requiritur veritas , ſed ſolùm , ut ex iis , quæ ſuppoſita ſunt , cetera veluti ex fonte conſequantur , nihilque ex iis , quæ videntur , ſuppoſitioni repugnet . Theſis autem , ſive poſitio eſt illa diſpoſitio ſiderum , quæ non ſolùm a nobis concipitur , ut poſſibilis , ſed affirmatur etiam , & defenditur , ut exiſtens in rerum naturâ ; unde in ſingulis ejus partibus veritas ineſſe debet . Quæ verò felicioꝝ , & opportunioꝝ methodus ſit in explicandis ſiderum motibus , Theſes nimirum , an Hypotheſes adhibere , inferiùs explicabitur . Interim certò , conſtantiffimèque defendimus , quod , quamvis opinio Copernici , velut Hypotheſis ceteris omnibus , quæ hætenus inventæ ſunt , accuratioꝝ , facilioꝝ , ſimplicioꝝ concedatur , ac ferè divina ſapientiffimòꝝ hominum iudicio videatur ; illa tamen vel , ut a Pythagorâ inventa , vel , ut inſtaurata a Cuſano , vel ,
ut a

ut a Copernico amplificata, vel denique, ut illustrata a Cartesio, veluti Thesis nullâ ratione defendi potest.

VII. Quod, ut illustrius adhuc appareat, atque illis etiam respondeatur, qui paullo liberius existimant Telluris quietem, quippe, quæ non a Romano Pontifice, sed a Card. definita fuerit, non adeo certam esse, ut inter articulos Fidei numeretur; siue nullam esse Romani Pontificis in definiendis ejusmodi rebus potestatem; siue denique nullam esse Sacrarum Literarum authoritatem in iis præsertim, quæ ad res naturales pertinent *, ostendemus etiam rationis lumine, & ex ipsis veluti Naturæ legibus opinionem Copernici, veluti Thesis haberi non posse. Et sanè, ut aliqua opinio veluti Thesis defendatur, siue ut Hypothesis aliqua ad explicandos siderum motus excogitata, deinde tanquam Thesis certò, constanterque assumatur, duo requiruntur. Primò quidem, quod Principium illud, vel suppositio non repugnet; & illo posito, clarè, feliciter explicentur omnia, quæ tum in siderum magnitudine, distantia, periodo nobis apparent, tum etiam cetera, quæ in singulis Mundi partibus observantur. Deinde verò requiritur, ut hæc omnia phænomena in aliquâ aliâ hypothesi non repugnante pari, vel majori claritate, felicitate fieri, & explicari non possint. Si enim alterutrum ex his deficiat, vel nempe principium illud re-

monstrat, quod non potest esse, nisi in pu-
 blico, non in privato, non in secreto, non in

* Non legitur in Evangelio Dominum dixisse: Mitto vobis Paraclitum, qui vos doceat de cursu Solis, & Lunæ: Christianos enim facere volebat, non Mathematicos. *Aug. de ciuit. contr. Felix. Manich. lib. 1. c. 10.*

pugnet, nec omnia feliciter ex illo sequantur; vel si alio principio æquè feliciter explicari illa possint, nunquam Hypothesis illa, veluti Thesis haberi poterit. Copernicam autem hypothese[m] Naturæ legibus non repugnare; sed omnia clarè, simpliciter, & mirâ quadam felicitate in illâ explicari posse arbitrantur Copernicani, quod unico Telluris motu plures illi, qui Planetis, atque sideribus tribuantur, eorumque periodi, & irregularitates optimè salventur, ut ex illorum sententiâ in superiori Capite demonstravimus. Neque fortasse, ut ingenuè loquamur, hac in re plurimum decipiuntur; cum certè Hypothesis illa principio facili, maximèque possibili innitatur, ac plurima evidenter expediat, quæ vix, ac ne vix quidem in aliis per innumeras circularum excentricorum, Epicyclorum ambages consequimur. Nonnulla tamen sunt, quæ in hac Hypothesi difficilia, absurda, vel certè liberius efficta videri poterunt, ut immensa, & enormis adeò siderum distantia, ut orbis annuus, cujus diameter 105. milliones miliarium excedat, cœlo sidero comparatus, veluti punctum haberi possit, perennis ille motus aeris, qui tum in superiori, tum in inferiori sui parte motum Telluris accuratè sequatur, gravium decidentium ictus, aliaque id genus, quæ sapientissimis etiam Viris Copernicam hypothese[m] propugnantibus gravissima videri solent. Verum, quandoquidem liberaliter agendum est, concedamus iterum in hac hypothese omnia phænomena feliciter explicari, ut nihil in illa corrigi, nihil reprehendi, nihil denique optari posse videatur; ergo ne putari debet
aliam

aliam hypothesim impossibilem esse, quæ pari, vel majori quoque felicitate hæc omnia expediat? Ergo ne ex innumeris, ac infinitis etiam rationibus, quibus divinus Artifex cælestia corpora, & singulas Universi partes disponere poterat, ut eadem prorsus phænomena nobis exhiberet, quæ nunc observantur, hanc unam a Pythagorâ excogitatam elegit (a)? Fieri ne denique oportuit, ut cum de magnetis virtute, de ætus maris origine, de conchiliis in montium verticibus effossis, aliisque innumeris rebus, quæ in Terrâ conspiciuntur, quarum affectiones, & effectus omnes oculis ipsis observantur, nihil ferè certò definire possimus, sed omnia conjiciendo, ac divinando inquiramus, de rebus tamen celestibus, quæ procul a nostrâ cognitione positæ sunt, quas nullo ferè sensuum testimonio consequimur, quas nullâ denique certâ ratione complecti possimus, certa quædam Thesis acerrimè defendatur?

Ego verò tantum abest, ut divini Artificis leges, & ordinem, vel hac in parte veritatem assequutos esse illos arbitrer, ut aliquando potius futurum existimem, qui novam hypothesim Copernicanâ longè nobiliorem inveniat; futurum etiam, qui nova sidera, novos Planetas, nova denique cælestia corpora, quorum motus, atque phænomena in Copernicanâ hypothesi explicari non possint, ostendat; futurum denique, ut egregiè inquit Seneca: *Tempus quo ista, quæ nunc latent, in lucem dies extrahat, & longioris ævi diligentia; ad inquisitionem enim tantorum ætas una,*
non

(a) Vid. Cleric. Phys. lib. 1. c. 2.

non sufficit ; futurum inquam , tempus , quo posterit nostri tam aperta nos nescisse mirentur (a).

Quod ubi fortasse contigerit , ut facile fieri posse arbitramur , quis apertè non videat Copernicanam Hypothesim eodem loco , eodemque in pretio futuram , in quo nunc ceteræ haberi solent . Certè vetus illud Ægyptiorum Systema meritò defendi poterat , nisi posteriores Astronomi Planetas aliquando proximiores , aliquando remotiores a Terrâ observassent , & excentricos orbes admittere coacti fuissent .

Atque hæc hypothesis ab Astronomis adhiberi facile poterat , nisi irregularitas illa motûs , quâ Planetæ velociore aliquando , sive directi , aliquando verò immobiles , & stationarii , aliquando denique etiam retrogradi nobis apparent , Ptolemæum impulisset , ut excentricis orbibus Epicyclos adjungeret , quâ inæquali lege , ac periodo moverentur . Ipsa denique Ptolemaica Hypothesis optima videri poterat , nisi Cometæ liberè Cælum tranantes , Mars aliquando Sole sublimior , aliquando inferior , Mercurii , & Veneris orbitæ circa Solem , satellites circa Jovem , & Saturnum gyrantes , receptam Cælorum soliditatem , & veterem corporum cælestium ordinem invertissent . Eodem igitur jure Copernicana hæc opinio tanquam felicior , & verisimilior hypothesis tandiu haberi , defendique poterit , quandiu alia verisimilior inventa non fuerit , in quâ hæc eadem phænomena explicentur ; aut certè alia Hypothesis aliorum siderum motibus explicandis , quibus hæc impar sit ,

exco-

(a) *Quæst. Nat. VII. c. 26.*

excogitari debeat. In hoc itaque falli videntur ii, qui Copernicanum Systema veluti Theſim defendunt, quod inter Hypotheſes illas, quæ hæcenus inventæ sunt, unam tanquam Theſim habendam eſſe opinantur; cum revera Theſis inter innumeras ſolam Hypotheſes, quæ poſſibiles ſunt, eligi poſſit: aut certè veriſimiliùs de cœleſtium corporum ordine, motu, nulla Theſis, ſed ſolam Hypotheſis inquiri, & feliciter adhiberi debeat. *Hac enim, ut egregiè ait Lactantius, diſputando, & conjecturis velle comprehendere tale eſt profeſſò, quale, ſi diſſerere velimus, qualem eſſe arbitramur cuiuſpiam remotiſſima gentis Urbem, quam nunquam vidimus, cuiuſque nihil aliud, quàm nomen audivimus. Si nobis in eâ re ſcientiam vindicemus, qua non poteſt ſciri, nonne inſanire videamur, qui id affirmare audeamus, in quo revinci poſſumus. Age opinemur de ſtatu, & qualitate Urbis illius, quæ nobis rebus onanibus præter nomen ignota eſt. Veriſimile eſt in plano ſitam, lapideis mœnibus, adificiis ſublimibus, viis pluribus magnificis, ornatiſque delubris. Deſcribamus, ſi placet, mores, habitumque civium. Sed cum hac dixerimus, aliud contraria diſputabit; & cum hic quoque peroraverit, ſurget & tertius, & alii deinceps, & opinabuntur multò diſparia, quàm nos ſimus opinati. Quid ergo erit ex omnibus veri certius? fortasſe nihil. At omnia ſunt dicta, qua in rerum naturam, cadunt ut neceſſe ſit aliquid eorum eſſe verum. At nescietur, quis verum dixerit. Poteſt fieri, ut omnes ex parte aliquâ erraverint, ex parte attigerint veritatem. Stulti ergo ſumus, ſi hoc diſputatione quaramus. Poteſt enim ſupervenire aliquis, qui opiniones*

non sufficit ; futurum inquam , tempus , quo posterius nostri tam aperta nos nescisse mirentur (a).

Quod ubi fortasse contigerit , ut facile fieri posse arbitramur , quis apertè non videat Copernicanam Hypothesim eodem loco , eodemque in pretio futuram , in quo nunc ceteræ haberi solent . Certè vetus illud Ægyptiorum Systema meritò defendi poterat , nisi posteriores Astronomi Planetas aliquando proximiores , aliquando remotiores a Terrâ observassent , & excentricos orbes admittere coacti fuissent .

Atque hæc hypothesis ab Astronomis adhiberi facile poterat , nisi irregularitas illa motus , quâ Planetæ velociore aliquando , sive directi , aliquando verò immobiles , & stationarii , aliquando denique etiam retrogradi nobis apparent , Ptolemæum impulisset , ut excentricis orbibus Epicyclos adjungeret , qui inæquali lege , ac periodo moverentur . Ipsa denique Ptolemaica Hypothesis optima videri poterat , nisi Cometæ liberè Cælum tranantes , Mars aliquando Sole sublimior , aliquando inferior , Mercurii , & Veneris orbitæ circa Solem , satellites circa Jovem , & Saturnum gyrantes , receptam Cælorum soliditatem , & veterem corporum cælestium ordinem invertissent . Eodem igitur jure Copernicana hæc opinio tanquam felicior , & verisimilior hypothesis tandiu haberi , defendique poterit , quandiu alia verisimilior inventa non fuerit , in quâ hæc eadem phænomena explicentur ; aut certè alia Hypothesis aliorum siderum motibus explicandis , quibus hæc impar sit ,

exco-

(a) *Quæst. Nat. VII. c. 26.*

excogitari debeat. In hoc itaque falli videntur ii, qui Copernicanum Systema veluti Theſim defendunt, quod inter Hypotheſes illas, quæ hæſtenus inventæ ſunt, unam tanquam Theſim habendam eſſe opinantur; cum revera Theſis inter innumeras ſolam Hypotheſes, quæ poſſibiles ſunt, eligi poſſit: aut certè veriſimiliùs de cœleſtium corporum ordine, motu; nulla Theſis, ſed ſolùm Hypotheſis inquiri, & feliciter adhiberi debeat. *Hæc enim, ut egregiè ait Lactantius, diſputando, & conjecturis velle comprehendere tale eſt profeſſò, quale, ſi diſſerere velimus, qualem eſſe arbitramur cujuſpiam remotiſſima gentis Urbem, quam nunquam vidimus, cujuſque nihil aliud, quàm nomen audivimus. Si nobis in eâ re ſcientiam vindicemus, qua non poteſt ſciri, nonne inſanire videamur, qui id affirmare audeamus, in quo revinci poſſumus. Age opinemur de ſtatu, & qualitate Urbis illius, qua nobis rebus omnibus præter nomen ignota eſt. Veriſimile eſt in plano ſitam, lapideis mœnibus, ædificiis ſublimibus, viis pluribus magnificis, ornatiſque delubris. Deſcribamus, ſi placet, mores, habitumque civium. Sed cum hæc dixerimus alius contraria diſputabit; & cum hic quoque peroraverit, ſurget & tertius, & alii deinceps, & opinabuntur multò diſparia, quàm nos ſimul opinati. Quid ergo erit ex omnibus veri certius? fortàſſe nihil. At omnia ſunt dicta, qua in rerum naturam, cadunt ut neceſſe ſit aliquid eorum eſſe verum. At neſcietur, quis verum dixerit. Poteſt fieri, ut omnes ex parte aliquâ erraverint, ex parte attigerint veritatem. Stulti ergo ſumus, ſi hoc diſputatione quaramus. Poteſt enim ſupervenire aliquis, qui opiniones*

nostras derideat, nosque pro insanis habeat, qui velimus, id quod nesciamus, quale sit, opinari. Verum non opus est longè posita conquirere, unde nemo fortasse veniat, qui nos redarguat. Age opinemur, quid nunc in foro geratur, quid in Curiâ: longum est id quoque; dicamus interposito uno pariete, quid fiat. Nemo potest id scire, nisi qui audierit, aut viderit. Nullus enim audet id dicere, quia statim non verbis, sed re ipsâ presenti refutabitur. Atqui hoc idem faciunt Philosophi, qui disputant in Cælo, quid agatur. Sed eo se id impunè facere arbitrantur, quia nullus existit, qui errores eorum coarguat. Quod si existimarent descensurum esse aliquem, qui eos delirare, ac mentiri doceret, nunquam quicquam de iis rebus, quas scire non possunt, disputarent (a).


VIII. Hæc autem paullo liberiùs, & prolixius fortasse dicta sunt, quàm instituta brevisitas pateretur. Operæ tamen pretium erat hæc omnia diligenter, & accuratè complecti, non solum, ut in re gravissimâ veritas ostenderetur, verum etiam, ut in aliis ejusmodi quæstionibus, quæ Scripturæ autoritatibus opponi videntur, facilè appareret, quantum rationi, quantum Fidei concedi debeat, & quidquid sapientes hujus Mundi de naturâ rerum veraciter demonstrare potuerint ostendamus, nostris literis non esse contrarium, atque ita teneamus fidem, ut neque falsa Philosophia, loquacitate seducamur, neque falsa Religionis superstitione terreamur (b).

PHY-

(a) Drvin. Infit. III. cap. 3. (b) Aug. de Gen. ad lit. I, c. 21.



PHYSICÆ
PARTICULARIS
TRACTATUS PRIMUS.



DISPUTATIO II.

De Cælo , & Corporibus Cælestibus .



Eterem , & Philosophorum omnium , sacrarumque Literarum authoritate celebrem Mundi divisionem sequutis pulcherrima nunc illius pars exponenda nobis occurrit , quæ mirâ quadam , & incredibili rerum magnitudine , atque splendore animum ferè rapit , dum illa contemplamur , quæ cælestia , quæ divina vocari meritò consueverunt . Dicendum est enim de Cœli substantiâ ; eorumque corporum naturâ , & proprietates omnes , quo meliori poterit ordine , sunt exponendæ , quæ amplissimis Cœli finibus continentur . Nihil est

autem, cur uberius hîc inquiramus, aut unde *Cœli* nomen originem duxerit, sive nimirum quoddam variis sideribus *cœlatum*, insculptum, distinctumque fuerit, sive quoddam homines tentorii instar *celet*, & contegat, aut quid ejusmodi *Cœli* nomine intelligi oporteat, cum id communi Philosophorum consensu satis appareat. Quamvis enim plerique veteres, & ipsæ divinæ Literæ *Cœli* nomine interdum aerem, supremam aliquando siderum regionem, interdum etiam universam Mundi compagem significaverint, nunc tamen ejusmodi voce illa regio, vel spatium illud exprimitur, in quo non modò sidera fixa, & inerrantia, sed ipsi quoque Planetæ reperiuntur, suasque periodos peragunt; ut quidquid proinde a Lunâ ad extrema sidera fixa diffunditur, *Cœli*, sive cœlestis regionis nomine nuncupetur. Hoc autem ordine in alterâ hac Disputatione progrediemur, quem ipsa ferè rerum, & loci opportunitas exigit, ut primùm de ipsâ *Cœli* substantiâ differamus, deinde verò siderum, Solis, aliorumque Planetarum naturam, distantiam, magnitudinem, periodos exponamus; postremò Cometas ipsos, qui inter cœlestia corpora haberi solent, & si quæ fuerint alia cœlestium corporum phœnomena, solitâ methodo complectamur. Utinam verò pulcherrimam, jucundissimamque Philosophiæ partem, nisi pro rei dignitate, non indecorè saltem exponere liceat; futurum enim sperarem, non solùm, ut singuli intelligant, quàm meritò dixerit Chrysippus (a), & Anaxagoras (b) homines *Cœli* suspiciendi causâ genitos esse, quandoquidem divinus Artifex, ut ait Ovidius:

Os

(a) Cic. de Nat. II. (b) Laër. II.

Os homini sublime dedit, Cælumque tueri

Iussit, & erectos ad sidera tollere vultus (a).

Et Aristoteles existimavit tenuissimam quoque rerum cœlestium cognitionem fore, vel maximæ, perfectissimæque scientiæ de terrenis hisce rebus anteponendam (b), verùm etiam, ut cœlestis originis nostræ memores degenerem animum terrenis rebus defixum, atque humi ferè serpentem revocaremus, & patriam nostram, a quâ veluti exulamus, vehementi quodam desiderio intueremur *.

CAPUT PRIMUM.

De Cœli substantiâ.

I.



Uamvis innumera, atque diversa plurimum sint, quæ de Cœli substantiâ dicenda nobis occurrunt, maximo tamen veluti fœdere ita inter se conjunguntur, ut ægrè ab invicem sejungi posse videantur. Vix etenim intelligi, vel explicari posse videtur, utrum cœlestis illa substantia ex Elementis ipsis formata, vel puriori quodam substantiæ genere composita fuerit, nisi simul accuratè inquiratur utrum corruptibilis, vel incorruptibilis; solida, vel tenuis haberi debeat, & opiniones illæ exponantur, quas a veteribus, recentioribusque Philosophis accepimus.

II. Atque, ut a veteribus exordiamur, communis est omnium ferè illorum opinio,

H 3

Cœlo-

(a) *Metam. I. ver. 85.* (b) *De Cœlo I.*

* Astronomia animum cogit sursum respicere, ac inde profectam eò reducit. *Plat. VII. de Republ.*

Cœlorum substantiam ab Elementis non differre, sed potius ex Elementis ipsis constare. Sic Anaxagoras ab Aristotele (a) reprehenditur, quod Cœlum omne igneum dixerit; Anaximenes etiam non solum igneam naturam cœlestibus corporibus tribuit, sed terrestrem quoque partem adjunxit (b), quod Anaximander ejus præceptor probaverat. Empedocles verò, quemadmodum sidera ignea putavit, ita Cœlum ex aere composuit (c). Parmenides denique, Heraclitus, Democritus, & Epicurus, alique complures igneam omnem Cœli substantiam existimaverunt (d), atque inter ceteros quidem memorari poterit Plato (e), qui ex Cœli splendore, & calore igneam fore illius naturam conjecit.

Neque alia fortasse videri poterit opinio sacrarum Literarum, si plures ex veteribus Ecclesiæ Patribus (f) consulamus, qui Cœlum ex igne, vel aquâ, vel aere compositum existimant; quamvis illustriores, atque inter ceteros D. Thomas (g) *aquas illas, quæ super Cœlos esse dicuntur*, non elementares existiment, sed illarum nomine aut crystallinum Cœlum intelligi oportere, aut aqueos vapores, qui repertiuntur in aere, cui sæpius Cœli nomen tribuitur, diciturque aer aquas ab aquis separare, quoddam vapores ipsos in aere dispersos ab aquis Oceani, fluminumque sejungat.

III. Unicus itaque, ac ferè singularis est Aristoteles, qui Cœlorum, & siderum substantiam

(a) *Meteor. I. cap. 3. & de gen. anim. II. cap. 3.*
 (b) *Stob. Ecl. Phys. 25.* (c) *Plut. I. c. 20.* (d) *Vid. Stob. loc. cit.* (e) *In Tim.* (f) *Cyrl Hieros. Cathec. 9. Ambr. Hexa. II. c. 3. Basil. Hexac. hom. 3. Aug. II. de Gen. c. 3.* (g) *In II. distin. 14.*

stantiam ab elementari diversam esse putaverit, ut nihil proinde cœlestium, & sublunarium rerum materiæ commune sit, cum nobiliori quodam substantiæ genere cœlestia corpora composita existimantur. Atque hæc est, ut ait Cicero, *quinta illa non nominata magis, quàm non intellecta natura* (a), quintum Elementum, quinta substantia, quæ ab Aristotele, & a Peripateticis omnibus admitti solet. *Manifestum enim existimant esse oportere substantiam aliquam corporis, præter inferiores has constitutiones, quæ ipsis omnibus diviniore, & prior sit* (b) *.

IV. Atque ista quidem veteres Philosophi de Cœli substantiâ. Recentiores autem (si Gassendum excipias, qui cœlestem regionem omninò vacuum arbitratur, in quâ nonnisi siderum radii, veluti tenuissima quædam fila quaquaversum liberè diffundantur) Cœli substantiam existimant ex tenuissimis, mobilibusque particulis esse compositam, quam ætheris nomine communiter solent appellare; quamvis Cartesius secundi elementi nomen usurpaverit. Quæ certè opinio ab Aristotelis mente non adedò dissidet, ut cum illa facile coherere non possit; quin etiam plurima Aristotelis loca afferri solent; in quibus ille ætheris nomine quintam illam, sive cœlestem substantiam intellexisse videtur; sed hæc inferiùs cum de soliditate Cœlorum.

V. Interim verò notari plurimum debet,
H 4 quod

(a) *Tuf. I.* (b) *De Cælo I. c. 2. t. 13.*

* Est aliquod præter corpora, quæ hic, & circa nos sunt, alterum separatum, tantò honorabiliorem habens naturam, quantò plus distat ab iis, quæ hic sunt. *Arist. I. Cæl. t. 16. 20.*

quod quamvis illustriores Philosophi Cœlos ex Elementis compositos, aut certè Elementis similes esse putaverint, plerique tamen incorruptibiles illos esse dixerunt. Empedocles certè, Anaximander, & Anaximenes, & si qui fuerint alii, qui Cœlorum soliditatem asseruerint, incorruptibiles etiam illos agnoverunt. Celebris autem est opinio Platonis, qui cœlestia corpora non quidem ab intrinseco, sive ex naturâ propriâ; sed ex Divinâ solum voluntate incorruptibilia docuit, undè in Timæo inducit Deum ita cœlestia corpora alloquentem: *Naturâ vestrâ estis dissolubilia, voluntate autem meâ indissolubilia; neutiquam tamen vos ulla mortis fata periment, quia mea voluntas majus, potentiusque vinculum est ad perpetuitatem vestram, quàm illud, quò fuistis tunc cùm gignebamini, colligata. Itaque Platoniorum sententia omnia hac, quæ de summo ad Lunam usque perveniunt, sacra, incorruptibilia, divina sunt, quia in ipsis est æther semper idem, & sicuti ætheris, & aeris, ita divinorum, & caducorum Luna consinium est (a).*

VI. Nobiliorem adhuc Cœlorum substantiam arbitratus est Aristoteles, qui non ab extrinseco solum, sed ab intrinseco etiam, nimirum ex ipsis quoque principiis incorruptibilem illam esse putavit, idque variis rationibus, quibus uti communiter solent Peripatetici, confirmavit.

1. Quid enim, inquit, verisimilius, aut ipsis Naturæ legibus accommodatius videri potest, quàm cœlestia corpora, quæ communi
bar-

(a) *Macr. Som. l. 2. 21.*

barbarum etiam gentium consensu, Deorum immortalium sedes habentur, omnis prorsus mutationis expertia fore, adeoque Diis immortalibus immortalem, & incorruptibilem sedem concedi (a)?

2. Non alia certè de causâ cœlestia illa corpora a sapientissimis Viris, & sacris etiam Literis creata dicuntur, quàm ut hominibus luce, calore, ceterisque virtutibus prodescent, rerumque generationes, quæ in solâ Tellure, veluti Theatro quodam fierent, motu, occultisque viribus promoverent.

3. Deinde corporibus cœlestibus quænam corruptibilitas inesse potest, quæ contrariis qualitatibus omnino carent, frigore nimirum, calore &c. sinè quibus alterari corpora, vel corrumpi non poterunt.

4. Huc etiam accedit, quod ut aliqua substantia corrumpatur, motibus contrariis subjici debet: cum igitur Cœli circulari motu ferantur, qui simplex est, & contrarium non habet, corruptibiles esse non poterunt.

5. Contigit autem, & hoc abundè, quantum ad Fidem humanam satis est, sensu confirmari. Siquidem, juxta traditam toto præterito tempore memoriam, nihil mutationis contigit neque in toto ultimo Cœlo, neque in ullâ partium propriarum ipsius (b). Hæc ferè sunt argumenta, quibus Aristoteles incorruptibilem esse Cœli substantiam demonstravit; hæc eadem sunt, quæ iisdem ferè verbis apud Recentiores Peripateticos expressa videri poterunt.

VII. Non defuere tamen Philosophi, qui aut ejusmodi rationibus nullam inesse vim
su-

(a) I. Cœl. t. 22. (b) Arist. I. Cœl. t. 27.

suspicientes, aut novis, accuratisque observationibus eruditi ipsa quoque siderum, & Cœlorum substantiam corruptibilem esse, & frequenter etiam corrumpi putaverint

1. Itaque reponere solent, esse quidem Cœlos ex Ethnicorum sententia Deorum sedem, hinc tamen nullâ ratione deduci posse, quod illi incorruptibiles esse debeant, cum divinæ, purissimæque substantiæ nulla, vel tenuissima labes, ac imperfectio inferri possit, quod corporeo, corruptibilique loco sit præsens, alioquin singulas etiam Universi partes incorruptibiles esse oporteret, cum omnes æqualiter (si Cœlum Empyreum excipias, in quo nobiliori quodam modo Deus existit) ejusdem Dei Regnum, & sedes haberi possint: quemadmodum igitur corpus humanum est corruptibile, quamvis incorruptibilis animæ sedes, & domicilium sit, ita quoque corruptibiles esse poterunt Cœli, quamvis in iis Dii reperirentur; idque Aristoteles ipse intelligere potuit ex celebri effato, quo, ut ipse commemorat, Heraclitus, adolescentes aliquos ipsum alloquuturos, & ad furnariam tabernam accedere verentes reprehendit, *In-
gredimini*, inquit, *ne huic quoque loco Dii
desunt immortales* (a); optimè ratus Deorum majestatem minimè dedecere, ut in vilioribus quoque, vel corruptibilibus locis reperirentur.

2. Cum verò dicitur, solùm Tellurem mutationi subjectam esse, principium petitur, aut certè nobis nimium tribuitur, ut omnia cœlestia corpora hac unâ de causâ facta arbitre-

(a) *Arist. de part. An. I. c. 5.*

tremur, ut nobis inserviant, quamvis ipsæ quoque mutationes, quæ in Cœlis fierent, nobis prodesse possent, ut de Cometis, maculis Solaribus suspicari fortasse liceat, ut suis in locis ostendetur.

3. Quod autem Aristoteles dixerit Cœlorum substantiam ab Elementari diversam esse, & contrarias qualitates calorem, & frigus &c. in illâ non reperiri, id levem, ac tenuissimam conjecturam esse opinantur Recentiores, cum nulla certa ratio, vel experimenta afferri posse videantur, quibus id invictè probeatur. Quin etiam verisimilius fortasse apparet, omnino similem fore cœlestium corporum, & sublunarium naturam, aut certè non adeò dissimilem, ut hæc corruptibilis, illa prorsus incorruptibilis existimetur. Sic Solem revera calidum esse, ceteras qualitates, quæ *elementares* vocantur, in singulis etiam Planetis reperiri inferius ostendetur.

4. Ac mirum sanè videri poterit, Aristotelem non aliâ ratione contrarias, & elementares qualitates corporibus cœlestibus negasse, nisi quòd illa circulari motu ferantur, qui simplex est, & nulli motui contrarius sit. Quasi verò inter motum, quo corpus aliquod localiter agitur, & corruptibilitatem illius aliqua conjunctio esse debeat, ut ex motu recto corruptibilitas, ex circulari incorruptibilitas inferatur. Deinde suspicari quis poterit in ipsoquoque circulari motu contrarietatem aliquam reperiri, dum corporis circumacti partes aliquæ sursum ascendunt, aliæ deorsum descendunt. Postremò cœlestia corpora, in hypothesi Ptolemaicâ ita moventur, ut contrariis veluti viribus, in occasum motu
diur.

diurno, motu verò proprio in ortum ferantur, atque interea in epicyclo tertiâ, quâdam periodo torqueantur.

5. Ad ultimum verò Aristotelis argumentum, quod ex sensuum experimento deducitur, & in quo maximam inesse vim arbitramur, ita plerique respondent, ut illud non inutile solum, & vitiosum existimari, sed in Aristotelem ipsum meritò retorqueri posse videatur. Quâ enim ratione inferri potest Cœlos corruptibiles esse, ex eo quod in illis nulla corruptio observata fuerit, cum sanè plures mutationes in illis haberi potuerint, quæ ob maximam, & infinitam ferè distantiam a nobis deprehendi nequeant? Plurima certè, atque infinita propemodum sunt; quæ non in Cœlo dixerim, sed in ipsâ Telluris superficie continentur, quæ a nobis videri non possunt, neque tamen illa negare, nisi temerè, ac impudentissimè liceat. Deinde si negativum illud argumenti genus vim ullam haberet, ostenderet etiam Tellurem ipsam incorruptibilem esse oportere, quia aliquis in Lunâ, vel in Marte positus leviores mutationes, quæ in globo terraqueo fiunt, non perciperet. Sed hæc leviora sunt, quæ Aristoteli facilè concedantur: quod verò rem ferè conficit, & in Aristotelem ipsum meritò retorqueri poterit est, quod accuratissimis observationibus erudimur plurimas in Cœlis mutationes fieri, & observari; ideoque ex ipsâ Aristotelis auctoritate Cœlos corruptibiles admitti oportere. Itaque nova sidera in Cœlis oriri, & interire primus omnium Hipparchus ducentis ante Christum annis; deinde verò illustriores omnes Astronomi Ticho, Keplerus,

rus, Phocilides, Fabricius, aliique innumerî observarunt. Cometas etiam Lunâ, ac subinde Sole altiores in eâdem cœlesti regione nasci, augeri, decrescere, ac tandem post aliquod temporis spatium evanescere complures existimant. Maculæ denique, quæ in Planetarum omnium superficie; præsertim verò in Sole, modò erumpere, modò interire, modò certâ quâdam periodo circa illum gyrare videntur, quid aliud innuere putaveris, quàm corruptibilem esse Cœli, omniumque corporum cœlestium substantiam? Certè vix aliter illa fieri, vel explicari posse videntur, quam si denuò gigni, & deinde corrumpi dicantur.

VIII. Hæc sunt, quæ a Recentioribus contra Peripateticos opponi solent. Peripatetici tamen se nondum causâ excidisse arbitrantur; & veterem opinionem ità tuentur, ut hæc omnia aut vitri ludibria, aut liberioris ingenii figmenta opinentur, aut certè plurimis etiam modis explicari posse existimant, quin incorruptibilitas Cœlorum deferatur. Quæ autem verisimilior putari possit inferiùs opportunè ostendetur cum de siderum, Cometarum, & macularum Solis naturâ, & origine differemus. Interim facilè Peripateticis concedi poterit: non omnia phænomena, quæ contra incorruptibilitatem Cœlorum afferri solent, revera id ostendere, cum certè plurima sinè ullâ prorsus corruptione fieri, & optimè explicari possint, ut illustriores etiam Astronomi fatentur; plurima tamen sunt, quibus Cœlorum corruptibilitas manifestissimè demonstratur.

IX. Sed altera jam cœlestis hujus substantiæ proprietas inquiri debet, solida nimirum,

an tenuis, & fluida videatur, hac enim in parte magis etiam inter se differunt Philosophi, quam in asserendâ Cœlorum incorruptibilitate, quam complures etiam admittere solent, qui solidam, aut fluidam Cœli substantiam existimant.

Quæ fuit Veterum Philosophorum opinio in hac celebri quæstione intelligi faciliè poterit, ex Plutarcho (a), qui illorum sententias ingenuè, & accuratè expressit. Is itaque refert, Anaximenem voluisse nihil aliud esse sidera, quam veluti *globos clavorum instar crystallo infixos* (b); quemadmodum etiam Empedocles solidum esse Cœlum putavit *glaciei in modum, ab igne ex aere compactum, & inerrantes stellas crystallo ait alligatas, errantes autem ab eo solutas* (c); unde Lactantius ex Empedoclis opinione *Cælum aerem glaciatum* vocavit (d).

Utrique tamen præluxisse videtur Anaximander, qui cœlestem substantiam solidam esse, crassamque docuit apud Stobæum (e). Qui hanc tamen sententiam de crystallinâ soliditate Cœlorum maximè illustraverit, est Aristoteles, qui Calippum, & Eudoxum sequutus innumeras illas sphaeras, quas alibi enumeravimus, solidas esse defendit. Vix autem ullum reperies, si ejusmodi Philosophos, & fortasse Ptolemæum exceperis, cui opinio hæc arriserit. Veteres enim, Recentioresque Philosophi tenuem, ac fluidam Cœli substantiam esse opinantur, in quâ Planetæ, & ipsa sidera, quæ *inerrantia* dicuntur, liberrimè moveantur.

X. Plu-

(a) Plac. II. c. 14. (b) c. 11. (c) ibi c. 13. & Lact. II. (d) de Opif. c. 7. (e) Ecl. Phys. 14.

X. Plurima verò sunt argumenta, quibus Peripatetici Cœli soliditatem tuentur.

1. Cum etenim eodem tempore sidera, & Planetæ duplici, & contrario motu ferantur, diurno quidem in occasum, proprio verò in ortum, necessarium est, ut alter ex his motibus, qui Planetæ cuilibet proprius est, illis ab intrinseco conveniat, alter verò, qui corporibus omnibus communis est, illis ab extrinseco imprimatur; itaut, dum superius aliquod Cœlum ex oriente in occasum celerimè movetur, omnia simul inferiora corpora secum abripiat, atque interim tamen, quodlibet Cœlum proprio, distinctoque motu ab occasu in ortum feratur, quod certè fieri, vel explicari non posset, nisi Cœlorum substantia solida in plures veluti sphæras accuratissimè tornatas, & invicem connexas divisa supponatur.

2. Quod si cœlestis illa substantia, in qua sidera, & Planetæ moventur, tenuis, & fluida supponatur, quamam lege constantes adèd siderum motus, ac certâ quadam periodo definitos peragi posse putabimus? non verò potius irregulares, adèd, & perturbatos illos futuros, in tantâ præsertim, ac serè incredibili velocitate, quâ sidera fixa moveri debent?

3. Cetera quoque phœnomena, quæ in Planetarum periodo observantur, sine Cœlorum soliditate salvari non posse videntur. Quid enim Planetas ipsos impelleret, ut ipsi aliquando Telluri proximiores, aliquando remotiores apparerent, aliquando celeriores, sive directi; aliquando verò tardiores, sive etiam retrogradi dicerentur? Si verò Cœlis ipsis
Pla

Planetæ, veluti clavi affixi sint, perenni, & æquabili illo motu ferentur, quo deferentes orbes, & epicycli moventur.

4. Accedit etiam, quod si Cœli fluidi ponantur, illorum corruptibilitas nullâ ratione defendi poterit; quæ enim fluida, & fluxa sunt, facillimè agitantur, permiscuntur, alterantur, novasque proprietates inducunt.

5. Postremò hæc eadem opinio pluribus Scripturarum testimoniis non suaderi solum, sed etiam invictè probari posse videtur. Dicitur enim in libro Job: *tu forsitan cum eo fabricatus es Cœlos, qui solidissimi, quasi ex are fusi sunt* (a)? Similiter ad Hebræos c. 4. dicitur Christum *penetrasse Cœlos*, sola autem solida corpora propriè penetrantur, cum fluida cedentia, ac flexibilia sint. Cœlum denique in sacris Literis *Firmamenti* nomine sæpiùs exprimitur, in quo Deus Solem, Lunam, & Stellæ collocavit, & quo veluti repagulo superiores aquas ab inferioribus divisit; quæ omnia de fluido corpore intelligi nequeunt.

XI. Tantùm verò abest, ut ii, qui fluiditatem Cœlorum defendunt, hisce rationibus, & auctoritatibus acquiescant, ut illas potiùs aut inutiles esse, aut in adversarios ipsos retorqueri posse arbitrentur.

Si etenim, inquit, sidera, & Planetæ diurno motu moverentur; quia a Cœlo quodam superiore inferius Cœlum abripitur in occasum, eâdem quoque ratione Cœlum inferius, motum, qui superiori sphæræ proprius est, recipere, & sequi deberet. Ut ex. gr. si Jupiter a Saturni Cœlo, cui immediatè subii-

(a) Job. c. 37. v. 38.

biicitur, ita diurno motu abriperetur, ut intra 24. horarum spatium integram periodum ex ortu in occasum absolvat, quidni eo quoque motu Jupiter abripiatur, quo Saturnus interim ex occasu in ortum 30. annorum spatium movetur?

2. Deinde concipi non potest, quomodo Cœlum superius aliud inferius, sibi que subiectum abripere possit. Si enim contiguæ illorum superficies asperæ, & inæquales prominentibus quibusdam veluti clavis infixæ, mutudque connexæ, & implicitæ sint, tunc, aut eadem futura est utriusque sphæræ velocitas, idemque motus, aut a mutuo contactu violenter avellentur. Si verò perfectè politæ, ac lævissimæ sint, ut Peripatetici existimant, nunquam superior inferiori vertiginem, motumque imprimere, aut impetum in illam transferre poterit; sicuti facili experimento manifestissimè demonstratur, quod si duorum corporum superficies contiguæ quidem, sed accuratè politæ, lævigatæque sint, circularis, aut rectus motus ex uno in aliud transferri non potest.

3. Neque si Planetæ, & sidera in fluido æthere liberè moveantur, vereri quis poterit, ne perturbati, & irregulares sint illorum motus; non solùm, quia Deus constantes illas periodos, & impetum semel impressum conservare potest, sive Angeli, qui movendis singulis orbibus solidis destinantur, singulis etiam corporibus cœlestibus in spatio fluido circumducendis affigi poterunt; sive denique, quia cœlestia corpora cum gravitatis, & levitatis expertia sint, nullâ ratione motui resistunt; unde impetus ille, sive dire-

etio, quæ semel a Deo determinata sunt, ut certa periodo, certam orbitam describerent, ut accuratius ostenderetur, cum de causâ motûs siderum dissetetur.

4. Irregulares itaque siderum motus, stationes, directiones, retrogradationes illorum hac ipsâ methodo salvari poterunt; nisi fortasse verisimilius arbitremur, illas non verè Planetis ipsis inesse, sed solum apparere, ut in hypothesi Copernicanâ, & Thiconicâ demonstratur. Inæqualis verò distantia Planetarum a Terrâ faciliè explicari poterit, si ab illis circuli excentrici, sive potius ellipses circa Tellurem describi dicantur.

5. Perperam verò, atque inutiliter Cœlorum incorruptibilitas ex illorum soliditate deducitur, ut incorruptibiles esse non possint, nisi solidi supponantur. Quamvis enim soliditas ad incorruptibilitatem plurimum conferat, fluidi tamen simul, & incorruptibiles esse possunt, ut a compluribus etiam Peripateticis est observatum. Ceterum neque solidi, neque incorruptibiles sunt Cœli, cum plurimas mutationes in illis observatas esse dixerimus, unde potius argumentum in Peripateticos ipsos retorqueri potest, quod si corruptibilitas cum soliditate conjungi non potest, Cœli autem sunt corruptibiles, solidi esse non possunt.

6. Quod unum superest, sacrarum Literarum testimonia vix illa videntur esse, quibus Cœlorum soliditas comprobetur. Celebris illa sententia, quæ ex libro Job communiter afferri solet, neque a Divino Spiritu, neque a Job expressa fuit, sed ab Eliu, qui inter plurimas alias absurdas propositiones illam effu-

effudit; ut meritò de illo dixerit *Dominus respondens Job de turbine. Quis est iste involvens sententias sermonibus imperitis* (a)? Sed quamvis ille sapientissimus etiam fuisset, eodem tamen loco, & pretio illius auctoritas habenda foret, quo haberi solet auctoritas, & opinio illustrium Astronomorum, qui Cœli soliditatem tuentur. Neque enim futurum arbitror, qui Divinam esse illius auctoritatem temerè suspicetur; nam alioquin primum, ac necessarium esset oppositæ sententiæ hæresis notam inurere, quod adhuc fieri certè non potest, cum præsertim 36. ex illustrioribus Ecclesiæ Patribus enumerentur, qui Cœli substantiam fluidam esse sacrarum Literarum testimonio docuerint (b). Locus illustris est apud D. Basilium, qui iisdem ferè verbis a D. Ambrosio exprimitur. Ille itaque de substantiâ Cœli, inquit, *satisfaciunt illa nobis, qua ab Isaiâ sunt dicta, qui vulgaribus verbis idoneum de naturâ Cœli nobis sensum aperuit, dum dicit, qui firmavit Cœlos sicut fumum; idest, qui tenuem naturam, non solidam, neque crassam, ad constituendam Cœli naturam fecit -- est enim puerilis, simplicisque mentis tales de corporibus celestibus opiniones habere* (c).

Firmamentum igitur vocatur Cœlum fiderum, vel Planetarum etiam, non quia solidum sit, sed ob stabilitatem, permanentiam, quâ perenni lege conservatur, cum præsertim Hebraica vox *expansionem*, sive *spatium* significet, ut Interpretes observarunt. Eadem-

(a) Job. c. 38. vers. 7. (b) Ap. Conimbr. de Cœlo.
(c) Hæc. II. c. 51.

que responsio ceteris autoritatibus, quæ ex Sacris Literis afferri solent, applicari facile poterit; nisi quod autoritas secundo loco proposita in hoc etiam peccat, quod corpora fluida verè, & rigorosè penetrari non posse arbitratur; quippe quæ cedant, cum paucis tamen interjectis lineis Apostolus dicat *gladium penetrare corpus*, quamvis eadem caro gladio cedere consueverit. Sed hæc jam ferè prolixius, quàm par fuerat.

Quid verò si argumenta, & accuratissimas observationes hîc adderemus, quibus recentiores Astronomi Cœlorum fluiditatem invictè probari posse gloriantur? Certum enim, perspectumque, atque ipsa meridianâ luce clarius existimant, omnia sidera, Planetas omnes circa propriam axem torqueri, secumque non elatiores modò partes, quibus veluti montibus componuntur, circumducere, sed maculas etiam, quæ circa illorum superficiem reperiuntur; Mercurium, & Venerem circa Solem veluti centrum gyrate ex observatis utriusque phasibus demonstratur, quatuor satellites circa Jovem, quinque circa Saturnum, alios etiam fortasse circa alios Planetas in æquali periodo moveri omnes fatentur: Martem aliquando proximior, aliquando remotior à Terrâ, quàm sit ipse Sol Ticho deprehendit: Cometas in cœlesti regione irregulares quasdam orbitas peragere plerique ex veteribus, & recentioribus opinantur: Planetas denique singulos non circulos, verùm ellipses circa Terram in altero umbilico positam describere accuratissimis observationibus erudimur. Quæ quidem, aliaque innumera satis ostendunt, Cœlos fluidos esse, ac
spi-

spirabili quadam, æthereâ, tenuissimâque substantiâ repleri. Neque aliâ certè Cœli natura videri poterat, si ingenitam ferè animis nostris opinionem consulamus, quâ prorsus inversimile judicamus, ut aeris regiones, quod superiores, vel à Tellure remotiores sunt, ed subtiliores etiam sint, deinde verò in Crystallinas Cœlorum sphæras impingatur: non verò potiùs aeris, atque ætheris substantia, quod longiùs a Terrâ recedit, ed rarior semper, atque subtilior evadat, ut illud etiam omittamus, quòd si Cœli essent solidi, non adeò pellucidi forent, sed radiis aditum prohiberent; aut certè siderum radii in illos incidentes ita refringi, inclinari, invicem uniri deberent, ut neque siderum locus, & ordo certò constarent, neque cetera sequerentur, quæ in cœlestibus corporibus admiramur. Hæc, aliaque id genus plurima in utramque partem de cœlesti substantiâ maximâ ingeniorum contentione dici solent. Qui hæc accuratè, & ingenuè perpenderit, atque illa præsertim, quæ suis in locis de Lunæ montibus, Veneris phasibus, Planetarum maculis, motu, periodo &c. opportuniùs explicabimus, faciliè intelliget, quæ nam ex his opinionibus verisimilior, & explicandis phœnomenis accommodatior haberi poterit.

C A P. II.

De Sideribus.

I.



ON aliud magnificentius qua-
sierit quispiam, aut didicerit
utilius, quàm de stellarum,
siderumque naturâ; an sint
flammei orbes, an solida qua-
dam, terrenaque corpora sint,
qua per igneos tractus labentia, inde splen-
dorem trahunt, coloremque, non de suo clara (a),
qui sit illorum numerus, magnitudo, distantia
periodus, aliaque id genus innumera, quæ
in illis incredibili prorsus admiratione con-
spicimus.

II. Quod itaque ad siderum substantiam
pertinet, etsi non eadem fuerit Philosophorum
opinio, plerique tamen in eo consensere, ut
ignea forent, vel certè terrestria quædam cor-
pora, quæ igne concepto, in superiorem lo-
cum avolaverint. Sic Empedocles, & Philo-
laus ignea, & ex igne constantia sidera pu-
tarunt, quem æther in se conceptum elisit
in prima Elementorum separatione. Parme-
nides etiam, & Heraclitus cùm Cælum igneum
arbitrarentur, densiores illius partes sidera
vocarunt; sicuti Plinius ex igne esse tot *Stel-
larum collucentium illos oculos* existimavit (b).
Anaximenes autem, quamvis igneam siderum
naturam habuerit, aliquam tamen terræ par-
tem, sed invisibilem miscuit, quemadmodum
Plato maximâ quidem ex parte ignem, sed
alio-

(a) Sen. *quest. Nat. VII. c. 1.* (b) *II. c. 58.*

aliorum quoque elementorum particulas adjecit, ferè ut Xenophanes ex ignitis nubibus formari ait sidera, quæ interdiu extincta, noctu tamen carbonum instar accenderentur. Longè lepidior est Anaximandri sententia, qui, cum circa extrema Mundi latera ignem collocasset, siderum sphaeram pluribus in locis in cribri formam perforatam esse putavit, eamque lucem, quæ per ejusmodi foramina traducitur, dum lentâ periodo perforata sphaera, cœlestem, sibi que circumfusum ignem subterlabitur, sidera vocavit (a); sed Anaxagoras ætherem ignitum, celerrimoque motu agitatam lapides aliquos abripuisse fabulatur, quos aded incenderit, ut sidera credantur: idque constanter, & præfidenter aded docebat, ut non modò casurum lapidem ex Sole in Ægos flumen prædixerit (*qui lapis etiam nunc ostenditur magnitudine vehis, colore adus*) (b) sed etiam ab Atheniensibus damnatus fuerit, quod Solem non Deum, aut animal, sed ignitum lapidem, laminam, vel massam ferream putaret; Anaxagoram præceptorem sequuti sunt Archelaus, Euripides, quorum ille laminam candentem, hic glebam auream Solem vocavit; quemadmodum Democritus, Metrodorus, & Epicurus, Solem, & ipsa sidera massam, aut lapidem igne candentem, vel è terrâ compactam molem, ac pumicis spongiaque modo perfusam, ab igne accensam esse docuerunt (c), & pumicis cum sit, per quoddam foramina splendorem ejaculari (d).

(a) Plut. II. c. 13. Laër. II. seg. & Srob. Ecl. Phys. 20. 5. (b) Plin II. c. 58. & Plut. lib. de superst. (c) Plut. c. 20. (d) Tasi. in Ar. Phan.

Hæc itaque sunt prima veluti nascentis Astronomiæ lumina, nisi fortasse veriùs conjectantis animi insomnia videantur; quæ si priscis illis temporibus, cum rudis adhuc, & indecora cœlestium corporum cognitio foret, aliquo in pretio habita sit, nunc certè vix illa videntur, quæ fusiùs exponi, vel seriò refutari debeant.

III. Plerique tamen, ex recentioribus etiam Philosophis igneam esse siderum substantiam arbitrantur eodem ferè argumento, quo veteres uti solebant, quia nimirum in sideribus lux, & calor reperitur, quæ duæ ignis proprietates existimantur; cumque eadem ferè sit Solis, & siderum natura, plurima verò sint argumenta, quibus ignea Solis substantia manifestissimè demonstratur, ipsa quoque sidera ignea, vel certè ignita videri poterunt.

Neque ab ejusmodi opinione plurimùm abhorre Cartesius videtur, qui sidera fixa totidem veluti Soles existimavit, ut, quemadmodum in nostro Vortice Sol reperitur, circa quem, veluti cor, & centrum Planetæ singuli moveantur; ita quoque singula sidera, aliorum Vorticum centra esse debeant, circa quæ alii Planetæ nobis invisibiles moverentur. Solis itaque, & siderum omnium substantia, juxta Cartesium, ex primi Elementi particulis componitur, quas tenuissimas, in infinitum divisibiles, & perenni, celerrimoque motu præditas ille affirmavit; unde etiam arcanam lucis, & caloris originem repetendam esse putavit, ut alibi dicitur.

IV. Sed quis apertè non videt huic opinioni plurima opponi posse ab iis præsertim, qui Copernicanam hypothefim averfantur cum
certè

certè intelligi vix possit, sidera perenni flammâ ardere, neque tamen decrefcere, vel consumi, celerrimâ vertigine circa Terram 24. horarum spatio torqueri, neque tamen dissolvi, vel avulsis subindè partibus dissipari? Quæ tamen a Cartesianis, aliisque Recentioribus reponi solent, inferiùs explicabuntur, cum de Solis substantiâ, ejusque maculis sermo opportuniùs inciderit; interim supponi commodè poterit, Solem, ac sidera nihil aliud esse, quàm ingentia quædam corpora fluida, quorum partes continuo, irrequieto, perennique motu agitentur, præsertim cùm certâ periodo circa proprium axem celerrimè moveantur, atque centrifugam vim exinde concipiant, neque aliundè lux, & calor ipse, quàm à celeri, perturbatoque partium motu oriri posse videatur.

V. Quandoquidem verò ignea, & corruptibilis siderum natura ex illis sideribus maximè probari posse videtur, quæ repentè in Cœlo oriri, deinde evanescere, augeri aliquando, aliquando minui observata sunt, operæ pretium erit admirabiles ejusmodi effectus, eorumque causas diligentius inquirere, quod superiori etiam loco facturos nos esse promissimus.

Illud est itaque non a Recentioribus modo sed a veteribus etiam Astronomis exploratum, nova aliquando sidera oriri: Hipparchus enim nunquam satis laudatus novam stellam, & aliam in avo suo genitam deprehendit, ejusque motu, quâ die fulsit in dubitationem est adductus, anne hoc sapius fieret, idemque ausus est posteris stellas annumerare, ac sidera ad normam expandere, organis excogitatis, per qua singulorum

lorum loca, atque magnitudines signaret, ut facile discerni posset ex eo, an omnino aliqua transirent, itemque an crescerent, minuerenturque Cælo in hereditatem relicto si quisquam inventus esset, qui ratione eam caperet (a).

Sed quod Hipparchus, alique plures optaverant, nostris solum temporibus reservatum esse gloriamur: nemo siquidem ex veteribus alia sidera deprehendit donec, exacto fere 1700. annorum spatio, anno 1572. nova stella in *Cassiopejâ* ab Astronomis omnibus, præsertim verò a Tichone est observata, quæ cum initio Veneri par foret, ita paullatim decrevit, ut post 2. annos evanuerit (b).

Aliam tertiæ magnitudinis in *Cate* deprehendit David Fabricius anno 1596. per menses 2. Aliam in *Cycno* Keplerus ab an. 1601. quæ usque ad 1661 decrevit, & evanuit, iterumque visa est ab Hevelio anno 1666. Alia in *Serpentario* 1604. ab eodem Keplero per annum. In cingulo *Andromeda* vidit aliam. Simon Marius 1612. & 1638. aliam 3. magnitudinis in collo *Cati* Fabricius, atque Phocilides, quæ singulis annis occultatur, & prodit iisdem fere temporibus, ut ab Hevelio, deinde à Cassino observatum est, qui ejus phasies diebus 330. redire comperit, quamvis aliquando 15. diebus prævertant; aut retardentur. Innumeras alias siderum mutationes hic enumerare non vacat, cum id egregiè præstiterint Hevelius in *Prodromo*; Gregorius in *Astron. lib. II. prop. 30. (c)*, quæ certè non prorsus fabulosum esse demonstrant id, quod

D. Au-

(a) *Plin. II. c. 26.* (b) *Greg. Astr. II. prop. 30.*
(c) *Od. Selt. IX. obser. 5. 6. 7. vid. Hist. 1709.*

D. Augustinus (a) refert ex libris M. Varronis Stellam Veneris semel magnitudinem, & figuram mutasse; quod sub Ogyge Rege factum Adraſtes, Cyzicenus, & Dion Neapolites prodiderunt; aut illud etiam, quod à veteribus Poëtis memoratur septimam Plejadum, quæ *Merope*, vel *Electra* dicebatur, poſt belli Trojani tempora evanuiſſe, imminuto ſic illarum numero

Quæ ſeptem dici, ſex tamen eſſe ſolent (b).

VI. Incredible eſt autem quàm multa Philoſophi ingenioſè excogitaverint, ut incorruptibilitatem Cœlorum, quæ his argumentis graviter labefactari, & everti propemodum videbatur eâ, quâ par eſt, conſtantiâ tuerentur. Alii nimirum hæc ſidera non in firmamento; ſed in ſupremâ potiùs Aeris regione, ubi Cometæ accendi, & moveri ſolent, exiſtere opinabantur. Alii ad divinam voluntatem veluti ad aram confugientes novum ſidus in Cœlo creatum eſſe dixerunt. Alii verò impreſſam ſolùm cuidam cœleſti parti lucem, quæ ſideris inſtar effulgeret. Alii non novum ſidus id eſſe; ſed, cùm antea ob exiguitatem inviſibile foret, tunc demum apparere, cùm craſſior aliqua ſphærarum inferiorum pars illi ſupponeretur, adeoque apparentem illius magnitudinem augetet. Alii tunc nova ſidera apparere, cum plura minutiora ſidera, quæ ſeparata inconſpicua, fuerant, uniuntur. Alii, qui corruptibiles Cœlos aſſerere non verebantur, hæc eadem nova ſidera ex congeſtis Solis, Planetarum, aliorumque corporum cœleſtium exhalationibus

(a) *Cleit. XXI, c. 8.* (b) *Ovid. Faſt. IV. ver. 168.*

bus ignis calore; vel intestino motu accensis repente oriri dixerunt, tandiuque effulgere, quandiu novarum exhalationum esca suppeteret. Alii denique alia, quæ hîc retexere nec juvat, nec decet. Sed, ut ingenuè loquamur, nulla ex his responsionibus argumenti vim eludit, & vitio caret.

VII. Ac primò nova illa sidera in Firmamento fuisse unanimis Astronomorum omnium consensus, & argumentum parallaxis invictissimè ostendit. Neque ulla necessitas impellit, ut neglectis naturalibus, ex secundis causis ad primam confugiamus. Crassior illa sphaerarum inferiorum pars, paullo liberiùs effingitur. Quemadmodum etiam minutiora sidera frequentius, & certâ periodo, ac lege conjungerentur. Quæ tanta denique cœlestium exhalationum copia esse poterit, quæ ingentia, adeò corpora constituere, perennem ignem, quo consumerentur reparare, velocissimò tandem motu circumagi posset?

VIII. Verisimilius est itaque sidera non denuo oriri; nec interire, sed aliquando solùm videri, aliquando verò occultari. Id autem non aliâ meliori ratione fieri, vel explicari posse videtur, quàm si supponatur sidera fixa circa proprium axem converti certâ quadam periodo, & substantiâ, sive materiâ componi, quæ inæqualiter lucida sit, ita ut dum lucidiorem partem, nobis obvertunt, effulgere, & oriri, dum verò obscuriorem, illa evanescere, & interire dicantur, nisi fortasse Cartesii opinio magis arrideat, qui siderum superficiem crassioribus secundi, & tertii Elementi particulis nitrosis, atque sulphureis ita crustâ, vel corticis instar aliquando obduci posse

posse arbitratur, ut ipsa sidera occultentur, a quibus deinde particulis liberata, rursus appareant. Sed priorem illam sententiam egregiè confirmat Solis, & Planetarum omnium analogia, in quibus ille motus circa proprium axem observatur; confirmat regularitas, & constantiâ motûs, quâ eadem sidera apparent, aut redeunt (a); invictè denique probat similis proprietas in quinto Saturni satellite, qui dum Terræ proximior est, numquam videtur, videtur autem superiori parte suæ orbitæ, dum a Tellure remotior est: quod certè fieri, & explicari non potest, aut solet, nisi ad inæqualem hanc lucem, siderumque motum recurratur.

Quæ cum ita sint, facilè apparet, quod ex his novis sideribus, quæ hætenus observata sunt, neque cœlestis substantiæ corruptibilitas inferri, neque siderum fixorum numerus augeri potest, sed ille solum siderum numerus nostris etiam temporibus Cœlo inesse putandus erit, qui olim a divino Artifice positus, ac definitus est, quamvis interdum aliqua sidera nobis conspicua repenti fiant, sive repente occultentur.

IX. Sed, inquires, quis nam ejusmodi siderum numerus censi poterit? Difficile est prorsus, & impossibile stellarum numerum definire. quarum multitudo *innumerabilis* dicitur, ab Aristotele (b), *imperscrutabilis* a Theophrasto (c), *incomprehensibilis* a Chrisippo (d), *immensa* a Cleomede (e), *infinita* a Gemi-

(a) Hist. 1719. (b) II. Cœl. c. 1. s. 61. (c) De Mundo (d) Ap. Stob. Ecl. 25. (e) Lib. I. c. 5.

Gemino (a), & Ptolemæo (b), a Sacris Literis (c) soli Deo cognita, qui numerat multitudinem stellarum, & omnibus eis nomina vocat, & arenæ numero æqualis; etſi ut egregiè ait Auguſtinus quantum ad multitudinem pertinet quid ſunt ſtella Cœli ad arenam Terra? niſi quis & iſtam comparationem in tantum ſimilem eſſe dicat, in quantum etiam ſtella dinumerari non valent. Quia nec omnes eas videri poſſe credendum eſt, nam quânto quiſque acutiùs intuetur, tanto plures videt, unde, & acerrimè cernentibus aliquas occultas eſſe meritò exiſtimatur (d), quicumque verò ſtellarum numerum comprehendiffe, & conſcripſiſſe jaſtantur, ſicut Aratus, vel Eudoxus, vel ſi qui alii ſunt, eos libri Geneſeos contemnit auctoritas (e);

Quid verò ſi egregius ille Doct̃or teleſcopio noſtro oculum admovere potuiſſet, & infinitam ferè ſiderum ſeriem intueri? Vidiffet nimirum in unico, vel altero Orionis gradu ſtellas quingentas, quas omnium primus Galileus obſervavit: vidiffet in illâ Cœli parte, in quâ *Plejades* conſpiciuntur, innumeras alias ſtellas reperiri; vidiffet denique Galaxiam nihil aliud eſſe, quàm minutorum ſiderum congeriem (f), atque inde facilè ſuſpicari potuiſſet longè fortasſe majorem eſſe illorum numerum, quæ oculos noſtros, & etiam teleſcopium effugiant, quam, quæ illorum ope conſpiciantur,

X. Veteres tamen, & recentiores Aſtronomi
nu-

(a) *Iſag. c. 14.* (b) *Almag. VIII.* (c) *Pſal. 146. ver. 4.* (d) *Civis. XII. c. 23.* (e) *Civis. XVI. c. 23.* (f) *Hug. Syſt. Satur.*

numerum aliquem definire consueverunt, qui lucidiora, & nudis oculis conspicua sidera complectatur, neque proinde mirari subeat, si plurimum inter se differant; nam, ut admonuit D. Aug. diversis oculis, diversa siderum multitudo apparere debuit (a)

Hipparchus itaque 1080 sidera numeravit, alii apud Plinium (b) 1600. Ptolemæus (c) 1012. quem numerum posteriores omnes Astronomi usque ad Tichonis ætatem retinuerunt. Hic enim cum Keplero 310. sidera observavit, quæ a Ptolemæo prætermissa fuerant; additæ deinde sunt a Bayero 317. unde omnes simul stellæ ferè 1709. sive ut numeratæ sunt ab Hevelio, 1888. communiter haberi possunt, quarum plurimæ veteribus conspicuæ fuerant, aliæ nuperrimè circa Polum australem, sive antarcticum sunt observatæ.

XI. Hæc verò sidera, ut facilius deprehendat, vel aliis ostendi possent, in plura signa, sive *constellationes* accuratè divisa, ac veluti depicta sunt. Sciendum autem est neque *Cepheum*, neque *Cassiopejam*, neque *Andromedam* in Cælo esse revera, ridiculum enim foret putare Cælum *Asterismis* ante hac caruisse. Perpetuò itaque ante *Perseum*, & *Orionem* stella fuerant: quare & apud varias nationes, varia siderum nomina habebantur, siquidem in sphaerâ *Ægyptiorum* nec ratio habetur, nec denominatio *Draconis*, aut *Ursarum*, aut *Cephei*, sed alia forma simulacrorum, nominaque alia imposita extant, sic in ipsâ quoque *Chaldaorum* sphaerâ.

Cum

(a) Vide Greg. Astro. lib. II. præf. 29. (b) II. c. 41.
(c) Astrag. III. (d) Tasi. in Arati Phæn.

Cum verò signorum nomina, qui nostris his temporibus adhibentur ex Græciâ in Latium translata fuerint, id ita intelligi debet, ut quamvis illorum originem ad Jovis in Italiâ regnantis tempora referat Virgilius asserens, quod

*Navita tum stellis numeros, & nomina
fecit*

*Plejadas, Hyadas, claramque Lycaonis Ar-
cton (a);*

Vetustissimi tamen Poëtæ Euripides, Sophocles, Hesioidus, & Hômerus, & Orphæus, Syrii, Orionis &c. meminerunt; quemadmodum etiam in libro Job, qui mille annis bellum Trojanum præcessit, *Arcturus, Hyades, & Orion* nominantur (b).

Quin etiam constellationum nomina, & origo priscis temporibus ab agricolis, pastoribus, & nautis ipsis derivata cenferi poterit, qui certum quemdam siderum ordinem contemplati familiaria illis nomina *Arietis, plausfri* imposuerunt, vanis deinde Poëtarum fabulis, atque præsertim elegantissimis Ovidii Carminibus conservata, ac illustrata.

Præclarè verò, & egregiè meritis est Eudoxus, qui cum eadem constellationum nomina ab omnibus usurpari animadverteret, in convexâ globi superficie illas depinxit, & omnia sidera suis in locis accuratè delineavit, opere etiam edito illustravit, quod Græcis Carminibus ab Arato expressum, & *Phænomena* vocatum a Cicerone Latinâ voce donatum, & ab Avieno, Hipparcho, Ptolemæo, aliisque compluribus illustratum est.

XII.

(a) *Georg. I. ver. 136.* (b) *Job. cap. 9. ver. 9.*

XII. Constellationes illæ, vel cœlestia signa ab Arato, Hipparcho, Ptolemæo 48. numerantur, cum alii pauciora enumerent.

Unus est Plinius, qui illa duo, & septuaginta (nisi verisimilius cum Scaligero *duo de quinquaginta* legendum sit) putaverit. Ex his autem constellationibus 12. in Zodiaco continentur 21. in Boreali Cœli parte, 15. reliqua in Australi; quibus addi poterunt 2. aliæ 12. circa polum Australem olim inconspicuæ, at recentioribus observatæ, & propriis etiam nominibus insignitæ sunt Omnes autem, ut altius memoriæ inhæreant, hic versibus complecti libuit.

Insunt signifero his sex cœlestia signa.

Sunt Aries, Taurus, Gemini, Cancer, Leo, Virgo,

Libraque, Scorpium, Arcitenens, Caper, Amphora, Pisces.

Ad Boream verò ter septem conspiciuntur.

Ursa minor, major, Custos, Draco, Gemma, Genuque

Prolapsus, Lyra, Olor, Cepheus, & Cassiopeja;

Perseus, Andromede, Delotnm, Auriga, Caballus,

Sectio-equi, Delphin, Telum, hinc Aquila, Anguifer, Anguis;

Denique converti ter quinque notantur ad Austrum,

Cetus, & Eridanus, Lepus, Orionis, & attrum,

Syrius, & Procyon, Argo, Ratis, Hydraque, Crater,

Corvus, Centaurus, Lupus, Ara, Coronaque, Piscis;

Tom. IV.

K

Ad-

Aldita sunt etiam Australi nunc sidera Cælo.
Phoenix, Grux, Indus, Xyphius, Pavo,
Anser, & Hydrus,

Passer, Apus, Triquetrum Muscæque, Chamæleonque.

XIII. Incredibilis autem illa cœlestium signorum pulchritudo præsertim oritur ex ipsâ siderum varietate, cum non omnia sidera, quæ in illis continentur æqualis magnitudinis appareant, sed in sex veluti classes ab Astronomis dividantur. Itaque sidera magnitudinis primæ sunt 15., secundæ 45., tertiæ 108., quartæ 474., quintæ 117., sextæ 49. obscuræ 9. nebulosæ denique 5.

Inæqualis verò siderum magnitudo vel vera esse potest, vel solum apparens, ex solâ nimirum inæquali illorum distantia a Terrâ oriri; perinde enim est, an omnia sidera mole æqualia, sed inæqualiter remota, an æqualiter dissita, sed inæqualia mole dicantur.

Certè, si veteres consulamus, *Xenocrates secundum unam superficiem Stellas moveri autumavit* (a); atque Chrysippus: *Sidera in unâ, eademque superficie, prout apparent, infixæ, fore putavit* (b), quod Auctor libri de Mundo, & omnes ferè Peripatetici confirmarunt. Stoici verò *Stellas alias, aliis esse humiliores, atque altiores dixerunt* (c), ut illæ notis majores videantur, quæ ad nos proximius accedunt, minores verò, quæ longius a nobis dissident. Quemadmodum eleganter ait Manilius de tribus illis sideribus, quæ in

ca-

(a) *Plut. II. c. 15.* (b) *ap. Strab. Ecl. 25.* (c) *Plut. loc. cit.*

capite *Orionis* collucent, & exigua videntur
*Non quod clara minùs, sed quod magis alta
 recedunt (a).*

Hæc eadem fuisse videtur opinio Pythagoræ, aliorumque, qui sidera fixa, vel inerrantia, totidem Mundos esse putarunt. Cartesius sanè, qui illos in asserendâ Vorticum, sive Mundorum multitudine est æmulatus, arbitratur, sidera esse totidem Soles respectu Vorticum, circa quos Soles, veluti centra alii Planetæ, aliæque Terræ moveantur. Cum itaque Vortices illi inæqualiter a nostro Vortice, vel a Tellure distent, & perturbatâ quadam serie per indefinitum Universi spatium collocentur, ipsa quoque sidera inæqualiter a Terrâ recedent. Hæc autem omnia, etsi ob immensam ferè siderum distantiam certò deprehendi, vel definiri, non possint, verisimilius est tamen inæqualem esse illorum distantiam; cum præsertim, si mole sint inæqualia, aliqua semper inæqualitas, etiam in illorum distantia admitti debeat, quocunque demum certo communi limite stellarum distantia definiatur. Si enim dicantur sidera unam, eandemque sphericam superficiem in inferiori sui parte contingere, inferior illorum pars, & centrum inæqualiter a Terrâ distabit; sicuti si inferiori sui parte unam, eandemque sphericam superficiem contingerent, superiori parte inæqualiter a centro Terræ distarent.

Maximo quidem argumento probari posset hæc inæqualis stellarum distantia, si dum lentâ periodo liberè per ætherea spatia moventur, una alteri supponeretur, eamque te-

(a) *Lib. 1. c. 4.*

geret, ut in Planetis contingit; sed constans illa siderum distantia, & immutabilis ordo, quem inter se, celerrimo licet impetu in Ptolemæi, vel Tychonis hypothese abrepta, conservant, non sinit, ut hac methodo rem jucundissimam contemplemur. Hinc illa *fixa*, vel *inerrantia* meritò dicuntur, cum nunquam sibi proximiora fiant, aut ab invicem sejungantur, eumque ordinem nostris adhuc temporibus constantissimè, & accuratissimè tueantur, quem in illis Hipparchus, & Ptolemæus observarunt. Sic *Virgilia neque a sui unquam se copulatione dispergunt; nec Hyadas, quæ vicina sunt, deserunt; septem Trionum quoque compago non solvitur; anguis, qui inter eos labitur, semel circumfusus non mutat amplexum (a), sed*

Jam tum, cum Graja verterunt Pergamæ gentes

Arctos, & Orion adversis frontibus ibant (b).

XIV. Quæcumque tamen hypothesis circa veram siderum magnitudinem eligatur, ex accuratissimis adhuc observationibus, illorum distantia definiri poterit, quæ majora nobis apparent, indeque sumi conjecturæ, quibus ad illorum distantiam progrediamur. Ac pudet certè veterum hac in re ignorantiam fusiùs exponere, qui cum Ægyptiis, Lunam ex hyperboreorum insulâ ita conspici putarunt, ut nihil ab ipsâ Tellure distaret (c), sive cum Plinio (d) montibus contiguam credidere; quemadmodum Ægyptii Saturni distantiam 3843. stadiorum esse putaverint, adeoque fide-

(a) *Macr. Somn. 1. c. 18.* (b) *Manit. 1.* (c) *apud Diob. II.* (d) *II. c. 23. vid. Censor. de die Nat. c. 21.*

siderum paullo majorem; quemadmodum Pythagoras siderum distantiam duplo majorem esse censuit intervallo Solis a Terra (a). Certiores itaque siderum distantias ex illustrioribus Astronomis desumptas hinc ordine subiciemus. Atque, ut ex distantia siderum, & apparente illorum diametro cognita, vera quoque illorum diameter, & magnitudo, juxta leges Opticæ facile intelligatur, hæc etiam accuratè simul exponemus, ut unico fere intuitu dissidentes aded de re gravissimâ sapientissimos Viros admirari liceat. Methodus autem, intricatissimæque supputationes, quibus infinito fere studio hæc omnia explorata sunt, non ex his rivulis, sed ex ipsis Astronomiæ fontibus inquiri debent. Itaque juxta Lansbergium sidera magnitudinis

Primæ	Con-	216125000000
Secundæ	ti-	675000000000
Tertiæ	ti-	270000000000
Quartæ	nent	84375000000
Quintæ	Ter-	11250000000
Sextæ	ram.	1350000000

Distantia verò siderum a Tellure ab eodem Lansbergio definitur 18000. semidiametrorum Orbis magni sive 420000000. semidiametrorum Terræ, qualium 1500. in semidiametro orbis magni continentur. Quod si semidiameter orbis magni 24000. semidiametros terrestres contineat, ut Hugenius existimavit, fieret distantia siderum a Terrâ semidiametrorum terrestrium 672000000. paullo major, quam

K 3

ab

(a) *Plus. II. c. 5.*(b) *Plus. II. c. 5.*

ab Hugenio definita fuerit; qui ex suis observationibus illam esse demonstrat semidiam. Terræ 663936000; atque immane dissidet ab opinione Tychonis, qui maximam siderum distantiam esse arbitratur semidiametrorum terrestrium 14000.

XV. Dicendum postremò foret de siderum motu, nisi id superiori locò cum de phœnomenis cœlestibus ageretur præoccupatum fuisset. Duplex est itaque siderum motus; diurnus nempe, quo 24. horarum spatio ex oriente in occidentem feruntur, & proprius, quæ ex occasu in ortum lentè adeò peragitur, ut tota periodus absolvatur annis 25000. aut 36000. juxta diversas Astronomorum opiniones, cum singulis centum annis sidera conficiant juxta

Ptolemæum gr. 1.

Copernicum 1. 23.¹ 40.¹¹ 12.¹¹¹

Tichonem 1. 25.¹

Flamstedium 1. 23.¹ 20.¹¹

Bullialdum 1. 24.¹ 54.¹¹

Hevelium 1. 24.¹ 46.¹¹ 50.¹¹¹

ideoque juxta Tichonem, quem accuratiores Astronomi sequuntur, singulis annis 51.¹¹ percurrant, vel; ut arbitratur Cassinus singulis annis peragunt 51.¹¹ $\frac{1}{2}$; gradum unum spatio 70. annorum; adeoque integram periodum, sive circulationem annis 25100. (a). Atque ista quidem periodus est illa, quæ Platonius annus sidereus annus magnus dicebatur, quo nimirum peracto, eundem futurum arbitrabantur Platonici siderum ordinem, distantiam,

tiam; aspectum, qui in primum Mundi origine fuerat; adeoque ipsa quoque terrestria corpora, quæ a cœlestium influxibus, & motu omnino dependent, eadem reditura, ut eleganter ait Poëta

*Alter erit tum Tiphys, & altera qua vebat
Argo*

*Delectos Heroas, erunt etiam altera bella,
Atque iterum ad Trojam magnus mittetur
Achilles (a).*

XVI. Ex hoc autem duplici siderum motu factum est, ut tres illorum ortus, & occasus a Poëtis præfertim memorentur, *Cosmicus, Achronicus, & Heliacus.*

I. Cosmicus ortus est, cum stella simul cum Sole oritur, ut sunt illa sidera, in quibus Sol reperitur.

II. Chronicus, cum stella oritur eo tempore, quo Sol occidit.

III. Heliacus denique, cum stella solaribus radiis oppressa, ab illis recedit, & videri incipit.

I. Occasus verò Cosmicus cum stella occidit oriente Sole.

II. Chronicus cum stella simul cum Sole occidit.

III. Occidere Heliacè dicitur stella, cum a Solis radiis tegitur.

Diversus autem siderum ortus, & occasus sequentibus versibus continetur.

Cosmicus est ortus dum Sol ascendit & a-
strum.

Achronicè surgit, dum Sol demergitur, a-
strum.

Heliacè quando a radiis solaribus exit

*Cosmicus occasus cum Sole oriente recedit ;
Achronicus verò si Sol descendit , & astrum
Heliacus nimia si Solis luce tegatur .*

C A P. III.

De Sole.

I.



Astenus illorum siderum naturam , distantiam , magnitudinem , atque periodum contemplati sumus , quæ fixæ , vel inerrantia dicuntur : nunc illa complectimur , quæ errantia vocari solent , quod inæquali periodo ita ferantur , ut inæqualis etiam illorum ordo , & distantia nobis appareat . Atque infixarum quidem Cælo Stellarum , ut antea vidimus , immensa fere multitudo est ; Errantes verò incertum adhuc , an plures sint ; sed hactenus septem , Sole nimirum , & Lunâ computatis , nobis innotuerunt (a) . Democritus certe subtilissimus antiquorum omnium suspicari ait se plures stellas esse , quæ currant ; sed nec numerum illarum posuit , nec nomina , nondum comprehensis quinque siderum cursibus (b) ; atque Artemidorus non has tantum quinque stellas discurrere ait , sed solas observatas esse ; ceteram innumerabiles ferri per occultum , ac vagari (c) .

II. Septem itaque Philosophorum omnium iudicio sunt illa sidera errantia , quæ stellæ
errant.

(a) Clem. I. c. 3. (b) Sen. Nat. Quæst. VII. cap. 3.
(c) Ibi c. 13.

errantes, erratica (a), vaga (b), sive *Planetae* dicuntur. Qui etenim quinque solum Planetas enumerant, Solem, & Lunam ob insigne lucis, & magnitudinis discrimen tum a sideribus fixis, tum a ceteris Planetis distinguunt; quemadmodum apud veteres Sol, & Luna non sidera, neque Planetæ, sed *lumina (c)* vocabantur; ut in sacris etiam Literis *luminaria magna (d)* dicuntur. Ubi verò feliciter novem alia sidera circa Jovem, atque Saturnum errantia superiori seculo primum inventa sunt, septem illi Planetæ veteribus cogniti *primarii* dici cæperunt; cum alii nuperrimè inventi *secundarii*, sive primariorum *asseda*, sive *satellites* habeantur. In Copernicanâ tamen hypothese Luna Telluris, & Planetæ singuli cum ipsâ Tellure Solis asseda, sive satellites supponuntur: undè sex tantum in illâ hypothese Planetæ primarii circa Solem, veluti Universi centrum, rotati enumerantur. Quemadmodum juxta Tychonem duo solum primarii Planetæ circa Tellurem Universi centrum moventur Luna, & Sol; cum ceteri veluti Solis asseda, vel secundarii habeantur. Quo autem ordine, quibusque temporibus hæc septem sidera observata, nomenque sortita fortasse fuerint inferiùs ostendetur: interim hæc est illorum series, & nomina a Deorum nominibus derivata, *Luna, Mercurius, Venus, Sol, Mars, Jupiter, Saturnus*.

« *Luna, Mercurii, Veneris, Solisque* refulgent
Si-

(a) *Agel. XIV. c. 1.* (b) *Cic. Tuscul. I. & Nat. II. & Plin. II. c. 6.* (c) *Macrobi. Somn. I. cap. 18. & 21.* (d) *Gen. c. 1, vers. 16.*

*Cosmicus occafus cum Sole oriente recedit ;
 Chronicus verdè fi Sol descendit , & aſtrum
 Heliacus nimia fi Solis luce tegatur .*

C A P. III.

De Sole.

I.



Aſtenus illorum ſiderum naturam , diſtantiã , magnitudinem , atque periodum contemplati ſumus , quæ fixa , vel inerrantia dicuntur : nunc illa complectimur , quæ errantia vocari ſolent , quod inæquali periodo ita ferantur , ut inæqualis etiam illorum ordo , & diſtantiã nobis appareat . Atque infixarum quidem Cœlo Stellarum , ut antea vidimus , immenſa ferè multitudo eſt ; Errantes verdè incertum adhuc , an plures ſint ; ſed hætenus ſeptem , Sole nimirum , & Lunã computatis , nobis innotuerunt (a) . Democritus certè ſubtiliſſimus antiquorum omnium ſuſpicari ait ſe plures ſtellas eſſe , quæ currant ; ſed nec numerum illarum poſuit , nec nomina , nondum comprehenſis quinque ſiderum curſibus (b) ; atque Artemidorus non hæc tantum quinque ſtellas diſcurrere ait , ſed ſolas obſervatas eſſe ; ceterùm innumerabiles ferri per occultum , ac vagari (c) .

II. Septem itaque Philoſophorum omnium iudicio ſunt illa ſidera errantia , quæ ſtellæ
 errant.

(a) Cleom. I. c. 3. (b) Sen. Nat. Quaſ. VII. cap. 3.
 (c) Ibi c. 13.

errantes, erratica (a), vaga (b), sive Planeta dicuntur. Qui etenim quinque solum Planetas enumerant, Solem, & Lunam ob insigne lucis, & magnitudinis discrimen tum a sideribus fixis, tum a ceteris Planetis distinguunt; quemadmodum apud veteres Sol, & Luna non sidera, neque Planetæ, sed *lumina (c)* vocabantur; ut in sacris etiam Literis *luminaria magna (d)* dicuntur. Ubi verò feliciter novem alia sidera circa Jovem, atque Saturnum errantia superiori seculo primum inventa sunt, septem illi Planetæ veteribus cogniti *primarii* dici cæperunt; cum alii nuperrimè inventi *secundarii*, sive primariorum *affecta*, sive *satellites* habeantur. In Copernicanâ tamen hypothese Luna Telluris, & Planetæ singuli cum ipsâ Tellure Solis affectæ, sive satellites supponuntur: undè sex tantum in illâ hypothese Planetæ primarii circa Solem, veluti Universi centrum, rotati enumerantur. Quemadmodum juxta Tychonem duo solum primarii Planetæ circa Tellurem Universi centrum moventur Luna, & Sol; cum ceteri veluti Solis affectæ, vel secundarii habeantur. Quo autem ordine, quibusque temporibus hæc septem sidera observata, nomenque sortita fortasse fuerint inferius ostendetur: interim hæc est illorum series, & nomina a Deorum nominibus derivata, Luna, Mercurius, Venus, Sol, Mars, Jupiter, Saturnus.

a Luna, Mercurii, Veneris, Solisque refulgent
Si-

[a] Agel. XIV. c. 1. (b) Cic. Tusc. I. & Nat. II. & Plin. II. c. 6. (c) Macrob. Somn. I. cap. 18. & 21. (d) Gen. c. 1. ver. 16.

Sidera , tum sequitur *Mars, Jupiter, atque Saturnus.*

III. Planetarum itaque *medius Sol fertur amplissimâ magnitudine, ac potestate: nec temporum modò, Terrarumque, sed siderum etiam ipsorum, Cœlique rector.* Hunc *Mundû totius animam, ac planiùs mentem, hunc, principale Naturæ regimen, ac numen* (*sive ut Cicerò (a), & Heraclitus (b) ait Cor Cœli, & ignis ætherei, cœlestisque luminis fontem*) credere daces. Hic *vices temporum, annumque semper renascentem temperat; hic suum lumen ceteris quaque sideribus fœnerat; præclarus, eximius, omnia intuens, omnia etiam audiens; ut Principi Literarum Homero placuisse video, cum ait (c).*

Sol, qui res omnes circumspicit, audit & omnes

Tanta nimirum est præclari hujus sideris vis, præstantia, ac divinâ ferè pulchritudo, ut veteres omnes in maximam sui admirationem rapuerit; & Eudoxum præsertim, qui non immeritò prorsus optare se dixit a Sole, Phætonis instar, comburi, dummodo Solem ipsum propiùs intueri, ejusque naturam contemplari sibi licuisset (d). Nec aliâ fortasse ratione de illius substantiâ certi aliquid cognosci, vel definiri vix posse videtur, nisi quod ille, quemadmodum oculos vehementi, & uberrimâ luce perfringit, ita ferè animorum aciem, & humanæ mentis ingenium eludere existimetur. Conjecturis itaque hac in parte

lo-

(a) *Tusc. I.* (b) *Laer. IX seg.* & *Macr. II. Sat. c. 17. 18.* & *Senn. I. c. 20.* (c) *Plin. II. cap. 5.* (d) *Plut. II. adv. Colos. Ptolem. Almag. III. c. 7.*

locus superest, atque inter innumeras Veterum, Recentiorumque opiniones de Solis substantiâ, illam verisimiliorem credi par erit, quæ, sin minus vera, phœnomenis tamen, Solisque effectibus explicandis accommodatior, & opportunior appareat.

IV. Veteres autem in hoc fere consentiunt, quod igneam esse Solis substantiam, aut igni simillimam arbitrantur. Celebris est, ac superiori loco commemorata Heracliti, & Anaximandri sententia, qui *splendidissimam, & calidissimam flammam inesse Soli* (a) putarunt; quemadmodum Possidonius, aliique Stoici Solem esse *purissimum ignem, ignitum, permul- toque igne compactum* (b); *splendidissimum, candidissimumque* Plato (c); Anaxagoras, Democritus, Metrodorus, *Globum ferri candentem, aut saxum ignitum*. Epicurus *globulentum, spissamentum intra exesos meatus ignitum*. Xenophanès ex multis ignibus *coagmentatum* dixere; Philolaus verò Pythagoricus ait, Solem vitri modo perlucens accipere ab igne cœlesti splendorem, acceptumque ad nos transmittere; adeoque cœlestem ignem Soli similem esse. Empedocles denique Solis esse duos opinatur: Horum quidem unum ignem *primariumque, ut ita dicam, exemplarem & regionem semper reflexi simulacri sui constitutum*. Hunc autem Solem, qui videtur repercussum simulacrorum esse illius, qui in altero hemisphærio reperitur aere ignito illo quidem pleno ab orbiculatâ verò Terrâ illud in Solem *crystallinum, repercussum unâque cum ignei illius motu receptum*

(a) Plut. Plac. II. c. 8. (b) ibi & Laer. VII. vid. Cig. in Somn. (c) Plotin. Enn. II. lib. 1. c. 7. & Plut.

ptum ad summam effulgentiam esse ignis ambientis Terram (a). Quin etiam ipsa quoque Divina Scripturarum autoritas opinionem illam egregie confirmare videtur, cum ait: *Sol in aspectu annuncians in exitu; Vas admirabile, opus excelsi. In Meridiano exurit Terram; & in conspectu ardoris ejus quis poterit sustinere? Fornacem custodiens in operibus ardoris: Tripliciter Sol exurens montes, radios igneos exsufflans, & refulgens, radiis suis obcacat oculos* (b).

Et ex veteribus Ecclesiæ Patribus D. Basiliius constanter aded Solis naturam igneam esse defendit, ut deliras, anilesque fabulas esse dixerit illorum opinionem, qui Solem calidum esse negant, & igneâ naturâ prædictum (c).

Quod si Veteribus Philosophis, Recentiores etiam addantur, non solum cum illis isti mirè conspirant, sed illorum etiam sententiam arctissime complectuntur. Gassendus enim Solis substantiam igneam esse defendit, ut Solem ipsum igneæ fornaci comparari posse putaverit. Cartesius illam ex primo elemento componit, particulis nimirum tenuissimis, perenni, celerrimoque motu agitatæ, quibus aliqua tertiæ elementi pars admixta sit, ut eadem prorsus Solis, & ignis origo, & natura videatur. Solarem denique substantiam metalli ferventis instar agitatam Averfa, Simon Martius; & veluti igneum Mare Maïgnanus se deprehendisse testantur (d).

V. Et

(a) *V. Plu. Plac. II. c. 20.* (b) *Eccl. 43. v. 4.* (c) *Mesae.*
(d) *Vld. Schein. Rosa Urs. I. c. 4.*

V. Et certe si telescopio Sol observetur; non solum perennis ille motus; & irrequieta partium agitatio statim apparet, sed quidam etiam veluti flammaram vortices ex illius substantiâ erumpere videntur, qui incertâ quadam periodo decrescunt, evanescent, atque iterum renascuntur. Eadem quoque Solis scintillatio, lux, & calor maximo argumento sunt, quod ignea sit Solis substantia; non solum, quod proprietates illæ solum igni conveniant; sed etiam, quod illæ sine maximâ partium agitatione, ut recentiores quidem existimant, fieri, & explicari non possint. Vix etenim, ac ne vix quidem intelligi posse arbitrantur, quomodo Sol vehementem aded calorem excitet, ut collectis speculo Ustorio radiis ligna incendi, metalla liquefieri, lapides ipsi dissolvi repente soleant, & tamen nullus in illo calor actualiter reperitur, nec magis calidus sit, quàm piper, & vinum, quæ non *formaliter* quidem, sed *virtualiter* solum calida esse dicuntur.

VI. Quæ tamen recentiorum omnium iudicio rem ferè conficere videntur, & quibus illi formaliter calidam, & igneam quoque Solis substantiam esse non suadere modò, sed etiam invictè probare se posse gloriantur, sunt illæ maculæ, quæ in Solari disco superioris seculi initio sunt observatæ. Vix etenim Galileus Galilei telescopio nuperrimè a se invento cœlestia corpora contemplari cœpit, cum in Solari superficie partes aliquas obscuriores, & nigricantes veluti maculas observavit primùm quidem Patavii, deinde verò etiam Romæ; ubi plurimis rei novitatem admirantibus conspiciendas illas exhibuit.

buit. * Non defuere tamen, neque adhuc defunt, qui hanc laudem Galilæo paullo liberius eripiant palmam Scheinero tribuentes; qui, ut ferunt, de Solaribus maculis a Galilæo nuper inventis admonitus illas observavit, & assumpto *Apellis post tabulam latentis* nomine, illarum naturam, & periodum, antequam Galilæus quicquam ederet, evulgavit. Sed Galilæum Scheinero præluxisse plurima egregiè demonstrant, quæ apud Galilæum ipsum legi poterunt; nisi fortasse liberius cum Scheinero agere, unàque cum Gassendo opinari libeat, Galilæum quidem omnium primum Solares maculas in Italiâ, Scheinerum verò in Germaniâ deprehendisse, quod credi Scheinerus ipse desiderat.

VII. Ex innumeris autem, & accuratissimis Astronomorum observationibus illud evidentissimè demonstratur, quod Solares maculæ aliquando plures, aliquando pauciores sunt. Quædam ex illis in Solis superficie, repentè oriuntur, ac veluti erumpunt, & lentâ periodo ita circa Solem ab ortu in occasum moventur, ut non lineas rectas, aut circulos, sed ellipses diversæ amplitudinis describere videantur, & post aliquod temporis spatium, nempe dierum 27. h. 12. 21. ad eandem iterum Solis partem, vel limbum, revertantur (a), aliæ verò, cum aliquo, brevique tempore apparuerint, lucidiores factæ, vel in ipso Solaris disci medio evanescunt; ut illa, quæ diutius, longiorique tempore ap-
pa-

* In Sole quis credat retectas

Arte sua, Galilææ libes. Urb. VIII.

(a) *Hist. Acad.* 1702.

paruit, circa Solem spatio 82. dierum ter revoluta prorsus evanuerit (a). Quoad illarum magnitudinem pertinet, hæc inæqualis esse solet, ut Galilæus, Scheinerus, alique plurimi observarunt. Macula in Sole visa est anno 1719. quæ quadruplo major erat Tellure; quemadmodum alia anno 1714 apparuit 125. vicibus major Terrâ, & si congeries illa macularum, quæ 1706. observata est, sphærica fuisset, 1728. vicibus Tellurem superasset. Maculas etiam aliquando in utroque simul Solaris disci limbo orientali, & occidentali observari contigit; quemadmodum aliquando circa polum Solis Australem; frequentius enim circa Æquatorem Solis moventur. Atque ista quidem sunt, quæ in Solaribus maculis non sinè incredibili admiratione contemplari licuit; ex quibus non illarum, solum substantia, periodus, sed ipsa quoque Solis natura, & motus illustrior fieri posse videtur.

VIII. Qui Solis substantiam igneam esse arbitrantur, maculas ejusmodi non aliud esse putant, quàm nubes, fuligines, flammarum, vortices, qui ex Sole, veluti ex accensâ fornace, erumpant. Idque ostendi posse coniiiciunt ex inæquali macularum numero, magnitudine, & periodo, quâ circa Solem moventur; neque aliâ de causâ illas in faculas potestè converti, & evanescere putant, quàm quia vehementi Solis ardore dissipatæ, & illustratæ, & lucidiores factæ Solis discum amplius obscurare non possint; quemadmodum, nubes, quæ ex vaporibus in aëre concretis effor-

(a) Volf. Elem. Math. tom. II. pag. 460.

efformantur, Solis radiis rarefieri, illustrari, tandemque dissipari conspiciunt.

Cartesius autem existimat solares maculas efformari, cum particulae tertii elementi, quae crassiores, & ad motum minus comparatae sunt, a ceteris subtilioribus, quae velocissime cum Sole torquentur, separantur, & in ipsa solaris disci superficie in varias inaequales moles concrescunt, eodemque motu tandem dissolvuntur: eo ferè modo, quo ex crassioribus aquae particulis vehementer agitatae, & aëri permixtis spuma concrescit, quae eodem deinde motu dissolvitur.

IX. Cum verò constans illa periodus, quam maculae circa Solem moventur, ægrè salvari posse videretur, si fluidae nubium, vel spumae instar supponantur, Hicæus nuperrimè suspicatur (a) non aliud esse solares maculas, quam solida quaedam corpora, quae fluidae Solis substantiae infideant, atque in illa veluti innatantia, ita moveantur, ut altiùs aliquando demergantur, unde minores maculae appareant, leviùs aliquando sustineantur, unde majores videantur, aliquando denique infra fluidi superficiem omnino demersa repente evanescant, aut occultentur.

X. Utraque tamen ex his opinionibus ægrè defendi posse videtur. Quo enim argumento ingentia illa corpora solida in fluida substantia Solis innatantia supponantur, aut què fieri poterit, ut inaequaliter in illa innatent, ut aliquando prorsus delitescant? Id certè a communibus gravitatis legibus abhorreere videtur, quibus ex variâ corporum specificâ gravitate
certa

(a) *Hist. Acad.* 1700.

certa quædam, ac definita corporum fluido insidentium depressio demonstratur. Explicari denique non potest quomodo maculæ lucidiores, clariioresque fieri, vel in faculas converti possint. Similiter, & si Cartesio liberaliter concedatur primi, & tertii elementi particulas in Sole permixtas esse, vix tamen intelligi poterit, quomodo ingentes adeo maculæ efformentur, quæ Solis superficiem obducere, & obscurare possint.

XI. Complures alii Philosophi, atque inter alios Malapertius, Rheita, Guërikus longè nobiliorem esse macularum substantiam opinati sunt, ut illas crederent esse Planetas, qui, cum circa Solem certâ periodo moveantur, in illius superficie veluti maculæ appareant: quemadmodum certè Mercurius, cum Solem inter, & Terram reperitur, veluti nigricans quædam macula in Sole conspicitur. Sed explicare vix poterunt, cur maculæ, siue Planetæ ejusmodi, non certâ periodo, stisque temporibus redeant, cur in medio Solis disco prorsus evanesceant, cur inæquales aded sint, cur denique, ut cetera omitam, aliquando plures, aliquando conglomerati videantur.

XII. Quæ cum ita sint, ingenuè fatendum est de macularum naturâ, & origine nihil ferè nobis perspectum esse, cum præsertim etiam hypothesis de igneâ Solis substantiâ, quæ verisimilior, & explicandæ macularum origini accommodatior videtur, difficultatibus obnoxia sit, & pluribus argumentis Peripateticis impugnari soleat.

1. Si etenim Solis substantia, inquit illi, ignea esset, & flammæ instar perenniter arderet,

deret, sensim illa decreſcere, ac tandem conſumi deberet; cū præſertim ſubtiliores illius partes, in quibus luminis natura poſita eſt, continuo, velociſſimoque motu ad ſingulas Univerſi partes uberrimè diffundatur.

2. Deinde, cū ignis ſubſtantia neque conſervari, neque eſſulgere ſoleat, niſi aſſiduo veluti alimento nutriatur, quæ tanta eſſe poterit alimenti copia, quæ alendo maximo ſideri par eſſe poſſit?

3. Sed quod omnem prorsus fidem excedit, quæ ratione ignea, tenuiſſimaque Solis ſubſtantia celerrimè circa Terram movebitur, quin perturbetur, diſſipetur, & vehementiori impetu plurimas veluti in partes diſcerpta extingatur?

XIII. His certè, aliisque ſimilibus argumentis oſtendi poſſe arbitrantur Peripatetici, igneam non eſſe Solis ſubſtantiam; ſed ingentem potiùs, rotundam, ſolidamque molem, cui divinus Artifex lucem, calorem, motumque impreſſerit, quo reliqua ſidera, & Univerſi partes illuſtrarentur.

Qui tamen Solis, ſiderumque ſubſtantiam, aut igneam, aut tenuiſſimam, certè fluidam, perennique motu agitatam cum nobilioribus Philoſophis exiſtimaverit, tum ſuperiora Peripateticorum argumenta diluere, tum opinionem hanc ſuam defendere, vel illuſtrare facile poterit.

1. Ac primò quidem, quod igneam Solis ſubſtantiam ſenſim flammæ inſtar conſumi oportere conjiciunt Peripatetici, id ex vulgaribus certè, præconceptiſque opinionibus arbitrantur. Fieri nimirum poteſt, ut Sol ex puriori, nobiliorique flammâ componatur, quæ

quæ neque alimento indigeat, quod depascat-
 tur, neque aliâ de causâ decreſcat; ſed ſem-
 per eadem perſeueret: unde, quemadmodum
 ſplendor, & calor ille, qui in Sole reperi-
 tur, longè purioris, nobiliorisque naturæ con-
 ſpicitur, quàm calor, aut ſplendor, qui re-
 peritur in igne; ita quoque Solis ſubſtantia
 longè perfectior eſt igne, quem *elementarem*
 vocare conſuevimus. Peripatetici ſanè ingen-
 tem ignis molem concavo lunaris Cœli inclu-
 ſam, vel ſupremæ Aeris regioni circumpoſi-
 tam eſſe opinantur, quæ, etſi celeri, vehe-
 mentique motu circa Tellurem quotidie mo-
 veatur, attamen neque corrumpi, neque ullo
 pabulo nutriri, quodque admirabilius eſt,
 neque ſplendorem, aut calorem ullum emit-
 tere poſſit; quid ni ergo ipſam quoque ſide-
 rum, Solisque ſubſtantiam fluidam, flexibi-
 lem, incorruptibilem, igneam eſſe dicamus?
 Sed, licet hæc ipſa Solis, ſiderumque ſub-
 ſtantia corruptibilis concedatur, perperam ta-
 men ipſius molem minui oportere deducitur;
 variæ nimirum illius partes ita miſceri, al-
 terari, perturbarique poterunt, ut in macu-
 las, nigrioresque partes abeant; ſed cùm ite-
 rum in lucidiori, clariorique Solis ſubſtantiâ
 abſorbeantur, æqualem ſemper, eandemque
 molem relinquent: eâdem ſerè ratione, quâ
 Terra, etſi continuò tenues aquæ, terræque
 particulas emittat, quibus nubes, & pluviz
 in aere efformentur, pluviis tamen, nivi-
 busque in Tellurem ipſam iterum concidenti-
 bus ſemper eadem perſeuerat.

2. Neque expectandum eſt, ut Sol, ac re-
 liqua ſidera, ne conſumantur, æthere, vel
 vaporibus ex Oceano prodeuntibus paſci di-

cantur, ut Plinius, & D. Ambrosius, alii-
que plurimi existimarunt; ut ait Poëta:

*Necnon Oceano pasci Phœbumque, Polumque
Credimus (a) - - unde ather sidera pascit (b).*

ut enim ostendimus, purior, atque nobilior
est solaris ignis substantia, quàm ut consumi,
alimentoque nutriri debeat.

3. Tenuissimas verò Solis partes celerrimæ
vertiginis impetu disjungi, sive discerpi opor-
tere negant plurimi; sive quodd in ipso Uni-
versi centro Sol immobilis perseveret; sive,
quodd fortior, & major sit illa vis, quâ sola-
ris substantiæ partes mutud adhærent, sphæ-
ramque componunt, quàm centrifuga vis,
quæ a circulari ipsius motu oriretur.

Sed hæc, aliaque id genus opportuniùs ex-
ponentur cùm de lucis origine differetur.
Hic autem veterum, recentiorumque senten-
tias de verâ Solis periodo, magnitudine, at-
que distantia subiiciemus.

XIV. Et quod ad Solis quidem periodum
pertinet, sive motum, quo circa Tellurem per
12. Zodiaci signa ab occidente in orientem de-
fertur, hæc a veteribus, recentioribusque Phi-
losophis varia ratione definitur. Ut enim
rudes admodum, & imperfectas antiquissimo-
rum temporum opiniones præteream, quibus
prima nascentis adhuc Astronomiæ semina
floruerunt, Thales ompium primus fuisse tradi-
tur, qui annuam Solis periodum 365. die-
rum esse docuerit(c), quod ille tamen ab Ægy-
ptiis fortasse accepit, quibus ejusmodi die-
rum numerum innotuisse, clarissimis Scripto-
rum testimoniis erudimur.

Pro-

(a) *Lucan. X. ver. 258.* (b) *Lucr. I. 231.* (c) *Laer. I. seg. 27.*

Proximis deinde temporibus observatum est, hanc anni periodum justo breviorē esse, superiorique spatio 365 dierum sex insuper horas addendas esse, ut accuratior anni periodus, vel quantitas haberetur d. 365. h. 6., ideoque singulis quaternis annis ex horis 6. integra dies efficeretur, quæ ceteris adjuncta singulos quaternos annos efficeret dierum 366. Vix tamen adducor, ut Blondello assentiar, qui eâ de causâ singulis quaternis annis Olympiades a Græcis institutas, ac celebratas esse arbitratur, ut ille mos intercalandi, vel novum, superadditumque diem singulis quaternis annis enumerandi constantius servaretur. Alia nimirum, longèquē diversa fuit Olympiadum celebrandarum causa, & origo, neque priscis illis temporibus exiguum illud 6. horarum discrimen satis accuratè deprehensum videtur, alioquin immeritò id laudis, & gloriæ Thaleti, qui circa 48. Olympiad. floruit, concederetur, quodd omnium primus annum in 365. dies divisisset.

Hæc ipsa deinde anni periodus a Sosigene, ac Julio Cæsare confirmata fuit, ut inferiùs ostendetur, cum de Kalendario differetur. Accuratioribus tamen studiis certior, atque subtilior anni periodus, sive quantitas definita est ab Astronomis, quorum varias hæc in parte opiniones oculis ferè subjectas sequenti schemate complectimur.

annus medius juxta	{	Ptolemæum d. 365. h. 5. 55. ¹ 12. ¹¹	
		Albategnium	46. ¹ 24. ¹¹
		Alphonsum	49. ¹ 56. ¹¹
		Copernicum	49. ¹ 26. ¹¹ 23. ¹¹
		Tychonem	48. 45. ¹
		Gregorium	49. ¹ 12. ¹¹
		Cassinum	49. ¹ 5. ¹¹
		Maraldi	49. ¹
		Malezievium	50. ¹ 54. ¹¹

Atque ista quidem, quod ad annuam Solis periodum, sive tempus, quo Sol ex aliquo Cœli puncto digressus peractâ circa Tellurem integra circulatione ad idem revertitur. Si etenim tempus illud definiri debeat, quo Sol ab aliquo sidere digressus ad sidus ipsum revertitur, superiori temporis spatio aliquot minuta adjungi debent, ut sol sidus ipsum per 50.¹¹ minuta in orientem digressum assequatur, unde Solaris hic annus non Cœlo, sed sideri comparatus erit d. 365. h. 6. 20.¹

XV. Quemadmodum verò in definiendâ Solis periodo Astronomi differunt, ita quoque plurimùm dissident in exponendâ illius magnitudine.

Hanc Plato *inexcogitabilem* (a), Plinius (b), & Cicero *immensam* esse affirmarunt; Archelaus *Solem siderum omnium maximum* (c), Parmenides Lunæ, Anaximander Terra *aqualem*, Empedocles, Stoici, & Plato, Plinius *Lunâ, & Terrâ majorem*; Eratosthenes quidem 27. vicibus, Ægyptii 18., Cleomedes, & Aristarchus 300. Hipparchus 1050. alii 1728. Possido-

(a) *In Ep.* (b) *II. c. 4.* (c) *Leſt. II. ſeq.*

sidonius denique 59319. (a) Recentiorum opiniones de mediocri Solis distantia a Terrâ, ejusque magnitudine Terræ comparatâ hîc ordine subiiciuntur.

Sol distantia a Terrâ juxta	Ptolemæum	1170.	170.
	Longomont.	1288.	196.
	Copernicum	1142.	162.
	Semidia-		
	Tychonem	1130.	149.
	Keplerum	3500.	3469.
	Lansbergium	1500.	434.
	Keplerum	4000.	22206.
	Vendalinum	40040.	
	Hugenium	24000.	
	Neutonum	10000.	
	sive	11000.	
	Cassinum	20000.	
	sive	22000.	

Mediocrates autem Solis distantias expressimus, cum Sol, ut alibi diximus, remotior sit in Apogæo, quàm in Perigæo juxta Ptolemæum 100. semidiametris terrestribus, juxta Copernicum 96., denique juxta Tychonem 82.

XVI. Gravissimam verò supputandæ, vel exponendæ Solis magnitudinis difficultatem, facile declinat Heraclitus (b), & Epicurus, qui hac etiam in parte, non a veritate solum, sed ab aliorum etiam sententiâ recedit existimans, quod *magnitudo Solis, & reliquorum siderum, quod ad nos quidem attinet, tanta est, quanta & apparet; quoad ipsam verò rem*

L 4

spe-

(a) Vid. Gassio. II. lib. 2. c. 15. (b) Læti. IX. s. 5.

spēctat, aut paullo major, aut, tanta praei-
 quanta videtur. Unde a Cicerone (a), La-
 ctantio (b), aliisque compluribus merito gra-
 viterque reprehenditur: *Animi est enim per*
quàm simplicis, ut optimè ait Aristoteles, exi-
 stimare, ea, quae moventur, idcirco pusilla esse
 magnitudine, quod nobis aspicientibus eiusmodi
 esse appareant (c). Non tamen sine divino Phi-
 losophiae lumine enormis illa Solis, & siderum
 magnitudo definiri poterat; quando enim ho-
 mo, nisi quem doctrinā Philosophia supra ho-
 minem, immo verè hominem fecerit, suspicari
 potest, stellam unam omni Terrā esse maiorem,
 cum vulgò singula vix facis unius flammam
 aquare posse videantur (d).

C A P. IV.

De Lunā.

I.



Mnium admirationem vincit no-
visissimum sidus, Terrisque fa-
miliarissimum, & in tenebra-
rum remedium a Naturā re-
pertum, Luna multiformi am-
bage torset ingenia contemplan-
zium, & proximum ignorari maximè sidus in-
dignantium; crescens semper, & senescens; &
modò curvata in cornua, modò aquā portione
divisa, modò sinuata in orbem, maculosa, ea-
demque subitò praeitens, humilis, & excelsa;
qua

(a) Acad. I. & I. Divin. (b) Epist. ad Pyth. (c) Arist.
 Mete. I. c. 3. (d) Macr. Senn. I. c. 16.

quâ singula in eâ deprehendit hominum primus Endymion; & ob id amore ejus captus famâ traditur (a). Dicitur autem Luna quasi luminum una, vel lucens una; Sed apud Poëtas ex triplici loco, quem ipsa incolere credebatur, triplex nomen accepit; cùm una, eademque sit Luna, quæ in Cœlis Selene, seu Jubar novum; in Terris Diana, Hecate, sive Proserpina in Inferis appellatur.

II. Quod ad illius substantiam attinet, Anaximander (b) existimavit, Lunam esse sphæram novendecim vicibus Terrâ majorem, quæ igne repleretur, & in quâ foramine aperto Lunæ sidus effulgeret; quemadmodum Heraclitus (c) Lunam scapham esse putavit, quæ igne repleta circa se ipsam converteretur, unde phases, & eclipses oriri possent; quamvis alibi (d) dixerit, Lunam esse Terram nubibus obvolutam, Xenophanes constipatam nubem; Pythagoras ignitum corpus, Stoici ex aëre, atque igne, majori tamen ex parte Terrâ formatam esse Plato (e) putavit, atque, ut ceteros omittam, Berosus Chaldaus pilam alterâ sui parte igneam, alterâ verò opacam existimavit, quæ, cum unius mensis periodo circa se ipsam torqueretur, phases omnes efficeret.

Plerique tamen in hoc maximè consentiunt, Lunæ substantiam Telluris nostræ substantiæ similem fore, ut non immeritò dixerit Macrobius, *Physicos vocare Lunam Terram athe-ream, & habitatores ejus lunares populos nunc-*
cu.

(a) Plin. II. c. 9. (b) Plut. II. c. 25. (c) Laën. IX. seg. 10. (d) Ap. Plut. II. c. 25. (e) Vid. Plut. loc. cit.

cupasse (a); quod Terra atherea nomen ex ipsis Ecclesiæ Patribus Beda est amplexus.

III. Atque in hac certè sententiâ fuisse videntur illi, qui Lunæ non montes solum, valles, maria, lacus, & flumina; sed incolas etiam, & plurima animalium genera concessere; ut Xenophanes, qui *habitari ait in Lunâ, eamque esse Terram multarum urbium* (b)? Democritus (c), Anaxagoras (d), Stoici, præsertim verò Pythagorici, qui *Lunam Terra instar circum habitari dixerunt, idque ab animalibus, piantisque & majoribus, & pulchrioribus; cum nempe illa animalia decies & quinque nostræ superent* (e), ut eorum aliqui fabulari non erubuerint, Leonem Nemæum, hominem, & ovum ex Lunâ decidisse (f) unde insignis proceritas incolarum Lunæ nobis innotuerit. Dedecet verò in refellendis ejusmodi ineptiis diutiùs immorari, cum aliqua præsertim in hanc rem dicta fuerint, cum de Mundi unitate ageremus. Addi solum poterit a D. de la Hire (g) nuperrimè demonstratum esse, quòd si in lunari superficie insignis aliqua mutatio, ut ex. gr. novæ alicujus urbis ædificatio fieret, hæc nos latere non posset: quemadmodum certè, si qui homines Lunam incolerent novas Urbes, montes & factas ex aquore terras in globo nostro deprehendissent.

Similiter etiam, etsi Luna fluminibus, variis arboribus, maribus exornata esse potuerit,

(a) *Som I c 2. vid. Hevel. Selenogr. & Fontanel. de plural. Mund.* (b) *Cic. Acad I.* (c) *Stob Ecl Phys.* (d) *Laër: II seg. 8.* (e) *Plut. II. c. 30.* (f) *ap. Arben. II. & Plutar. de fac. in ore Luna:* (g) *Hist. Acad. 1706.*

rit; nullum tamen ejus rei argumentum afferri potest. Quin etiam conicere meritò possumus, quod ejusmodi variæ substantiæ in Lunâ non reperiuntur, cùm effectus illi, phænomena, vel mutationes in ipsâ non observentur, quæ exinde fieri, vel apparere deberet, ut elegantissimè demonstrat Hugenius (a), vix etenim flumina, & maria in Lunâ admitti possent, quin nubes etiam, pluviae, nives, aliaque id genus admitterentur, quibus subinde Lunæ facies ita variari deberet, ut insignes in illâ mutationes, lucidæ, obscuræque partis varietas, & inæqualitas appareret; eâdem ferè ratione, quâ Lunæ incola Telluris nostræ faciem aspiciens illam subinde plurimùm variari, nubibus obscurari, clariorem in montibus nive obductis, in vallibus aquâ repletis obscuriorem fieri deprehenderet. Cùm itaque nihil ejusmodi in Lunâ observetur, longè verisimilius est, neque flumina, neque arbores, neque animalia ulla in lunari globo reperiri.

IV. Asperam tamen, & inæqualem esse lunaris corporis superficiem, montes, valles, & declivia quædam, & fovearum instar excavata loca in illâ reperiri evidenter aded, invictèque, telescopii præsertim ope, demonstratur, ut plurimi ex Peripateticis ipsis id ingenue fateantur. Neque aliâ certè ratione explicari posse videtur, quomodo, cùm Luna falcata, vel corniculata est, linea, circulus, sive sectio, quæ illuminatam partem ab obscuriori dividit, non æquabilis, & recta, sed aspera, & inæqualis, tortuosa, ac veluti

ferræ

(a) *Cosmorb. II.*

ferræ in morem dentata appareat. Similiter etiam cùm una Lunæ pars, vel hemisphærium illuminatur a Sole, in alterâ parte, vel hemisphærio adhuc obscuro partes aliquæ lucidæ, quæ sensim lucidiores fiunt, veluti emergunt, ac si, montium instar, ante alia decliviora loca solis radios excipiant, & ad nos regerant. Hoc etiam manifestissimè demonstratur ex maculis, non perenhibus quidem, sed temporalibus, quæ stasis temporibus, & certâ quadam periodo in Lunâ sunt observatæ. Compertum est enim, quod aliquando nigricantes quædam maculæ in Lunâ videntur juxta diversos aspectus, quibus Luna a Sole respicitur; ut, si Sol aliquâ ex parte Lunam illuminet, umbra, vel macula in oppositam partem veluti proiciatur, si Sol interrim moveatur, umbra similiter juxta notissimas Opticæ leges moveri videatur, cum denique Sol Lunæ oppositus fuerit, ut in plenilunio, nullæ tunc maculæ in lunari disco deprehendi possint. Quid autem illustrius, & evidentius afferri unquam poterit, quo demonstretur, elatiores aliquas partes in Lunâ reperiri, quæ in decliviores alias umbram proiciant, esse foveas, & specus, quæ Solaribus aliquando radiis expertes, obscuræ sint, lucidiores verò fiant, cùm directè ab ipsis illustrantur?

V. Ipsæ quoque perennes maculæ, quæ a primis usque temporibus in facie Lunæ videbantur, ut illam Orpheus larvatam, seu personatam esse putaverit, argumento pluribus esse solent, quod in illâ montes, silvæ, lacus, & maria reperiantur. Celebris enim est Pythagoricorum sententia, qui cùm Lunam

Lunam Telluri nostræ similem crederent, lucidiores illius partes, veluti continentes, & insulas esse arbitrabantur; obscuriores verò mari, & fluminibus comparabant: quemadmodum certè, si Tellus ipsa ex Lunâ videretur, hac lege maculis plena appareret, quæ maribus, & fluminibus responderent.

Alii verò Clearchum sequuti, globi Terraquei lacus, flumina, insulas, &c. in Lunâ, veluti in speculo, expressa, & depicta fore, putarunt; & singula Mediterranei loca in illius superficie designarunt, iis fortasse non multò feliciores, qui aut circumvectum a Lunâ puerum, aut Sybillæ Delphicæ animam, aut Hecatis penetrale, in quo animæ plecterentur, ibi collocabant (a). Anaxagoras, Stoici, Plato, cum partim ex igne, partim etiam ex aëre, vel alio obscuriori corpore Lunæ substantiam componerent, lucidiores illius partes ex igne, obscuriores ex aëre formatas arbitrabantur (b). Plinius autem, alique *sidera humore terreno pasci inde maximè ostendi* putarunt, quod *Luna macula non aliud sint, quàm Terra rapta cum humore sordes* (c).

Peripatetici denique, cum lunaris corporis superficiem accuratè sphæricam, politam, lævissimam esse opinentur, perennes, & temporales etiam illius maculas ex solâ majori, vel minori densitate oriri posse autumant; ut rariores illius partes solaribus radiis penetrentur, minimamque illorum partem ad nos regeant, maximam densiores. Sed præterquamquod ex æquabili, & lævigatâ sphæricâ super-

(a) *Plut. loc. cit. & Clem. Alex. Strom. I.* (b) *Plut. II. c. 25.* (c) *Lib. II. c. 9.*

perficie vix ulli, aut ex paucissimis certè punctis radii reflecti possent, adeòque Luna prorsus obscura videretur, cur cavitates illæ a rariori substantiâ formatæ numquam illuminantur, quemadmodum illuminantur illæ, quæ temporales maculas efficiunt, dum a Sole directè respiciuntur? cur, dum sectio lucis per aliquam perennem maculam transit, deinde per lucidiorem partem, non curvatur, & flectitur in lucidiori, rariorque parte, ut fieri certè deberet, si lucidioris partis fundum infra Lunæ superficiem existeret? cur denique, si rarior illa substantia pellucida, est, nigra esse debet; aut, si obscuritas illa non pellucidæ, & rariori parti, sed fundo tribuitur, cur ipsi potiùs superficiæ tribui non potest?

VI. Verisimilius est itaque, perennes Lunæ maculas non aliunde oriri, quàm ab inæquali superficiæ lunaris asperitate; ut ubi scilicet asperior est, ac regerendo lumini accommodatior, lucida sit; ubi verò aut æquabilior, aut ebibendis radiis aptior, obscura, vel maculosa videatur. Idque ex ipsis Opticæ legibus alibi explicandis, & experimento faciliè demonstratur. Ex ipsis etiam Opticæ, vel Astronomiæ legibus montium illorum altitudo deducitur, quos in Lunâ reperiri jam diximus, & a quibus umbras in partem Soli adversam projici, adeòque temporales maculas produci demonstravimus. Hanc itaque lunarium montium altitudinem Galileus observavit 40. stadiorum, ut proinde lunarium montium altitudo quadruplo major sit Olympi altitudine, quæ decem stadiorum a Xenagora, & Dicæarcho tradita est.

VII.

VII. Ex his verò maculis, earumque occasione plurima a veteribus, recentioribusque Philosophis sunt observata; quæ non jucundissima solum, & maximè admirabilia sunt, sed plurimam etiam lucem circa Lunæ periodum, suppeditant.

Compertum itaque est primò, Lunam, et si duplici motu, diurno nimirum, & menstruo circa Tellurem feratur, semper tamen eandem sui partem, vel hemisphærium ad nos convertere; semper enim eadem macularum series, numerus, & ordo conspicitur, ut Aristoteles ipse testatur. Inde verò facillimè demonstratur, quod Luna singulis diebus, & mensibus, dum circa Tellurem movetur, interim quoque circa proprium axem torquetur; neque enim aliter eandem semper faciem nobis ostenderet; ut si quis in circuli periphæriâ ita moveretur, ut semper ore, vultuque, centrum respiceret, interim certè circa seipsum torqueri, ac veluti circa proprium axem gyrare deberet. Ac mirari certè quis poterit, duplicem hunc Lunæ motum circa proprium axem tandiu ab Astronomis ignoratum, vel non expressè traditum esse, ut primus omnium Cassinus motum illum nuperrimè deprehenderit, quo Luna, dum mensis spatium periodum circa Terram peragit, interim circa proprium axem convertitur, diurnum, consultò prætermittens, qui in Copernicanâ hypothesi non Lunæ, sed Telluri circa proprium axem rotatæ tribuitur. Accuratissimis tamen observationibus erudimur, non adeo constantem esse, vel æquabilem ejusmodi motum Lunæ circa proprium axem, ut aliquando quadam veluti trepidatione, vel libratione

ne

ne 18. dierum spatio, ut arbitratur Hevelius, nunc ad orientalem, nunc ad occidentalem limbum per 2. digitorum spatium non excurrat, & magis etiam ex Austro in Boream, vel vicissim, ut aliquæ proinde novæ partes appareant, aliæ occultentur. Quâ verò periodo tres ejusmodi Lunæ motus peragantur, quæ nam eclipsium, & luminis origo sit, quæ orbita a Lunâ circa Tellurem describatur, inferiùs ostendetur.

VIII. Nonnulla potiùs hoc posteriori loco de Lunæ magnitudine, ejusque a Terris distantia dicenda sunt, quam aliqui ex veteribus exiguam adedò putarunt, ut ab Hyperboreorum Insulâ prope spectari Lunam, atque contingi posse crederent (a). Pythagoras quoque 4. semidiametris terrestribus distantiam hanc definivit (b); neque fortasse majori intervallo distitam esse Lunam a Terris arbitratus est Anaxagoras, qui Solem ipsum vix Peloponneso majorem putavit (c), quemadmodum Parmenides (d) Soli Lunam æqualem esse jam dixerat. Illustriores autem veterum, recentiorumque opiniones hic ordine subiciemus.

Luna distat a Terra semid. terrest. juxta.	{ Ptolemæum		40.
	{ Copernicum 60.		43.
	{ Tichonem 56. $\frac{1}{2}$		42.
	{ Lansberg.	minor est Terra	45.
	{ Ricciolium		55.
	{ Cassinum 57.		

CAP.

(a) *Ap. Diod. II. & Plin. II. cap. 9.* (b) *Plin. II. c. 21.* (c) *Ap. Plut. c. 21.* (d) *Idem c. 26.*

CAP. V.

*De Calendario, & illustrioribus
Epochis.*

Eteras inter Solis, & Lunæ proprietates, hæc quoque meritò numeratur, quòd illa sidera ab optimo sapientissimoque rerum omnium Opifice (a) in *signa, dies, tempora, & annos* constituta sint, ut illorum nempe luce, & periodo, cetera cœlestia corpora, & homines ipsi quodammodo regerentur. Operæpretium itaque facturos nos esse confidimus, si explicatâ jam Solis, ac Lunæ periodo, nunc ipsa temporum discrimina contemplemur, quæ ejusmodi Solis, ac Lunæ motibus efficiuntur. Quod ut illustrius fieri possit, hoc ordine progrediemur, ut primùm *diei, mensis, & anni* spatia explicemus, deinde verò diversas annorum periodos exponamus, postremò *Epochas*, sive terminos, a quibus illæ periodi, vel tempora numerari cœperunt, complectamur.

Dies.

Veteri, communique discrimine dies in *naturalem*, ac *artificialem* distinguitur. Dies naturalis, est illud temporis spatium, quo Sol, aut inerrantia sidera ab ortu in occasum integram circulationem circa Tellurem conficiunt,

Tom. IV.

M

ciunt,

ciunt, atque ad eundem Cœli locum, ex quo discesserant, peractâ circa Tellurem integrâ periodo, revertuntur. Cùmque non eadem sit Solis, siderumque celeritas, sed ipse Sol sensim retardetur, vel in consequentia progrediatur dies *fidereus solari* brevior erit, itaut si fidereus 24. horas contineat, solaris sit futurus hor. 24. 3.¹ 55.¹¹ 54.¹¹¹ quemadmodum si Solaris ipse in 24. horas distinguatur, fidereus nonnisi h. 24. 56.¹ 4.¹¹ 6.¹¹¹ continebit. Artificialis autem dies est illud temporis spatium, quo Sol, aliaque sidera super horizonem nobis conspicua moventur; quemadmodum nox artificialis alterum temporis spatium completur, quo Sol infra horizonem moratur; Hinc facillè apparet, quod dies naturalis diem, noctemque artificialem continet, unde a Græcis Νύκτιήμερός, vel *Nocti-dies* appellatur. Porro naturalis hic dies in 24. æquales partes dividitur, quæ dicuntur *hora*, quælibet autem hora in 60. minuta prima, quodlibet primum in 60. secunda, & quodlibet secundum in 60. tertia, atque ita deinceps. Cùmque Solaris dies, quo solo nunc utimur, sive diurnus Solis circa Tellurem circuitus æquali semper tempore peragatur, dies naturales, quolibet anni tempore æquales erunt, ideoque etiam horæ, sive minuta semper erunt æqualia. Quemadmodum verò nos in 24. æquales horas diem naturalem dividimus, ita Judæi, ac Turcæ diem, noctemque artificialem in duodecim æquales partes distinguunt; cùmque dies ejusmodi artificiales variis anni temporibus, variisque regionibus sint inæquales, ut alibi ostendimus, cùm de variis sphaeræ positionibus, sive proprietatibus loque-

queremur ; horæ similiter apud illos inæquales erunt, diurnæ nimirum longiores æstate, quàm hyeme, nocturnæ verò breviores. Duodecim denique diurnas horas, vel integrum diei artificialis spatium quatuor in partes, vel *horas* orationi destinatas dividebant Judæi, quarum singulæ, tres diurnas horas continerent ; tres nimirum a *Primâ* ad *Tertiâ* numerabantur, totidem a *Tertiâ* in *Sextâ*, tres rursus a *Sextâ* in *Nonâ*, totidemque a *Nonâ* in *Vesperam*, vel duodecimam, quod in sacris etiam Ecclesiæ precibus nunc observari conspiciamus. Integrâ quoque noctem, vel duodecim nocturnas horas in quatuor *Vigilias* dividebant, in quarum singulis tres horæ continerentur ; unde sæpius in sacris Literis nocturnæ, sive noctis *Vigilia* memorantur.

Quamvis autem, si Turcas, atque Judæos exceperis, omnes ferè naturalem diem in 24. æquales horas diviserint, plurimum tamen in illo dissident, unde ejusmodi horæ numerari incipiant, sive quodnam diei naturalis initium haberi debeat. Babylonii quidem ab ortu Solis diem auspicabantur, atque ad Solem iterum renascentem 24. horas numerabant. Athenienses autem, Norimbergenses, & Italia a Solis occasu. Romani veteres, omnesque nunc Europæ Regiones a mediâ nocte, sive meridie, ut nimirum a mediâ nocte in meridiem 12. horas enumerent, 12. rursus a meridie in mediam noctem. Quæ certè ratio longè subtilior, & accuratior videtur, quòd meridiei, mediæque noctis punctum, tempus nimirum, quo Sol meridianum circulum attingit, clariùs, certiusque deprehendatur,

quàm tempus illud, quò infra horizontem deprimitur, ut Disp. I. Cap. 5. demonstravimus.

Observasse tamen postremò juverit, quòd apud unam, eandemque Nationem, aut Urbem varia diei initia haberi consueverunt pro variâ ratione, quâ dies ipse consideratur.

Ita nos ferè, etsi diei horas ab occasu Solis numeremus, solemni tamen Ecclesiæ ritu diem ipsum, tum in jejuniis ritè servandis, tum in Divinis precibus persolvendis a mediâ nocte in mediam noctem distinguimus; quemadmodum etiam diebus festis celebrandis a vespere, in vesperum alium extendimus. Quod olim ab Judæis etiam observatum fuisse plurimis Scripturæ auctoritatibus eradimur. Hinc facile conciliari poterunt ea Scripturæ loca, undè gravissimum Græcos inter, Latinosque Scriptores dissidium exarsit, quibus nimirum dicitur Christum Paschalem Agnum comedis-
se *ante diem festum Pascha (a)*, & *primâ die Azymorum*. Cùm enim Christus Jesus Pascha celebraverit ad vesperam diei 14. optimè verificatur, quod Pascha peregit ante diem artificialem, civilem Paschæ; simulque intelligitur, quod ipsum celebravit primâ die Azymorum, vel primâ Paschatis die, quæ jam a vespere diei decimæquartæ juxta legem incæperat.

Hebdomada.

Cùm in ipsâ Mundi creatione Divinus Artifex, ut alibi diximus, sex diebus cuncta di-

(a) *Joan. c. 13. v. 1.*

digesserit, & septimâ tandem die *requieverit* ab omni opere, quod patrarat (a); illius fortasse monitu; vel certè gratâ quadam recodatione primorum Parentum more institutum videtur, ut *hebdomada*, vel *septimana*, septem nempe dierum sibi ordine succedentium continuatio, vel series distingueretur, quorum dierum ultimus *Sabbatum*, vel *requies* diceretur, quod in illo olim Creator; ejusque deinde jussu homines ipsi requiescerent. Quin etiam hebdomada ipsa *Sabbatum*, & quælibet hebdomadæ dies (b), *prima*, *secunda* &c. *Sabbati* dici consuevit, ut sæpissimè in Evangelio observatur, præsertim verò, cum Phariseus gloriabatur se (c) *bis in Sabbato jejunare*. Quamvis autem Christiani, Sabbati loco Dominicum diem, quo Christus a mortuis surrexisse traditur, sacrum semper habuerint, & singulas hebdomadæ dies *feria prima*, *secunda* &c. nomine inscripserint; plerumque tamen veterem Ethnicorum morem secuti sunt, qui singulis diebus Planetæ alicujus nomen imposuere, ut *Dominica*, vel *feria prima dies Solis*, *secunda Luna* &c. diceretur: hujus autem ordinis ratio fuit, quod, cum singulis horis diei Planetam aliquem successive ordine præesse putarent; ut ex. gr. primæ horæ Sabbati præesse dicebatur Saturnus, secundæ Jupiter, iterum Saturnus octavæ, & decimæquintæ, & vigesimæsecundæ, & vigesimætertix Jupiter, ultimæ tandem, vel vigesimæquartæ præesse debuerit Mars, adeoque primæ sequentis diei Dominicæ præerat Sol, unde illa *dies Solis* dicebatur.

M 3

Id

(a) Gen. c. 2. v. r. 2. (b) Matth. 28. 1. (c) Luc. 18. 16.

Id eleganter etiam exprimitur in Heptagono *, cuius angulis septem Planetæ eodem ordine, quem in hypothefi Ptolemaicâ fortuantur, adscripti fuerint. Si etenim a Lunâ per rectam lineam ascendatur ad Martem, inde per lineam rectam tendatur ad Mercurium, deinde ad Jovem, tum Venerem, Saturnum, ac Solem, ex quo iterum ad Lunam descendatur.

Mensis.

Paullo difficilior est, ac obscurior Mensis periodus: hic enim tam Soli, quam Lunæ tribui solet, & alteruter multiplex, & inæqualis est. Propriè tamen Mensis nomine, intelligitur illud temporis spatium, quo Luna Zodiacum proprio motu, superiori capite exposito, percurrit, hicque Mensis, qui *periodicus* dicitur spatio 27. dierum hor. 7. 43. 5." perficitur. Quia verò dum Luna a Sole digressa Zodiacum peragit, interim quoque Sol ipse per Zodiacum movetur, diebusque singulis 59. 8." percurrit; postquam periodum integram, sive circulationem Luna compleverit, aliquod aliud temporis spatium infumere debet, ut Solem jam in consequentiâ, vel ad orientem digressum iterum assequatur, ideoque Mensis *Synodicus*, spatium nempe illud, quo Luna a Sole digressa eundem assequitur, rursusque Soli conjungitur, definitur dierum 29. h. 12. 44. 3." 11." qui Mensis, cum in supputandis Lunæ phasibus ab Astronomis adhibeatur, *Astronomicus* optimè dici

* Fig. X.

dici solet, quamvis, ut a populis omnibus communiter usurpatur, ac proinde *civilis* dicitur, diebus 29. & horis 12. constare existimetur, ut alternis vicibus modò 29., modò 30. dierum habeatur, & prior illa quidem Lunatio 29. dierum *cava* dicitur, posterior verò *plena*. Ex illis denique minutis 44.¹, quæ in civili Mense rejecta, vel omissa fuerant, & singulis Lunationibus Astronomicis, verè supersunt, post 32. Lunationes integra dies efformari poterit, quæ *cava* Lunationi adjungatur, sicque Menses civiles cum Astronomicis planè convenient. Quemadmodum verò ex 12. Mensibus Solaribus, anni Solares, ità ex 12. Mensibus Lunaribus, anni Lunares componuntur, qui 354. dies, horas 8. 48.¹ 38.¹¹ 12.¹¹¹ continent, quibusque Arabes, Turcæ, Saraceni nostris etiam temporibus utuntur. Ceterum Mensibus Lunæ, Solares etiam Menses, & Solaris Annus Anno Lunari olim par fuerat; cum etenim Romulus dies 304. sive 10. Menses singulis Solaribus Annis tribuisset, quorum primus esset *Martius* Marti Sacer, secundus *Aprilis* Veneri dicatus, alique ex aliis nomen accepissent, ut ait Ovidius l. Fast. vers. 10. Numa Pompilius Januarium, & Februarium adjecit.

Itaque Solaris Annus ex Numæ præscripto 12. Mensibus Lunaribus, ita componebatur, ut alternè forent dierum 29. & 30. ideoque integer Annus dies 354., vel impari numero, quo Deus gaudere juxta Pythagoricos dicebatur, 355. contineret; quòd, cum ab annuâ Solis periodo plurimum abhorreret, redditâ post Pharsalicum bellum Imperio pace, Sosigenis Astronomi operâ, diligentique

studio a Julio Cæsare Pontifice Maximo correctum fuit Anno ab Urbe conditâ 708., ut primus Annus a Julio Cæsare definitus, qui proinde *Julianus* dicitur, incæperit Anno ab Urbe conditâ 709. Periodi Julianæ 4669.

Hac ipsâ Solarium Mensium serie, quæ a Julio Cæsare constituta fuerat, nos adhuc utimur, mensisque dies non a *Neomenia*, vel *Novilunio*, ut Græci, sed a *Kalendis*, hoc est a primâ Mensis die, qua populi convocari, festisque diebus, & Mense celebrandis erudiri consueverant, numeramus; cùmque in Mense præter *Kalendas*, *Nona* insuper, atque *Idus* distinguantur, ab ipsis reliqua dierum series numeratur. *Idus* itaque 13., vel 15. Mensis die celebrantur, *Idusque* dicuntur, sive quod in Lunari Mense, vel Anno, quo Romulus utebatur, in plenilunio contingerent, cum Lunæ plena, rutilaque *facies*, aut *Idôs* videbatur, sive quodd Mensē *iduate*, sive bifariam dividere existimentur, ut inquit Horatius lib. 4. Od. 2.

Idus tibi sunt agenda,

Qui dies mensem Veneris marina

Findit Aprilem.

Nona denique die ante *Idus* *Nona* contingunt, quæ proinde in quintum, vel septimum Mensis diem incidunt. Si itaque Mensis alicujus, ex gr. Martii, dies exprimere, vel numerare velimus, in quo *Idus* decimumquintum, *Nona* verò septimum diem occupant, primam Mensis diem *Kalendas Martii* vocabimus, secundam verò *VI. Nonas Martii*, tertiam *V. Nonas*, sicque ordine, usque ad sextam diem, quâ *pridie Nonas* dicitur, septima verò *Nonis Martii* scribetur; deinde

octa.

octava dies dicetur *postridie Nonas*, sive *VIII. Idus*, nona *VII. Idus*, decimâquartâ *pridie Idus*, decimâquintâ *Idibus*, decimâsextâ *postridie Idus Martii*, sive *XVII. Kalendas Aprilis*, atque ita in reliquis Mensibus, nisi quod, ut antea dicebamus, in Martio, Majo, Julio, & Octobri Idus in decimumquintum, & Nonæ in septimum diem incidunt. Cur verò in quatuor ejusmodi Mensibus Idus, ideoque Nonæ seriùs contingant, definiri vix potest. Credibile est tamen, quod, cum Romulus Lunari Mense uteretur, cujus initium in Novilunio contingeret, dimidium in Plenilunio, atque in iis Mensibus Plenilunium aliquanto seriùs fieri deprehendisset, Idus etiam in decimumquintum, & Nonas in septimum diem distulerit; quemadmodum certè cum singulis Anni Mensibus 30. dies concessisset, Martio, Majo, Julio, & Octobri 31. attribuit, quòd in illis fortasse tardio- rem, longioremque Lunæ periodum observasset. Quæcumque tamen ratio Romulum impulerit, etsi Anni spatium auctum, correctumque deinde fuerit, eadem tamen Iduum, Nonarumque series, sive dierum designandorum ratio servatur.

Clarùs fortasse Græci Mensis spatium distinguiebant. Cum etenim ipsi antequam in Asiaticâ pugnâ anno U. C. 722. Romanorum legibus, ac imperio subderentur, Solarem Annum 365. diebus componerent, ex his 12. Menses formabant, quorum singuli 30., omnesque simul 360. dies continerent, quibus peractis reliquos 5. dies veluti *Επαγομενας*, vel *additos* adjungebant, antequam iterum ad primum Mensem reverteretur, singulos au-
tem

tem Menses, vel 30. dierum spatium in tres æquales partes, vel decades dividebant; quarum singulæ 10. dies continerent; hac lege, ut primi 10. dies Mensis *incuntis* dicerentur, alii sequentes 10. Mensis *stantis*, alii denique postremi dies 10. Mensis *cadentis*; quod nostris ferè temporibus in celeberrimo Arcadum Cætu instauratum, & usurpatum esse conspicimus.

Annus.

Ex duodecim Solaribus Mensibus, Solaris Annus componitur, qui juxta Cæsaris emendationem continet dies 365., & horas 6., quæ quidem horæ sex singulis quaternis Annis integrâ diem componunt, quæ aliis addita Annum illum 366. dierum constituit. *Bissexthus* autem, vel *Intercalaris* Annus iste vocatur; quod bis eo anno dicatur *sexto Kalendas Martii*, cum ille dies *intercalaris*, vel additur inter 23. & 24. Februarii diem, quo *Regifugium*, vel Regum fuga Romæ contigerat, inferatur, ut infra ostendemus.

Quandoquidem verò Solari Anno; quem Numa instituerat undecim dies Cæsar adjecit; ipsos quoque Mensium dies augere, & invertere debuit. Itaque incipiens a Martio, Aprilis, & Junio, aliisque paribus solum dies 30. attribuit; singulis verò imparibus 31.; atque, ut Januario ultimo ex imparibus suum quoque diem concederet, hunc abstulit Februario, qui proinde 29. dierum superfuit. Deinde verò quemadmodum Quintilis in Julii Cæsaris honorem, qui eo Mense natus erat, legem ferente M. Antonio Consule, *Julius* vocari

cari cœpit (a) ; ita Sextilis , quo Augustus primum Consulatum cœperat , ter in Urbem triumphos subjectâ Ægypto , & pace undique partâ , intulerat , illius nomine *Augustus* est appellatus . Cùm autem ægrè ferret Augustus Mensem sibi cognominem uno die minorem esse Julio , unam adhuc Februario diem surripuit , quam Augusto adjiceret ; ac ne tres immediatè menses 31. dierum ponerentur , Julius nimirum , Augustus , September , unum Septembri detraxit , quem Octobri adjecit , unumque similiter Novembri , quem Decembri concessit ; atque ita factum est , ut aliqui Menses 30. , alii 31. diebus constarent , & Februarius Anni communis 28. dies contineret , bissextilis verò 29. , quod his versiculis exprimitur .

Triginta September habet, totidemq; November,

Junius, Aprilis ; reliquis adjungitur unus ;

Viginti enumerat tantum Februarius octo ;

At si bissextus fuerit, superadditur unus .

Hec autem Anni Juliani dispositio , bissextorum periodus , Mensium ordo adhuc servantur , nisi quod Annus ipse paullo minor est observatus ; neque enim dies 365. & hor. 6. accuratè continet , sed dies 365. , & hor. 5. min. 49. unde locum Gregorianæ Correctionis factum esse dicimus . Illud etiam in Julii Cæsaris Anno servatum esse conspiciamus , ut cùm ille , non a Solstitio hybérno , sed a Novilunio , quod Solstitium ipsum proximè sequatur , atque Correctionis anno U. C. 709. fortè fortunâ Kalendis Januarii contigit , annum incœperit , ita quoque Christiani omnes a Kalendis Januarii Annum exordiantur .

No-

(a) *Macr. Sat. I. c. 12.*

Notum est autem Arabes a Solstitio Æstivo Annum incœpisse; Judæos ante Moysen ab Autumnali Æquinoctio; post Moysen verò ab Æquinoctio Verno.

Cyclus Solaris.

Sol spatio 365. dierum, & horar. 6. in anno Juliano Zodiacum percurrit, adeoque totidem dies, & horas continet annus *Julianus*, *Romanus*, *communis*; & si bissextus fuerit, dies 366. quodd si numerus ille dierum in hebdomadas dividatur, fient hebdomadæ 52. & unicus adhuc dies in Anno communi, vel duo in bissextili supererunt. Hinc si a die Dominico, ex. gr. hic Annus incaperit, & communis sit, sequentis Anni initium cadet in diem Lunæ, tertii sequentis initium in diem Martis, sicque singulis septem annis in singulos hebdomadæ dies Anni principium incideret, & octavo quoque Anno semper eadem die Dominicâ Annus inciperet; unde septem illæ priores Alphabeti literæ, quæ singulis diebus in Calendariis apponi solent, quæque a Romanis olim *Nundinales*, nunc verò *Dominicales* vocantur, ordine diem Dominicum exhiberent, ut Anno primo litera Dominicalis esset G, secundo F, tertio E, quibus peractis octavo Anno rediret ad G. Quia verò quarto quoque Anno intercalatur, hoc est dies integer Anno bissextili adjungitur, & Annus ille duas Dominicales Literas habere debet, quarum prima a Kalendis Januarii ad 25. diem Februarii, altera exinde ad Anni finem inserviat; necessariò fit, ut ordo ille pervertatur, & si ex. gr. hoc Anno bis-

bissextili principium Anni sit dies Lunæ, & Litera Dominicalis F, sequenti Anno erit

Cycl Sol.	Lit.Dom.
1.	D C
2.	B
3.	A
4.	G
5.	F E
6.	D
7.	C
8.	B
9.	A G
10.	F
11.	E
12.	D
13.	C B
14.	A
15.	G
16.	F
17.	E D
18.	C
19.	B
20.	A
21.	G F
22.	E
23.	D
24.	C
25.	B A
26.	G
27.	F
28.	E

Mercurii dies, & Litera Dominicalis D; hinc literarum ejusmodi Dominicalium series, periodus, five Cyclus diei *Solaris*, hoc est diei Dominici, qui olim Soli Sacer fuerat, singulis septem Annorum quadrienniis, hoc est 18. Annis absolvitur, quo peracto idem literarum ordo revertitur, quod in subiecto schemate clarius intelligitur; ubi observandum, quod invento Cycli Solaris numero, qui huic Anno conveniat, facile invenitur Litera Dominicalis ejusdem Anni, hæc enim illi proximè opponitur.

Ut autem Cycli Solaris numerus singulis Annis conveniens inveniatur, supponendū est Annum 1700. esse primum Cycli Solaris, cui

cui Litera Dominicalis C correspondet, atque ita ordine Cyclorum, Annorumque seriem. continuari, ut Anno 1727. numerus Cycli Solaris sit 28., Litera Dominicalis E, iterumque Anni 1728. Cyclus Solaris sit I, litera Dominicalis D C, atque ita semper usque ad Annum 1900. exclusivè: sed ut universalius adhuc, & sine schemate Cyclus Solaris, tantummodo cujuslibet Anni inveniatur, supponi debet primum Annum Christi in decimum annum Cycli Solaris incidisse; unde si Annis Christi, vel Æræ Christianæ addantur 9., & tota illorum summa per 28. dividatur, si nihil quidem supererit, Annus ille erit ultimus, seu vigesimus octavus Cycli Solaris; sin verò supererit aliquis numerus, hic illius Anni Cyclum exhibebit, ut ex. gr. si Anno 1732. addantur 9., ac tota summa 1741. dividatur per 28. supererit 5. qui significat Annum hunc esse quintum Cycli Solaris; & literam F E, illi correspondentem esse Dominicalem. Itaque

Junge Annis Domini ter. ternos, perque viginti

Octo seca summam, Cyclus Solaris habetur.

*Cyclus Lunaris, vel Aureus
Numerus.*

Quemadmodum olim Athenienses, & tota ferè Græcia, ita nunc Arabes, ut antea diximus, Turcæ, & Saraceni anno lunari utuntur, qui nullâ ratione, ac veluti fœdere cum anno solari conjungitur, sed per anni solaris tempora liberè evagatur, ut aliquando hyeme, aliquando æstâte incipiat. Plerique

tamen alii, qui lunarem annum amplexi sunt, illum cum anno Solis conjungere, vel comparare studuerunt, quod a pluribus quidem diversâ ratione tentatum est, feliciter tamen a Metone Atheniensi tandem perfectum, ut ab illo inventa Periodus novendecim annorum, quibus anni Solis, & Lunæ ad æqualitatem redirent, Metonica Enneadecaeteris, Cyclus aureus, vel numerus Aureus dici, & aureis etiam characteribus depingi consueverit.

Ratio verò, quâ lunaris ejusmodi Cyclus, sive anni lunaris æquatio cum solari a Metone instituta, atque deinde a posteris usurpata fuerit, sic brevissimè exponi poterit.

Quilibet solaris annus communis, aut Julianus 365 dies, & horas 6. continet, unde in novendecim solaribus continentur dies 6939. horæ 18. Quilibet verò mensis Synodicus Lunæ, ut antea diximus continet dies 29. hor. 12. 44.¹ 3.¹¹ 11.¹¹¹ unde in novendecim annis solaribus, sive in diebus 6939. & horis 18. mensis Synodicus 235. vicibus continetur. Si etenim mensis ille dier 29. hor. 12. min. 44.¹ 3.¹¹ 11.¹¹¹ 235. vicibus sumatur, sive per numerum 235. multiplicetur, fient dies 6939. hor. 16. 32.¹ 28.¹¹ 5.¹¹¹ quæ ad superiorem summam 6939 hor. 18., spatium nempe temporis novendecim annorum solarium proximè accedit, unde post spatium illud Lunæ, Solisque motus sic iterum conjungetur, ut eodem tempore ad idem Cœli punctum, quo ante 19. annos simul discesserant, revertantur.

Ac veteres quidem, cùm Lunæ Periodum non accuratè cognitam haberent, rudiorique calculo ipsam cum annuo Solis motu compa-

rarent, novendecim annorum spatio Lunæ, Solisque motus perfectè æquari putarunt, ideoque etiam Nicæni Concilii Patres Enneadecaeteridem, sive decemnovalē circulum, veluti accuratum, constantem, perpetuumque definiendo Lunæ motui, Paschatisque celebritati indicendæ existimarunt. Itaque in hoc fallitur Enneadecaeteris, quod Solis, Lunæque periodum accuratè non adæquet, & 235 lunationum periodus, sive dies 6939. hor. 15. 32.¹ 28.¹¹ 5.¹¹¹ a 19. annorum solarium spatium sive diebus 6939. hor. 18. spatium hor. 1. 27.¹ 31.¹¹ 55.¹¹¹ deficiat; ideoque, cū Sol vigesimum annum ingreditur, jam Luna 236. lunationem per spatium horæ unius, ac ferè dimidiæ incipit; unde spatium 304. annorum, in quo 16. Enneadecaeterides numerantur, ferè hor. 23. 20. 30.¹¹ 40.¹¹¹ sive integrum diei spatium reperietur, quo Luna Solem præcedet.

Hipparchus itaque, & Calippus quadruplo majorem periodum assumpserunt, & 76. solarium annorum spatium elegerunt, quo 940. lunationes, hoc est dies 27758. 18. 0.¹ 52.¹¹ 20.¹¹¹ continentur, quæ minimum differunt a 76. annorum solarium spatio, sive dier. 27759. Primus verò Periodi Calippicæ annus incidit in an. 3 Olymp. 112. P. I. 4384. A. C. 331. Aliud quoque vitium in hac Metonis Enneadecaeteride reperitur, quoddam anno solari Juliano utatur, nempe dierum 365. hor. 6. cū revera, ut mox ostendetur, quilibet solaris annus non nisi dies 365. hor. 5. 49.¹ contineat, ideoque in 19. solaribus annis dies 6939. hor. 14. 31.¹ reperiantur, unde lunaris Enneadecaeteridis periodus solarem superat di-

scri-

scrimine hor. 2. 1.^a 18.^{ta} 5.^{ta} ideoque spatium 209 annorum, in quibus 11. Enneadecaeterides numerantur, horæ 22. 16.^{ta} 8.^{ta} 55.^{ta} vel integra ferè dies reperiatur, quâ Sol Lunam præcedit, sed hæc innuisse sufficiat.

Interim verò intelligi, vel definiri facile poterit, quis Aureus numerus anno cuilibet dato conveniat. Cum enim primus Christi annus in Aureum numerum 2. inciderit, si anno Christi proposito ex. gr. 1732. unitas adjungatur, & summa 1733. dividatur per 19. quod superest, nimirum 4. erit Aureus numerus anni propositi 1732.

Unum addes annis Domini summamque novenis,

Et denis tribues, numerus tibi ut aureus adsit.

Indictio.

Quemadmodum verò literarum Dominicalium periodus, vel 28. annorum series Cyclus solaris, atque 235. lunarium mensium series, sive 19. annorum solarium Enneadecaeteris aureus numerus vocatur; ita tertia quædam Periodus per singulos 15. annos revolvibilis Indictio appellatur. Non solum autem illius origo, & institutio incerta est, sed etiam multiplex est illius forma, vel modus. Alia nimirum est *Constantinopolitana*, vel *Græca*, quæ Kalendis Septembris incipit; alia *Cæsarea*, vel *Imperatoria*, quæ VIII. Kal. Oct. initium sumit; alia denique *Romana*, vel *Pontificia*, quæ sola nunc adhibetur, & 2 Kal. Januarii exorditur.

Ex illius institutione, quæ omnino fortuita, & arbitraria fuit, factum est, ut primus an-

N

nus

nus *Æræ Christianæ* in Indictionem quartam, hoc est annum quartum Indictionis Pontificiæ inciderit, adeoque, ut Indictio conveniens singulis annis reperiatur, annis Christi adjungi debent tres anni, totaque summa dividi per 15. quod enim supererit, Indictionem ipsam ostendet. Ut additis, simulque collectis 1732. & 3. summa 1735. dividatur per 15. quod supererit 10. erit Indictio anni 1732.

Si tribus adjunctis Domini divideris annos, Ter tibi per quinos Indictio certa patebit.

Periodus Juliana.

Ex tribus ejusmodi Cyclis Lunæ, Solis, & Indictionis, qui singulorum annorum veluti characteres meritò haberi solent, celebris illa Periodus est derivata, quæ, cum a Josepho Scaligero Julii Cæsaris filio ad anni Juliani leges accommodata fuerit, *Juliana* communiter appellatur, quâ certè nihil illustrius, & ad errores, qui plurimi in Chronologiâ irrepere solent, evitandos accommodatius excogitari posse videbatur. Si igitur Cyclus solaris integer 28. in integrum Cyclum lunarem, vel Aureum numerum 19. ducatur, fiet 532. quæ Periodus *Victoriana*, hoc est a Victore Aquitano, tempore, & consilio Hilarii Papæ anno 457. instituta dicitur, vel *Dionysiana* a Dionysio quodam *Exiguo*, qui illam ad conciliandum discrimen, quod circa Paschatis celebrationem inter Romanos, & Alexandrinos erat, adhibuit. Quod si Periodum hanc Victorianam, sive summam annorum 532. ex Aureo numero, & Cyclo solari inter

inter se ductis productam adhuc multiplicaveris per 15. numerum Indictionis, fiet 7980., quæ est celeberrima Juliana Periodus, de quâ nunc agimus.

Ejusmodi verò Periodi utilitas, ac miræ ferè præstantia indè præsertim oritur, quod idem annus, hoc est annus iisdem Cyclo solari, Aureo numero, vel Indictione, certis veluti characteribus, distinctus, non nisi post exactam integram Periodum 7980. annorum, redire possit, adeoque omnis confusio, & æquivocatio prorsus vitetur. Sic ex. gr. si præsens annus 1732. Cyclum solare habet 5. Aureum numerum 4. Indictionem 10., impossibile est, quod alter annus in hac totâ Periodo annorum 7980. reperiatur, qui habeat simul eundem Cyclum solare, Aureum numerum, & Indictionem, quæ huic anno tribuitur; ideoque si Veteres Historici rerum gestarum memoriam, vel annos, quibus illæ contigerunt, his Cyclis consignassent; nulla propemodum opinionum varietas haberetur, neque annus ille cum alio confundi posset.

Hæc illustrius adhuc intelligi poterunt ex iis, quæ superius dicta sunt. Cyclus solaris hujus anni 1732. est 5. Aureus numerus est 4. Indictio verò est 10., annus itaque præsens erit 6445. Periodi Julianæ; impossibile est enim, quod in totâ Periodo 7980. annorum, alter annus, vel numerus reperiatur, qui divisus per 28. relinquat 5., per 19. relinquat 4., per 15. residuum sit 10., ideoque hic annus cum alio nullâ ratione confundi posset. Illud etiam insigne discrimen inter Julianam Periodum, aliasque temporum supputando-

rum rationes reperitur, quod in illis ab aliquo remoto puncto, veluti initio, tempora numerantur, ut ab *Urbe conditâ*, a *Christo nato*, a *Trojâ dirutâ*; incertum est autem, quot exinde anni ad nostra tempora fluxerint; Juliana verò Periodus a nostris ipsis temporibus incipiat, retroque gradiendo ad annum illum perveniat, quo res facta memoretur, clarissimèque demonstret, quot ex inde anni intercesserint. Sic ex. gr. si dixerim Socratem natum esse anno ab orbe condito 3537. a *Trojâ dirutâ* 718. incertum adhuc, obicurumque erit, quot a Socratis ortu, ad præsentem annum effluxerint anni, cum in definiendâ Mundi origine, Trojanæ Urbis excidio immane quantum Chronologi dissideant. At verò si dixerim Socratem natum esse anno Periodi Julianæ 4247 sive, quod idem est, anno, quo Cyclus solaris erat 19. Lunaris 10. Indictio 2. statim intelligo annum illum a præsentem, quo Cyclus solaris est 5. Lunaris 4. Indictionis 10., ideoque in Julianâ Periodo est 6445. annorum 2198. intervallo distare.

Quandoquidem verò primus annus Christi Cyclum solare habuit 10. numerum Aureum 2. Indictionem 4. annus ille in Periodo Julianâ erit 4714. atque supposito, quod Mundi creatio Christi Nativitatem 4004. annis præcesserit, ut inferius ostendetur, necessariò fiet, ut annus primus Mundi fuerit 710. Periodi Julianæ, cui convenit Cyclus solaris 10. Aureus numerus 7. Indictio 5. Hinc universaliter dato quocumque anno Periodi Julianæ, Cyclus solaris, Aureus numerus, & Indictio illi conveniens facillè reperitur.

tur. Si etenim annus ille propositus ex. gr. 4247. dividatur per 28. id, quod relinquitur, nempe 19. erit *Cyclus solaris*; si dividatur per 19. Aureus numerus 10. relinquetur; quemadmodum si per 15. dividatur, numerus 2. pro *Indictione* supererit.

Similiter etiam dato *Cyclo solari*, Aureo numero, & *Indictione*, inveniri, vel definiiri poterit annus *Periodi Julianæ*, cui soli *Cycli*, vel *characteres* illi convenient. Ex *Cyclo solari* proposito addito, si opus fuerit, (si nempe *Cyclus solaris* Aureo numero minor foret) integro *solari Cyclo* 28. auferatur propositus numerus Aureus, & residuum multiplicet. numerum 56. tum illorum producto addatur numerus *Cycli solaris*, ex quo facta fuerit subtractio, & illorum summa, detracto prius, si fieri potest, numero 532. exhibebit annum *Periodi Victorianæ*, cui propositi *Cycli Solis*, & *Lunæ* convenient.

Deinde ex hoc anno *Periodi Victorianæ* subducatur *Indictio* proposita, & quod relinquitur dividatur per 15. atque id, quod factâ divisione superfit, multiplicetur, per 1064. eorumque producto addatur annus *Periodi Victorianæ* antea repertus, illorumque summa detracto, si fieri possit, numero 7980. exhibebit annum *periodi Julianæ*, cui tres illi *Cycli* convenient.

Sint ex. gr. *Cyclus solaris* 19. Aureus numerus 10. *Indictio* 2. subducatur ex *Cyclo solari* 19. Aureus numerus 10. & residuum 9. multiplicetur per 56. eorumque producto 504. addatur *Cyclus solaris* propositus 19. eritque illorum summa 523. annus *Periodi Victorianæ*, cui *Cyclus solaris* 19. & Aureus numerus 10. convenient.

N 3

Ex

Ex anno 532. Periodi Victorianæ subducatur Indictio proposita 2. atque residuum 521. dividatur per 15., numerusque 11., qui factâ divisione relinquitur, multiplicetur per 1064., illorumque producto 11704. adjungatur annus Periodi Victorianæ 523., illorumque summa 12227. detracto prius, siquidem fieri id potest, numero 7980., exhibebit numerum 4247. Periodi Julianæ, cui tres propositi Cycli conveniunt.

Emendatio Gregoriana.

Quæ de variis Cyclis, atque Periodis, quæ ad explicandos Solis, & Lunæ motus, & distinguenda tempora inventæ sunt, hætenus exposuimus, supponunt annum diebus 365. & hor. 6. accuratè componi, quod olim Julius Cæsar, Nicœni Patres, Dionysius Exiguus, ceterique Ecclesiastici, & Profani Scriptores omnes amplexi sunt. Deinde tamen accuratioribus studiis compertum est sex horas illas non integras esse, cum undecim ferè minuta prima illis desint, & verior anni, Solisque periodus sit diebus 365. hor. 5. 49. Itaque singulis annis undecim minuta supererant, quæ spatio 131. annorum integram diem componebant, atque a Julii Cæsaris ætate, primoque anno Juliano ad annum Christi 1582. spatio nempe annorum 1617. undecim illa minuta integros duodecim dies formaverant, atque a Concilii Nicœni temporibus, quod anno 325. celebratum est, decem similiter dies perperam additi, numerati, insertique fuerant.

Exinde verò fieri oportuit, ut *Æquinoctium verum*, tempus nimirum, quo Sol æquino-

ctii verni punctum ingrediebatur, citius singulis annis contingeret, quàm vulgò putaretur, ideoque, cùm æquinoctium Nicœni Concilii tempore in 20. aut 21. Martii diem incidisset, anno 1582. ad 10. vel 11. ejusdem Martii diem pervenerat. Huic gravissimo quidem incommodo, quo pulcherrimus ille dierum festorum ordo, præsertim verò Paschatis celebratio maximè invertebatur, plurimi sapientissimi Viri occurrere studuerunt, resque in Constantiensi, & Basileensi Concilio primum, deinde in Tridentino proposita, atque ad Romanum Pontificem postremò delata est, qui illustrioribus Astronomis undique convocatis, maximo tandem bonorum omnium plausu (a) Kalendarium, & labes, quæ in illud irreperant, anno 1582. emendavit. Cùm itaque Gregorius XIII. animadverteret singulis 393. sive ferè 400. annis tres integros dies ex 11. minutis illis, quæ in Juliano anno supererant, componi, & veris annis solaribus perperam addi, adeoque a Nicœni Concilii temporibus jam ferè 1300. annos effluxisse, quibus decem dies irreperant, ut æquinoctium in suam sedem restitueretur, 10. hos dies eximendos esse putavit, quemadmodum eodem anno 1582. ex mense Octobri subripuit, ut ille dies, qui festum D. Francisci sequebatur, & 5 alioquin fuisset, 15. diceretur, quod in aliis quoque Provinciis factum est, in Galliâ ex. gr. dies, qui 10. Novembris erat futurus, 20. haberetur, ideoque sequenti anno 1583. dies, qua 11. Martii erat futura, 21. jam foret. Nonnulli tamen veterem adhuc

(a) Vid. Tich. epist. ad Rodolph. Imperat.

rarent, novendecim annorum spatio Lunæ, Solisque motus perfectè æquari putarunt, ideoque etiam Nicæni Concilii Patres Enneadecaeteridem, sive decemnovalē circulum, veluti accuratum, constantem, perpētuumque definiendo Lunæ motui, Paschatisque celebritati indicendæ existimarunt. Itaque in hoc fallitur Enneadecaeteris, quod Solis, Lunæque periodum accuratè non adæquet, & 235 lunationum periodus, sive dies 6939. hor. 15. 32.¹ 18¹¹ 5.¹¹¹ a 19. annorum solarium spatium sive diebus 6939. hor. 18. spatium hor. 1. 27.¹ 31.¹¹ 55.¹¹¹ deficiat; ideoque, cū Sol vigesimū annum ingreditur, jam Luna 236. lunationem per spatium horæ unius, ac ferè dimidiæ incæpit; unde spatium 304. annorum, in quo 16. Enneadecaeterides numerantur, ferè hor. 23. 20. 30¹¹ 40¹¹¹ sive integrum diei spatium reperietur, quo Luna Solem præcedet.

Hipparchus itaque, & Calippus quadruplo majorem periodum assumpserunt, & 76. solarium annorum spatium elegerunt, quo 940. lunationes, hoc est dies 27758. 18 9¹ 52.¹¹ 20.¹¹¹ continentur, quæ minimum differunt a 76. annorum solarium spatium, sive dier. 27759. Primus verò Periodi Calippicæ annus incidit in an. 3 Olymp. 112. P. I. 4384. A. C. 331. Aliud quoque vitium in hac Metonis Enneadecaeteride reperitur, quod anno solari Juliano utatur, nempe dierum 365. hor. 6. cū revera, ut mox ostendetur, quilibet solaris annus non nisi dies 365. hor. 5. 49.¹ contineat, ideoque in 19. solaribus annis dies 6939. hor. 14. 31.¹ reperiantur, unde lunaris Enneadecaeteridis periodus solarem superat discri-

scrimine hor. 2. 1.^a 28.^{ta} 5.^{ta} ideoque spatium 209 annorum, in quibus 11. Enneadecaeterides numerantur, horæ 22. 16.^{ta} 8.^{ta} 55.^{ta} vel integra ferè dies reperiatur, quâ Sol Lunam præcedit, sed hæc innuisse sufficiat.

Interim verò intelligi, vel definiri facile poterit, quis Aureus numerus anno cuilibet dato conveniat. Cum enim primus Christi annus in Aureum numerum 2. inciderit, si anno Christi proposito ex. gr. 1732. unitas adjungatur, & summa 1733. dividatur per 19. quod superest, nimirum 4. erit Aureus numerus anni propositi 1732.

Unum addes annis Domini summamque novenis,

Et denis tribues, numerus tibi ut aureus adsit.

Indictio.

Quemadmodum verò literarum Dominicalium periodus, vel 28. annorum series Cyclus solaris, atque 235. lunarium mensium series, sive 19. annorum solarium Enneadecaeteris aureus numerus vocatur; ita tertia quædam Periodus per singulos 15. annos revolvibilis Indictio appellatur. Non solum autem illius origo, & institutio incerta est, sed etiam multiplex est illius forma, vel modus. Alia nimirum est *Constantinopolitana*, vel *Græca*, quæ Kalendis Septembris incipit; alia *Cæsarea*, vel *Imperatoria*, quæ VIII. Kal. Oct. initium sumit; alia denique *Romana*, vel *Pontificia*, quæ sola nunc adhibetur, & a Kal. Januarii exorditur.

Ex illius institutione, quæ omnino fortuita, & arbitraria fuit, factum est, ut primus an-

nus *Æræ Christianæ* in Indictionem quartam, hoc est annum quartum Indictionis Pontificiæ inciderit, adeoque, ut Indictio conveniens singulis annis reperiatur, annis Christi adjungi debent tres anni, totaque summa dividi per 15. quod enim supererit, Indictionem ipsam ostendet. Ut additis, simulque collectis 1732. & 3. summa 1735. dividatur per 15. quod supererit 10. erit Indictio anni 1732

*Si tribus adjunctis Domini divideris annos,
Ter tibi per quinos Indictio certa patebit.*

Periodus Juliana.

Ex tribus ejusmodi Cyclis Lunæ, Solis, & Indictionis, qui singulorum annorum veluti characteres meritò haberi solent, celebris illa Periodus est derivata, quæ, cum a Josepho Scaligero Julii Cæsaris filio ad anni Juliani leges accommodata fuerit, *Juliana* communiter appellatur, quâ certè nihil illustrius, & ad errores, qui plurimi in Chronologiâ irrepere solent, evitandos accommodatius excogitari posse videbatur. Si igitur Cyclus solaris integer 28. in integrum Cyclum lunarem, vel Aureum numerum 19. ducatur, fiet 532. quæ Periodus *Victoriana*, hoc est a Victore Aquitano, tempore, & consilio Hilarii Papæ anno 457. instituta dicitur, vel *Dionysiana* a Dionysio quodam *Exiguo*, qui illam ad conciliandum discrimen, quod circa Paschatis celebrationem inter Romanos, & Alexandrinos erat, adhibuit. Quod si Periodum hanc *Victorianam*, five summam annorum 532. ex Aureo numero, & Cyclo solari
inter

inter se ductis productam adhuc multiplicaveris per 15. numerum Indictionis, fiet 7980., quæ est celeberrima Juliana Periodus, de quâ nunc agimus.

Ejusmodi verò Periodi utilitas, ac miræ ferè præstantia indè præsertim oritur, quod idem annus, hoc est annus iisdem Cyclo solari, Aureo numero, vel Indictione, certis veluti characteribus, distinctus, non nisi post exactam integram Periodum 7980. annorum redire possit, adeoque omnis confusio, & æquivocatio prorsus vitetur. Sic ex. gr. si præsens annus 1732. Cyclum solare habet 5. Aureum numerum 4. Indictionem 10., impossibile est, quod alter annus in hac totâ Periodo annorum 7980. reperiatur, qui habeat simul eundem Cyclum solare, Aureum numerum, & Indictionem, quæ huic anno tribuitur; ideoque si Veteres Historici rerum gestarum memoriam, vel annos, quibus illæ contigerunt, his Cyclis consignassent, nulla propemodum opinionum varietas haberetur, neque annus ille cum alio confundi posset.

Hæc illustrius adhuc intelligi poterunt ex iis, quæ superius dicta sunt. Cyclus solaris hujus anni 1732. est 5. Aureus numerus est 4. Indictio verò est 10., annus itaque præsens erit 6445. Periodi Julianæ, impossibile est enim, quod in totâ Periodo 7980. annorum, alter annus, vel numerus reperiatur, qui divisus per 28. relinquat 5., per 19. relinquat 4., per 15. residuum sit 10., ideoque hic annus cum alio nullâ ratione confundi posset. Illud etiam insigne discrimen inter Julianam Periodum, aliasque temporum supputando-

rum rationes reperitur, quod in illis ab aliquo remoto puncto, veluti initio, tempora numerantur, ut ab *Urbe conditâ*, a *Christo nato*, a *Trojâ dirutâ*; incertum est autem, quot exinde anni ad nostra tempora fluxerint; Juliana verò Periodus a nostris ipsis temporibus incipiat, retroque gradiendo ad annum illum perveniat, quo res facta memoretur, clarissimèque demonstret, quot ex inde anni intercesserint. Sic ex. gr. si dixerim Socratem natum esse anno ab orbe condito 3537. a *Trojâ dirutâ* 718. incertum adhuc, obitumque erit, quot a Socratis ortu, ad præsentem annum effluxerint anni, cum in definiendâ Mundi origine, Trojanæ Urbis excidio immane quantum Chronologi dissideant. At verò si dixerim Socratem natum esse anno Periodi Julianæ 4247 sive, quod idem est, anno, quo Cyclus solaris erat 19. Lunaris 10. Indictio 2. statim intelligo annum illum a præsentem, quo Cyclus solaris est 5. Lunaris 4. Indictionis 10., ideoque in Julianâ Periodo est 6445. annorum 2198. intervallo distare.

Quandoquidem verò primus annus Christi Cyclum solare habuit 10. numerum Aureum 2. Indictionem 4. annus ille in Periodo Julianâ erit 4714. atque supposito, quod Mundi creatio Christi Nativitatem 4004. annis præcesserit, ut inferiùs ostendetur, necessariò fiet, ut annus primus Mundi fuerit 710. Periodi Julianæ, cui convenit Cyclus solaris 10. Aureus numerus 7. Indictio 5. Hinc universaliter dato quocumque anno Periodi Julianæ, Cyclus solaris, Aureus numerus, & Indictio illi conveniens facillè reperitur.

tur. Si etenim annus ille propositus ex. gr. 4247. dividatur per 28. id, quod relinquitur, nempe 19. erit *Cyclus solaris*; si dividatur per 19. Aureus numerus 10. relinquitur; quemadmodum si per 15. dividatur, numerus 2. pro *Indictione* supererit.

Similiter etiam dato *Cyclo solari*, Aureo numero, & *Indictione*, inveniri, vel definiiri poterit annus *Periodi Julianæ*, cui soli *Cycli*, vel *characteres* illi convenient. Ex *Cyclo solari* proposito addito, si opus fuerit, (si nempe *Cyclus solaris* Aureo numero minor foret) integro *solari Cyclo* 28. auferatur propositus numerus Aureus, & residuum multiplicet. numerum 56. tum illorum producto addatur numerus *Cycli solaris*, ex quo facta fuerit subtractio, & illorum summa, detracto prius, si fieri potest, numero 532. exhibebit annum *Periodi Victorianæ*, cui propositi *Cycli Solis*, & *Lunæ* convenient.

Deinde ex hoc anno *Periodi Victorianæ* subducatur *Indictio* proposita, & quod relinquitur dividatur per 15. atque id, quod factâ divisione superfit, multiplicetur, per 1064. eorumque producto addatur annus *Periodi Victorianæ* antea repertus, illorumque summa detracto, si fieri possit, numero 7980. exhibebit annum *periodi Julianæ*, cui tres illi *Cycli* convenient.

Sint ex. gr. *Cyclus solaris* 19. Aureus numerus 10. *Indictio* 2. subducatur ex *Cyclo solari* 19. Aureus numerus 10. & residuum 9. multiplicetur per 56. eorumque producto 504. addatur *Cyclus solaris* propositus 19. eritque illorum summa 523. annus *Periodi Victorianæ*, cui *Cyclus solaris* 19. & Aureus numerus 10. convenient.

N 3

Ex

Ex anno 532. Periodi Victorianæ subducatur Indictio proposita 2. atque residuum 521. dividatur per 15., numerusque 11., qui factâ divisione relinquitur, multiplicetur per 1064., illorumque producto 11704. adjungatur annus Periodi Victorianæ 523., illorumque summa 12227. detracto prius, siquidem fieri id potest, numero 7980., exhibebit numerum 4247. Periodi Julianæ, cui tres propositi Cycli conveniunt.

Emendatio Gregoriana.

Quæ de variis Cyclis, atque Periodis, quæ ad explicandos Solis, & Lunæ motus, & distinguenda tempora inventæ sunt, hætenus exposuimus, supponunt annum diebus 365. & hor. 6. accuratè componi, quod olim Julius Cæsar, Nicœni Patres, Dionysius Exiguus, ceterique Ecclesiastici, & Profani Scriptores omnes amplexi sunt. Deinde tamen accuratioribus studiis compertum est sex horas illas non integras esse, cum undecim ferè minuta prima illis desint, & verior anni, Solisque periodus sit diebus 365. hor. 5. 49. Itaque singulis annis undecim minuta supererant, quæ spatio 132. annorum integram diem componebant, atque a Julii Cæsaris ætate, primoque anno Juliano ad annum Christi 1582. spatio nempe annorum 1617. undecim illa minuta integros duodecim dies formaverant, atque a Concilii Nicœni temporibus, quod anno 325. celebratum est, decem similiter dies perperam additi, numerati, insertique fuerant.

Exinde verò fieri oportuit, ut *Æquinoctium verum*, tempus nimirum, quo Sol æquino-

aii verni punctum ingrediebatur, citius singulis annis contingeret, quàm vulgò putaretur, ideoque, cùm æquinoctium Nicœni Concilii tempore in 20. aut 21. Martii diem incidisset, anno 1582. ad 10. vel 11. ejusdem Martii diem pervenerat. Huic gravissimo quidem incommodo, quo pulcherrimus ille dierum festorum ordo, præsertim verò Paschatis celebratio maximè invertebatur, plurimi sapientissimi Viri occurrere studuerunt, resque in Constantiensi, & Basileensi Concilio primum, deinde in Tridentino proposita, atque ad Romanum Pontificem postremò delata est, qui illustrioribus Astronomis undique convocatis, maximo tandem bonorum omnium plausu (a) Kalendarium, & labes, quæ in illud irreperant, anno 1582. emendavit. Cùm itaque Gregorius XIII. animadverteret singulis 393. sive ferè 400. annis tres integros dies ex 11. minutis illis, quæ in Juliano anno supererant, componi, & veris annis solaribus perperam addi, adeoque a Nicœni Concilii temporibus jam ferè 1300. annos effluxisse, quibus decem dies irreperant, ut æquinoctium in suam sedem restitueretur, 10. hos dies eximendos esse putavit, quemadmodum eodem anno 1582. ex mense Octobri subripuit, ut ille dies, qui festum D. Francisci sequebatur, & 5. alioquin fuisset, 15. diceretur, quod in aliis quoque Provinciis factum est; in Galliâ ex. gr. dies, qui 10. Novembris erat futurus, 20. haberetur, ideoque sequenti anno 1583. dies, qua 11. Martii erat futura, 21. jam foret. Nonnulli tamen veterem adhuc

(a) Vid. Tich. epist. ad Rodulph. Imperat.

usum, vel *stylum* servant, quod apprimè notandum est, ut errores omnes vitentur, & apparentes temporum contradictiones conciliantur. Ne verò eadem rursus labes, & Æquinoctiorum præcessio contingeret, decrevit Pontifex, ut tres dies intercalares singulis 400. annis omitterentur; ut, cum alioquin singuli centesimi bissextiles esse debuerint, tres tamen ex illis communes forent: bissextilis itaque fuit 1600. correctioni proximus, sequentes verò centesimi 1700. 1800. 1900. communes erunt, 2000. verò bissextilis.

Alter etiam error ex anni Juliani periodo in Kalendarium irrepserat, quod veteres Enneadecaeteridem, seu decennovalem Cyclum, quo numerus aureus continetur, accuratum, & exactum adeo putarunt, ut post annorum 19. spatium novilunia, & plenilunia in eodem dies, horas, & minuta reditura existimarent, cum tamen horâ 1. 27.¹ 31.¹¹ 55.¹¹¹ anticipent juxta veterem anni Juliani formam, sive potius, ut paullo superius ostendimus, cum de Aureo numero loqueremur, spatio hor. 2. 21.¹ 28.¹¹ 5.¹¹¹ differant, sive sequantur; ideoque nullâ ratione Solis, Lunæque periodus hac Enneadecaeteridum serie cœquetur.

Duplex itaque hic error, ejusque remedium, cum Astronomorum ingenia diu elusisset, difficilius tandem, ac operosius Aloysii Lylî studio inventum est, qui, cum triginta *Epactas*, vel *Epactarum* numeros excogitasset, qui loco aurei numeri adhiberentur, irregularitates illas vitavit, quæ ex omissis intercalationibus, vel bissextilibus annis oriri poterant. Cum tamen *Epactæ* cognitio, & methodus, quâ adhiberi illa solet, ac debet, paul-

paullò intricatior sit, hìc omittitur; subjecto tamen duplici schemate, in quorum primo ostenditur, quānam singulis annis Epacta, vel Aureus numerus conveniat ab anno 1600. inclusivè, cui tribuitur Epacta XV. usque ad 1700. exclusivè; in altero verò ab anno 1700. inclusivè, cui tribuitur Epacta IX. ad annum 1900. exclusivè, itaut per 199. annos ab ultimâ ad primam regrediamur *.

Aur. Num. 5. 6. 7. 8. 9. 10. 11.
Epacta XV. XXVI. VII. XVIII. XXIX. X. XXI.

12. 13. 14. 15. 16. 17.
II. XIII. XXIV. V. XVI. XXVII.

18. 19. I. 2. 3. 4.
VIII. XIX. I. XII. XXII. IV.

Aur. Num. 10. 11. 12. 13. 14. 15. 16.
Epacta IX. XX. I. XII. XXIII. IV. XV.

17. 18. 19. I. 2. 3. 4.
XXVI. VII. XVIII. * XI. XXII. III.

5. 6. 7. 8. 9.
XIV. XXV. VI. XVII. XXVIII.

Admirabilis autem est Epactarum, & Cycli solaris, seu literarum Dominicalium usus in Festis mobilibus, quæ variis nimirum, incertisque diebus celebrari solent, ritè definiendis. Irregularis autem, *mobilis*, & incerta sedes festorum exinde oritur, quòd cetera a Paschate de-

* Hac tamen certâ, constantique lege, ut anni propositi Epacta non a Kalen. Januarii, sed a Kalendis Martii incipiat, ad sequentis anni Kalend. Martias duratura.

dependeat ; Paschalis verò festivitas , quæ Dominico die , qui 4. Martii Lunam proximè sequatur , celebrari debet , modò citiùs , ac modò seriùs , prout citiùs , vel seriùs plenilunium Martii contigerit , celebretur . Ut itaque singulis annis Paschatis dies inveniatur , consulenda est primò series Cycli solaris , & invenienda littera Dominicalis , quæ dato anno respondeat . Deinde ex superiori Epactarum serie invenienda similiter est Epacta ejusdem anni ; tum in primâ columnâ sequentis *Tabula Paschalis antiqua reformatæ* invenienda est Epacta anni propositi , atque postremò littera Dominicalis , quæ in secundâ columnâ proximè sit infra numerum Epactæ ; eidemq; litteræ Dominicali sic inventæ adhærebit , vel rectâ respondebit in tertiâ columnâ dies , quo Pascha eò anno contigerit .

Quærat ex. gr. dies , quo Pascha contigerit anno 1721. inveniatur littera Dominicalis ejusdem anni , quæ est E , & Epacta , quæ est 3. cui in Paschali Tabula è regione opponitur littera Dominicalis B , infra quam proximè reperiatur E , cui è regione , sive directè respondet dies 13. Aprilis , in quo Pascha celebrari debuit .

Longè facilius est Paschatis inventio in *Tabulâ Paschali novâ* . Inveniri debet in primâ columnâ littera Dominicalis anni propositi ex. gr. 1731. quæ est E , tum in secundâ columnâ , sive cellulâ Epactarum , quæ eidem litteræ Dominicali E correspondet , inveniatur Epacta ejusdem anni , quæ est 3. & ille rectâ è regione respondebit in tertiâ columnâ dies 13. Aprilis quæsitâ .

Inveniri similiter debeat Paschatis dies anno 1815. littera Dominicalis erit A , Epacta verò

rò 17. cui respondet in Tabulâ Paschali novâ dies 2. Aprilis.

Quod si Paschatis dies anni 1630. sit inveniendus, litera Dominicalis erit F, Epacta 16. cui in Paschali Tabulâ novâ rectè respondet dies 31. Martii, quo Pascha eodem anno celebratum est.

Invento jam Paschatis die, cetera mobilia festa faciliè inveniuntur. Siquidem inter diem Paschatis, & Dominicam Septuagesimæ 62. solidi dies intercedunt; inter diem Cinerum, ac Pascha dies 45., a Paschate ad Ascensionem Domini 40. numerantur, 49. ad Dominicam Pentecostes; festum Trinitatis in Octavam Pentecostes incidit, & solemnitas Corporis Christi feria V. proximè post Dominicam Trinitatis celebratur; quemadmodum prima dies Adventûs est Dominica proximior festivitati S. Andræ, sive illa festum ipsum præcedat, sive sequatur, sive in ipsum incidat.

Tabula Paschalis Antiqua reformat.

Epacta.

Lit. Dom.

XXIII.	d	22. Mart.
XXII.	e	23.
XXI.	f	24.
XX.		
XIX.	g	25.
XVIII.	A	26.
XVII.	b	27.
XVI.	c	28.
XV.	d	29.
XIV.	e	30.
XIII.	f	31.
XII.	g	1. Apr.
XI.	A	2.
X.	b	3.
IX.	c	4.
VIII.	d	5.
VII.	e	6.
VI.	f	7.
V.	g	8.
IV.	A	9.
III.	b	10.
II.	c	11.
I.	d	12.
*	e	13.
XXIX.	f	14.
XXVIII.	g	15.
XXVII.	A	16.
25. XXVI.	b	17.
XXV. XXIV.	c	18.
	d	19.
	e	20.
	f	21.
	g	22.
	A	23.
	b	24.
	c	25.

Tabula Paschalis Nova.

Lit. Dom.	Epaſtæ.	Dies Paſch.
D	23. 22. 21. 20. 19. 18. 17. 16. 15. 14. 13. 12. 11. 10. 9. 8. 7. 6. 5. 4. 3. 2. 1 * 29. 28. 27. 26. 25. 24.	22. Mar. 29. Mar. 5. Apr. 12. Apr. 9. Apr.
E	23. 22. 21. 20. 19. 18. 17. 16. 15. 14. 13. 12. 11. 10. 9. 8. 7. 6. 5. 4. 3. 2. 1. * 29. 28. 27. 26. 25. 24.	23. Mar. 30. Mar. 6. Apr. 13. Apr. 20. Apr.
F	23. 22. 21. 20. 19. 18. 17. 16. 15. 14. 13. 12. 11. 10. 9. 8. 7. 6. 5. 4. 3. 2. 1. * 29. 28. 27. 26. 25. 24.	24. Mar. 31. Mar. 7. Apr. 14. Apr. 21. Apr.
G	23. 22. 21. 20. 19. 18. 17. 16. 15. 14. 13. 12. 11. 10. 9. 8. 7. 6. 5. 4. 3. 2. 1. * 29. 28. 27. 26. 25. 24.	25. Mar. 1. Apr. 8. Apr. 15. Apr. 22. Apr.
A	23. 22. 21. 20. 19. 18. 17. 16. 15. 14. 13. 12. 11. 10. 9. 8. 7. 6. 5. 4. 3. 2. 1. * 29. 28. 27. 26. 25. 24.	26. Mar. 2. Apr. 9. Apr. 16. Apr. 23. Apr.
B	23. 22. 21. 20. 19. 18. 17. 16. 15. 14. 13. 12. 11. 10. 9. 8. 7. 6. 5. 4. 3. 2. 1. * 29. 28. 27. 26. 25. 24.	27. Mar. 3. Apr. 10. Apr. 17. Apr. 24. Apr.
C	23. 22. 21. 20. 19. 18. 17. 16. 15. 14. 13. 12. 11. 10. 9. 8. 7. 6. 5. 4. 3. 2. 1. * 29. 28. 27. 26. 25. 24.	28. Mar. 4. Apr. 11. Apr. 18. Apr. 25. Apr.

Que-

Quemadmodum verò ex Epactâ, simulque Dominicali literâ Paschatis celebrandi dies, juxta methodum superiùs, invenitur, ita prorsus ope ejusdem Epactæ definiri faciliè poterit ætas Lunæ qualibet die, quot nimirum dies à Novilunio, vel Plenilunio decesserint. Inveniendus est enim primò numerus Epactæ, qui dato anno respondeat, incipiendo a Kal. Martii, tum adjungendus est illi numerus dierum, qui ex initio mensis solaris ad propositam ejusdem mensis diem intercedunt, atque postremò addi debet numerus mensium, vel Kalendarum, quæ a Martio inclusivè ad propositum mensem numerantur; Hæc etenim summa, si numerum 30. non excedat, ætatem, sive diem Lunæ exhibebit, si fuerit 30. ostendit Novilunium in ipsâ contingere, at si 30. superet, ablato 30., qui supersunt ætatem Lunæ designant. Quærat ex. gr. die 15. Junii anni 1732. ætas Lunæ. Epactæ ejusdem anni 3. addatur 15. simulque 4. numerus mensium à Martio incëptorum, illorumque summa 22. ostendit Lunam die 15. Junii 22. diem suum agere. Quod si id de 25. Junii die quæreretur, ex 32. Epactæ nimirum Kalendarum, & dierum mensis summa subtrahi deberet 30. numerusque 2. qui superesset, ostenderet tunc Lunam 2. diem agere. Sed hæc, aliæque id genus plurimæ, suis ex fontibus uberiùs repeti poterunt; quemadmodum certè nuperiùs accuratissimè, luculentissimèque præstitit, Jacobus Betazzius in eximio Opere publici juris futuro. Nobis autem hæc indicasse sufficiat, quæ clariora fuerant, & ex quibus maxima subindè utilitas consequetur.

De Æris , & Epochis illustrioribus .

Ut certus aliquis annorum numerus describi possit , rerumque gestarum memoria distincto quodam , determinatoque tempore definiri , necessarium fuit , ut aliqua veluti puncta , & fines aliqui eligerentur , unde annorum numerus inciperet . Hinc optimo , sapientissimoque consilio Epochæ inventæ sunt , quæ *remoram* , seu *inhibitionem* significant , quæ posterioribus deinde seculis , ut inferius ostendetur , *Æra* vocatæ sunt . Duplex est autem istarum genus ; aliæ nimirum sunt *Æræ sacra* , alia *profana* . Sacræ dicuntur illæ , quæ a sacris Literis traditæ , vel adhibitæ sunt , sive certè sunt illæ , in quibus annorum series ab aliquâ re gestâ , quæ in sacris Literis memoretur , exordiat ; Profanæ verò sunt illæ , quibus alii Scriptores , præsertim Ethnici utuntur , & ab aliquo facto , quod a profanis solùm Scriptoribus memoretur , originem sumunt . Utrumque tamen Epochæ genus adeo conjunctum est , ut unum ab altero sejungi vix possit , sed unum alteri plurimam lucem afferat . A sacris itaque , quæ longè profanis nobiliores , antiquioresque sunt , exordiamur .

Epocha sacra.

Prima inter Epochas sacras est illa , quæ ab ipsâ Mundi origine incipit ; cùmque illustriores etiam Chronologi in assignandâ Mundi origine , vel ætate plurimùm differant , ut Disp. I. c. 2. ostendimus , in ipso quoque hu-

hujus Epochæ limine, vel exordio definien-
do maximè dissident. Varias illorum opinio-
nes alibi demonstravimus; id unum hîc ad-
dimus, ceteros inter accuratiorem, atque
eruditis hominibus probatiorem esse Usserii
calculum, quem a Pagio, Lanceloto, aliis-
que compluribus illustratum, & confirmatum
accepimus.

Mundus itaque in hac hypothesi creatus est
initio noctis, quæ Dominicum diem 23. Octo-
bris præcessit, anno P. I. 710. nimirum an-
nis 4004. ante primum Christi annum; ut
proinde annus istæ 1732. in quo hæc scribi-
mus, sit 5736. a Mundi origine.

Quandoquidem verò ejusmodi temporis spa-
tium, quod a Mundi origine ad Christum
natum reperiri dicimus, series nimirum 4004.
annorum, in 6. partes, vel ætates dividi so-
let, ejusmodi divisionis puncta, veluti toti-
dem Epochæ sacræ, sive termini, a quibus
anni numerentur, haberi solent.

1. Prima itaque Mundi ætas ab ipsius ori-
gine, vel creatione ad Diluvium usque ex-
tenditur, nimirum ad incuntem annum Mun-
di 1657. unde annos integros continet 1656.
duosque insuper ferè menses anni sequentis
1657.

2. Incipit a Diluvio absoluto, sive ab an-
no 1657. duobus mensibus jam incœpto, usque
ad Abrahami vocationem, peregrinationem,
promissionemque illi factam de nascituro ex
ipsius genere Redemptore, quæ contigit anno
Mundi 1083. adeoque complectitur annos 426.

3. Ab anno 76. Abrahamæ ad exitum populi
Israël de Ægypto, hoc est ad annum Mun-
di 2513. in quâ sunt anni 430.

4. Ab

4. Ab exitu populi de Ægypto ad Templi ædificationem, sive ad annum Mundi 2992. per annos 480.

5. A fundatione Templi ad solutam captivitatem Babylonicam anno 1. Cyri, quæ in annum Mundi 3468. incidit, & constat annis 476.

6. A captivitate solutâ ad Christi nativitatem, sive ad annum Mundi 4004. annos continet 536.

Æra Christiana.

Hujus celebris Epochæ initium ex communi Ecclesiæ consensu post Dionysii Exigui tempora conjicitur in annum Julianum, sive reformationis a Julio Cæsare factæ, 46. sive P. I. 4714.; itaut Christus natus fuerit, in hac hypothesi, die 25. Decembris anni Juliani 45. qui esse debuit annus P. I. 4713. Mundi verò 4004. U. C. 753. & 4. Olymp. 194. Sed illustriores, & accuratiores Historici, & Chronologi demonstrant, quod Christus quadriennio ante hujus Epochæ Dionysianæ initium natus est, die nimirum 25. Decembris anni Juliani 41. P. I. 4709. Mundi 4000. anno 4. Olymp. 193. ab U. C. 749. anno Imperii Augusti Cæsaris post Julii Cæsaris mortem 40. anno denique regni Herodis Magni 36. ut Epochæ, vel Æra Christiana revera incœperit a Kal. Jan. anni Juliani 42. P. I. 4710. U. C. 750., atque hic præsens annus a Christi nativitate sit non 1732. sed 1736.

Ex plurimis autem, clarissimisque rationibus, quibus id egregiè demonstratur, hanc unam afferre, vel exhibere sufficiat, quæ clari-

rior videtur, & ad illustrandam Christi Nativitatem propius accedit.

Compertum est itaque, clarissimisque Scripturæ locis ostenditur, Christi Domini, Servatorisque nostri nativitatem, circumcisionem, factamque Orientis Regibus revelationem *in diebus Herodis Regis* (a) contigisse; ideoque natalem Christi diem, primumque *Æræ Christianæ* annum ante Herodis cognomento *magni*, vel *infanticida* mortem ponendum esse.

Herodem verò anno Juliano 42. U. C. 750. P. I. 4710. defunctum esse plurimis, clarissimisque Josephi auctoritatibus, atque Astronomicis observationibus manifestissimè demonstratur. *Moritur enim Herodes annos quidem triginta quatuor, ex quo interfecit Antigonum, regno potitus; triginta verò septem post quam Rex a Romanis declaratus est* (b), vel, ut alibi expressius habet; *vitâ defunctus est Herodes post detrusum regno Antigonum anno trigesimo quarto, ex quo autem a Romanis Rex declaratus est, trigesimo septimo* (c). Porro ille regium fastigium adeptus est 184. Olympiade C. Domitio Calvino iterum, & C. Asinio Coss. hoc est, ut ex Fastis apparet, anno U. C. 714. Juliano 6. Hierosolymam verò triennio obsessam superavit, & Antigonum Regno, vitâque spoliavit anno ab U. C. 717. Juliano 9. siquidem ea clades Hierosolymorum incidit in Consulatum M. Agrippa, & Canidii Galli 185. Olymp. , mense tertio (d) tamquam recurrente in idem temporis momentum illatâ Judæis a Pompejo calamitate. Nam & ab illo eodem die

(a) *Matth. c. 2. ver. 1.* (b) *De Bello Judæ. I. c. 12.*
 (c) *Antiq. XVII. c. 10. & Bell. I. c. 21.* (d) *ibi c. 28.*

die Urbs capta fuerat ante annos 27. (a) tertio nimirum mense 179. Olymp. C. Antonio, & M. Tullio Cicerone Coss (b), idest anno U. C. 691.

Quo quidem in loco notari plurimum debet, Herodem regni insignia Romæ accepisse ineunte ætate anni Juliani 6. U. C. 714. antequam Olympias 184. desineret, ac inciperet 185. quæ, juxta Calvisium, circa solstitium æstivum ejusdem anni, hoc est diem 17. Augusti cœpit. Si itaque Herodes interiit post accepta Romæ Regni insignia anno 37. & post sublatum Antigonum, captamque Urbem anno 34.; regnum autem accepit, siue Romæ Rex declaratus est ante solstitium æstivum anni U. C. 714. Urbemque Hierosolymam occupavit anno U. C. 717. & ineunte quidem ætate, vel mense tertio, ut ait Josephus, inito calculo manifestissimè sequitur, quod Herodes ante ætatem anni U. C. 751. Juliani 43. defunctus est.

Ipsam tamen intra anni Juliani 41. periodum excessisse, non modò ex superioribus Josephi verbis, quibus annos regni 37. non integros, completosque, sed inchoatos, ut solet, inceptosque significat, inferri potest, sed ex eclipsi etiam Lunæ, quam contigisse refert Josephus eadem nocte, quâ Herodis ægrotantis jussu Matthias populi seductor occisus est, & post quam Herodem non diu ægram traxisse vitam commemorat. Contigit autem eclipsis illa ferè 3. horarum spatio, ut ex Astronomicis Tabulis accuratissimè demonstratur, anno Juliano 41. die 3. Martii tribus horis ante ortum Solis. Paulo post itaque lunarem eclipsim Herodes interiit, die nimirum 25. Novembris, ut in Calendario Judaico perspicuè definitur.

O 2

Id

(a) *Antiq. XIV. c. 28.* (b) *Ibi. c. 10.*

Id etiam postremò confirmari poterit ex annorum numero, quibus Archelaus Herodi Patris successor regnum obtinuit. Hunc etenim *decimo Principatus anno Caesar misit Vienne in exilium, qua est Urbs Gallia (a)*, quod *nono principatus anno* contigisse alibi notat Josephus (b); ideoque Archelaus imperio spoliatus, & in exilium actus est anno 9. jam completo, inceptoque 10. postquam Herodi patri successerat; cùmque Archelai exilium inciderit in annum U. C. 750. Jul. 51. *M. Emilio Lepido, & L. Aruntio Coss. (c)* ut auctor est Diodorus, initium illius Imperii, adeoque Herodis mors contigit anno Juliano 42.

Cùm itaque Christi Nativitas, ex constantissimâ Orientalis, & Occidentalis Ecclesiæ traditione, 25. Decembris die contigerit, in superiorem annum Julianum 41. U. C. 749. P. I. 4709. Mundi 4000. *Augusto 12. & L. Cornelio Sulla Coss* referri debet; ut primus Æræ Christianæ annus incæperit unâ cum anno Juliano 42. U. C. 750. P. I. 4710. M. 4001.

Deinde verò, cùm Tiberii Cæsaris Imperium incæperit anno Juliano 59. U. C. 767. P. I. 4717. quo Cæsar Augustus die 19. Augusti defunctus est; consequens est, ut annus 15. Imperii Tiberii Cæsaris, quo D. Joannes Baptista Pœnitentiæ Baptismum, fortasse mense 7., nimirum Octobri nostro, qui *pœnitentialis* a Judæis vocabatur, prædicavit, incæperit mense Augusto anni Juliani 73. U. C. 781. P. I. 4741. cùmque Joannes *cursum implevisse*, maximamque sibi gloriam compa-

(a) *Antiq. XVII. c. 15.* (b) *De Ballo Jud. II. c. 6.*
(c) *Lib. LV.*

parasse dicatur, ut Christus a compluribus haberetur (a), Baptismus Christi, qui ex veteri Ecclesiæ consensu, in 6. Januarii diem incidit, non proximè sequenti anno Juliano 74. U. C. 782. P. I. 4742. sed potius in sequentem annum Julianum 75. U. C. 783. P. I. 4743. referri debet. Denique, cum Christus post susceptum a Joanne Baptisma quater Pascha celebraverit; primò nimirum cum vendentes, ac ementes ejecit e Templo (b); secundò cum languidum sanavit (c); tertio cum quinque hominum millia panibus quinque satiavit (d); quarto demum, & ultimò cum post Paschalem agnum Corpus suum Discipulis, mortique tradidit (e), necessariò fit, ut is crucifigi, vel mori debuerit, anno Juliano 78. U. C. 786. P. I. 4746. hora 21. diei 3. Aprilis, in quem feria 6. simulque luna 15. eodem anno contigerat, cum ætatis suæ compleisset annos 36. menses 3. dies 9.

Accuratior tamen horum tractatio ad Cronologos pleno jure spectat: nobis autem hæc leviter innuisse sufficiat, atque illa indicasse, quæ præteriri vix poterant. Juerit etiam monere, mirandum non esse, quod vulgaris illa, vel Dionysiana Epochæ Christiana incerta, & falsa deprehendatur; hæc enim primis Ecclesiæ temporibus adhiberi non consueverat, cum anni vel Consulium nomine, vel ab Urbe Condita, vel per Olympiadas, vel ab immani Diocletiani persecutione, quæ exeunte anno 302., & ineunte 303. incæpit, numerari solerent; unde facile fieri potuit, ut

O 3

post

(a) *Joan. C. 1.* (b) *Joan. 2. ver. 14.* (c) *Ib. c. 5.* (d) *C. 6.* (e) *C. 18.*

post integra quinque secula, siue quingentos annos in definienda ipsius origine, vel exordio Dionysius erraverit. Græci tamen Scriptores annos adhuc enumerant ab Orbe Condito, sed alii exinde ad Christi Nativitatem. 3493. annos constituunt, alii 5501. alii denique 5509. Prior illa Epochæ *Alexandrina*, vel *Antiochena* dicitur; secunda *Ethiopica*, tertia *Byzantina* vocatur, quodd a Byzantinis scriptoribus adhiberi consueverit.

Epocha Profana.

Longè major in Profanis, quàm in Sacris Epochis varietas reperitur. Nobiliores ex illis, & quæ frequentius ab Auctoribus adhibentur, hic ordine complectemur.

Troja diruta.

Apud veteres Scriptores nihil illustrius, & celebrius est, quàm Trojanæ Urbis, & Imperii excidium; quemadmodum etiam, ut alibi diximus, veluti limes, & terminus illud videtur, a quo vera Historia incipiat, cùm ante bellum Trojanum locus nonnisi fabulis relinquatur. Ut autem Epocham apud profanos Scriptores celeberrimam definiamus, Eratosthenes, & Cato apud Dionysium Halicarnasæum Trojam dirutam esse docuerunt 432. annis, antequam Roma ædificaretur, adedque cùm Urbs condita fuerit anno Mundi 3252. P. I. 3961. ut mox dicetur, Trojanum excidium anno Mundi 2819. vel anno I. P. 3529. contingere debuit, cùmque trecentis annis Trojanum Imperium stetisse dicatur, atque ita intelligi debeat illud Virgilii. *Urbs*

Urbs antiqua ruit multos dominata per annos (a),

consequens est, ut Troja a Dardano ædificata fuerit anno Mundi 2519. P. I. 3219.

Olympias.

Græci per Olympiades annos numerabant, cum singulis 5. annis, hoc est 4. completis, & ineunte 5. ludi in Pisâ, vel Olympiâ Ælidis urbe in Herculis honorem celebrari solebant. Primus autem ex Olympiacis ludis ab Iphito Elidis Rege celebratus est anno 776. ante Æram Christianam, hoc est anno Mundi 3228. P. I. 3938. adeoque præsens hic annus jam foret 1. Olympiadis 628. a superiori ætate inchoatus.

Urbs Roma Conditâ.

Romani ab Urbe Conditâ, hoc est a Romæ Urbis ædificatione, annorum initium aspiciabantur, illorumque seriem numerabant. Conditâ autem est Roma, ut inquit Varro, exeunte anno 3. Olymp. 6. hoc est anno P. I. 3961. Mundi 3251. ante Christianam Æram 753. Facti tamen Capitolini in sequentem annum Urbis originem conciliunt.

Lustrum.

Quemadmodum Græci Olympiades, ita Latini *lustra*, sive *quinquennia* adhibebant, do-
O 4
nec

nec Indictiones, quæ tria lustra, vel 15. annos continerent, sunt institutæ.

Æra Nabonassari.

Quamvis autem priscis etiam temporibus Olympiadum usus apud Græcos floruerit, Ptolemæus tamen, aliique Astronomi veteres Ærâ Nabonassari Babylonii Regis sæpissime usi sunt, quod plurimæ cœlestium corporum observationes ab Assyriis, & Chaldæis peractæ, & illius Regis Æra consignatæ Aristotelicæ Callisthene missæ, ac per totam Græciam divulgatæ fuerint. Hæc autem Æra cæpit anno Mundi 3257. P. I. 3967. ante Christianam Æram 747. ab U. C. 7 cùmque annis Ægyptiacis utatur, qui diebus 365. componuntur, illius initium incidit in diem 26. Februarii nostri.

Æra Seleucidarum.

Hæc Epochâ Seleucidarum, sive Macedonum, quâ post Alexandri mortem Græci communiter in Oriente sunt usi, ut ex libris Machabæorum apparet, incipit anno P. I. 4402. A. C. 312. In ipsa verò modò lunares, modò solares anni adhibentur, qui modò vere, modò autumnò incipiunt.

Æra Hispana.

Cùm facta a Triumviris totius Orbis partitio a Senatu anno 8. Juliano U. C. 716, approbata, & confirmata fuisset, Cæsar Augustus Hispanis imperare cœpit, atque isti ab exordio regni illius annos numerare cœperunt.

runt, unde Hispanica, vel Hispaniensis Æra anno Juliano 8. Mundi 3966. P. I. 4676. est instituta; quin etiam Æræ nomen posterioribus etiam seculis inde manavit, cum quatuor hæc literæ A. E. R. A. quibus annos *Ab Exordio Regni Augusti* numerari significabatur, ad Epocham ipsam, vel numerandi rationem traductæ sunt.

Hegira.

Epocharum omnium postrema est Hegira, seu *persecutio*, vel *fuga*, quâ Saraceni, Arabes, Turcæ uti solent. Incipit illa a die 16. Julii anni communis Æræ Christianæ 622. quo Mahometes, ob novam sectam institutam, fugere compulsus est; cumque dies ille inferiam sextam incidisset, hic dies veluti sacer apud Turcas habetur. Atque istæ quidem sunt illustriores Epochæ, quibus Historici, & Scriptores omnes uti consueverunt, sed illas accuratiùs exponere neque loci hujus, neque muneris nostri ratio postulat.



C A P. VI.

De Mercurio, & Venere.

I.



Ulcherrimum est Veneris sidus quod ab Ægyptiis *Isidis Stella* vocatum accepimus. Hæc enim non insigni solum splendore, puriorque luce minores alios Planetas facile antecellit; sed admirabili adeo periodo, variisque phasibus movetur, ut æmula Solis, & Lunæ meritò habeatur. Hæc eadem aliquando Solem præcedit, unde *Phosphorus*, *Lucifer*, *Aurorifer* appellatur; aliquando verò Solem ipsum proximè sequitur, unde *Hesper*, *Vesper*, *Vesperugo* dicitur. *Quam eius sideris naturam Pythagoras Samius primus deprehendit Olympiade circiter 42. qui fuit Urbis Romæ 142.* ut auctor est Plinius^(a), & Apollodorus^(b); quamvis alii^(c) Parmenidem, alii^(d) Hybicum fuisse memorent, qui unum, idemque sidus esse Phosphorum, & Hesperum observaverit.

II. Cùm itaque Veneris sidus parùm a Sole digrediatur, sed illi semper ædhærat, nunc illum præveniens, nunc sequens, nunc dextram, nunc verò sinistram ejus partem occupans, hinc veteres omnes Ægyptii meritò suspicati sunt^(e) Mercurium, & Venerem non circa Terram, sed potius circa Solem veluti cen-

(a) II. c. 8. (b) Apud Stob. Ecl. Phys. (c) Laërt. XI. seg. 23: & Suid. (d) Tasi. in Arat. (e) Macrob. Somn. I. c. 19. & Vitruv. IX. c. 4.

centrum gyrare, ut in Systematè Ægyptio, & Pythagoricâ, sive Copernicanâ, & Tichonicâ etiam hypothese apparet. Quod autem verisimili hac conjecturâ veteres illi, alique complures affecuti fuerant, nostris hisce temporibus invictè, manifestissimèque demonstratur. Cùm etenim Galileus anno 1610. Venerem modò falcatam, modò obscuram, modò pleno orbe nitentem, easdemque phases in illâ observasset, quæ in Lunâ conspiciuntur, juxta severiores Astronomiæ leges demonstravit, quod aliquando Venus, Lunæ instar, Soli conjuncta esse debet, & obscurior videri, aliquando verò Soli opposita, plenoque orbe fulgere. Quia verò in Hypothese Ptolemaicâ, dum Venus circa Terram, veluti centrum, movetur, nunquam Soli opposita esse potest, quandoquidem ab illo ultra 48. gradus numquam digreditur, necessariò sequitur, quod hæc oppositio Veneris fiat, dum Venus est Sole superior, adeoque Veneris orbita Solem veluti centrum coronet, ut illa aliquando Sole superior, aliquando Sole inferior sit. Hæc autem periodus Veneris circa Solem spatio dierum 224. h. 17. 44.¹ 55.¹¹ 14.¹¹ conficitur, hoc est ferè mensium 7. cum dimid. cum singulis diebus percurrat gr. 1. 36.¹ 8.¹¹ Interim verò circa proprium axem velocissimè movetur spatio 13. horarum, ut ex maculis, quæ in illa videntur, ostenditur (a).

III. Unam Cassinus, duas circa Venerem Lunulas, sive Satellites se deprehendisse putavit Fontana (b) sed illi, aut nondum sub aspe-

(a) Vid. Greg. Astr. VI. prop. 3. (b) Hamel. Astron. Phys. II. c. 5.

aspectum rediere, aut certè sidera fixa, vel maculæ Veneris fuerunt. Asperam denique, & inæqualem esse illius superficiem testantur Astronomi (a), atque inter alios Hiræus, qui in illius superficie montes lunaribus, adeoque terrestribus, pro ratione molis, altiores observavit.

IV. De Mercurio Planetarum omnium minimo panca dicenda nobis occurrunt; non solum, quòd eadem ferè sit illius Theoria, quæ Veneris, a qua proximè ambitur, sed etiam quia rarò conspicitur, tum ob exiguitatem, tum quia ferè semper a radiis solaribus occultatur. Maxima siquidem illius digressio a Sole est gr. 28. quòd argumento esse potest, ut antea de Venere dicebamus, Mercurium quoque circa Solem 87. dierum, & horarum 23. 11.ⁱ 24.ⁱⁱ periodo moveri, singulisque diebus grad. 4. 5.ⁱ 32.ⁱⁱ 35.ⁱⁱⁱ 37.ⁱⁱⁱⁱ percurrere. Atque ista quidem celer adeo periodus in causâ fuit, cur ab Ægyptiis Mercurius *Stella Apollinis* diceretur, quòd Apollo sagittandi peritiâ floruerit. Sæpius in solari disco Mercurius apparuit, veluti nigricans quædam macula, atque a solaribus maculis celeriori solum motu, quo solarem discum spatio hor. 5. 14. peragebat, distinguebatur, ut fusè Gassendus commemorat. Luminis phasés in illo observatas esse clarissimi Astronomi (b) demonstrarunt; maculas verò, aut Satellites observare non licuit: hæc tamen omnia in illo reperiri, adeoque Mercurium circa proprium axem

(a) *Fabry. Tract. VII. lib. I. prop. 89. Ricciol. Alm. VII. sect. I. c. 2.* (b) *Ricciol. Almag. VII. sect. 1. c. 2. Kepl. Astron. Coper. Hevel. Selenogr.*

axem, Planetarum omnium instar, torqueri, quod spatio 6. horarum fieri Keplero videbatur, incertum quidem est, sed tamen partim ex ipsis Astronomiæ legibus, partim ex verisimili conjecturâ, partim denique ex analogiâ, sive similitudine, quæ in Planetarum omnium substantiâ, dignitate, periodo &c. inesse debent, optimè ostendi potest; ut enim egregiè ait Plutarchus (a) *Probabilitatis ratio postulat aspectum nostrum, aut omnibus in Astris, aut in nullo sic affici.* Addi etiam poterit, Mercurium ipsum vix accuratè rotundum videri, cum ferè semper gibbosus, & aliquando bifariam sectus appareat.

CAP. VII.

De Marte, Jove, & Saturno.

- I.  NO, eodemque Capite, quæ de tribus superioribus Planetis, Marte nimirum, Jove, & Saturno dicenda sunt, complectimur, quod eadem ferè sint illorum phænomena, eademque leges, quibus illi periodum circa Solem, vel circa Terram perficiunt. Atque ut ab illo, qui Telluri nostræ proximior est, exordiamur, Mars, quem Ægyptii *Stellam Herculis* appellabant, a fixis sideribus, ceterisque Planetis faciliè distingui potest ob ardentem veluti ruborem, quo illustratur, unde etiam Martis, & Herculis nomen accepisse

(a) *De fac. in or. Luna.*

se dicitur. In illius facie insignes quædam maculæ ope Telescopii conspiciuntur, quæ solarium instar augeri, minui, ac demum evanescere solent. Ex illarum motu ab Astronomis omnibus, atque Cassino præsertim, accuratissimè observatio deducitur, Martem ipsum circa proprium axem torqueri spatio 24. horarum cum minutis 40. Altero verò motu, quo circa Solem veluti centrum in Tychonicâ, & Copernicanâ Hypothesi movetur spatio dierum 686. h. 23. 31.¹ 56.¹¹ 49.¹¹¹ nempe unius anni, & ferè 322. dierum, cum quotidie peragat 31.¹ 26.¹¹ 39.¹¹¹ Tellurem ipsam complectitur; ut proinde, aliquando Sole proximior, aliquando remotior sit, quod, ut antea dicebamus, Tychonem impulit, ut Cælorum soliditatem respueret. Incredibile est autem, quàm inter se differant veteres, & recentiores Astronomi in illius magnitudine, sive distantia a Tellure definiendâ, cum aliqui Terrâ majorem; alii minorem illum existiment.

II. Marte superior est, ipsumque proximè sequitur Jupiter, quem *Osiridis stellam* dixerunt Ægyptii. Suas ipse quoque habet maculas, sed maximè diuturnas, cum illarum aliquæ tribus ferè annis apparuerint. Ejusmodi macularum periodus circa Jovem, vel motus Jovis circa proprium axem, aliquando hor. 9. 50.¹ aliquando hor. 9. 51.¹¹ frequentius tamen, & verius hor. 9. 56.¹ observatus est. Nonnullis insuper veluti fasciis, non integris tamen, & in se perfectè redeuntibus, sed aliquando interruptis ambitur, quæ modò plures, modò pauciores, modò latiores, sibi que proximiores, modò graciliores, & remotiores apparent,

rent, quas omnium primus in illius superficie Franciscus Fontana deprehendit. Jovis figura non accuratè sphærica, sed sphæroidi potius circa polos compressæ similis videtur. Integra Jovis periodus circa Solem, vel Terram spatio dierum 4332. hor. 12. sive. annorum 11. dier. 317. h. 14. 49.¹ 31.¹ 56.¹¹ completur, cùm diebus singulis peragat 41.¹ 56.¹¹ 26.¹¹¹ Illius denique magnitudo, & distantia a Terris inferiùs exhibebitur.

III. Circa Jovem veluti centrum quatuor nova sidera, sive Planetæ certâ periodo moventur. Hæc omnium primus superioris sæculi decus eximium Galileus anno 1610. die 7. Januarii feliciter observavit, & *Medicea sidera*, quibus æternum foret Regiæ Etruscorum familiæ nomen, vocavit.

Peireskius verò Principum nomina singulis adjecit, ut interior, Jovisque proximior satelles sit *Cosmus minor*, sive II. 2. *Cosmus major*, sive I. 3. *Maria*, 4. *Catharina* (utraq. ex Mediceo genere, Galliæque Regina) Galilei gloriam æmulatus quinque alios circa Jovem satellites se deprehendisse putavit Fontana, & etiam Rheita, qui illos *Urbano-Ostiana*, vel *Ferdinando-Tertiana* sidera vocavit; aut inerrantia sidera, aut certè maculas quasdam satellitum locum habuerunt.

Quatuor illi Jovis satellites ita Jovem coronant juxta Cassinum.

I.	distat	$2\frac{5}{6}$	mouetur d.r.h.	18.28. ¹	36. ¹¹
	a centro		circa		
II.	Jovis	$4\frac{1}{2}$	Jovem	3.	13.13. ¹ 52. ¹¹
	diam.				
III.	Jovis	$7\frac{1}{6}$		7.	3.59. ¹ 40. ¹¹
IV.		$12\frac{2}{3}$		16.	18. 5. ¹ 6. ¹¹

IV. Satellites ipsos circa proprium axem torqueri, vel certè maculas habere, quibus illorum superficies, aliquando obscurior appareat, ex pluribus observationibus ostenditur. Hoc denique felici invento non cœlestium modò corporum numerus augeri contigit, aditumque ad illustriora adhuc liberius inquirenda aperiri; sed innumera quoque sunt commoda, quæ ex velociori satellitum periodo, & frequentibus illorum eclipsibus in Geographiam, & Nauticam derivarunt, de quibus opportuniùs alibi differetur, cùm de longitudine, de motu lucis agi contigerit.

V. Planetarum omnium supremus est ille, quem *Nemesis sidus* Ægyptii, nos verò Saturnum dicimus, qui communiter quidem, sed prorsus immeritò, lividus, ac plumbeus haberi solet, cùm splendidus adeo, vividusque sit, ut olim *Phænon*, seu lucidus vocaretur. Lentâ admodum periodo circa Solem, vel circa Terram movetur, ut quotidie 2.¹ 36.¹¹ percurrat, & integram circulationem spatio dierum 1079. hor. 7., sive an. 29. dier. 174. hor. 4. 58.¹ 25.¹¹ 30.¹¹ perficiat. Credibile est etiam ipsum, aliorum Planetarum instar, suas habere maculas, & circa proprium axem torqueri; sed hætenus, ob ingentem distantiam,

tiam, quâ a Terrâ diffidet, illæ observari, vel certò definiri non potuerunt; nisi quod in illo lucidiores quædam, aut nigriores fasciæ sunt observatæ, quæ subinde locum mutabant, & argumento esse poterant Saturnum quoque circa seipsum converti (a). Quod autem in hoc sidere maximè mirum videtur, est ille circulus, ansula, ac veluti corona, quæ illud, non superficiei quidem adherens, sed paullo ab illâ remota, circumdat. Hanc Galileus feliciter observavit, seque Saturnum *tricorporeum*, aut ehormiter oblongum, aut certè duobus satellitibus stipatum deprehendisse Astronomos monuit, neque enim illustrius aliquid hac de re conicere, aut asserere potuit.

Hugenius autem anno 1655. meliori Telescopio Annulum id esse deprehendit, qui juxta diversam inclinationem, quâ a nobis conspicitur, modò apertior, modò compressior, modò etiam in lineæ perexiguæ morem confectus appareat. Quæ verò sit hujus annuli substantia, nos suspicari vix possumus; esse tamen corpus aliquod solidum, quod Planetarum instar lumen ad nos reberat, manifestissimè apparet; nisi fortasse verisimilius existimetur illud esse pluriū veluti stellarum, sive satellitum coronam, qui circa Saturnum certâ periodo moveantur. Annuli distantia a Saturno est ad radium Saturni, ut ferè 5. ad 3., & radius annuli ad radium Planetæ, ut 9. ad 4., sive 11. ad 5. Latior est autem annulus, quàm crassior; unde, cum omnino constringitur, veluti linea medium Planetæ discum secans videtur.

Tom. IV.

P

VII.

(a) Vide Hamel. Astron. Phys. II. sect. 11. c. 4.

VII. Quemadmodum verò quatuor satel-
 lites, sive Medicea Sidera Jovem coronant, ita
 quoque circa Saturnum quinque Lunulæ, sive
 satellites observantur. Ex his unicum, qui
 nimirum ordine est quartus, invenit Hugenius,
 reliquos verò Cassinus: nuperrimè dete-
 xit, & ipsi Hugenio ostendit; qui tamen satel-
 lites alios inter IV, & V. adhuc latere su-
 spicatur, quos etiam se vidisse putavit Fontai-
 na. Illorum periodus, & distantia a centro
 Saturni ita a Cassino, & ab Hugenio defini-
 tur per diametros annuli,

I.	$\frac{19}{40}$	d. 1. h. 21. 18. 31. 11.
II. distat	$\frac{1}{4}$	movetur 2. 17. 41. 27. 11.
diam.	$\frac{3}{4}$	circa
III. annuli	$\frac{1}{4}$	Satur. 4. 13. 47. 16. 11.
IV.	$\frac{1}{4}$	15. 22. 41. 11. 11.
V.	$\frac{12}{100}$	79. 27. 53. 57. 11.

In exteriori denique Saturni satellite illud
 animadverti plurimum debet, quod in maxi-
 mæ digressionis orientali a Saturno nunquam
 conspicitur. Videtur autem, ac lucidus ap-
 paret in digressionis occidentali; quamvis in
 primo casu Telluri proximior sit (moventur
 enim satellites ex occasu in ortum in parte
 superiori orbitæ), & in secundo remotior.
 Vel itaque inæqualis est illius substantia, ut
 altera pars clarior, seu reflectendo lumini ac-
 commodatior sit, altera obscurior, minùsque
 luminis regerat, sicque dum circa proprium
 axem satelles ille convertitur, modò obscu-

(Id est, si Saturni satellite sit.)

riorem, modò lucidiorem partem ad nos convertat, ut in ipsis quoque sideribus fieri diximus; vel eandem semper Saturno faciem, nobisque diversam exhibet, ut Luna Telluri; vel denique id ex maculis variabilibus oriri potest, cum præsertim anno 1705. etiam in orientali digressionè apparuerit.

CAPUT VIII.

De Planetarum Orbitâ, periodo, distantia, ac magnitudine.

Nihil est ferè, quod ab Astronomis, qui maximâ ingenii laude superiori sæculo floruerunt, aut melioribus studiis accuratissimè exploratum, aut feliciter inventum, aut uberius illustratum fuerit, quàm leges illæ, quibus cœlestia corpora admirabiles motus suos peragunt, dum certâ quadam periodo certam orbitam circa Solem, aut Terram, juxta diversas hypothesas, describunt. Ipsa rei difficultas, quæ maxima, certè esse debuit, ut irregulares adeo siderum motus certis quibusdam legibus, ac veluti limitibus definirentur, exigat, ut egregiâ honoris, gratique animi significatione complectamur quidquid ab illis, nisi fortasse verè, ac pro rei dignitate, subtiliter tamen, ac ingeniosè explorari potuerit. *Latent ista nitidum crassis occultata, & circumfusa tenebris, ut nulla acies humani ingenii tanta sit,*

qua penetrare in Cælum possit (a), neque ullo in genere venia justior est, si modò minimè mirum, homine genitum non omnia novisse (b).

Breviter itaque, & accuratè ostendemus, quæ de Planetarum orbitâ, & periodo a recentioribus Astronomis nuperrimè excogitata sunt; cùmque ex ipsis Astronomiæ fontibus hæc omnia in Physicam derivata fuerint, ea tantummodò complectemur, quæ muneris nostri sunt; cetera siquidem apud Astronomos, Keplerum præsertim, Newtonum, Gregorium, quos hac in parte sequimur, uberius invenientur.

II. Ac primò, quod ad Planetarum orbitam pertinet, communis est hominum opinio, atque ab ipsis ferè Astronomiæ incunabilis usurpata, quæ circulos a sideribus, sive Planetis circa Tellurem describì putavit. Vix etenim Veteres Solem, aut reliqua sidera oriri, & occidere, iterumque oriri intuebantur, quin illorum circuitus, gyros, & orbitas circulares esse suspicarentur: præsertim cùm ab æquabili, simplici, & pulcherrimoque motu, qualis cœlestium corporum motus merito putabatur, nonnisi æquabilis, simplex, & pulcherrima circularis figura describi posse videretur. Sic in hypothesi Ægyptiâ, & Platonicâ omnia cœlestia corpora circa Tellurem, veluti centrum, non solum diurno motu, sed etiam proprio circulariter, sive potiùs spirali-ter, circulis nimirum in se redeuntibus, movebantur; nisi quod in Ægyptiâ Venus, & Mercurius, dum circulariter circa Terram, quotidie ferebantur, interim proprio motu similiter circulari Solem coronabant.

(a) Cic. Acad. II. (b) Plin. II.

III. Deinde verò cùm inæqualis Planetarum distantia deprehensa fuit, additi sunt orbes excentrici, vel deferentes, in quibus Planetæ singuli circulariter quidem, sed non circa Terram, veluti centrum gyrarent; quemadmodum etiam, ubi stationes, directiones, & retrogradationes Planetarum sunt observatæ; inventi quoque sunt Epicycli, in quibus Planetæ singuli, Sole tamen excepto, ut alibi diximus, circulariter moverentur. Motus itaque Planetarum in Ptolemaicâ Hypothesi triplici motu circulari componitur, adeoque maximè mirum est, quàm irregularis, & implexa futura sit orbita, siue curva, quæ a Planetis circa Terram describitur.

IV. Qui verò Tychonis Hypothesim amplectuntur, diurnum quidem motum Planetarum circa Terram circularem, siue spiralem esse opinantur, propriam verò, qui ex alio duplici motu *conversionis* circa Solem, & *abreptionis* circa Terram componitur, non circularem, sed contortæ cuidam spirali similem esse egregiâ Kepleri methodo; qui omnium primus illam ostenderat, ut Disp. I. c. 7. diximus, arbitrantur. Atque istæ quidem hypotheses, cùm duplicem motum Planetis omnibus concedant, irregulares, & contortas illorum orbitas supponere debent; in illâ verò, quæ Planetis unicum inesse motum existimat, longè simplicior orbita supponitur.

V. Copernicus itaque, cum Solem, veluti cor, & centrum Universi, illius medio collocaret, Planetas omnes, & Terram ipsam ordine superius exposito circa Solem in circulis concentricis moveri putavit; inæquales

enim Planetarum distantias ex annuo Telluris motu deducit, quæ interdum Sole inferior, interdum verò superior, adeoque ceteris Planetis aliquando proximior, aliquando remotior existeret. Sed quia neque Telluris a Sole, neque Lunæ a Terrâ distantia inæqualis esse poterat, si Terrâ accuratè circum, circa Solem, & Luna circa Tellurem describeret; circulus Soli excentricus excogitari debuit, ut ejusmodi inæqualitas salvaretur.

VI. Deinde verò decus illud eximium tempestatis nostra Keplerus (a); cùm admirabiles Planetarum motus, non optice solum, & apparenter, sed etiam physice, ac verè perplexos aded, & inæquales immenso ferè labore comperrisset, ut vix, ac ne vix quidem ad certas leges, & æquabilem periodum revocari posse viderentur; omnium primus ellipses excogitavit, quas Planetæ circa Solem in altero umbilico positum ita describerent, ut illi aliquando proximiores, aliquando remotiores existerent*. Quæ quidem nuperrima Astronomiæ ratio, vel Planetarum Theoria quanto intellectu facilior, tanto comparatè laboriosior, atque inventu difficilior esse debuit, ut ingenue Keplerus ipse testatur. (b). Keplerum sequutus est Bullialdus; ejusque methodum in Astronomiâ Philolaicâ maximè illustravit. Utrumque æmulatus est Sethus Wardus in Astronomiâ Geometricâ; Comes Paganus, Gregorius, Villemontius, La Loville, alique innumeri.

Cas-

(a) Casend. in Ep. ad Golium. (b) Repl. in Com. de Stella Mar.

* Fig. XI.

Cassinus denique ad explicandos siderum motus, & illorum inæqualitatem peculiarem aliam curvam ellipsi, vel ovali similem excogitavit, quæ ab Auctoris nomine *Cassinois* appellatur. Habet & illa suos focos, & umbilicos; hac tamen lege, ut sicuti in ellipsi summa inclinatarum ad focos semper æqualis est, ita in Cassinoide rectangula inclinatarum semper æqualia esse debeant, ut in Mathematicis Institutionibus Libro XII. ostendimus. VII. Quæ verò fieri possit, ut cœlestia corpora in fluido æthere liberè volitantia figuras ejusmodi, quæ irregulares, & impleitæ videntur, constanter adeo describant, sequenti capite demonstrabitur, cum motus illius causa, & origo exponetur. Interim in genuè fatemur, optandum quidem, ut Planetarum orbitæ ad circularem figuram reduci possent, & epicyclorum, spiraliū ambages, & anfractus a cœlestibus corporibus exularent; quandoquidem verò id ipsa Planetarum phœnomena vix patiuntur, ovals orbitæ merito, & satis feliciter cum memoratis Astronomiæ principibus admitti poterunt, ut fusiùs, & opportuniùs sequenti capite demonstrabitur.

VIII. Quòd ad periodum pertinet, sive tempora, quibus cœlestia corpora orbitam propriam describunt, incredibile est certè, quàm Veteres, Recentioresque Philosophi inter se differant, ut ex illorum calculis subinde expositis evidentissimè demonstratur. Admirabilis autem illa varietas, & ambiguitas oritur, non modò, quòd ipsi in explorandâ, definiendâque siderum distantia, magnitudine maximè differant; verùm etiam

quodd non unum, idemque sit centrum, circa quod sidera moveri, orbitamque propriam describere existimentur. Sic, ex causâ, qui Venerem, atque Mercurium circa Tellurem, veluti centrum, moveri arbitrantur, utriusque periodum, sive tempus, quo motus ejusmodi peragatur, unius anni definiunt; qui verò Copernici, sive Tychois hypothese, amplectuntur, utrumque Planetam circa Solem veluti centrum torqueri existimant, Venerem quidem octo ferè Mensium spatio, Mercurium verò trium; quod in aliis etiam Planetis intelligi debet. Atque ista quidem systematis, observationumque varietas conciliari posset, Planetarumque phænomena in singulis systematis explicari, ut Disp. I. jam diximus, quandoquidem tamen illustriores omnes Astronomi, qui in supputandis, definiendisque siderum motibus immortale nomen adepti sunt, ceterisque palmam præripere, Copernicanam hypothese, veluti clariorem, simpliciorisque admiserunt, in hac ipsâ illorum hypothese eorum calculos subiciemus, quos industrius adolescens ad Tycho nicam deinde, sive Ptolemaicam hypothese transferre faciliè poterit.

Eâ verò de causâ Keplerum maximè sequuti nunc sumus, quod omnium faciliè accuratissimus haberi ille possit, ejusque calculi ab illustrioribus deinde Astronomis, Bulialdo imprimis, Cassino, & Hiræo confirmati, vel certè levissimè correcti fuerint. Supposito itaque, quod Planetæ singuli circa Solem orbitam propriam describant;

Perio- dum com- plet						
Merc.	d.	87.	h. 23.	14. ^r 24. ^u	0. ^u 11. ^r	B. 4. 5. 132. ^u 1. ^u 14
Venus	d.	224.	17.	44. ^r 55. ^u	14. ^u 11. ^r	1. 35. ^r 8. ^u 0. ^u 14
Terra	d.	365.	5.	49. ^r 24. ^u	0. ^u 11. ^r	0. 59. ^r 8. ^u 0. ^u 14
Mars an.	r.	311.	23.	31. ^r 56. ^u	49. ^u 14. ^r	0. 31. ^r 26. ^u 39. ^u 14
Jupit. an.	r.	317.	14.	49. ^r 31. ^u	56. ^u 14. ^r	0. 4. ^r 56. ^u 26. ^u 14
Satur. an.	r.	174.	4.	58. ^r 25. ^u	30. ^u 14. ^r	0. 2. ^r 0. ^u 36. ^u 14

De

De Lunæ periodo circa Terram; satellitum Jovis, atque Saturni circa Saturnum ipsum, & Jovem alibi diximus. Quod si Planetarum distantiam a Sole veluti centro desideres, & illorum excentricitatem, sive Discrimen inter maximam, minimamque a Sole distantiam, utrumque in subjectâ Tabellâ expressimus, sive illam cum distantia Solis a Terrâ, hoc est orbis magni semidiametro, quæ 100000. partium supponatur, comparavimus. Et, quod ad distantiam quidem, & excentricitatem pertinet, Keplerum sequimur, magnitudinem verò ex Hugenio, hoc est ex Planetarum diametris ab Hugenio observatis, deduximus; ubi observandum est, quod si excentricitas addatur distantiae mediæ, habebitur maxima distantia Planetæ a Sole; sin verò excentricitas auferatur a distantia mediâ, supererit minima a Sole distantia; ut ex. gr. si distantiae mediæ 38806. Mercurii addatur excentricitas 8149., fiet illius distantia maxima 46955. si excentricitas ex distantia mediâ auferatur; residuum 30657. erit distantia minima.

Mercurii	38806.	9149.
Veneris	72400.	500.
Terra	860000.	1800.
Martis	152350.	1445.
Jovis	519650.	25058.
Saturni	951000.	54107.

Quod si quis juxta observationes aliàs non-nihil a superioribus dissidentes, id experiri vo-luerit, temporum periodicorum, quæ in su-bjecto schemate exhibentur, quadrata, di-stantiarumque cubos accipiat, atque inter se conferat; semper enim hanc miram, constan-temque legem, vel proportionem reperiet, ut, in duobus quibuscumque Planetis, inter se comparatis temporum quadrata sint, ut cubi distantiarum.

	Periodica tempora.	Distant. med.
Satur. d.	10759. h. 6. 36. ¹	26. ¹¹ 953800.
Jup.	4332. 12. 20. ¹	25. ¹¹ 520110.
Mar.	686. 23. 27. ¹	30. ¹¹ 151369.
Terra	365. 216. 9. ¹	30. ¹¹ 100000.
Venus.	224. 16. 49. ¹	24. ¹¹ 72333.
Mercur.	87. 23. 15. ¹	53. ¹¹ 38710.

Quod verò de primariis Planetis circa Solem æquabili periodo circumductis ostenditur, in secundariis quoque, vel satellitibus, qui cir-ca primarias torquentur, est observatum; isti nimirum periodum suam circa centrum, vel Planetam suum ita peragunt, ut temporum quadrata distantiarum cubis respondeant.

Id in Jovialibus Affectis exhibemus, quod facillè quivis in Saturniis experiatur.

Satelles	Tempus	Quadrat.	Distantia	Cubus.
I.	d. 1 $\frac{1}{2}$	3.	62	170.
II.	3 $\frac{1}{2}$	13.	9	736.
III.	7 $\frac{1}{8}$	51.	14 $\frac{1}{3}$	2890.
IV.	16 $\frac{2}{3}$	280.	25 $\frac{1}{3}$	15800.

XI. Quemadmodum verò Planetarum omnium periodus, sive tempus, quo circa centrum sui motus revolvuntur, cum illorum distantia ab ipso centro comparatur, ita quoque periodus ipsa, vel tempus revolutionis comparari poterit cum spatio, vel orbita, quam describunt; ita ut dato quolibet tempore definiri possit spatium, vel pars, quæ in orbita eodem tempore peragatur, vel vicissim dato spatio, vel orbitæ parte peractâ definiri tempus, quo peragatur.

Qui Planetarum orbitas circa Tellurem, veluti centrum describi, sive Planetas ipsos circa Tellurem moveri arbitrantur, Planetarum motus irregulares esse demonstrant, ut æqualibus nempe temporibus, non æqualia spatia conficiant, sed modò majora, modò minora; cum Planetæ modò directi, modò stationarii, modò etiam retrogradi admittantur: ut nulla proinde proportio inter spatia peracta, & tempora, quibus eadem peraguntur, admitti possit. Itaque hæc mira motus irregularitas, quæ cœlestia corpora maxime dedecere merito videbatur, Copernicum, aliosque impulit, ut eadem corpora, sive Planetas non circa Tellurem, sed circa Solem moveri, orbitamque propriam describere existimarent, ut hac fortasse ratione uniformis, regularisque illorum periodus salvaretur. Exitus verò, vel institutæ observationes huic voto feliciter aded responderunt, conceptamque Astronomorum spem impleverunt, ut nihil illustrius, nihilque accommodatius optari posse videretur. Keplerus itaque omnium primus demonstravit, Planetas omnes primarios interim, dum ellipsim circa Solem in altero foco

foco positum describunt radiis ad Solem ipsum ductis areas describere temporibus proportionales, ut ex. gr. tempus, quo Planeta A * ex A movetur in B, ad tempus, quo ex C movetur in D, erit, ut area, vel sector ellipticus A S B ad aream, vel sectorem ellipticum C S D. Quod non modò de Planetis primariis circa Solem; verùm etiam de secundariis circa primarios, de Lunâ nimirum circa Tellurem, atque satellitibus circa Jovem, & Saturnum ab Astronomis omnibus mirificè confirmatum est. Atque hujus quidem admirabilis periodi ratio, juxta varias Astronomorum hypotheses opportuniùs sequenti Capite demonstrabitur. Id unum itaque superest, ut expositâ jam periodo, ac legibus, sive phænomenis, quibus cœlestium corporum motus fieri conspiciuntur, illorum causa inquiratur, quod sequenti Capite præstabimus.



C A P. IX.

De Causâ Motûs Siderum.

I.



Omnunis esse jam solet Philosophorum omnium querela, quod effectus illi, qui in rerum naturâ nobiliores apparent, sui que splendore, ac magnitudine omnium animos rapiunt, occultiores plerumque causas habeant, quæ omnem ferè ingenii nostri vim, atque solertiam eludere videantur. Quid certè siderum motu, constantique illorum periodo, certisque legibus, quibus orbitas suas illa peragunt, illustrius, nobilius, magnificentius excogitari poterit? quid tamen alterâ ex parte difficilius haberi consuevit, quàm motricem illorum causam exponere? ut incredibile planè sit, quàm inter se differant Veteres, Recentioresque Philosophi in explicandâ motuum cœlestium causâ, & origine.

Omnes tamen ad duo veluti Capita revocari posse videntur, cùm aliqui principium motûs sideribus ipsis inesse, alii verò prorsus extrinsecum illud existiment.

II. Qui cœlestia corpora, ut alibi diximus, animata fore putarunt, illorum animam, veluti motûs originem, & principium admiſerunt; ut quemadmodum corporis nostri partes ab animâ moventur, ita etiam sidera propriis viribus periodos suas constantissimè peragerent; cùmque siderum motus admirabiles adedò sint, non ab animâ quacumque illos

los fieri, sed a Divino quodam Spiritu regi docuerunt. *Hanc etenim in stellis errantibus, sive Planetis, constantiam, hanc tantam, tam variis cursibus in omni aternitate convenientiam temporum non possumus intelligere, sine mente, ratione, consilio, qua, cum in sideribus inesse videamus, non possumus ea ipsa non in Deorum numero reponere (a). Perennes etiam, inerrantium cursus, atque perpetui cum admirabili, incredibilique constantia declarant in his vim, & mentem esse Divinam, ut hac ipsa, qui non sentiat Deorum vim habere, is nihil omnino sensurus esse videatur (b). Quin etiam, ut alibi diximus, ex admirabili siderum motu Deorum nomen derivavit. Hæc eadem fuisse videtur opinio Platonis, qui in Epinomide, cum cœlestium corporum motus originem inquireret; Ego, inquit, causam esse Deum ajo; neque fieri aliter ullo modo potest; aliter quippe, quam per Deum, esse animatum fieri non potest: additque argumentum esse hominibus magnum, debere inesse mentem sideribus, quod eadem semper agant: admirabilem esse, illa a tanto usque tempore non alternasse consilia, ut nunc hac, nunc illa aliâque alia facerent, aut aliâ ratione vagarentur, & circumirent. Quæ tamen omnia, non literaliter, sed allegoricè intelligenda fore, juxta Platonis sententiam ostendimus, cum de animâ Mundi ageremus.*

III. Longè obscurior est Aristotelis sententia, ut vix conici possit, quid ille de cœlestium corporum motu putaverit, cum ferè sibi ipsi, quandoque contrarius videatur (c). Id

Q 2

unum

(a) Cic. II. Nat. (b) Ib. (c) II. Cœl. c. 12.

unum ex innumeris locis, quæ afferri possent, manifestissimè apparet, quod ille sidera animata putavit, & quidem animâ rationali, ut non Arabes modò, Græcique illius Interpretes, sed etiam Latini, eorumque Princeps Divus Thomas (a), ingenuè fatetur. Deinde verò singulis Cœlis substantiam aliquam separatam, & incorpoream, quam Arabes *intelligentiam* vocarunt, concessit, quæ convexæ illorum superficiei adhærens sphaeram ipsam impelleret, perennique, ac æquabili motu circumduceret; *necessè est* enim, ut ait Aristoteles ipse, *unamquamque harum latiorum moveri a per se immobili, aternâque substantiâ* (b).

IV. Sed incorporeas tamen ejusmodi substantias, non esse veram, ac physicam efficientem causam motûs, sed movere solum moralitèr, obiectivè, metaphoricè, occasionaliter, ut causa finalis, & objectum illud, quod sui pulchritudine amatur, inquiritur, & expetitur, expressè jam dixerat Aristoteles, cùm ait *esse aliquid, quod immotum moveat, quod & aeternum, & substantia, & actus sit; & id, quod sic movet esse id, quod expetibile, & intelligibile est, cùmque expetibile sit, quod est pulcrum, & optimum*; subdit, *id verò est in immotis id, cujus gratiâ, movet enim tamquam amatum* (c); quibus profectò verbis satis apertè docuit Aristoteles, quod motus Cœlorum efficitur quidem ab animâ, quæ singulis sphaëris inhæreat, sed efficitur tamen ob amorem intelligentiæ cujus-

(a) *Quest. de Anim. & II. consr. Gen.* (b) *Aristot. loc. cit.* (c) *e. 6. & 7.*

jusdam pulcherrimæ, quæ eidem sphaeræ mobili assistit, quemadmodum sphaera inferior superiorem intelligit, atque amat, adeoque ab illâ, veluti a fine movetur, & quodammodò mutatur; omnium verò suprema, nihil aliud propter se ipsam intelligit, unde cetera movet, & a nullo movetur. *Manifestum igitur est id, quod est diviniſſimum, honorabiliſſimumque intelligere, nec mutari, siquidem mutatio fieret in deterius (a).*

Atque ista quidem sunt, quæ de Aristotelis sententiâ circa siderum motus ferè divinando consequi licuit, ut mirandum proinde non sit, si apud Interpretes illius triplex opinio circumferatur, quarum singulas pluribus Aristotelis locis probari, & illustrari posse gloriantur. Complures enim existimant, ut antea diximus, Cœlos moveri efficienter ab animâ, quâ præditi sunt, & ab intelligentiâ solum moraliter; alii verò moveri Cœlos ab intelligentiâ, quæ sit anima ejusdem Cœli; alii denique longè plures intelligentiam esse arbitrantur, non animam Cœli, sed substantiam aliquam separatam, quæ imperio suo Cœlorum motum efficiat. Quæ verò ex his opinionibus, non verisimilior dixerim, sed Aristotelis menti proximior fuerit, viderint illi, quibus *Aristotelis doctrina est summa veritas (b)*; nos certè didicimus in disputando, non tam authoritatis, quàm rationis momenta quarendæ esse (c); & oportere non omnino quis dixerit, sed quid dicatur attendere (c).

V. Non defuere tamen Philosophi, qui,

Q 3

licet

(a) c. 9. (b) *Averr. ib* (c) *Cic. Acad. II.*

licet sidera inanimata esse putaverint, a se ipsis tamen illa moveri, hoc est ingenitum habere motus principium existimarunt. Sic Aristoteles refert, Veterum sententiam fuisse, quod sidera, cum ignea forent, ignis autem ex naturâ suâ celerrimè moveatur, ipsa quoque torqueri debeant; hanc verò potius, quam illam semitam peragunt, quod a spiritu, quo ignis pascitur, veluti alliciantur (a). Hippocrates certè arbitratus est, quod Solis, Lunaque, & siderum via, per spiritum dirigatur; spiritus enim est igni cibus, ac spiritu privatus ignis non potest amplius vivere, quare & Solis cursum perennem perennis aer, ac tenuis facit (b); quod Cleanthes etiam apud Ciceronem (c), & omnes Stoici apud Plutarchum (d) docuere, & Epicurus inter alias cœlestium motuum causas hanc etiam exprefsit: Conversiones Solis, & Luna contingere posse propter pabulum, quod congruè, seu secundum eam viam continenter dispositum partim quidem ponè accendatur, partim prorsus aufugiat (e); quemadmodum inferiùs ait, nihil prohibere, quominus astrorum motus fiat, aut toto Cœlo circumducto, ipsaque sidera secum debebente, aut illo stante, ipsisque per se circumductis, & utrumque quidem juxta necessitatem motus, usque ab initio, tum cum motus generaretur, factum, impressumque ex parte orientis (f). Quod Anaxagoras (g) etiam, & Empedocles existimarunt: cumque Epicurus omnia ex fortuitâ atomorum concursione olim

(a) De Cœlo ...: (b) lib. de flat. (c) de Nat. III.
 (d) Plac. II. c. 20. (e) Laër. X. (f) Laër. ibi.
 (g) Plut. loc. cit.

olim formata arbitraretur, ipsos quoque siderum globos, qui inter se inæquales sunt, ex secretis propriis Vorticibus majoribus, minoribusque prodisse voluit, *juxta concretamenta, convolutionesque interius factas subtilium quarundam, earumque spirituosarum, seu ignearum, seu utriusque conditionis atomorum*: quo in loco satis expressa videri fortasse poterit hypothesis illa, de siderum, & totius Mundi formatione, quam pluribus additis nuperimè illustravit Cartesius.

VI. Alii verò siderum motus ita explicare solent, ut non ab ignea quidem illorum naturâ oriantur, quandoquidem ignis ipse aut nullum, aut certè non æquabilem, perennem, ac uniformem motum habere potest; sed a seipsis, hoc est a formâ sibi divinitus impressâ moveantur; ut quemadmodum lapis, & omnia corpora grâvia principium habent in se, quo liberè versùs Terram moveantur, ita quoque cœlestia corpora vim habeant, quâ impetu semel impresso, vel concepto circulariter, aut ellipticè circa Solem, aut Terram ipsam convertantur. Sed hæc opinio paulò liberius mox declarabitur.

VII. Dicendum est potiùs de illorum sententiâ, qui sidera ab extrinsecâ causâ moveri docuerunt, quos inter memoratur Anaximenes, qui censuit astra impelli a condensato, & renitente aere; a quâ sententiâ non plurimum Anaxagoræ, Empedoclis, aliorumque opinio dissidere conspicitur (a). Epicurus autem, ubi cœlestia corpora ex Vorticibus illis superius explicatis efformata dixisset, illorum

Q 4

mo-

(a) *Plus. II. c. 23.*

motus originem exponens, *copia autem*, ait. *corpusculorum se exhalando diffundentium, aerem percussit, eumque elisit; ipse verò venti motionem accipiens, astraque corripiciens illa circumduxit, ac motum in orbem, qui etiam in illis conspicitur, continentem fecit (a).*

Nobiliorem adhuc cœlestis motus originem. Stoici docuerunt, qui, ut ait Tertullianus: *Deum esse extra Mundum opinati sunt, qui finguli modo extrinsecus torqueat hanc molem (b);* quamvis, ut alibi diximus, cùm Stoici Deum esse ignem, spiritum, & animam Mundi putaverint, non extrinsecam illum, sed intimam, ac ingenitam potius cœlestis motus causam asserere debuerint.

VIII. Cùm verò Aristoteles modò superius explicato Cœlos, & sidera ab incorporea quadam, & separatâ substantiâ moveri dixisset; qui illum sequuti sunt, Arabes, ejusque Interpretes, Cœlos ab Intelligentiis moveri putarunt, unde communis est Peripateticorum omnium, & veterum Theologorum opinio, quod cœlestia corpora ab Angelis moveantur. Quin etiam plurima loca ex sacris Literis afferri solent, in quibus id expressè traditum videtur. Sic Math. 24. nominantur *Virtutes Cœlorum*, quod de Angelis Cœli motoribus intelligendum esse putat D. Dionysius (c). Habetur etiam in Job.: *cùm me laudarent astra matutina, & jubilarent omnes Filii Dei (d),* quemadmodum antea dixerat, *sub quo curvantur, qui portant orbem (e),* quod de Angelis, qui cœlestia corpora dirigunt, iisque præ-

(a) *Latr. X.* (b) *Adv. Gent. 7.* (c) *De Hierar. Cœl. c. 5.* (d) *Job. c. 38.* (e) *c. 9. ver. 13.*

sunt, intelligitur. Quid, quod Clemens Alexandrinus (a) *Septem Spiritus, qui in conspectu Throni sunt septem candelabri luminibus prapositos* (b) *septem Angelos esse arbitratur, qui movendis septem Planetis fuerint destinati*; & D. Thomas non solum *cœlestia corpora a spiritali creaturâ moveri a nemine Sanctorum, vel Philosophorum negatum se legisse, meminit* (c), sed alio quoque in loco *demonstrativè probari posse putavit, quod ab aliquo intellectu corpora cœlestia moveantur, vel a Deo immediatè, vel mediantibus Angelis ea moveat, congruere rerum ordini, quem D. Dionysius infallibilem asserit, ut inferiora per media secundum cursum communem administrentur* (d); verum etiam (quod facile mirari quis poterit) asserere non dubitavit *Fidei sententiam esse, quod Angeli corpora cœlestia suo imperio localiter moveant* (e).

IX. Non defuere tamen Philosophi, & Ecclesiæ Patres qui cœlestia corpora, non ab Angelis, sed aut ab animâ, quâ prædita credebantur, aut immediatè a Deo moveri putaverint. Atque, ut Philosophos omittamus superius enumeratos, manifestissimum est, Origenem dixisse *siderum motum ab illorum animâ oriri*; explicans enim illud *Isaiæ, Ego præcepi militia Cæli &c. Cum Stella, ait, tanto ordine, tantâque ratione moveantur, ut nullatenus unquam fuerit illorum cursus impeditus; quomodò non omnis soliditatis metas excedat asserere, ordinem tantum, tantam disciplina rationis constantiam desiderari, ac perfer-*

(a) Strom. V. (b) Apoc. c. 1. ver. 20. (c) Opusc. X.
(d) Opusc. XI. (e) Quæst. 6. de pos. arr. 3.

ei ab expertibus rationis naturis (a)? Hæc autem omnia de animâ Cœlorum intelligenda fore ceteros inter demonstrat ipse D. Thomas (b), cùm ait D. Hieronymum Origenis errorem de animâ siderum sequutum esse.

Pluribus etiam ex antiquis placuisse, ut Cœli, non ab Angelis, sed a propriâ formâ moveantur, asserit D. Bonaventura (c) licet hanc opinionem oppositam rationi, & fidei minimè consentaneam vocet; quemadmodum Albertus Magnus D. Thomæ præceptor nihil in hac disceptatione securiùs dici posse arbitratur, quàm Cœlos solâ Dei voluntate moveri. Postremò Card. Cajetanus D. Thomæ interpres explicans illa verba, *Cœlorum virtutes &c.* (d) quid, ait, per *virtutes Cœlorum* intelligit, num *Angelos motores*? Sed supra *Angelos recensuit*, nec eos repetere debuit. Igitur ipsas *Cœlorum*, *astrorumque animas per virtutes Cœlorum intellexit* (e).

X. Quæ cùm ita sint, hypothesis illa, vel opinio, quæ statuit Cœlos, non ab Angelis, sed immediatè a Deo, sive a propriâ formâ moveri, tantum abest, ut hæresis notâ inuratur, ut longè verisimiliùs, ac optimè defendi illa possit. Quamvis enim, ut egregiè docuit D. Thomas, ea sit lex, a Sanctis Patribus mirificè commendata, ut infima per superiora, & extrema per media moveantur; negari tamen non debet (f), quin ille plurima, per se immediatè operetur, ut ab eo dem

(a) *Coment in Joann.* (b) *I. par. qu. 70. art. 3. & de pot. qu. 6. art. 6.* (c) *In II. distinct. 14. art. 6.* (d) *In præf. Missæ* (e) *Tract. de Indulg.* (f) *Dyonis. Cœl. Hier. c. 5. August. lib. 83. quæst. VIII. de Gen. ad lit. c. 24.*

dem D. Thomâ erudimur; idque de siderum motu concedi posse testatur D. Gregorius(a), cùm explicans illud Job, *quem constituit alium super Terram, aut quem posuit super Orbem, quem fabricatus est?* quippe, inquit, *Mundum per se ipsum regit, qui per se ipsum condidit.*(b).

Certè per se ipsum immediatè, ut ait D. Thomas, divisit aquas ab aquis, per se lapidi gravitatem indidit, quâ ad centrum descenderet, quidni etiam impetum quoque, sideribus imprimere potuit, qui, cùm nullum obicem reperiat, invariabiliter perseveret?

Quæcumquè tamen hypotesis eligatur, si-
ve nimirum per Angelos, si-ve immediatè per se Deus moveat Cœlos; id unum certè constitui potest, ad hunc motum efficiendum non requiri, ut Angeli sideribus præsentés sint, & singulis instantibus, diebus, aut annis sidera impellant; cùm impetus semel impressus neque a siderum gravitate, vel levitate, neque a mediæ resistantiâ, quæ in sideribus tenuissimâque Cœli substantiâ non reperiuntur, destrui, vel minui possit; adeoque non est, cur cœlestes illæ substantiæ, vel Angeli longè ab Empyreo Cœlo ablegentur, sphæræ contorquendæ affigantur, statisque temporibus, dum impetus jam impressus perseverat, ad Empyreum revolent, inde in provinciam redituri, aliaque id genus, quæ paullo liberius, & absurdius fortasse a pluribus effinguntur. Sed longius jam, quàm par erat, digressi fuimus.

XII. Adcundæ potiùs, vel exponendæ modò

(a) *Greg. dial. IV. c. 4.* (b) *Moral.*

dò supersunt Recentiorum hypotheses, quibus longè accuratiùs, atque feliciùs, quàm veteres omnes præstiterint, non modò siderum motus, sed elegantissima quoque illorum periodus, atque proportio explicatur. Quamvis enim veteres ipsi causam aliquam effinxerint, cur sidera moverentur; quâ tamen vi, sive ratione ita Planetæ moverentur, vel circa Solem orbitam propriam describerent, ut spatia peracta temporibus, temporumque quadrata cubis distantiarum accuratissimè responderent, nemo ex veteribus explicavit.

Keplerus itaque, Neutonus, Cartesius, atque Leibnitius ingeniosâ variâque methodo, id præstare conantur, eamque causam cœlestium motuum exponere, quâ singulæ motuum leges explicarentur. Itaque singulas illorum hypotheses hîc ordine complectemur, quidve in illis probari, reprehendive possit, ingenuè subiiciemus.

Keplerus itaque Planetarum motum oriri putat a circulari motu, quo Sol circa se ipsum in Universi centro torquetur. Interim enim, dum Sol celerrimè spatio 25. dierum circa proprium axem convertitur, quemadmodum tenuissimos lucis radios uberrimè quaquâ versum diffundit; ita, inquit Keplerus, tenuissimas etiam, & *imateriales species*, veluti irradiando, emittit, quæ circa Solem, eadem cum ipso velocitate, eodemque tempore convertuntur. Cùm itaque Planetæ singuli in æthereo spatio dispersi, ac veluti fluitantes reperiantur, neque gravitatem ullam, aut resistantiam exercent; poterunt illi a solaribus radiis, sive speciebus circumductis circulari-

lariter abripi, vel circa Solem converti, atque eò validiùs, atque celeriùs, quò Planeta Soli proximior, uberiorique, seu confertiori radiorum copiâ implicitus fuerit. Sic itaque Sol spatio 25. dierum circa seipsum convertitur, Mercurius illi proximior trium mensium, Venus 7. Terra unius anni tempore, Mars duorum, Jupiter 12., Saturnus triginta annorum. Quemadmodum verò Sol Planetas omnes primarios circa seipsum contorquet, ut illi periodum integram circa Solem ipsum conficiant, ita quoque, cùm iidem Planetæ circa proprium axem celerrimè moveantur, Satellites suos, sive secundarios Planetas circumducunt; ut, cùm Jupiter spatio ferè 10. horarum circa proprium axem convertitur, Satelles illi proximior periodum complet spatio d. 1. h. 18. 28. 36." secundus d. 3. h. 13. 13. 52." quod similiter intelligi debet in Lunâ respectu Telluris.

XIII. Quì verò fieri debeat, ut periodica Planetarum tempora sint in sesquialterâ ratione orbitalium, quas peragunt, sive, quod idem est, ut temporum quadrata distantiarum cubis respondeant, quod omnium primus Keplerus ipse observavit, sic a Keplero explicatur. Cùm illa vis, aut potentiâ, quâ circa Solem Planetæ circumducuntur, quæque *vectoria* appellatur, luminis instar, dum a Sole diffunditur, sensim decrescere, sive languere debeat, eò minor, sive debilior erit, quò longiùs à Sole recesserit; ideoque decrescet in ratione distantiae. Planetarum verò moles, ac magnitudo in eâdem ratione augetur, ut opinatur Keplerus, quâ Planetarum distantiae augeantur; ut nimirum major esse debeat Plane-

ne-

netæ moles, ac magnitudo, quò major sit illius distantia a Sole. Æqualis itaque vis, aut potentia in Planetis omnibus circumducendis requireretur, siue Sol in Planetis omnibus circum se torquendis æqualem impetum imprimeret; quantò enim vectoria vis, aut radiorum impetus ex ratione distantiae minuitur, siue languidior efficitur, tantò etiam radiorum copia augetur, qui in ampliorem remotioris Planetæ superficiem incidant, ac impellant; ideoque vectoria vis Solis easdem prorsus in Planetis omnibus circumducendis vires impendet.

Quod si Planetarum quantitas, siue materies comparetur, putat Keplerus in Planetis inter se comparatis quantitatem esse in subduplicatâ ratione molis, seu magnitudinis, aut distantiae a Sole, ideoque densitates Planetarum erunt in reciprocatâ subduplicatâ ratione molium, aut distantiarum. Periodicum itaque alicujus Planetæ tempus tanto majus erit, quanto major est orbita, quam describere debet, & quanto major est ipsa materiæ quantitas circumducenda, quam in se continet; ideoque, si orbita augetur in simplici, siue directâ ratione distantiae a Sole, materia verò in subduplicatâ ratione ejusdem distantiae, periodicum Planetæ tempus augebitur in ratione compositâ ex simplici, & subduplicatâ ratione distantiae, nimirum in sesquialterâ ratione distantiae a Sole. Remotioris itaque Planetæ tempus periodicum erit, ad periodicum tempus proximioris Planetæ in sesquialterâ ratione distantiarum a Sole; siue in Planetis inter se comparatis periodicorum temporum quadrata erunt, ut cubi distantiarum.

XIV. Explicandum postremò fuerat, cur Planetæ circa Solem rotati, non circulos, verùm ellipses in quarum altero umbilico Sol reperiatur, describant; idque similiter ingeniosè Keplerus exequitur. Concipit ergo Planetarum globum, siue substantiam, ex duplici partium genere componi; ut altera Planetæ pars Soli amica, altera verò sit inimica; idèdque amica, siue cognata Soli pars, ad Solem ipsum accedere sensim nitatur, inimica verò recedere; magnetis instar, qui alterâ ex parte magnetem alium allicit, alterâ repellit. *Solipeta* verò partes ita a *Solifugis* distinguuntur, ut illarum discrimen, aut limes sit æquator Planetæ, ideoque *Solipetæ* unum Planetæ polum obtineant, *Solifugis* alterum occupantibus, ut in magnete quoque observatur. Itaque si Planeta in A * reperiatur, atque uterque polus a Sole æqualiter distet, æqualibus etiam viribus accedere, & recedere conabitur; unde ferè immotus, vel in æquali distantia consistet; dum verò sensim a solaribus radiis impellitur versùs B, atque vectoriâ vi circumfertur; polus, in quo *Solipetæ* partes reperiuntur, Soli proximior fiet, ideoque etiam Planeta fortius ad Solem allicietur, illique accedet; proximior adhuc fiet, Solemque directius respiciet, ubi pervenerit in C, ut omnes *Solipetæ* partes ibi ad Solem convertantur. Deinde verò, cùm sensim Planeta ex C in D circumfertur, polus ille a Sole recedit, ac obliquè respicitur, ita ut in D uterque polus æqualiter a Sole distet, & Planeta immotus ibi quiescat; at, ubi ex

D tran-

* Fig. XL

D transferit in E, oppositum Soli polum obvertet, idèdquè ab illo repelletur, donec ad A revertatur, iterumque exinde vectoriâ Solis vi abreptus eandem orbitam ellipticam circa Solem describat. Quandoquidem verò ellipses ejusmodi circa Solem descriptæ ad Eclipticæ planum inæqualiter in variis Planetis inclinantur; concipit Keplerus Planetarum corpus duos veluti in cortices, nucleumque distinguere, quarum partium singulæ fibras inæqualiter directas obtineant, ut a radiis solaribus diverso modo penetratæ, & inclinatæ Planetam ipsum in diversâ orbitâ circumferant. Sed hæc, aliaque idgenus, quæ sunt ingeniosè a Keplero exposita, fusiùs ex ipso auctore, aliisque Scriptoribus repetantur. Interim verò nos aliqua de celeberrimæ hujus hypothese præstantiâ subiiciemus.

XV. Quamvis itaque plurimi *Keplerum supra mortales non immeritò admirari consueverint*, nullique Astronomorum, sive observandi peritiam, sive inveniendi felicitatem, sive hypotheseum elegantiam consideres, Keplerus faciliè concedat; plura tamen sunt, quæ in hac hypothese vix, ac ne vix quidem probari possunt.

1. Ac primò quid *imateriales illa species* censerì poterunt, nisi cum radiis, alioque tenuissimarum particularum effluvio confundantur? Concipi certè non poterit, quomodo immateriales, & incorporeæ quædam species corpora afficere, & impellere possint, quandoquidem

Tangere, nec tangi, sine corpore, nulla potest res (a).

2. In definiendâ quoque Planetarum magnitudi-

(a) *Lac. lib. 1. ver. 305,*

itudine aberrat Keplerus, quòd illam in ratione distantiae a Sole augeri arbitratur, secus ac observationibus ostendatur. Sic globus Martis, quemadmodum duplò remotior, duplò etiam major esse deberet globo Veneris, cum tamen Mars longè minor sit Venere. Similiter etiam Saturnus, etsi remotior sit Jove, minor tamen est ipso Jove; ideòque magnitudines Planetarum, quas hìc supponit Keplerus, archetypos quidem rationibus, & armoniae cuidam, quam Keplerus ipse imaginatus fuerat, elegantissimè correspondent, sed observationibus tamen repugnant.

3. Supponit etiam Keplerus in Planetis densitates, vel materiae quantitates augeri in subduplicatà ratione distantiae, atque in eadem ipsà ratione, quā densitates augentur, Planetarum resistantiam ad motum augeri; cum tamen, & densitates illae gratis effingantur, neque ex solà densitate, sive materiae quantitate resistantia oriatur, nisi gravitas etiam aliqua effingatur, quod non a veritate solùm, sed a Kepleri quoque hypothesei abhorret.

4. Observari etiam poterit, quod si Planeta, ob debilitatem fibrarum, a Sole nec allici, nec repelli possit, ut in Venere concedit Keplerus, tunc non ellipsim, sed circulum juxta Keplerum describet; cum tamen, corpora, quae nullā vi gravitatis ad centrum aliquod urgeantur, non circulum, sed rectam potius describant, ut in Physicā generali ostenditur.

5. Similiter etiam Planeta, dum a Perihelio sensim ad Aphelium ascendit, ab ipso Sole repellitur, ideoque nunquam circa Solem ellipsim describeret, sive in certā quadam di-

stantiâ a Sole retineretur ; sed longius semper ab illo recederet , nisi vi quadam Soli-
petâ coerceretur .

6. Addi postremò poterit , intelligi , vel explicari non posse , cur Planetæ corpus variis fibris , atque corticibus varias in partes tor-
queatur , ac vires exerceat animalibus ferè
similes , ut minutiora omittam , quæ conside-
ranti facilè occurrent . Itaque ingeniosa Ke-
pleri hypothësis ad explicandam cœlestium
motuum originem admitti non potest .

XVI. Kepleri hypothësim hac in parte imi-
tatur Cartesius , quodd ipse quoque Planeta-
rum motum a celeri vertigine , quo Sol cir-
ca proprium axem convertitur , repetendum
esse arbitratur ; ab illo tamen plurimum dis-
fidens , quodd ubi Keplerus , cui Planetarum
motus perspectissimi fuerant , immateriales
quasdam species adhibuit , quibus illi circa
Solem ellipsim describerent , Cartesius id corpo-
reis vorticibus fieri existimavit , ut vortices
ipsi , etsi ante Cartesium usurpati jam forent ;
ab ipso tamen nomen , ac illustre decus acce-
perint .

Putat itaque Cartesius totam materiam Cœ-
li , in quâ Planeta versantur , in modum cu-
jusdam vorticis , in cujus centro est Sol , assi-
duè gyrate , ac ejus partes Soli viciniores ce-
leriùs moveri , quàm remotiores , Planetasque
omnes (è quorum numero est Terra) inter eas-
dem istius cœlestis materia partes semper ver-
sari . Ex quo solo , sinè ullis machinamentis ,
omnia ipsorum phænomena facillimè intelligen-
tur . Ut enim in iis fluminum locis , in quibus
aqua in seipsam vorticem facit , si varia festu-
ca illi aqua incumbunt , videbimus ipsas simul

cum

cum eâ deferri, & nonnullas, etiam circa propria centra converti, & eò celerius integrum gyrum absolvere, quò centro vorticis erunt viciniore, & denique quamvis semper motus circularis affectent, vix tamen unquam circulos omninò perfectos describere, sed nonnihil in longitudinem, & latitudinem aberrare; ita eadem omnia de Planetis absque ullâ difficultate possumus imaginari, & per hoc unum cuncta eorum phenomena explicantur.

Si itaque Sol*, & omnis materia cœlestis circumjacens ita moveatur in easdem partes, nempe ab Occidente per meridiem versùs Orientem, ut ea, quæ est circa Saturnum, impendat ferè annos triginta ad eum per totum circulum ☿ deferendum; ea verò, quæ est circa Jovem, intra annos 12. illum cum ejus asseclis deferat per circulum ♃; Mars duobus annis, Terra cum Lunâ uno anno; Venus octo mensibus, & Mercurius tribus circuitus suos in circulis ☿, ♀, ☿, ♀, materiâ Cœli eos deferente, absolvant.

Necnon etiam corpora quadam opaca perspicillorum ope nobis conspicua, quæ dicuntur Solis macula; ipsiusque superficiei contigua sunt, spatio viginti sex dierum eum circummeunt. Ac præterea, ut sæpe in aquarum vorticibus videtur contingere, in majori illo cœlestis materia vortice; sint alii minores vortices, unus, in cujus centro sit Jupiter, alter, in cujus centro sit Terra, quæ in easdem partes, ac major vortex ferantur; & ille, quæ habet locum in centro, deferat circa ipsum quatuor ejus asseclas tali celeritate, ut remotissimus diebus 16.

R 2

se-

* Fig. IV.

sequens diebus 7., tertius horis 6., & centro proximus horis 42., unum circuitum perficiat, sicque, dum semel in majori circulo circa Solem ferentur, minores suos circulos circa Jovem aliquoties percurrant, eodemque modo vortex, qui habet Terram in centro, efficiat, ut Luna mensis spatio eam circumeat, ipsa autem Terra singulis diebus circa proprium axem integrum gyrum absolvat, ita ut eodem tempore, quo Terra, & Luna circulum communem semel peragrabunt, Terra 365. vicibus circa proprium centrum, & Luna duodecies circa Terram vertatur. Denique, ne putemus omnia centra Planetarum accuratè in eodem plano semper consistere, nec circulos, quos describunt, esse omnino perfectos; sed, ut in omnibus aliis rebus naturaliter contingere videmus, ista tantum prater propter talia esse, ac etiam labentibus seculis continuè mutari arbitremur.

XVII. Hæc est celeberrima hypothesis vorticum, quæ adeo Cartesio arrisit, ut is præfidenter asserat, quod nihil occurret circa phænomena Planetarum, cujus ratio ex jam dictis non faciliè reddatur (a). Si accuratiùs tamen hypothesis illa exploretur, plurima continebit, quæ, non modò falsa, & absurda sunt, sed phænomenis etiam explicandis opposita.

1. Quemadmodum enim alibi dicebamus, cùm de Cartesianâ gravitatis origine loqueremur, cùm subtilis, ac ætherea substantia interim dum circa Solem, aut Planetam alium movetur, centrifugam vim concipiat, quâ ab ipso Sole, sive Planetâ recedat, vortices ipsi Soli, sive Planetis circumfusi certis limitibus

tibus definiri non possent; sed in se mutuo serperent, atque excurrerent; quod siderum ordini, simplicissimo, perennique illorum motui repugnat.

2. Deinde verò accuratissimè demonstratum est; quod si sphaera solida in fluido uniformi, ac infinito uniformi cum motu, revolvatur, & ab hujus impulsu solo agatur fluidum in orbem, perseveret autem fluidi pars unaquaque uniformiter in motu, tempora periodica partium fluidi erunt, ut quadrata distantiarum a centro sphaera (a). Cum itaque Planetæ, sive solida corpora, quæ in vorticis solaris fluido circumferuntur, ejusdem sint densitatis, ac fluidi partes, quibus ambiuntur, eadem celeritate, sive periodo circumferentur, quâ ipsius fluidi, seu vorticis partes; ideoque periodica tempora Planetarum in vorticibus delatorum erunt in duplicatâ ratione distantiae, quod observationibus apprimè repugnat, quibus accuratissimè demonstratur periodica Planetarum tempora esse in sesquialterâ ratione distantiarum; ideoque in vorticibus longè tardiores futuros esse superiores Planetas, quàm fuerint observati; inferiores verò celeriores. Quod si fluidi, seu vorticis densitas uniformis non sit, densioresque sint (ut arbitratur Cartesius (b) fluidi partes, quo remotiores a centro fuerint, tunc longè tardiores erunt periodi Planetarum in hoc crassiori fluido, quàm in subtiliori, ideoque longiùs adhuc superiorum Planetarum periodus in densiori fluido ab observationibus aberraret.

3. Similiter etiam si vorticum partes, quò

R 3

re-

(a) *Newt. III. sect. 9. prop. 52.* (b) *n. 82.*

remotiores a centro fuerint, densiores forent, ipsi quoque remotiores Planetæ proximioribus densiores essent; cum tamen hæc densitatum inæqualitas temere effingatur, aut certe verisimilius sit, proximiores potius Planetas remotioribus densiores esse, ut vehementiori calori Solis resistat.

4. Singulæ quoque vorticis partes circulum circa Solem describerent; ideoque etiam Planeta, qui a partibus ipsis æquabiliter circumfertur, circa Solem circulariter moveretur: circulus etiam ille, qui a subtili vorticis materiâ describitur, parallelus esse deberet æquatori Solis, sive ad rectos angulos axi Solis insistere; ideoque etiam Planetarum orbita axi Solis perpendicularis esse deberet; cum tamen Planetæ neque circulares orbitas, sed ellipticas potius describant, neque ad axim Solis orbitæ rectæ sint, sed cujuslibet Planetæ orbita inæqualiter ad Solis axim inclinetur. Perperam verò Cartesius ait, *ista tantum præter propter talia esse, ac etiam labentibus seculis continuò mutari* (a), sic etenim irregularitates illas, atque aberrationes in corporibus cœlestibus esse opinatur, quæ, non modò observationibus, sed ipsi quoque rerum ordini, rationique repugnat. Mirari certè solemus funditores aliquos, aut sclopetarios, qui ex balistis, & bombardis suis incredibili penitus collimationis certitudine tela projiciunt. Si igitur momentaneis illis, qua per crassum, & inquietum aëra moventur, tantam inesse certitudinem videmus, an non longè majorem expectabimus in corporibus illis perpetuis in placidissi-

mo,

(a) num. 34.

mo, ac purissimo aethere aeternâ lege revolutis (a)?

5. Maxima quoque motûs irregularitas in Planetis observaretur, si a corporeis vorticibus circa Solem abducerentur. Cum enim Planetarum distantia variis subinde temporibus sit inæqualis, ut ex. gr. Terra Jovi aliquando proximior, aliquando verò remotior sit, Martis Planeta, seu Vortex, qui per spatium Telluri, ac Jovi interjectum transire debet, celerius moveretur, dum spatium ejusmodi angustius est, tardius verò, dum spatium est majus; atque, ut demonstrat Newtonus, celerius moveretur in Aphelio, quàm in Perihelio, quod Astronomicis observationibus adversatur.

6. Postremò Cometæ aliorum Planetarum orbitas variis directionibus, aut angulis intersectant, atque istâ lege circa Solem moventur, ut radio ad Solem ducto areas temporibus proportionales describant; quod fieri certè non posset, si Planetæ singuli, & ipsi quoque Cometæ a propriis Vorticibus abriperentur.

XVIII. Longè felicior est in explicandâ cœlestis motûs origine Leibnitius, qui *Tentamen de motuum cœlestium causis* edidit. Expositis itaque phœnomenis, sive legibus, quæ in cœlestibus motibus observantur, supponit Cl. Auctor Vorticem ex. gr. solarem, innumeras in partes, vel orbes, vel cortices sibi concentricos distingui, quorum quilibet propriâ celeritate circa Solem moveatur; ut proximior nempe celerius, remotior tardius

R 4

mo-

(a) Horac. ap. Greg. Astr. I. prop. 76.

remotiores a centro fuerint, densiores forent, ipsi quoque remotiores Planetæ proximioribus densiores essent; cùm tamen hæc densitatum inæqualitas temere effingatur, aut certè verisimilius sit, proximiores potius Planetas remotioribus densiores esse, ut vehementiori calori Solis resistat.

4. Singulæ quoque vorticis partes circulum circa Solem describerent; ideoque etiam Planeta, qui a partibus ipsis æquabiliter circumfertur, circa Solem circulariter moveretur: circulus etiam ille, qui a subtili vorticis materiâ describitur, parallelus esse deberet æquatori Solis, sive ad rectos angulos axi Solis insistere; ideoque etiam Planetarum orbita axi Solis perpendicularis esse deberet; cùm tamen Planetæ neque circulares orbitas, sed ellipticas potius describant, neque ad axim Solis orbitæ rectæ sint, sed cujuslibet Planetæ orbita inæqualiter ad Solis axim inclinetur. Perperam verò Cartesius ait, *ista tantum præter propter talia esse, ac etiam labentibus seculis continuò mutari (a)*, sic etenim irregularitates illas, atque aberrationes in corporibus cœlestibus esse opinatur, quæ, non modò observationibus, sed ipsi quoque rerum ordini, rationique repugnat. *Mirari* certè solemus funditores aliquos, aut scelopetarios, qui ex balistis, & bombardis suis incredibili penitus collimationis certitudine tela projiciunt. Si igitur momentaneis illis, qua per crassum, & inquietum aëra moventur, tantam inesse certitudinem videmus, an non longè majorem expectabimus in corporibus illis perpetuis in placidissimo,

(a) num. 34.

mo, ac purissimo aethere aeternâ lege revolutis (a) ?

5. Maxima quoque motûs irregularitas in Planetis observaretur, si a corporeis vorticibus circa Solem abducerentur. Cum enim Planetarum distantia variis subinde temporibus sit inæqualis, ut ex. gr. Terra Jovi aliquando proximior, aliquando verò remotior sit, Martis Planeta, seu Vortex, qui per spatium Telluri, ac Jovi interjectum transire debet, celerius moveretur, dum spatium ejusmodi angustius est, tardius verò, dum spatium est majus; atque, ut demonstrat Newtonus, celerius moveretur in Aphelio, quàm in Perihelio, quod Astronomicis observationibus adversatur.

6. Postremò Cometæ aliorum Planetarum orbitas variis directionibus, aut angulis intersectant, atque istâ lege circa Solem moventur, ut radio ad Solem ducto areas temporibus proportionales describant; quod fieri certè non posset, si Planetæ singuli, & ipsi quoque Cometæ a propriis Vorticibus abriperentur.

XVIII. Longè felicior est in explicandâ cœlestis motûs origine Leibnitius; qui *Tentamen de motuum cœlestium causis* edidit. Expositis itaque phœnomenis, sive legibus, quæ in cœlestibus motibus observantur, supponit Cl. Auctor Vorticem ex. gr. solarem, innumeras in partes, vel orbes, vel cortices sibi concentricos distingui, quorum quilibet propriâ celeritate circa Solem moveatur; ut proximior nempe celerius, remotior tardius

(a) Horac. ap. Greg. Astr. I. prop. 76.

moveatur, atque celeritates ipsæ, quæ in variis fluidi partibus reperiuntur, sint radiis, sive distantis a Sole reciprocè proportionales: quo certè fiet, ut sectores, aut aræ, quæ temporibus æqualibus describantur a Planetis, semper æquales sint; sectores enim ejusmodi erunt in ratione compositâ ex ratione directâ radiorum, & reciprocâ arcuum, sive celeritatum; quæ ratio composita, juxta Leibnitii hypothesim, est ratio æqualitatis. Circulationem autem ejusmodi Planetarum *Harmonicam* vocat Leibnitius, quod radiis, sive distantis æquabiliter, sive arithmeticè crescentibus, celeritates, aut circulationes, quæ radiis ipsis reciprocè proportionales sint, Harmonicè decreascent, ut in Mathematicis Institutionibus demonstratur.

Interim verò, dum Planeta ab æthere circumfuso tranquillè circumducitur, attractione solari ad Solem ipsum accedit, atque orbibus ejusmodi, sive corticibus Soli proximioribus, adeoque velocioribus immergitur, & celerius movetur; quemadmodum centrifugâ vi a Sole repellitur, atque ad remotiores, tardioresque partes, ascendendo tardius movebitur, eâ constanti ratione, vel lege, ut aræ ubique descriptæ sint temporibus proportionales. Centrifuga autem vis, quæ a Planetâ harmonicè circumducto concipitur, ostenditur ab Auctore augeri in triplicatâ ratione radiorum, seu distantiarum a centro; Gravitas autem, vel attractionis vis, quæ conjuncta cum tali vi centrifugâ mobile circulatione harmonicâ delatum in ellipsim circumferat, talis ostenditur esse, ut illius vires sint, ut quadrata circulationum directè,

... five

sive reciprocè quadrata radiorum, seu distantiarum a foco; supposito nimirum quod Planetæ harmonicâ periodo circumferantur, eamque gravitatem habeant ad centrum Solis, ut illius vires reciprocae sint quadratis distantiarum, & harmonicâ circulatione centrifuga vis concipiatur, quæ in triplicatâ reciprocâ proportionem radiorum augeatur, quæ singula, vel ab Astronomis aliis probata sunt, vel faciliè admitti poterant: accuratissimè Leibnitius ostendit Planetas omnes in ellipsis circa Solem in altero umbilico positum ita moveri; ut area peractæ temporibus respondeant. Exinde verò faciliè inferri poterit ex observationibus, atque principiis paullo superius ex positis altera cœlestium motuum proprietas, ut temporum nempe periodicorum quadrata sint, ut cubi distantiarum.

XIX. Ceterum eximio Leibnitii Tentamini plurima opponi poterunt, quæ paullo superius contra Cartesii Vortices opponebantur; atque illud in primis, quod Planetæ, non in unico, eodemque plano orbitam propriam describunt, sed illorum orbitæ inæqualiter inclinantur; atque præsertim Cometarum orbitæ aliorum Planetarum orbitas interfecant. Ad hæc tempora periodica, sive circulationes in Leibnitii hypothese sunt in duplicatâ ratione radiorum; at verò tempora periodica Planetarum esse debent in sesquialterâ ratione radiorum.

Quod si reponatur, fluidum Vorticis non æquabiliter ubique retardari, sed harmonicam circulationem a Perihelio ex. gr. Mercurii ad Aphelium, atque similiter a Perihelio Veneris ad Aphelium non interruptâ serie

COR-

continuari, sed fluidum inter Mercurii Aphelium, Venerisque Perihelium aliâ ratione moveri, id omnino absurdum, & incredibile videri poterit; solaris nempe vorticis partes incertâ adeo, variâ, & irregulari periodo circulare. Dicendum est itaque in hac eximiâ hypothefi legem illam salvari, quod areæ peractæ sunt temporibus proportionales, reliquas verò leges, atque phœnomena nullâ ratione salvari posse.

XX. Quænam ergo hypothefis explicandis siderum motibus apta supererit, si quæ ab illustrioribus etiam Astronomis inventæ sunt, vix, ac ne vix quidem probari posse jam diximus? Omnium certè pulcherrima, ac simplicissima videtur, spemque implere putatur Neuthoni hypothefis, quâ celeberrimus Auctor, ex communibus gravitatis legibus omnia Planetarum phœnomena, admirabilemque periodum incredibili, & divino, quo is erat, ingenio definivit.

Supponit itaque Neuthonus, ut alibi quoque explicavimus, cum de gravitatis origine loqueremur, quamlibet materiæ partem ad partem aliam materiæ gravitate, ejusdemque gravitatis vires augeri pro ratione quantitatis, atque materiæ; ut nimirum corpora in æqualibus a centro distantis eò majorem gravitatem exerant, quò majorem materiæ quantitatem contineant, etsi æqualem materiæ quantitatem contineant, atque inæqualiter a centro dissideant, gravitatis vires sint in reciproca duplicatâ ratione distantiarum, sive sint, ut quadrata distantiarum. Itaque Planetæ singuli, certâ quadam lege, seu vi in Solem gravitant, ejusdemque gravitatis viribus ad Solem

lem ipsum accedunt, sive perenni nisu ad ipsum accedere nituntur; sed, ne Planetæ in Solem decidant, projectibilem motum per lineam rectam Deus illis impressit, quo ab hoc descensu retineantur, conjunctisque his viribus quarum unâ Planetæ ad Solem semper urgeantur, & alterâ in orbitâ propriâ retineantur, ellipticam orbitam circa solem describant; ut subjecto schemate clarius, atque facilius intelligetur.

Si Planeta * A projectili motu moveretur, ubi pervenisset in B, rectâ tenderet in C; sed quia interim vi gravitatis urgetur versùs Solem S, a lineâ rectâ B C deflectit, & tendit in D; ibi similiter solo projectili motu tenderet in E, sed quia interim gravitate suâ versùs Solem retrahitur, lineam D F excurreret; atque ita semper. Si itaque triangulorum numerus augeatur, eorumque bases A B, B D minuantur in infinitum, perimeter A B D F H, quæ a Planeta describitur, erit aliqua Curva, quæ Solem ipsum intra se contineat. Cujusmodi verò sit eadem Curva, ex projectili motu, viribusque gravitatis inter se comparatis ostendi faciliè poterit. Si etenim projectilis motus, gravitatis viribus perfectè æqualis sit, circulus * A F G describetur, æquali nimirum, vel eâdem vi Planeta a Sole projectili motu retrahitur, & gravitate ad solem urgetur, ideoque in eadem ubique distantia a Sole conservabitur, sive circumulum circa Solem describet. Quod si projectilis motus gravitatis vim superet, Planeta longiùs a Sole abreptus majorem, longio-

* Fig. VIII. * Fig. IX.

gioremque Ellipsim $A B C D$ circa Solem describet; quod si projectilis motus, gravitatis viribus debilior, sive languidior fortasse fuerit, tunc Planeta Soli successivè proximior fiet, ideoque in minori, breviorique Ellipsi $A M N O$ movebitur.

Si itaque in Solem Planetæ eâ gravitatis lege ferantur, ut illius vires augeantur in reciproca ratione quadratorum distantia, atque initio Mundi horizontalem, sive projectilem quandam motum gravitatis viribus fortiores receperint; projectilis motus, gravitatisque viribus simul conjunctis Ellipsim circa Solem in altero umbilico positum describent.

Quod verò Planetæ in Ellipsis circa Solem rotati, æqualibus temporibus æquales areas, sive quod idem est, areas temporibus proportionales describant, facili, elegantique ratione probatur.

Intelligatur enim * recta $A B$, sive triangulum $A S B$, primâ temporis parte describi: secundâ, & æquali temporis parte solo projectili, & æquabili motu Planeta rectam $B C$ rectæ $A B$ æqualem, sive triangulum $S B C$ triangulo $S A B$ æquale describeret: sed quia sensim, a vi centripetâ, vel gravitatis impetu urgetur versùs S , ductâ $C D$ parallelâ lateri $S B$, Planeta motu composito lineam transversalem $B D$ describet eodem tempore, quo rectam $B C$ motu projectili, simulque rectam $C D$ motu centripeto perageret, ideoque secundâ temporis parte rectam $B D$, sive triangulum $S B D$, describet; sed triangu-

* Fig. X.

gulum $S B D$ est æquale triangulo $S B C$, sive $S A B$, ergo Planeta temporibus æqualibus æquales areas, sive triangula describet; cùmque triangula sensim graciliora in ellipticam aream abeant, erunt areae, sive sectores elliptici temporibus quibuscumque peracti, ut tempora, quibus peraguntur.

XXI. In hac itaque Newtoni hypothefi, quæ omnium longè pulcherrima ac simplicissima censerì meritò poterit, prima cœlestium motuum causa est Solus Deus, qui motum illum, atque impetum, quem semel in ipsâ Mundi origine Planetis impressit, jugiter conservat; ut, illo perenniter conservato, eandem ipsi semper orbitam, eadem celeritate describant. Vix etenim, ac ne vix quidem intelligi potest quâ ratione æquabilis adeo, constans, & regularis sit siderum motus, si a corporeâ causâ impelluntur; multòque simplicius est motum, & impetum directè sideribus in tenuissimo Cœlorum spatio delatis impressum asserere, quàm Deum ipsum vortices, Solem, aliudque id genus impellere, quo deinde cœlestia corpora moveantur, ut opportuniùs expositum est ubi de gravitatis origine differeremus. Hinc meritò, & egregiè, inquit, Seneca *hic siderum certus discursus fortuiti impetus non est; nam qua casus incitat, saepe turbantur, hac verò inoffensa velocitas procedit aterna legis imperio* (a). Nimirum Deus Universi Artifex sic illa disposuit, sic illa machinatus est, ut per spatia Cœli divinâ, & admirabili ratione decurrerent, ad efficiendas succedentium sibi temporum varietates.

(a) *De Provid. c. 1.*

tes. An Archimedes Siculus concavo aere similitudinem Mundi, ac figuram potuit machinari, in quo ita Solem, & Lunam composuit, ut in aequales motus, & cœlestibus similes conversionibus singulis quasi diebus efficerent, ut non modò accessus Solis, & recessus, vel incrementa, diminutionesque Luna, verùm etiam Stellarum, vel inerrantium, vel vagarum dispares cursus orbis ille, dum vertitur, exhiberet; Deus verò illa vera non potuit machinari, & efficere, quæ potuit solertia hominis imitatione simulare? Inest ergo sideribus ratio ad peragendos motus suos apta; sed Dei est illa ratio, qui & fecit, & regit omnia, non ipsorum siderum, quæ moventur (a).

C A P. X.

De luce Siderum.

I.



Tsi perennis ille cœlestium corporum motus, ordo, magnitudo, distantia, quas in illis jucundissimè contemplamur, admirabilia maxime sint; nihil est tamen, quod aut illustrius appareat, aut divino quodam munere nobis spectandum offeratur, quàm siderum lumen; ut meritò dici potuerit, maximam siderum pulchritudinem in luce potissimum consistere; & lucem ipsam omnium pulchritudinum formosissimam haberi posse (b).

Quid .

(a) Lact. Inst. II. c. 5. (b) Leo. Hebra. de Amor. dial. 3.

Quid enim cœlestia corpora pulcherrima, maxima, admirabilia fore prodesset, nisi lucem emitterent, quâ viderentur? Explicatis igitur iis, quæ ad siderum substantiam, motum, ac periodum pertinent, par est, ut aliqua de illorum luce dicamus, ejusque originem, & leges, quibus in cœlestibus illis corporibus reperitur, breviter ostendamus.

II. Porro de luce siderum illud communiter quæri solet, an omnia cœlestia corpora æqualiter lucida sint, hoc est ingenitam habeant lucis originem; an verò potius quædam ex illis lumen ab alio recipiant, ut non *luminosa*, sed *illuminata* verisimilius vocari possint. Quâ quidem in re celebris, & communis est omnium ferè veterum, recentiorumque Philosophorum opinio, quod Sol, & sidera fixa, vel inerrantia proprio lumine effulgeant, cum plurimi tamen sint, qui Planetarum lumen partim quidem a Sole oriri arbitrentur, partim etiam tenuissimam lucem illis inesse defendant. Hæc autem optimè intelligi poterunt, ex iis quæ dicta sunt alibi, cum de Solis, & siderum substantiâ ageretur. Omnes enim, qui Solis, aut siderum substantiam igneam esse putarunt, ii quoque Solem, & sidera proprio lumine gaudere sunt arbitrati, cum ipsa lux prima veluti ignis proprietas habeatur; idque plurimi ex illis expressè docuerunt, ut Stoici, Plato, Possidonius, Heraclitus, alique superius memorati. Aristoteles etiam, & si qui alii fuerint, qui Cœlos incorruptibiles esse dixerunt, Solisque substantiam ab igne nostro plurimum differantiarunt, proprium lumen tamen Soli inestimant, quod ignis instar, non ceteris modò

modò sideribus lucem impertiretur, sed omnium etiam illorum splendorem longè superaret. Solus Empedocles, & Philolaus memorantur, qui Solem non proprio, sed alieno lumine fulgere dixerint; quatenus nimirum, vitreus, sive crySTALLINUS cùm foret, alterius Solis radios imbiberet, atque ad nos reflecteret; quemadmodum ferè Solis imago, quæ in speculo, aut aquâ, aut nube depingitur, Sol alter apparet. Ceterum Solem proprio lumine gaudere, ut illum Plato *Splendidissimum, candidissimumq;* (a) dixerit, Philosophorum omnium consensu, & experimento manifestissimè demonstratur; cùm vix oculos in Solem convertere liceat, quin illorum acies acerrimâ, vehementique luce, uberrimè perfundatur, & perstringatur, atque Sol ipse *omnia clarissimâ luce colluflret* (b).

III Ipsa quoque fixa, vel inerrantia sidera proprium lumen, Solis instar, habere, ab omnibus ferè conceditur, si Metrodorum, Strabonem (c), Diotimum (d), Plinium, aliosque paucos exceperis, qui *omnes non errantes a Sole lumen habere* (e) arbitrantur. Certè cùm eadem ferè sit, ut illustriores omnes Philosophi existimant, Solis, ac siderum natura, atque ipsa sidera veluti totidem Soles a Pythagorâ, Cartesio, aliisque compluribus habeantur; quemadmodum Sol proprio lumine effulget, ita etiam sidera propriam lucem habere debent.

Maximo quoque argumento esse poterit,
quod

(a) ap. Plot. *Enn. II. lib. 1. c. 7.* (b) *Cic. Nat. II.*
(c) *Strab. Ecl. Phy.* (d) *II. c. 6.* (e) *Plut. 2. c. 17.*

quod Sol, & sidera fixa scintillent, eorumque lux tremulâ quâdam undulatione pupilam feriat, & perenni veluti agitatione percellat. Itaque, vel Solis, ac siderum scintillatio ex perenni, vehementique motu oriatur, quo tenuissimæ illorum particule ad oculos nostros feruntur, in quo motu plurimi lucis naturam positam esse arbitrantur; vel ex facierum mutatione, adamantis instar, ut putavit Tycho; vel ipsâ oculorum, & visus imbecillitate, qui, cum vehementiorem, & acriorem siderum lucem, vix patiatur, tremere, ac nictitare compellatur, ejusque tremor faciat, ut hæc motio stellæ ipsius esse, videatur (quandoquidem *nihil interest, an visus, an id, quod cernitur, moveatur*) (a); ex ipsâ tamen Solis, & siderum scintillatione, quæ Planetis, ut mox ostendetur, non convenit, optimè inferri poterit, Solem, ac sidera propriâ, non alienâ luce gaudere.

IV. Sed illustrius adhuc ex plurimis Astronomicis observationibus id ostendi posse videtur. Cum enim sidera fixa, ut alibi diximus, Soli æqualia, vel etiam majora sint, si Sol in eâ distantia poneretur, in quâ sidera reperiuntur, illis æqualis, aut etiam minor appareret, ejusque lumen par foret lumini, quod a *Sirio*, *spicâ*, aliisve sideribus sextæ fortasse magnitudinis diffunditur; quî igitur fieri poterit, ut siderum lux a Sole oriatur, & a sideribus ipsis reflectatur, quando Sol ipse, si ex aliquo sidere videretur, 1800. vicibus minor appareret, ut ait Keplerus (b),

Tom. IV.

S

tan-

(a) *Arist. II. Cal. t. 42.* (b) *Kepler. Epit. Astr. Copern. VI.*

tantumque abesset, ut lumen ipse sideribus impertiretur, ut illud potius ab ipsis recipitur?

V. Quid verò de Planetarum omnium lumine verisimiliter arbitremur? *Anaximander tradit Lunam proprium lumen habere, sed rarius. Antiphon suo fulgore nitere Lunam. Heraclitus eodem modo affici Lunam, quo Solem. Scaphæ enim formam esse sideribus hisce; cumque humidum excipiat vaporem, illustrari, sicut videntur, clarius quidem Solem, ut qui in puriore feratur aere, Lunam obscurius, quia in turbidiore (a).*

Plerique tamen, & illustriores etiam Philosophi docuerunt Lunam alieno lumine, hoc est Solis radiis, illustrari; eamque opinionem Thales, Pythagoras, Parmenides, Empedocles, Anaxagoras, Metrodorus (b), Cicero (c), Plinius (d), Macrobius (e), amplectuntur, & Aristarchus ille Samius, qui omnium primus Lunarium phasium causas ostendisse traditur (f), Quin etiam Anaximander ipse Lunæ splendorem a Sole oriri, dixisse fertur apud Laërtium, cum Lunam falsò lumine lucentem (g) vocaverit; neque sanè verificari posset, quod ait Plutarchus, *Thaletem, & qui ejus sequuntur decreta, a Sole illustrari Lunam, opinatos fuisse; si Anaximander illius auditor, & Scholæ successor oppositam sententiam docuisset.*

VI. Quæcunque tamen fuerit illorum opinio, ex ipsis Lunæ phasibus manifestissime de-

(a) *Plut. II. c. 28.* (b) *Stob. Ecl. Phys.* (c) *de Or. III.* (d) *II. c. 9.* (e) *Somn. I. c. 19.* (f) *apud Vi-truv. II.* (g) *Plut. II. c. 28.*

demonstratur, Lunam, non proprio lumine, sed radiis Solaribus omnino illustrari. Cum etenim juxta diversum Solis aspectum, lux illa augeatur, sive decrescat, ut aliquando Luna prorsus obscura, interdum in cornua falcata, interdum pleno orbe lucens appareat; necessariò fit, ut a Sole lux illa tota dependeat. Quod, ut illustrius adhuc intelligi possit, animadverti plurimum debet, quod ejusmodi phases, sive incrementa luminis, aut decrementa hac lege fieri debent, ut quamvis dimidia semper Lunæ pars a Sole illustretur; cum tamen non eadem semper dimidia pars a Sole illustrata ad nos obvertatur, sed aliquando solum exigua illius pars, aliquando tota, aliquando dimidia illustrata Tellurem respiciat; hinc Luna, aliquando pleno orbe lucens, aliquando clarior, aut obscurior appareat. Sic ubi Luna cum Sole conjungitur, hoc est inter Solem, & Terram intercipitur; Lunæ pars a Sole illustrata in Solem ipsum convertitur, nobisque inferior, & obscura pars apparet. Deinde verò, dum Luna sensim a Sole digreditur, majorem nobis lucidæ partis portionem exhibet, donec peractis 90. gradibus, dimidiâ sui parte lucida videtur, tandemque 180. gradibus a Sole remota, eique opposita pleno orbe nobis effulgeat; iterumque alterâ ex parte ad Solem accedens in tertia quadraturâ reperiatur, sensimque decrescens ad conjunctionem iterum revertatur. Ex quo facillè intelligi poterit, quod a conjunctione ad primam quadraturam Luna *Menoides*, hoc est in cornua *falcata*, sive *curvatâ* dicatur, in quadraturâ *Dichotomos*, *bisariam secta*, inde ad oppositionem

Amphikyrtos, utrinque gibbosa, in oppositione denique *Panselenos*, seu *Plenilunis*; quarum quidem phasium, cum tres solum priores a veteribus, ut ait Cleomedes (a), cognitæ fuerint, Luna *triformis* est appellata; deinde verò quartam, quæ ordine est tertia, a Recentioribus additam esse Cleomedes ipse testatur. Itaque cum illa pars Lunæ, quæ juxta Opticæ leges hîc exposita, a radiis solaribus non illustratur, obscura prorsus appareat, optimè inferri poterit, Lunam *alieno lumine lucere*, atque etiam idcirco Terræ *umbrâ* interveniente, ut in eclipsibus Lunæ fieri debere mox ostendetur, *deliquium pati* (b).

VII. Tenuis autem, & veluti languida lux illa, quæ in Luna, dum interceptis radiis solaribus eclipsim patitur, adhuc apparet, a plerisque Philosophis *secundaria* dicitur, & ipsi Lunæ veluti propria tribuitur; cum clarior alia, & argentea in Solem communiter referatur. Anaximander enim, ut antea diximus, *proprium lumen habere Lunam*, ait, sed *rarius*; (c) quemadmodum Stoici (d) dixerunt inesse Lunæ, *subobscurum*, & *aereum splendorem*; Plutarchus (e) *nigrescentem*, ac *terreum*; Theon (f) *obscuriorem*, *debilioremque*; Pappus (g) denique *cineritium*, quod his quoque temporibus Peripatetici nostri arbitrantur.

VIII. Recentiores tamen Philosophi ferè consentiunt, quod hæc ipsa quoque tenuis, & subobscura, vel *secundaria lux* Lunæ non illius

(a) H. c. 5. (b) Diog. II. (c) Plut. II. c. 28. (d) Stob. Ecl. Phys. c. 25. (e) de facie Lunæ. (f) in IV. Almag. (g) Coll. Math. VI.

illius propria sit, sed a radiis solaribus oriatur; cum præsertim ejusmodi lux non eadem semper appareat, sed aliquando candidior, aliquando ferruginea, nunc rubea, nunc pallida, nunc denique nulla, intra quadraturas fortior, extra illas debilior nullâ servatâ ratione, vel certâ lucis periodo, videtur. Plurimum tamen inter se differunt in exponendâ secundariæ hujus lucis origine. Tycho lucem illam a Venere oriri, hoc est a Veneris disco in Lunam reflecti arbitratur. Verum etsi Planetæ, vel sidera radios in Lunam dirigant, impossibile est tamen, ut inde lux illâ resultet, cum Veneris sidus non ita semper constitutum sit, ut Lunam radiis a se reflexis illustrare possit. Alii opinantur secundariam hanc lucem a primariâ prodire, quatenus ex illustratis Lunæ partibus plures radii resiliunt, ac diffunduntur, qui circumpositas obscuriores partes illuminent; sed his responderi posse videtur, quod non ingens adeo radiorum copia diffundi potest, quæ rotundam, & devexam Lunæ superficiem æqualiter ambiat, & illuminet; quemadmodum etiam perperam ad aërem Lunæ circumfufum alii confugiunt, cum nulla athmosphæra circa Lunam deprehendi, certoque demonstrari potuerit; vel ipsa Lunæ substantia aliquomodo pellucida ab aliis effingitur, ut a radiis solaribus penetretur, & aliquam tenuissimæ lucis particulam exhibeat, quod olim Possidonius existimavit (a), cum prorsus opaca illa sit, ut ex maculis, aliisque argumentis evincitur.

(a) *ap. Cleom. II. c. 4.*

IX. Longè verisimilius est itaque secundariam hanc lucem, quæ in Lunæ phasibus observatur, ex radiis solaribus creati, qui vel a Terrâ, vel ab aëre Telluri circumfuso reflectuntur, quod omnium primus observavit Mœstlinus, quem deinde Keplerus, Skicardus, Galileus, ceterique sequuti sunt. Neque dubitare quis poterit, Solis radios a Tellure in Lunam regeri, vel reflecti posse; quemadmodum enim a Lunâ in Terram ita reflectuntur, ut Luna argenteo primario lumine fulgere videatur, ita quoque ex Terrâ in Lunam reflectire poterunt. Hinc inæqualitas, & varietas illa coloris explicatur ex inæquali vaporum densitate, qui in aëre existentes a reflexis Solaris radiis inæqualiter trahuntur. Quemadmodum etiam observatum est uberiorem esse secundariam hanc lucem, cum Luna exoriente eclipsatur, quodd illa maximo Asiæ continenti imminens radios a Terra reflexos excipiat; dum verò occidit, Oceano immineat, ideoque paucioribus radiis ab illo reflexis illustratur.

Secundaria quoque lux illa, quæ in eclipsi Lunæ conspicitur, ex iisdem radiis solaribus, qui in atmosphærâ Telluri circumpositâ refringantur, & invicem uniantur, oriri posse demonstravit Keplerus, & intelligi facile poterit ex iis, quæ de luminis refractione dicenda sunt.

X. Dicendum postremò foret de aliorum Planetarum luce; sed cum eadem sit illorum, ac Lunæ conditio, nihil est fere, quod uberius, & illustrius adhuc afferri possit, ut ostendatur, ipsos quoque lucem omnem a Sole recipere.

1. Verisimile est itaque Planetas omnes ex eâdem substantiâ compositos, ideoque æqualiter opacos, & obscuros esse.

2. Certè luminis phases in Venere (a), Mercurio (b), & Martè (c) Lunaribus simillimæ post Galileum observatæ sunt, iisque ceteros etiam Planetas obnoxios esse ex Opticæ legibus demonstratur; quamvis, ob maximam distantiam, observari nondum potuerint.

3. Mercurius in Solis disco sæpius, ut nigra macula, visus est; ideoque inferior illius pars nobis obversa, Solique opposita, opaca, & obscura esse debuit (d). Venerem quoque solarem discum, maculæ nigricantis instar, trajecisse observavit Horoccius die 24. Novembris 1639., quod cum tunc primum ab orbe condito contigisset, iterum apparebit die 15. Mâii 1761. (e).

4. Addi etiam poterit Planetas, quod proximiores sunt Soli, eò lucidiores videri; obscuriores verò, quod remotiores; ut Mercurius, & Venus, quia uberiores, & fortiorrem lucem ad nos regerunt, etiam scintillare videntur, quod tamen nulli Planetarum propriè conceditur, ideoque illorum lucem, si pro majori, sive minori distantia a Sole fortior, sive debilior deprehenditur, a Sole oriri, repetique debet.

(a) *Galil. nunc. sider.* (b) *Ricciol. Alm. VII. sect. 1. c. 2. Kepl. Epist. Astron. Hevel. Proel. Selenogr.* (c) *Ricc. Alm. IV. c. 6.* (d) *Gass. de Merc. in Sole viso. Guerik. Syst. Mun. lib. 1. c. 14.* (e) *Vuisthon. Méthod. ad Astron. & Velf. tom. 2. p. 473.*

G A P. XI.

De Eclipsibus Siderum.

I.



Roximum est, & ipsa loci oportunitas exigit, ut siderum, præsertim verò Solis, & Lunæ labores, deliquia, defectiones, vel, ut communiter dici solet, *eclipses*, earumque causas ostendamus. Quâ quidem in re quid senserit Heraclitus, Anaximander, aliique superiori loco jam diximus, cum de Lunæ substantiâ res foret; nihil est etiam cur opinio Xenophanis memoretur, qui Lunam, dum eclipsen patitur, extingui putavit; quemadmodum etiam Epicurus eclipses ait, *tam Solis, quam Luna contingere posse, aut per extinctionem proprii luminis, aut per obductionem aliarum quarundam interpositarum rerum, ut Terra, certa partis Cæli, aliorumve huiusmodi (a);* quamvis alibi dixerit, deficere Solem ob Lunam ipsi, nobisque interpositam; & Lunam ob Terram ipsi, Solique interjectam (b). *Manifestum est, itaque Solem, interventu Luna occultari, Lunamque Terra obiectu, eisdem Solis radios Lunâ interpositu suo auferente Terra, Terrâque Luna (c).* Quod omnes ferè Philosophi Thales, Plato, Aristoteles, Stoici docuerunt. Quâ verò ratione fieri possit, ut aliquando Solis radii a Lunâ, vel

(a) Ep. ad Pyth. (b) Plu. II. c. 24. 29. (c) Plig. II. c. 10.

vel a Terrâ impediuntur, adeoque Solis, & Lunæ eclipsis sequatur, facillimè intelligi poterit, ex iis, quæ de siderum motibus explicavimus.

II. Cùm itaque Sol, & Luna motu proprio ab occasu in ortum, sed inæquali periodo, seu velocitate infra Zodiacum ferantur; necessariò fieri debet, ut aliquando veluti conjungantur, Luna nimirum Soli immediatè subjecta sit, ac inter Solem ipsum, & Terram posita, aliquando ab illo ita digrediat, ut integrâ semiperipheriâ, sive 180. gradibus ab illo remota, diametraliter ipsi opponatur, adeoque inter Solem, & Lunam Terra collocetur; si Luna quidem inter Solem, ac Terram reperiatur, ut in conjunctione fieri diximus, tunc radii Solis a Lunâ impediuntur, ne ad nos perveniant, adeoque Sol obscuratur, eclipsim patitur, ejusque facies, & splendor nobis eripitur, undè non Solis propriè, sed Terræ defectus, vel eclipsis vocari posset, cùm *Sol in defectu nihil patiatur, sed noster aspectus fraudetur* (a). Sin verò inter Solem, ac Lunam Tellus interposita sit, ut in oppositione contingit; tunc radii Solis impediuntur a Terrâ, sive potius ab umbrâ, quæ a Telluris atmosphærâ in Lunam projicitur (b), ne Lunæ superficiem illuminent, adeoque Luna veluti languere, deficere, eclipsim pati conspicitur; & quia non omnes simul radii a Lunâ, vel Terrâ interpositâ impediuntur, sed in eclipsi Lunæ sensim Luna Telluris umbram, aut in eclipsi So-

(a) *Macr. Somn. I. c. 15.* (b) *vid. Tacq. Astron. IV. c. 2. n. 17.*

Solis Terra umbram Lunæ ingreditur ; hinc Lunæ , vel Solis eclipses aliquo temporis intervallo durare debent , quandiū nimirū Luna , vel Terra Solis umbram paullatim ingreditur , & ab illā subinde digrediatur . Quin etiam in eclipsi Lunæ , antequam eadem Luna Telluris , vel potiūs crassioris atmosphæræ umbram ingreditur , incipit obscurari ex umbrâ , quæ in Lunam projicitur a subtiliori aëre Terræ circumfuso , in quo Solis radii refringuntur , & maximâ ex parte impediuntur , adeoque Luna levio rem umbram , sive *penumbram* subire dicitur * .

III. Antequam verò cetera memorentur , observari plurimū debet , quod non in omnibus Lunæ conjunctionibus , vel oppositionibus cum Sole eclipsim fieri contingit , alioquin singulis Noviluniis Sol deficeret , ac Luna in Pleniluniis . Id autem oritur ex diversis orbitis , quas motu proprio infra Zodiacum peragunt Planetæ . Quamvis enim Sol annuo motu mediam Zodiaci lineam , quæ *ecliptica* dicitur , accuratè percurrat ; alii tamen Planetæ hinc inde ab illâ versùs alterutrum polum digrediuntur , & in Zodiaci superficie circulum describunt , qui eclipticam in duobus punctis oppositis bifariam secat , & ab illâ mutud secatur . Hæc duo puncta *Nodi* vocantur , atque illud quidem , in quo Planeta ascendit , *Caput Draconis* , aliud autem , per quod descendit , *Draconis cauda* , utrumque verò punctum *Sygiziorum* , vel *Sygizii* dicuntur . Si igitur oppositio , vel conjunctio Solis , & Lunæ in his punctis fieri contingat ;

tunc

* Fig. XVIII.

tunc Sol, aut Luna certò deficiet, & quidē eclipsi maximā, centrali, sive totali cūm centra Solis, Telluris, ac Lunæ in eādē rectā lineā reperiantur. Fieri tamen aliquando solet, ut licet ejusmodi centra in eādē rectā lineā posita sint; & eclipsi centralis dicatur; integra Solis facies non occultetur, sed circa Lunam in centrò Solis positam fascia quædam lucida supersit, idque oriri debet ex inæquali distantia Lunæ a Tellure; ut quò nimirum Luna Telluri proximior fuerit, eò majorem Coeli, Solisque partem occultet. Fieri etiam potuit ob refractionem lucis, ut *in occasu Lunæ deficeret, utroque super Terram conspicuo sidere* (a); quod etiam a Mœsthlinò anno 1610., & a Maraldo anno 1717. observatum est (b). Quod si prope puncta sigyziorum oppositio, vel conjunctio fiat, eclipsi partialis videbitur; sin verò fiet in punctis; ubi ab eclipticā Lunaris orbita maximè distat, tum nullā eclipsi sequetur, quæ omnia clariùs, & accuratiùs in sphaerā armillari intelliguntur. Hic solum monuisse sufficiat maximam illius orbitæ, quæ a Planetis describitur, latitudinem, declinationem, sive distantiam ab eclipticā, vel orbitā Solis, esse in Saturno gr. 2. 33. 30.¹¹, in Jove 1. 19. 20.¹¹, in Marte 1. 51.¹, in Venere 3. 23. 5.¹¹, in Mercurio 6. 52.¹, denique in Lunā 5. 1.¹

IV. Quæ verò de Solis, ac Lunæ laboribus, vel eclipsibus dicta sunt, ad ceteros quoque Planetas, & fixa sidera transferri debent; hæc enim cœlestia corpora eclipsim pati di-

(a) *Plin. II. c. 16. 13.* (b) *Hist. Acad. an. 1716.*

dicuntur, cùm ab aliquo inferiori fidere teguntur; eclipsim verò efficere, cùm superius aliquod sidus contegunt, nobisque eripiunt. Tellus itaque eclipsim efficit tantummodo in Lunâ; cùm umbra, quæ in oppositam Soli partem a Telluris atmosphærâ proiicitur, utpotè conica, & efformata a Sole, parum supra Lunæ regionem proprio apice extendatur, adeoque nullum ex fixis sideribus, aut superioribus, vel inferioribus etiam Planetis, ex interpositu Terræ eclipsim noctu pati unquam potest, præsertim verò Mercurius, & Venus, qui nunquam longius a Sole digrediuntur, ut illi opponantur.

V. Quandoquidem verò plurimi Solis, aut Lunæ defectus contigisse memorantur, qui ad has leges ægrè reduci posse videntur; juverit etiam illorum causas, & originem breviter contemplari, ut certa ab incertis, & vera a fabulosis distingui possint. Atque inter hæc posteriora haberi certè poterit illud, quod Xenophanes refert, Solis eclipsim contigisse, quæ integro mensis spatio duraverit, quamvis Gemina Frisius Caroli V. temporibus, Solem per tres dies sanguineum, & obscurum adeo apparuisse dicat, ut sidera, vel meridie conspicerentur; & Plinius asserat, *avo suo, Imperatoribus Vespasianis* ingentem adeo eclipsim contigisse, ut *duodecim diebus utrumque sidus Solis, & Luna quareretur* (a); Cedrenus etiam narrat, 7. Justiniani Cæsaris anno Solem anni spatio, Lunæ instar, sine radiis apparuisse (b). Sed hæc intelligi profectò debent, non de verâ Solis, aut Lunæ eclipsi;

fed

(a) II. c. 26. (b) Vid. Gassen.

sed potiùs, aut de crassioribus, & obscurioribus exhalationibus, quæ superiorem Aëris regionem occupantes Solis colorem, & lucem obdlexerint; aut etiam de maculis solaribus, quæ majores, frequentiores, crassioresque in Solis superficie concreverint, ejusque faciem foedaverint: quemadmodum certè a compluribus explicantur illæ tenebræ, quæ occiso Cæsare visæ sunt, ut inquit Poëta:

*Ille etiam extincto miseratus Casare Romam;
Cum caput obscurâ nitidum ferrugine texit,
Impiaque aeternam timuerunt secula noctem (a).*

Etsi Plinius defecisse tunc Solem arbitretur: *Fiunt*, inquit, *prodigiosi, & longiores Solis defectus, qualis occiso Casare dictatore, & Antoniano bello totius anni pallore continuò (b)*, quod divinitus etiam in Christi morte contigisse divinæ literæ testantur.

Ceterùm vera Solis eclipsis vix aliquot minutis perseverat, quibus Sol ipse ex lunari disco emergit; etsi Lunæ eclipsis duarum, & amplius horarum spatio deprehendatur, antequam nempe ex Telluris, vel atmosphæræ terrestri umbrâ egrediatur. Maxima verò inducitur in aërem obscuritas, dum Sol totalem, ut inquiunt, eclipsim patitur. In eclipse, quæ contigit anno 1654. & 1415: tanta fuit obscuritas, ut neque scribi, neque legi potuerit, & plurima sidera viderentur, nocturni volucres è nidis erumperent, in quos diurni sese receperant, & subitâ caligine perterriti in Terram deciderent, quod etiam 1699. & 1706. contigisse memoratur (c).

VI.

(a) Virg. Georg. I. v. 463. (b) II. e. 30. (c) Hist. Acad. 1700.

VI. Hinc mirandum non est, si vetères, ætudiores homines, qui admirabilis adeo effectus causas, & originem ignorarunt, detrahi, vel deduci Lunam è Cælo carminibus putaverint (a); Solem è Cælo periisse (b), relictâ sedes inconspicuum evasisse (c); Lunam somno, & amore correptam esse, ut proinde tympanis, & cymbalis excitanda foret; verùm, etiam quod subito terrore, & ingenti formidine perculsi fuerint, ut Pythius sibi ipsi, filioque necem intulerit (d); Archelaus, quo die Sol defecit, regiam clausurit, & filium, quod in luctu, rebusque adversis moris est, tonderit (e); Nicias per plurimos dies, maximâ Atheniensium jacturâ, classis expeditionem retardaverit, Macedones Romanis turpiter cesserint (f); ut innumera omittamus, quæ nostrâ ferè ætate contigisse, memorantur; ut egregiè Seneca: *Multa bodis sunt gentes, quæ tantum facie noverint Cælum, quæ nondum sciant, cur Luna deficiat, quare obrumbetur* (g); ut certè Sinenfes Lunam in oppositione idcirco deficere existiment; quod è regione Solis facta, acerrimumque hujus splendorem directè contemplata, nimio veluti stupore correpta deficiat (h). Maximam itaque laudem egregius ille Philosophus, Anaximander, consequutus esse videtur, qui primus clarissimam, confidentissimamque rationem, unde Luna illuminetur, inumbreturque scripto edidit (i), inaneque terrorem a mortalium animis avertere curavit, quamvis eâ de causâ in vincula

(a) Plut. de facie Luna. (b) Plut. ibi. (c) Herod. VII. con-28

(a) Plut. de facie Luna. (b) Plut. ibi. (c) Herod. VII. (d) Herod. Polyb. (e) Senec. Benef. V. c. 6. (f) Plut. in Emil. (g) VII. c. 25. (h) Trigal. lib. 1. (i) Plut. in Nic.

conjectus fuerit. Sed Anaximandro præluxisse videtur Thales Milesius, qui primus inter Græcos eclipsim illam prædixit (a), quæ, ut inquit Plinius (b), anno 2. Olymp. 48. contigit, sive, ut Herodotus (c), anno 6. belli inter Lydos, & Medos; Chaldeos etenim, & Ægyptios ante ea tempora Solis, & Lunæ eclipses observasse, & ingresso Babylonem Alexandro ostendisse, Laërtius, Diodorus, Cicero, aliique commemorant.

VII. Incredibile est autem, quàm feliciori, & accuratiori methodo id nostris hisce temporibus præstari consueverit; cum, non solum eclipsium reditus prædici, sed illarum quoque periodus certò, & accuratissime definiri soleat. Id unum innuisse sufficiat, cetera. Astronomis relinquentes, eclipsim in eosdem dies aliquot horarum discrimine post annos 19, redire, sive, ut ait Plinius, post menses 223, diesve 6940., quo temporis spatio tota decemnovalis illa Metonis periodus continetur, de quâ fusiùs, & opportuniùs Capite IV, disseruimus.

C A P. XII.

De Cometis.

I.



Rit fortasse, qui temere suspicetur hinc a nobis indictâ causâ rem definiri, si contra celebrem, nostrisque etiam temporibus mirificè florentem plurium Philosophorum sententiam, qui Cometas, non inter cœlestia, sed inter sublimia, vel Meteora corpora collocarunt; nos illorum naturam exponere aggrediamur in illâ Philosophiæ parte, quæ cœlestia solum corpora contemplatur, ac si planè cognitum, perspectumque foret, Cometas inter sidera haberi posse: sed, ut opinor, hæc venia facillè concedi poterit, ut quæcumque demum Cometarum natura verisimilior appareat, de illis tamen eo loco differatur, quæ ipsa temporis, vel rerum opportunitas ferat. Quod si Philosophorum numerus, & auctoritas hac etiam in parte spectari debeat, illustriores omnes veteres, recentioresque Philosophi, sin meliori, pari certè jure cœlestem Cometæ naturam, ceterisque sideribus, sive Planetis attexendam esse arbitrantur. Quamvis autem innumera ferè sint, quæ de cœlestis hujus, vel certè sublimis corporis loco, naturâ, & origine quæri solent; miro tamen, & incredibili quodam nexu ita artissimè conjunguntur, ut unum ex altero pendere, & plurimum lumen accipere videatur. Veterum, recentiorumque singulas hypotheses, sive opinio-

niones de Cometarum loco, naturâ, & origine exponemus; deinde verò ostendemus, quæ phænomenis explicandis accommodatior, adeoque verifimilior appareat.

II. Celebris est opinio Aristotelis (a), qui, cum cœlestia corpora incorruptibilia dixerit; Cometam nihil aliud esse arbitratur, quàm terrestres exhalationes, puriores nempe, & subtiliores terrestris substantiæ partes, quæ aut ingenito Telluris calore, aut solaribus radiis in supremam Aëris regionem evectæ, vel a radiis ipsis solaribus, vel a proximâ Ignis Elementaris sphærâ accensæ, sideris in morem, effulgeant, eodemque diurno motu, quo Cœlum Lunæ, ipsique subjectus Ignis, & suprema quoque Aëris regio, circa Tellurem abripiantur. Interim tamen incertâ quadam periodo, ad alterutrum polum accedat, quò nutrimenti, vel inflammabilis exhalationis copia illum alliciat. Crines autem illi, qui barbæ, vel caudæ instar, Cometæ corpori adhærent, ut ille *crinitus*, sive *comatus*, *barbatus*, *caudatus* appareat, ex tenuiori Cometæ substantiâ oriuntur, quæ, cum inæqualiter illustretur, inæqualem etiam figuram fortitur.

III. Eadem ferè videtur esse Stoicorum opinio (b); quamvis alibi ex aëre in atherea loca sublato fieri Cometam putaverint (c).

Epigenes elationem in sublime spiritus terra permixti, & accensi. Anaxagoras ignes traicientes ab athere, scintillarum instar, deferri, quæ etiam caussa, quod statim extinguantur.

Tom. IV.

T

Me-

(a) *Meteor. I. c. 7.* (b) *Sen. VII. c. 20.* (c) *Laer. VII. seg. 152.*

Metrodorus elici scintillas violentâ Solis impressione . Xenophanes omnia id genus compactum aliquid , aut motum esse nubium ignitarum . Heraclides Ponticus nubem in sublimi a sublimi lumine illustratam ; impressiones autem differre statuit pro ratione figura , in quam nubes conformatur (a) .

IV. Heraclidis Sententiam nuperrimè instauravit , & quo erat ingenio , illustravit Galilens . Itaque existimat ille fieri Cometam , cùm terrestris aliqua exhalatio ad supremam Aëris regionem evecta radiis solaribus traicitur , & illustratur ; eo ferè modo , quo cùm Solis radii depressiores etiam nubes penetrant , lucem , coloremque illis impertiuntur , ut virga , Coronæ , Parhelia , & Irides efformentur . Hinc autem fieri oportet , ut nulla sit Cometarum parallaxis ; non quod illi , siderum instar , ob infinitam ferè distantiam , ipsâ carere debeant ; sed quia non idem Cometa singulis observatoribus , sed singulis omnino diversus , ac in diverso loco videatur , ut certè in Iride , aliisque Emphaticis impressionibus experimur .

V. Atque istæ quidem Philosophorum opinioniones hætenus memoratæ , Cometas omnes sublunares , hoc est ex sublunari , sive terrestri materiâ compositos , & infra Cælum Lunæ existentes arbitrantur ; cœlestes autem illos esse , & in æthereo spatio vagari arbitrantur reliqui . Egregius ille superioris seculi Astronomus Hevelius opinatur , Cometas Lunâ , atque subinde Sole altiores existere , eisdemque fieri ex illis exhalationibus , quæ a
Pla-

(a) *Plut. III. c. 2.*

Planetis omnibus, præsertim Sole, erumpentibus, & in unam veluti congeriem conglobatis, tum Solis, tum fiderum calore, tum intestino partium motu accendantur; ejusque rei argumentum esse plerique coniciunt, quod ubi videntur Cometæ, nullæ, aut certè rariores, & exiliores in Sole maculæ conspiciuntur: Keplerus autem existimat, Cometas nihil aliud esse, quàm cœlestem auram vi quadam occultiore condensatam, quæ Solis radios colligit, & certis coloribus fingit, immo & unitos dispergit.

VI. Sed longè nobiliorem esse Cometarum originem, & naturam veteres alii, recentioresque Philosophi suspicantur: quibusdam enim antiquorum placet, cum è Stellis errantibus altera se alteri applicuit, confuso in unum duorum lumine, faciem longioris sideris reddi (a); nimirum congruere Stellas, & radios inter se committere, & hac societate luminis existere imaginem Stella longioris (b): unde Anaxagoras, & Democritus ait, Cometam esse duorum, aut plurium stellarum unionem, fulgorem proprium conjungentium (c).

Complures alii fuerunt, qui hac sidera perpetua esse crederent: suoque ambitu ire, sed non nisi relicta a Sole cerni, ut Pythagorici quidam dicunt esse Cometam errantium siderum, sed post multum tempus apparitionis illius esse, quod accidit, & circa stellam Mercurii, quæ sæpe non apparet, ita ut post multum tempus appareat (d).

Alii denique præter Planetas vulgò appa-

T 2

ren-

(a) Sen. VII. c. 11. (b) C. 19. (c) Plut. III. c. 2.
(d) Arist. Meteor. I. c. 6.

rentes, alias esse stellas existimant, quæ ali-
quando quidem inconspicua sint, quoniam sur-
sum procul a nobis feruntur, interdum verò
appareant, factæ scilicet humiles, tumque Co-
meta ab iis vocentur, qui stellas esse nesciunt,
videri porro evanescere, cum ætheris profundita-
tem, ut pisces Maris fundum, subeuntes, in
regionem suam sursum referuntur (a). Simili-
ter Cometas in numero stellarum errantium po-
ni a Chaldeis, tenerique cursus illorum tradit
Apollonius Myndius peritissimus inspicendorum
naturalium (b); Democritus quoque subtilissi-
mus antiquorum omnium suspicari ait se, Come-
tas plures stellas esse, quæ currant, quemad-
modum Pythagoræorum quidam Cometam putant
stellam ex earum numero, quæ non semper vi-
deantur, sed statò tempore suâ revoluzione exo-
riantur (c). Veterem hanc opinionem, quæ ab
Aristotelis usque temporibus, vetustatis, ac
ingeniorum incuria obsoleverat, illustriores
Astronomi nuperrimè vindicarunt, Cassinus,
Wisthon, Bernoullius, Gregorius, alique,
ut inferius ostendetur. Neque ab illâ pluri-
mum abhorret Cartesius, qui Cometas ait
esse sidera, quæ crassioribus aliquando tertii
elementi particulis, veluti maculis, obducta
conspici nequeant, & ex uno in vorticem
aliud abrepta delegantur, & proximiora no-
bis reddita videantur.

Utinam verò tam facile foret opiniones
omnes exponere, & illarum aliquam, non te-
mere, & inconsultò, sed feliciter complecti,
& ex illis, non veram dixerim, quando-
quidem

(a) Stob. Ecl. Phys. (b) Sen. VII, c. 3. (c) Plut. III.
c. 2.

quidem id ipsa ferè obscuritas rei vix patitur, sed verisimiliorem cognoscere! Quod unum fortasse licet, difficultates omnes, quæ contra singulas fieri solent, hic afferemus: tum faciliè intelligi poterit, quæ sit ceteris anteferenda.

VII. Aristotelis itaque opinio duplici ex capite falsa, & impossibilis haberi solet.

1. Primò siquidem ab Astronomis omnibus invictissimo Parallaxis argumento manifestissime demonstratur, Cometas omnes Lunâ, & interdum etiam Sole altiores existere, cum longè minorem habeant parallaxim, quàm Sol, & aliquando etiam nullam; ideoque ad fixorum siderum regionem sint referendi.

2. Deinde verò omnem prorsus superat fidem, ac nullâ ratione explicari potest, cur tenuis flamma constanter adeo, & incredibili ferè celeritate quotidie moveri possit, & diutius conservari, ut aliqui Cometæ ad sex mensium spatium pervenerint, ut ille, qui a Seneca (a) Neronis ætate visus est; omnes verò saltèm diebus 7. appareant. Certè omne, quod temporalis causa accendit, citò intercidit; sic facès ardent, dum transeunt; sic fulmina in unum valent ictum; sic, quæ transversa dicuntur stella, & cadentes, pratervolant, & secant aëra, Cometa verò tenorem suum servant, paresque sunt (b).

3. Idque ex solaribus maculis illustrari, & confirmari maximè potest. Quamvis enim ejusmodi maculæ ingentes adeo aliquando fuerint, ut anno 1719. macula sit observata, quæ quadruplò major erat Tellure;

T 3

quem.

(a) Sen. VII. c. 23. (b) Ibi. c. 20.

quemadmodum illa, quæ anno 1714. apparuit, Terram superabat 125. vicibus; & si sphericæ fuissent illæ, quæ visæ sunt anno 1706., 1726. vicibus majores Terrâ fuissent; in propriis tamen motibus irregulares adeo reperiuntur, ut, licet illarum aliquæ integram periodum circa Solem spatio 25. dierum absolvant, plurimæ tamen statim, ac repente dissolvantur, sive in faculas abeant; Cometæ verò eandem periodum, figuram, magnitudinem constantissime, diutissimèque tuentur.

4. Rursus *fideris proprium est ducere Orbem; ignis verò, aut it, quò illum natura sua ducit, idest sursum, aut eò, quò trahit materia, cui adhæret, & quàm depascitur (a)*; cùm igitur Cometa quotidie ab Ortum ad Occasum, & motu proprio ab Occasu in Ortum feratur, idque uniformi; constantique periodo; necessariò sequitur, ut ille tenuis, & libera flamma dici non possit.

5. Perperam verò, atque inutiliter ad diurnum Cœlorum motum confugere videtur Aristoteles. Quid enim, si negetur, Cœlos, moveri, sed sidera potiùs immotis Cœlis tenuissimum æthera permeare dicantur; aut, etiam si concedatur Cœlos moveri, negetur tamen hunc motum in ignem, & aërem transferri posse, cùm certè experimento compertum sit, aërem, qui circa rotam celerrimè agitatam reperitur, circulariter non moveri; quantò igitur minus tenuissima, ac infinita ætheris moles, quæ lævissima, ac politissima Cœli superficièi adhæret, æquabili, celerique motu torqueri poterit?

VIII.

(a) *Sen. VII. c. 23.*

VIII. Utriusque argumenti vim maximam agnovit Galileus, adeoque talem Cometæ substantiam esse arbitratur, quæ neque parallaxim subire, neque consumi posset. Verùm habet & ille, quibus prematur, argumenta. Quæ etenim fieri possit, ut ingens adeo exhalationis copia ad superiorem aëris partem feratur, quæ ubique locorum sub eodem angulo, eademque luce videatur? Quæ fiat, ut constans adeo, & regularis sit Cometæ motus, cum tamen Solis aspectus singulis diebus varietur? Quæ denique ratione Cometa, vel saltem rarior illius pars cauda, coma, vel barba semper eodem modo solaribus radiis illustretur, cum certè nubes, coronæ, iris, ceteraque id genus certam, quamdam aëris dispositionem exigant, ut efformentur?

IX. Ex his intelligi poterit quid de Kepleri, vel Hevelii sententiâ dicendum sit, cum hic Aristotelem, ille Galileum ferè secutus fuit. Nihil est itaque, quodd ex densioris aëris congerie, vel ex maculis solaribus Cometas oriri posse arbitrentur, cum nulla fere sit illorum cum ejusmodi rebus connexio; etsi aliquando solares maculæ, cum Cometæ videntur, rariores sint, id temere, fortuitòque factum esse putabimus, alioquin id, non interdum, sed semper fieri oporteret. Et certè si maculæ solares, ut antea dicebamus, ipsi Soli radiis inhærentes, vix unius mensis periodum absolvant, quomodo exhalationes ipsæ, sive Cometæ remotiores a Sole, adeoque longè rariores, & leviores perenni, celerrimo, diuturnoque motu ferentur, nisi fortasse Copernicana Hypothesis alibi rejecta supponatur, in quâ, non Cometæ, sed Tellus ipsa diurno motu circumagatur!

X. Democriti verò, Zenonis, & Anaxagore Sententia facile everti potest, his nos respondemus certum esse numerum stellarum mobilium, solere autem eodem tempore, & hac apparere, & Cometem, certè si Cometam faceret stella stella superveniens, momento esse desineret, summa enim velocitas transeuntium est (a) Quod si Ephorus apud Senecam referat (b) se vidisse Cometam in duos divisum, & Democritus apud Aristotelem asserat ex Cometâ plures stellas exiliisse, quod a pluribus etiam superiori seculo observatum refert Gassendus; explicari facile poterit dicendo; quod Cometa dissolvitur, sive occultatur in aliquâ Cœli parte, ubi stellæ confertiores sunt, adeoque stellulæ, quæ remoto Cometâ conspiciuntur, ex eodem Cometâ prodiisse videntur; nisi fortasse suspicari liceat, id observatum esse, cum a Cometâ cauda, vel coma sejungebatur.

XI. Qui verò Cometas errantia sidera; sive Planetas existimant, qui instar Veneris; & Mercurii circa Solem moveantur, & ab illius radiis occultentur; ii profectò dissimulant, aut ignorant, Cometas longius a Sole digredi, quàm Mercurius, & Venus, adeoque non ita radiis solaribus obrui posse, ut saltem telescopio deprehendi nequeant. Plurima deinde repugnant in hac hypothese explicandæ Cometarum periodo, ut inferiùs ostendetur.

XII. Superest modo, ut Pythagoræorum, Democriti, & Apollonii Sententiam, quæ postremò loco exposita fuerat, quæque Cometas decernit esse Planetas aliquos, qui cer-

ta

(a) Sen. VII. c. 12. (b) Cap. 16.

tâ periodo longius a Terrâ recedunt, & illi rursus appropinquant, quam denique ab illustrioribus superioris ætatis Astronomis instauratam, & adhuc usurpatam esse diximus, quò meliori poterit ordine, examinemus, & argumenta, quæ in utramque partem fieri solent, afferamus: utrumque verò iisdem ferè Senecæ verbis præstabinus, qui celebrem hanc controversiam, non eleganter modò, sed etiam graviter, & uberrimè pertractavit.

Qui igitur Cometam non aliud esse opinatur, quàm subitaneum ignem, qui ex terrestribus, sive cœlestibus exhalationibus oritur, non verò Planetam, aut Sidus, quod certâ lege moveatur; plurima obiiciunt, quæ in Cometis observantur, atque Planetarum naturæ, vel legibus opponuntur.

1. Si erraret, inquit, Cometes, essetque sidus, intra Signiferi, vel Zodiaci, terminos moveretur, intra quos omne sidus cursus suos colligit (a).

2. Rursus Cometa, quo primùm die apparuerint, maximi sunt; atqui deberent crescere, quò propius accederent, nunc autem manet in illis prima facies, donec incipiant extingui.

3. Similiter etiam stellæ omnes rotundæ sunt, Cometa verò porrecti, ex quo apparet stellas non esse (b); certè vix explicari poterit in hac hypothesi, unde nam extrinsecus ille, & ascititius splendor oriatur, ut Cometa crinitus, barbatus, caudatus appareat; cur ille semper a Sole averfus sit, ac in oppositam partem veluti proiciatur.

4. Nunquam apparet stella per stellam, acies

no-

(a) Cap. 18. (b) Cap. 26.

nostra non potest, per medium sidus exire, ut per illud superiora perspiciat, per Cometam, autem non aliter, quàm per nubem ulteriora cernuntur, ex quo apparet illum non esse sidus, sed levem ignem, ac tumultuarium (a).

5. Ipse deinde Cometarum color, & magnitudo, quæ nunquam eadem nobis apparet, argumento esse potest, illos inter sidera haberi non posse: hæc enim eandem semper magnitudinem, & colorem constantissimè retinent.

6. Quod si Cometæ forent errantia sidera, sive Planetæ, certâ quadam lege, ac periodo moverentur, statisque temporibus redirent; cùm tamen certum, exploratumque sit, vix duos reperiri posse Cometas, qui eundem motum, locum, distantiam habuerint. Alii nimirum dolii, vel disci figuram præferunt, unde *Pythetes* dicuntur, & *Discei*; *Hippeus* vocatur, qui equinis veluti júbis in orbem diffusis cingitur; *Acontias* jaculum, *Xyphias* gladium, *Lampadias* facem, *Cerantias* cornu æmulatur.

7. Illud est etiam in Cometis admiratione dignissimum, quod integram circulationem, nunquam perficiunt, sed, peractis aliquot in Cælo gradibus, evanescunt, quod nulli siderum convenire posse videtur.

XIII. Hæc illi, qui Cometarum substantiam a siderum, & Planetarum naturâ plurimum differre arbitrantur. Qui tamen oppositam sententiam tuentur, plurima reponere solent, quibus ad singula capita respondeatur; atque ut a primo exordiamur,

I. *Quis*

(a) *Ibid.*

2. Quis unum stellis limitem ponit? quis in angustum divina compellit, nempe hac ipsa sidera, qua sola moveri credis, alios, & alios circulos habent: quare ergo non aliqua sint, qua in proprium iter, & ab istis remotum secesserint? Quid est quare in aliquâ parte Cœlum pervium non sit? quod si judices, non posse ullam stellam, nisi Signiferum attingere, Cometes potest sic latum habere circulum, ut in hunc tamen parte aliquâ sui incidat, quod fieri non est necessarium, sed tamen potest. Vide ne hoc magis deceat magnitudinem Mundi, ut in multa itinera divisus sit, ne hanc unam deterat semitam, ceteris partibus torpeat: credis in hoc maximo, & pulcherrimo corpore inter innumerabiles stellas, quinque solas esse, quibus exercere se liceat, ceteras stare, fixum, & immobilem populum? (a) Hactenus Seneca, cui nobis adjungere liceat ex nuperrimi Cassini observationibus, Cometas etiam proprium Signiferum, sive Zodiacum habere, in quo certâ lege, determinatâ periodo, statisque temporibus moveantur; complectitur autem Zodiacus ille Cometicus *Antinorum*, *Pegasus*, *Andromedam*, *Taurum*, *Orionem*, *Procyonem*, sive *Canem minorem*, *Hydram*, *Centaurum*, *Scorpionem*, & *Arcum Sagittarii*, ut his versiculis exprimitur.

Antinorus, *Pegasusque*, *Andromeda*, *Taurus*,
Orion,

Procyon, atque *Hydrias*, *Centaurus*, *Scorpius*,
Arcus.

3. Alterum verò duplici ratione explicari facile potest: primò in plurimis Cometis id a Seneca, Cassino, aliisque compluribus observa-

tum

(a) Cap. 23. 24.

tum est, ac præsertim in illis, qui anno 1698. visi sunt; secundò quod minimè necessarium est, ut Cometa Telluri proximior, major etiam appareat, quemadmodum enim, ut superius ostendimus, & inferius etiam dicturi sumus, 5. Saturni satelles, dum inferiorem, nobisque proximiorē orbitæ partem excurrit, invisibilis est, & omnia ferè sidera fixa magnitudinem augere, vel minuire videntur, quòd inæquali substantiâ partim lucidiori, partim obscuriori composita sint, & dum circa proprium axim. torquentur, modò obscuriorem, modò lucidiorē nobis partem obvertant; quantò meliori jure de Cometis ipsis id suspicari possumus, quorum periodus nondum deprehensa videtur?

3. *Stella, inquiunt, omnes rotunda sunt, Cometa porrecti, ex quo apparet illos non esse stellas; sed quis tibi concedat Cometæ longos esse, quorum natura quidem, ut ceterorum siderum, globus est, ceterum fulgor extenditur (a).*

Irregularis itaque Cometæ figura non arguit, illos sidera non esse, tum quòd ipsa quoque sidera, & Planetæ irregularem figuram exhibent, ut præsertim ex annulo Saturni colligitur, tum etiam quòd illa figuræ varietas non in Cometæ Corpore, sed in fulgore, vel athmosphærâ, quâ tingitur, existat. Quin etiam oppositum inferri potest; cùm enim Cometæ plerumque rotundi sint, quod siderum, & Planetarum proprium esse dicitur, ipsi quoque inter Planetas, & sidera recenseri meritò poterunt; ceterum undenam splendor, athmosphæra, sive cauda oriatur, non-

(a) C. 26.

nondum inter Philosophos convenit; Appianus, & Cardanus, Tycho, Snellius, aliqui ex solaribus radiis, per Cometæ corpus tractis illam efformari putant, unde Soli semper opposita videatur. Cartesius lucem Solis reflexam hanc esse arbitratur; Hevelius autem, & Neutonus atmosphæram, sive tenuissimum vaporem, qui Cometæ corpus ambiat, atque a solaribus radiis in partem Soli aversam propulsus lucem ad nos regerat. Quæcumque tamen ex his tamquam verisimilior hypothesis eligatur; inde certè inferri non poterit. Cometas inter sidera, sive Planetas haberi non posse, cum præsertim eadem sidera fixa crinita interdum, aut barbata, aut caudata apparuerint, quod præsertim accidit stellæ, quæ reperitur in famore canis, quod etiam contigisse superiori seculo refert Blancanus (a); quemadmodum etiam Cometæ plurimi caudâ, vel crinibus aliquando destituuntur. Cur autem in Cometis frequentius, quàm in ceteris sideribus cauda videatur, obscurum, & incertum est: interim cum Hevelio, & Neutono putari poterit, id ex diversâ corporum substantiâ, ex quâ diversi prodeant vapores, exoriri, sicuti planetæ singuli, si solam Lunam exceperis, atmosphæram habent sibi circumfusam, & solus Saturnus ansulâ, vel annulo coronatur.

4. *Per stellas, inquires, ulteriora non cernimus, per Cometas verò aciem transmittimus: Primum si sit istud, non in eâ parte sit, quâ sidus ipsum est spissè, & solidi ignis, sed quâ rarus splendor excurrit per intervalla ignium.*
vi-

(a) De Mund. Fabric. lib. XVI.

vider, non per ipsos ignes (a). Videntur itaque sidera, cum inter illa, & oculum rarior illa, ac ferè pellucida Cometæ pars intercipitur, quæ comam efficit; at verò si corpus ipsum Cometæ interponatur, compertum est sidera occultari, quod etiam contingere deberet, si Cometæ, vel nubes accensæ, vel exhalationes ignitæ, vel nubes etiam radiis solaribus illustratæ dicerentur.

5. Quod autem Cometæ colore dissimiles sint, argumento esse non potest illos non esse sidera; quemadmodum enim, ut egregiè, inquit Seneca, *licet omnes Stella inter se dissimilem habeant aliquatenus faciem, nihil tamen hoc prohibet, ista sidera esse; ita nihil prohibet, Cometæ aternos esse, & sortis ejusdem cum ceteris, etiam si faciem illis non habeant similem. Non etenim ad unam naturæ formam opus suum præstat, sed ipsâ varietate se jactat. Ignorat Natura potentiam, qui illi non putat aliquando licere, nisi quod sapius facit (b).*

Hinc non solum diversi Cometæ diversum colorem, & magnitudinem habere possunt; verum etiam unus, idemque Cometa diversis temporibus diverso colore, magnitudine, ac figurâ apparere potest. Cum enim, aliorum Planetarum instar Cometæ circa proprium axem verisimiliter moveantur, & partibus dissimilaribus, sive etherogeneis componantur; & superficiem insuper habere possint, partim lævem, partim asperam, & inæqualem; necessariò fit, ut non eandem semper faciem nobis obvertant, ideoque non eundem colorem,

lu-

(a) C. 26. (b) C. 25.

lucem, ac magnitudinem præferant. Certè
 5. Saturni Satelles, cùm Terræ proximior sit,
 decrefcit, ac denique occultatur, cùm verò
 magis, magisque a Terrâ recedit, major, &
 splendidior apparet; fic 1. 2. & 4. Jovis Sa-
 telles magnitudinem, & colorem fenfibiliter
 mutat; fic denique fidera ipfa, ita augentur,
 vel decrefcunt, ut quæ in tibiâ Sagittarii
 fuerat 3. magnitudinis, nunc ad sextam de-
 creverit, & anno 1692. vix confpici potue-
 rit; quæ in brachio Sagittarii erat 3. ma-
 gnitudinis, nunc ad 5. vix accedat, quod &
 in ftellâ, quæ erat in fæmore ejufdem Ser-
 pentarii, & in cauda Serpentis reperitur,
 obfervatum eft. Stella verò, quæ fita eft in
 collo Cæti, ita habet lucis, & magnitudinis
 periodum, ut 7. menfibus omnino occultetur,
 quatuor fequentibus appareat, & iterum oc-
 cultetur. Hinc meritò Maraldo afferit, nul-
 lam effe ftellam, quæ in luce, colore, ac ma-
 gnitudine non immutetur. Cùm igitur hæc
 argumento effe non poffint Planetas, Satelli-
 tes, & fidera non redire, fed folo motu cir-
 ca axem a Caffino, Roëmer, Maraldo, Mon-
 tanario, Du-Hamel optimè explicentur; eâ-
 dem profectò ratione Cometas fingulos redi-
 re, defendi poterit, licèt inæqualem lucem,
 colorem, magnitudinem illi præferant. Deinde hoc Cometarum proprium eft, quod
 caudam habeant, quâ folâ plerumque a fide-
 ribus diftinguantur; cùm igitur cauda tenuif-
 fima fit, & pellucida, adeoque facilè evane-
 fcere, vel occultari poffit; fiet profectò, Co-
 metas ægrè a fideribus diftingui poffe, adeo-
 que illorum reditum non obfervari; quod
 fæpius contigiffe teftatur Caffinus. Rurſus,
 cùm

cùm Cometæ a Sole minimùm recedere soleant, ejus radiis ita occultari poterunt, ut nullâ ratione deprehendi possint; quod in Mercurio quoque compertum est; certè etiam Seneca multos, inquit, Cometas non videmus, quòd obscurantur radiis Solis; additque argumentum quod Sole deficiente, Cometa apparuit, quem Sol vicinus obtexerat (a).

6. Si quis autem hoc loco me interrogaverit; quare ergo, non quemadmodum quinque stellarum, ita horum observatus est cursus? Huic ego respondebo, multa sunt, qua esse concedimus, qualia sint ignoramus. Habere nos animum, cujus imperio, & impellimur, & revocamur, omnes fatebuntur; quod sit animus ille rector, dominusque nostri non magis tibi quisquam expediet, quàm ubi sit (b). Quid ergo miramur, Cometas tam rarum Mundi spectaculum, nondum teneri legibus certis, nec initia illorum, finesque notescere, quorum ex ingentibus intervallis recursus est? Nondum annimille, & quingenti, ex quo Græcia stellis numeros, & nomina fecit, multasque hodie sunt gentes, qua tantum facie noverunt Cælum, qua nondum sciant, cur Luna deficiat, quare obumbratur; veniet tempus, quò ista, qua nunc latent, in lucem dies extrahat, & longioris avi diligentia, ad inquisitionem tantorum atas una non sufficit, ut tota Cælo vacet (c).

XIV. Quod autem Seneca in votis habuit, quod ille posteris ætatibus augurabatur, superiori seculo feliciter contigisse gloriamur. Immortalis enim memoriæ vir Joannes Dominicus Cassini Regis Christianissimi Astro-

no-

(a) C. 20. (b) G. 24. (c) C. 25.

nomus, qui celebrem hanc opinionem primus instauravit, ubi Cometas singulos accuratissimè observasset, inter Planetas haberi illos posse, eorumque reditum prædici, & certam periodum deprehendi posse, testatus est. Ipse certè Cometas anni 1577. 1680. & 1652. 1698. eosdem fuisse arbitratur, sicuti & illos, qui anno 1689. & 1699.; & rursus illos etiam, qui anno 1472., & 1556. observati sunt. Ut enim ipse in Historiâ Academiæ Parisiensis (a) egregiè demonstrat, Cometæ ejusmodi, quos eosdem fuisse arbitratur, eâdem inclinatione, iisdem in punctis, sive nodis, eâdemque velocitate Eclipticam secaverunt. Quemadmodum igitur quinque, vel septem Planetas, eorumque satellites certâ quadam periodo moveri, atque in orbem redire compertum est, quodd eadem loca pertranseant, eâdemque velocitate appareant; ita Cometæ, in quibus hæc eadem manifestissimè observantur, inter Planetas meritò haberi poterunt; quin etiam, ut Cassinus ipse testatur, meliori etiam jure defendi id poterit, cùm Planetarum motus admodum sit irregularis, ut aliquando directi, aliquando stationarii, aliquando etiam retrogradi videantur, adeo ut a tribus saltem annorum millibus, ex quo illorum motus observati sunt, ad certas leges revocari non potuerint; Cometarum verò motus certâ lege, atque periodo finitus est, cùm tamen nonnisi paucis ab hinc annis ejusmodi opinio de Cometarum reditu illustrata sit. Hinc meritò Cassinus cum Senecâ auguratur, brevi tempus futurum, quo ista, qua latent, in lu-

Tom. IV.

V

cem

(a) *Hist. an. 1699. & 1702.*

cem dies extrahat, & longioris avi diligentia, quo posterì nostri mirentur, tam aperta nos nescisse: futurum, qui demonstret, in quibus Cometa partibus errent, quanti, qualesque sint, cur tam seducti a ceteris eant (a). Quod faciliùs adhuc sperare nunc liceat, postquam Clarissimus Vir, atque de Astronomicis optimè meritus Guilelmus Visthon Opere edito Cantabrigiæ anno 1710. Cometas singulos, qui ab anno 1337. ad annum usque 1698. observati sunt, in orbem rediisse luculentissimè demonstravit, atque sententiam nostram egregiè confirmavit, Cometas scilicet inter cœlestia corpora, sive inter Planetas haberi posse. Id etiam uberrimè demonstravit Jacobus Bernoullius in novo systemate Cometarum pro eorum motu sub calculum revocando, & apparitionibus prædicendis, ubi ex plurimis, & accuratissimis observationibus deducit, Cometas nihil aliud esse, quàm invisibilis Planeta primarii rotati circa Solem, ad distantiam 2583. semidiametrorum orbis magni, spatio annorum 4. dierum 157., satellites, qui tum demum videri incipiant, cum ad perigaum se demittunt, nobis proximi evadunt. Atque hinc intelligi faciliè poterit, quàm incredibilis, & immensa ferè distantia sideribus fixis, aut Planetis par videatur, unde Cometæ lumen oriatur, & quid terrifici Cometæ præferant, quod inferiùs ostendetur.

XV. Dicendum est priùs de Trajectoriâ Cometarum, sive exponenda nobis est orbita, quam illi motu proprio peragere, ac lentâ periodo describere videntur; Keplerus, alii-
que

que complures existimant, Cometas in lineis rectis moveri, ut aliquando proinde Telluri proximiores, aliquando remotiores appareant. Sed hæc opinio, quamvis a Cartesii sententiâ minimè abhorreat, ab iis tamen admitti non potest, qui Cometæ veluti sidera in orbem redire, stasisque temporibus apparere arbitrantur.

Longè verisimilior est itaque Cassini sententia, qui Cometas omnes in circulo Telluri excentrico, vel etiam prorsus extrinseco, qui nempe Tellurem ipsam minimè complectatur, æquabiliter moveri putat, quamvis alii melius fortasse existiment, Cometas ipsos, omnium Planetarum instar, in ellipsis ferri, in quorum umbilico altero Sol existat; sic enim faciliè explicari poterit, cur in illorum magnitudine, motu, periodo, &c. inæqualitas aliqua appareat, & integram circulationem, sive periodum circa Terram non absolvant; si etenim in ellipsis, aut circulo extrinseco ferantur, nunquam Tellurem proprio motu complecti poterunt; sed pro diversâ a Terris distantia, pro majori, vel minori ipsorum mole, pro inæquali circuli, vel ellipsis magnitudine modò plures, modò pauciores gradus in firmamento computatos describere videbuntur.

Secus verò in Peripateticorum sententiâ explicari vix poterit, cur exhalationes accensæ, licèt sex mensium spatio perenni motu, celerrimoque ferantur, ac jugiter instaurentur; nunquam tamen circulum perficiant, & rarissimè quoque semicirculum.

XVI. Exinde tamen inferri faciliè poterit, quid de Cometarum effectibus censi debeat.

Vulgaris est enim opinio, quæ omnium ferè animis alrè insedit, Cometen esse *terrificum*, magnâ ex parte *fidus* (a), ut

_____ si quando nocte Cometa

_____ sanguinei lugubre rubent (b),

Ventos, tempestates, sterilitatem, pestem minitentur.

Quin & bella canunt, ignes, subitosque tumultus,

Et clandestinis surgentia fraudibus arma,

Civiles etiam motus, cognataque bella (c), ut homines, neque vulgares, & omnino rudes existimaverint, Cometen splendore semper aliquid triste ostendere,

Et nunquam Cælo spectatum impune Cometen (d),

quemadmodum D. Joannes Damascenus dixit: *Existunt plerumque Cometa, summorum Principum extremum pita diem portendentes, qui Dei imperio illis temporibus conflagrant, rursusque delabuntur* (e).

XVII. Quamvis itaque negari non possit, Deum indicibus aliquibus imminencia mala interdum præsignificare, ut de illo dixerit Prophetæ: *Dedisti metuentibus te significationem, ut fugiant a facie arcus, & liberentur dilecti tui* (f): incertum est tamen, neque ullâ ratione probari unquam poterit, Cometas ipsos eâ de causâ nobis ostendi, vel inter ejusmodi signa haberi posse: si etenim illorum natura, & origo, motus, proprietates superius expositæ accuratè perpendantur, apprimè perspe-

(a) Plin. II. c. 25. (b) Virg. Æn. X. ver. 272 (c) Manil. I. (d) Claud. IV. de Bell. Gor. (e) De Fide II. c. 7. (f) Psal. 49. ver. 6.

spectum erit nihil esse, cur illos terrificos, di-
ros, læthales, quàm salutare potius, & ama-
biles existimemus. Addi etiam poterit, plu-
rimos sæpissime Cometas impune spectatos es-
se, hisce præsertim temporibus, quibus fre-
quentissimi ope telescopi deprehenduntur.

Quæ verò de variâ Cometarum præsignifi-
catione, & aliorum effectibus dicta sunt, in-
telligi meritò poterunt de effectibus etiam il-
lis, qui sideribus, aliisque Planetis adscribi
solent. Quid enim sunt aliud ineptissima
Astrologorum judicia, quibus ex variis cœ-
lestium corporum aspectibus, occultisque viri-
bus, vel, ut ipsi vocant, influxibus, futura
conjicere, vel prævidere se posse glorian-
tur, quàm impudentissima æruscatorum ho-
minum mendacia, quibus otiosis, rudibus, aut
nimiùm certè curiosis hominibus imponitur?
Qui illorum artes, fraudesque nosse velit,
Gassendum; aliosque plures adire poterit,
qui longâ de his oratione differunt. Nobis
hæc fufius prosequi, nec juvat, nec decet;
quin potius mirandum esse putamus, non so-
lùm, quòd Haruspice videns non videat Ha-
ruspex, ut olim dicebat Cato; verum etiam,
quòd argumenta expectari, exponique soleant,
quibus hæc impia, inutilis, ac temeraria ho-
minum audacia coërceatur.



PHYSICÆ
PARTICULARIS
TRACTATUS PRIMUS.



DISPUTATIO III.

*De Corporibus sublimibus, seu
Meteoris.*




LX pulcherrimâ, jucundissimâ-
que siderum, Planetarum, &
si quæ fuerint alia, cœlestium
corporum contemplatione di-
vellimur, ut illa quoque ex
instituto jam ordine prosequa-
mur, quæ, cùm in aëre pendere videan-
tur, *sublimia*, vel Græcâ voce *Meteora* satis
accommodè nōinantur. Hæc autem, etsi
cum nobiliori, ac divinâ ferè siderum substan-
tiâ comparari vix possint, hominum tamen
oculos, animumque partim ipsâ sui magnitu-
di-

dine, partim terrore, partim denique pulchritudine implere solent. Quàm etenim excitari, vel commoveri solemus, ubi fulgura, fulmina Cœlo torqueri, nostrisque cervicibus imminere conspiciamus; ubi nubes, pluvias, nives, aut grandines fieri, deorsumque labi videmus; ubi denique pulcherrimam Iridis, Parhelii lucem, coloremque intuemur? Dicendum est itaque de Meteoris omnibus, quæ in aëre efformantur; cumque illa partim ex aquâ, partim ex terrâ, partim ex aëre, partim denique ex igne fieri videantur, hoc est cum plurimæ Elementorum omnium particulæ ad illorum originem requirantur; prius de Elementis ipsis, eorumque particulis differemus. Quandoquidem verò Meteora alia *igneæ*, vel *accensa* sunt, ut fulgur, fulmen &c. alia *aqueæ*, vel *humida*, ut nubes, & pluvix; alia denique solùm *emphatica*, & *apparentia*, ut Iris, Parhelia; de singulis hisce generibus ordine differetur.



CAPUT PRIMUM.

*De Elementorum numero , naturâ ,
ordine , & loco .*

I.  E Elementorum naturâ , ac numero pauca dicenda nobis supersunt , cùm plurima de ipsis explicata jam fuerint in Physicâ Generali , ubi de sensibilibus corporum omnium principiis fusè , ac uberrimè juxta veteres , recentioresque Philosophos disputavimus .

Juverit ergo quædam hîc solùm exponere , quæ hujus loci propria sint ; & ex quibus sublimium corporum , vel Meteororum origo clariùs intelligi , vel explicari posse videtur .

II. Elementi nomine , ut inde exordiamur , nihil aliud intelligi solet , quàm *corpus aliquod simplex* , quo corpora componuntur , & in quod omnia corpora resolvuntur ; unde corpora ex Elementis ipsis composita *mixta* appellantur ; *imperfecta* quidem , si Elementorum , vel insensibilium corporum unio facilè solvi possit , ut glacies , nubes &c. *perfecta* verò , si diutiùs illa perseveret , ut in lapidibus , metallis &c. conspicimus .

III. Quæ fuerint Veterum , quæ nostris etiam temporibus sint Recentiorum sententiæ de Elementorum numero , nos opportuniùs alibi diximus . Quamvis enim Empedocles , & Aristoteles quaternarium illorum numerum constantissimè tueantur ; non defuere tamen , nec desunt Philosophi , qui plura , vel pau-
cio-

eiora, vel certè ab his diversa Elementa, constituent. Facile tamen hac in parte dissidentes illorum sententiæ conciliari posse videntur, quodd sensibilibiter quidem quatuor sint Elementorum genera; non omnia tamen prima, & simplicia corpora dicantur, cum aliqua ex illis genita, vel composita supponantur.

Plurima certè sunt argumenta, quibus Peripatetici probare solent quatuor esse Elementa, quæ *vulgaria*, vel *sensibilia* vocantur. Terram nimirum, Aquam, Aërem, & Ignem,

1. Cum etenim quatuor dicantur esse primæ qualitates, ex quibus deinde ceteræ oriuntur, calor scilicet, frigus, siccitas, & humiditas; quatuor etiam esse debent prima, vel simplicia corpora, quibus ejusmodi qualitates conveniant, & ex quibus alia corpora componantur.

2. Deinde verò, cum quatuor ejusmodi qualitates nonnisi quatuor modis inter se conjungi, vel combinari possint, ut siccitas cum calore, calor cum humiditate, humiditas cum frigiditate, frigiditas cum siccitate, reperiantur; (neque enim siccitas cum humiditate, aut calor cum frigore inesse potest) necessarium videtur, ut quatuor sint Elementa, quorum singulis duæ qualitates conveniant; ut Igni siccitas cum calore, Aëri calor cum humiditate, Aquæ humiditas cum frigore, Terræ denique frigus cum siccitate tribuatur.

3. Hoc autem ex ipsâ quoque corporum mixtorum resolutione, vel corruptione manifestissimè demonstratur. Omnia siquidem mixta in Ignem, Aërem, Aquam, & Terram.
resol-

resolvuntur; ut cùm ex ligno fit ignis, pars illius in ignem convertitur, pars in aërem avolat, pars in humorem exsudat, pars denique in cineres, vel terram abit; adeoque, si in quatuor elementa corpora resolvuntur, iisdem quoque quatuor Elementis corpora componi debent.

4. Postremò quaternarium Elementorum numerum, hac etiam ratione demonstrare nititur Aristoteles. Datur Terra, quæ crassior; impurior, & gravior Universi pars in illius medio, veluti centrum, collocata sit; quia verò posito uno contrario, poni debet; & aliud, si Terra gravis, & frigida est, poni debet Elementum aliud leve, & calidum, hoc est Ignis; deinde verò, cùm contraria corpora invicem proximè, & immediatè uniri, & coherere non possint, necessarium est, ut inter Ignem, ac Terram, quæ contraria sunt, duo alia corpora reperiantur, quibus veluti vinculis extrema devinciantur, Aqua scilicet Terræ finitima, & similis ob frigiditatem, & Aër Igni similis ob calorem, quemadmodum inter se similia sunt Aër, & Aqua ob humiditatem

5. Hinc Elementa quædam *Symbola*, vel *similia* dicuntur, quòd communem habeant aliquam qualitatem, ut Aqua, & Aër humiditatem &c. *dissymbola*, vel *dissimilia*, quorum qualitates omnes contrariæ sunt, ut in Aquâ, & Igne. Quæ symbola, vel similia sunt, invicem transmutari, vel unum ex alio generari posse arbitrantur Peripatetici, ut Aqua ex Aëre, Aër ex Aqua; secus verò dissymbola, vel dissimilia ex aliis produci non possunt, ut nunquam Ignis ex Aquâ, vel Aër ex Terrâ producat. IV.

IV. Hæc itaque sunt argumenta, quibus vulgarium Elementorum numerus a Peripateticis defendi solet. Quid singulis reponere consueverint illi, qui a Peripateticis dissentiunt, intelligi potest ex iis, quæ de rerum generatione exposita sunt alibi.

1. Diximus enim incertum esse, an illæ quatuor qualitates sint reales, ac positivæ, cum frigus sola privatio caloris, & humiditas privatio siccitatis a compluribus existimetur; quemadmodum etiam plurimæ sunt qualitates, quæ ab illis quatuor non oriuntur, ut lux, motus, gravitas, sed potius illarum causæ videantur, ut motus est causa caloris, quies frigoris &c.

2. Ostendetur etiam inferius, quod illarum qualitatum distributio, vel combinatio, quæ in Elementis supponitur, omnino fortuita, & arbitraria, ipsique experientiæ contraria sit.

3. Quod si corpora quædam in quatuor Elementa resolvuntur; sunt etiam plurima corpora, ex quibus hæc Elementa educi nequeunt; sunt etiam alia corporum, vel partium genera, quæ ex his Elementis, ex. gr. ex Terrâ, & Aquâ vi ignis, Chemicorum operâ, educuntur; vel certè, ut contra Chymicos ipsos urgebamus, suspicari quis poterit, hæc Elementa vi Ignis, vel principii dissolventis interea produci, cum antea non essent, alioquin potius quinque Chemicorum Elementa, quæ omnium postrema educuntur, admitri deberent.

4. Ignis itaque, & Terra fortasse contraria non sunt, vel certè magis Aquæ, quàm Terræ opponitur Ignis. Quod si contraria concedantur, ut uno contrario posito, aliud etiam ad-

admitti debeat, cur inter Aquam, & Aërem, quæ ob levitatem, & gravitatem contraria sunt, Elementum aliud, partim grave, partim leve non ponitur?

5. Quod autem posteriori loco de mutuâ Elementorum conversione dictum est, clariùs explicabitur inferiùs, cùm de vaporibus, & exhalationibus agetur: ostendetur enim, quod hæc mutatio sit solùm sensibilibiter etiam ex dissymbolis, vel contrariis Elementis, ut Aër ab exhalationibus terrestribus; quamvis Aër humidus, & calidus sit, Terrâ verò frigida, & sicca.

V. Celebris itaque Peripateticorum opinio verisimilis est, atque optimè defendi poterit; non ea tamen est, quæ certis rationibus, ut ipsi opinantur, probari, vel invictè confirmari possit. Sed hoc illustriùs, & uberiùs exponere fortasse nunc dedecet, quod hujus loci non videtur; & quantum ad Meteora pertinet, hoc unum veluti certum supponimus, quatuor esse magna corpora sensibilia, ex quibus alia componuntur, quæque ad mixtorum omnium generationem maximè requiruntur, Terram nimirum, Aquam, Aërem, & Ignem. Utrum verò sint simplicia, vel prima corpora, utrum ex atomis, vel ex materiâ primâ, utrum ex Chymicorum principiis coalescant, perinde est; nec ullam inde lucem in sequentes quæstiones manare posse videtur. Quin etiam, ut alibi diximus, clarior, & opportunior explicandi ratio exigit, ut Elementa ipsa tenuissimis, & subtilibus particulis, sive corpusculis composita supponamus, quæ juxta diversas hypothesen, vel prima rerum principia, vel ex Chymicis principi-

cipiis, vel materiâ, & formâ composita cre-
di poterunt.

VI. Interim verò notari plurimùm debet, quod nullum ex Elementis illis, quæ nobis apparent, simplex, vel purum est: sed unum alteri permixtum, tenuissimæque saltem omnium partes in singulis reperiuntur; sic Aqua plurimas Terræ, & Aëris particulas admixtas habet; Aëris quidem, quæ separantur ab illâ, dum in machinâ pneumaticâ purificatur; Terræ verò, propter quas ebullit, fermentatur, sensimque putrescit: quod similiter de ceteris Elementis faciliè demonstratur; præsertim verò de Aëre, vel athmosphærâ, in quâ Elementorum omnium particulæ reperiuntur: unde, cùm Elementa dicuntur esse corpora simplicia, non de Elementis illis intelligi debet, quæ in rerum naturâ videntur; sed de iis fortasse, quorum tenuissimæ etiam partes ab aliorum omnium partibus sejunctæ, secretæ, ac omnino separatæ concipiuntur.

VII. Quamvis autem unius Elementi partes, ut antea diximus, alterius Elementi partibus permixtæ sint; sensibiliter tamen unius Elementi substantia ab alterius substantiâ distinguitur, ut ordinem etiam aliquem inter se habere videantur. Communis est enim Philosophorum omnium opinio, quod si Elementorum omnium conditio, vel gravitas spectetur, infimus locus Terræ, quippe quæ ceteris gravior sit, debetur, deinde sequitur Aqua, quam excipit Aër; ita ut supremus omnium Ignis proximum Lunæ spatium occupaverit. Certè si initio Mundi informis illa materies creata est, quam dixere Chaos, in quâ Elementorum omnium particulæ simul
per-

permixtæ fuerint, deinde verò, vel succussione quadam, ut ait Plato, vel celeri motu, ut Epicurus, & Cartesius, vel alio ejusmodi principio, juxta gravitatis leges ab invicem sejunctæ illæ fuerint; necessarium fuit, ut Terræ partes, utpote graviore, subsederint; deinde Aqua Telluri proxima universam illius superficiem, corticis instar, obduxerit; tum Aëris substantia eodem prorsus modo Aquæ globum complexa fuerit; subtiliores denique Ignis particulæ sursum avolaverint, & Elementaris regionis fines compleverint.

VIII. Veterem hanc opinionem de Elementorum numero, & ordine Recentiores omnes Philosophi communiter amplectuntur; nisi quod, non a Veteribus modò, sed a nostris etiam Peripateticis plurimùm dissident in assignando loco, vel sphærâ Ignis elementaris, quem non in concavo Lunæ, sed in aliâ regione, vel nullâ fortasse determinatâ Mundi parte positum esse arbitrantur.

Quâ quidem in re duo sunt argumenta, quibus hæc opinio Peripateticorum innitur, ipsa nimirum levitas Ignis, & experimenta, quæ in nostro Igne, licet impuriori, observantur. Cùm etenim, inquiunt illi, Ignis Elementorum omnium levissimum sit; ceteris insidere, vel supereminere debet, adeoque supremam elementaris regionis partem occupare; nec aliâ certè de causâ accensæ faces maximâ vi sursum ascendere videntur, nisi quod ingenito quodam impetu ad propriam sphæram ferri conantur.

IX. Innumera tamen sunt, quæ his argumentis a Recentioribus opponi solent, quæ illorum vim, non eludere, sed invictè solve-re videntur.

1. Si

1. Si etenim Ignis in concavo Lunæ perenniter arderet, certè aliquis splendor, vel calor illius sentiretur, & quo altiùs ascenditur, major, & intensior adhuc illius vis perciperetur; cùm tamen media Aëris regio frigidior sit primâ, quam nos incolimus.

2. Deinde quî fieri potest, ut voracissimum Elementum, sinè escâ, vel nutrimento diutius conservetur, cur innatâ vi levitatis ad extrema Mundi latera non avolaverit, cùm neque a solidâ Cœlorum substantiâ, neque a terrestri materiâ, cui adhæreat, contineatur?

3. Quod enim in propriâ regione esse dicatur, adeoque alimento non indigere, manifestissimè falsum est; cùm Ignis, ubicumque sit, proprietates suas, quæ ab illius essentiâ inseparabiles sunt, habere debeat; & fortius adhuc, & nobiliùs illas exercere in loco sibi connaturali, ubi a contrariis causis, & accidentibus liberior est, totamque vim suam, nullo prohibente, exercere potest.

4. Quæ postremò foret utilitas in Igne, si in extremo elementaris regionis angulo poneretur, si neque luce, neque calore terrestria corpora fovere, neque rerum mutationes promovere posset? Inutilis itaque, & otiosus propemodum foret, nisi vel calefacientis radiis Solaribus, vel Cometis, fulminibusque accendendis destinaretur, quæ tamen, quàm meritò dici consueverint, faciliè apparet.

X. Verisimiliùs est itaque nullam esse Ignis regionem, nullum nempe locum, in quem elementaris Ignis substantia nitatur ascendere; sed in singulis Elementis, præfer-

tim

tim in Aëre, & Terrâ elementaris Ignis particulas reperiri. Certè, quod plurima Ignis substantia in Terræ visceribus recondatur, manifestissimè demonstrabitur, ubi de ignivomis Montibus, de Thermis, de subterraneis Ignibus, de Terræmotibus differetur: unde non prorsus immeritò plerique arbitrantur, quod, si aliqua sit Ignis regio; hæc aut in Sole, aut in Terræ visceribus constitui possit. Id unum certò defendi poterit, quod Elementum Ignis, cum qualitates, & accidentia propria, hoc est, lucem, & calorem habere nequeat, nisi terrestri, crassiorique materiæ adhæreat, eamque depascatur; ex naturâ suâ sensibiliter in Aëre, & Terrâ, unâ cum materiâ combustibili reperiatur: cum verò ab ejusmodi materiâ paulatim secernitur, & innatâ vi levitatis sursum avolat; ita in plures particulas secernitur, dividitur, dispergitur, ut sensibiles omnes proprietates, adeoque naturam Ignis amittat, nisi ignitas, & calorificas atomos cum Epicuro comminiscantur, quæ in Aëre conserventur.

XI. Quod si fortasse reponant Peripatetici, tenuissimas illas particulas, quæ ex. gr. ab accensâ candela flammâ celeriter avolent, non esse verè, ac realiter Elementum, & substantiam Ignis; quis apertè non videat illos sibi metipsis adversari, dum Elementum, vel substantiam Ignis, quam in concavo Lunæ collocant, ex particulis illis compositam esse arbitrantur, neque aliâ clariori, & efficaciori ratione sphaeram Ignis in concavo Lunæ repositam esse defendunt, quàm, quia tenuissimæ Ignis particulae ex accensâ flammâ sursum ascendunt? neque enim flamma,
ipfa,

ipsa, quæ luce, calore, & aliquo colore prædita est, sursum avolare, & ad concavum Lunæ pervenire posse dicetur? Quid si nec ipsæ quoque Ignis particulae, ad insignem aliquam altitudinem ascendere posse dicantur, tantumque abesse, ut ad concavum Lunæ perveniant, ut vix ad paucarum ulnarum spatium progrediantur, ut manu, sive Thermometro accensæ candelæ superimposito, manifestissime demonstratur? Quid si particulas Ignis, aut flammam ipsam, non ingenitâ vi levitatis, quâ certè caret, sursum ascendere existimemus, sed solum ab atmosphærâ, sive crassiori Aëris parte, quæ Igne gravior est, sursum propelli, protrudique? Quid denique, si peculiaris aliqua fumi, exhalationum, vaporum &c. regio eodem jure effingatur, cum hæc omnia similiter sursum ascendere videantur?

XII. Quod itaque dicunt Peripatetici, Ignem, Aëre, & Elementis omnibus leviozem esse, adeoque oportere, ut illis superemineat; optimè, & invictè probat, quod si Elementum Ignis in aliquâ separatâ regione, secretum ab omni materiâ combustibili, & omnino simplex, & purum existere posset, supremum locum occuparet; cum tamen, ut antea diximus, & inferiùs etiam dicetur, elementaris Ignis natura sine luce, calore existere nequeat; hæc autem terrestrem aliquam materiam exigant, manifestissime apparet, quod sublimis aliqua Ignis regio inutiliter excogitatur. Quemadmodum igitur ex Elementis aliis nulum simplex, & purum est, nec ullam regionem habet, in quâ a ceteris omnibus secretum reperiatur, sed omnia potius ita per-

mixta sunt, ut Aër, & Aqua in Terrâ, hæc in Aëre, & Aquâ reperiatur; ita quoque Ignis in Terrâ, & Aëre dispersus, divisus, terrestribus corporibus inhærens dici poterit. Et quemadmodum Aqua infra Terræ litora, sive Telluris superficiem depressior est, quamvis ratione gravitatis Tellurem ambire, ipsâque superior esse deberet; ita Ignis ratione levitatis, ceteris insidere deberet, ratione tamen alimenti, quod ex naturâ suâ requirit, in Terrâ, vel Aëre reperitur.

XIII. Neque alia certè fuisse videtur opinio Aristotelis, quamvis illum Interpretes in diversa rapiant. Ille etenim Elementorum omnium locum, & ordinem enumerans, nullam veri, & elementaris Ignis mentionem facit: quin etiam expressè docuit, substantiam illam, quæ Terrâ, Aquâ, Aëre subtilior, & levior est, adeoque illis supereminet, & in concavo Lunæ reperitur, non esse verum Ignem, sed ætherem, puriorem nempe Aëris partem, quæ Igni quidem simillima sit, ob partium tenuitatem, mobilitatem &c. sed Ignis tamen non sit. *In medio igitur, inquit, & circa medium est gravissimum, & frigidissimum segregatum, Terra, & Aqua: circa hac autem, & attigua his Aër, & quod propter consuetudinem vocamus Ignem, non est autem Ignis; excessus enim calidi, & veluti fervor, est Ignis. Quod enim est sursum, & usque ad Lunam, dicimus esse corpus alterum, & ab Igne, & ab Aëre &c.* (a) Quod iterum repetit II. Meteo. c. 2. *Aqua enim, inquit, circa Terram extensa, sicuti circa banc Aeris*
spha-

(a) I. Meteor. c. 4.


sphæra, & circa hanc, qua dicitur Ignis: his enim est omnium ultimus, sive, ut plurimi dicunt, sive, ut nos.

XIV. Reponere quidem solent Peripatetici, Aristotelem his verbis docuisse, quod Ignis ille, qui in concavo Lunæ reperitur, non est Ignis, Igni nostro similis, vorax, terrestri materiæ permixtus; sed purior, ac nobilior quædam Ignis substantia, quæ ob raritatem suam, neque fulgere, neque urere, possit. Sed aut invitum illi Aristotelem suas in partes trahunt, aut certè Aristoteles ipse hac in parte plurimum desipuisset. Cùm etenim singula Elementa, eorumque loca accuratissimè exponere instituisset, cur nullam veri Ignis mentionem fecit, aut cur liberius, & constanter asseruit, illum esse ætherem, non Ignem, si revera esset Ignis? Cùm verò dicit ibi esse corpus, quod *propter consuetudinem vocamus Ignem, non est autem Ignis*, manifestissimè docet, quod ibi est Ignis omnino diversus ab illo Igne, quem nos ibi cogitare, vel collocare consuevimus: quis autem ex Veteribus, aut ex nobis in concavo Lunæ Ignem nostrum, crassiolem, terrestri materiæ defixum, luce, calore præditum, collocare, vel cogitare consuevit? Verus itaque Aristotelis sensus non est, quod in concavo Lunæ reperiatur Ignis purior, defacatior, diversus ab illo crassiori, quem nos ibi cogitamus; cùm revera nullum ibi crassiolem, & lucentem Ignem cogitemus: sed quod ibi reperitur æther, qui, ut antea diximus, propter tenuitatem, mobilitatem partium, Igni simillimus est, quemadmodum etiam radii Solares dicuntur Ignes, sed revera tamen non sunt Ignes.

XV. Id expressius adhuc ostendi potest ex eo, quod Ignis ille in concavo Lunæ repositus fieri dicatur ex Aëre accenso ob motum Cœli : *cum enim fertur primum Elementum (hoc est Cœlum) circulo , & corpora , quæ in ipso sunt , id quod propinquum est , corporis motu disgregatum accenditur , & facit caliditatem . Corpus enim , quod sub eâ circulatione , qua sursum est , reperitur , velut materia quadam existens , & potentiâ calida , & frigida , & sicca , & humida , & quacumque alia has sequuntur passiones , sit talis , & est a motu , & immobilitate , cujus causa , & principium diximus prius . In media &c. videmus itaque motum , qui potest disgregare Aërem , & Ignem , ut & qua feruntur , liquefieri videantur sæpe . In quo obiter notari debet turpissimè labi Aristotelem , dum probare volens Aërem Cœlo finitimum , motu Cœli calefieri , corpora , quæ moventur in Aëre , ut plumbum ipsum jaculis affixum , motu calefieri , & liquefieri solere comminiscitur . Propter hanc igitur causam pertingit ad hunc locum caliditas &c. , & hæc est tota ratio , quâ Ignis in Lunæ concavo , juxta Aristotelem collocetur , quæ certè sententia quantum a veritate , vel a Peripateticorum sententiâ abhorreat , nemo non videt . Sed de Ignis sphaerâ , & Elementorum numero , & ordine plusquam fatis .*

CAP. II.

De Igne, & Aëre.

I.  Unc, explicatâ superiùs Elementorum omnium naturâ, numero, & ordine, de singulis accuratè differamus, eorumque discrimina, & qualitates omnes, meliori quo poterit ordine, ita prosequamur, ut Aërem, & Ignem hoc Capite complexi, Terram, & Aquam in sequentibus exploremus.

De Igne.

II. Quamvis Elementum Ignis, proprietates, & accidentia habere non posse videatur, nisi cum ceteris jungatur, nitrosam nempe, sulphuream, oleosamque materiam depascatur; cùm tamen ad rerum generationem plurimum conferat, atque illius proprietates, calor nimirum, & splendor nobilissimæ sint, ceteris Elementis nobilior, ac præstantius censeripotuit. Principem itaque illi locum tribuimus, ejusque naturam juxta veterum, recentiorumque Philosophorum sententias hîc exponemus.

III. Quæ fuerit Peripateticorum sententia de naturâ, & qualitatibus Ignis superiori Capite dictum est. Diximus enim Peripateticos definire Ignem *Elementum calidum siccum*; Ignis enim *calidissimus est, & causa calidita-*

tis in ceteris (a). Calor tamen, & siccitas non æquali gradu, vel intensiōe dicuntur inesse Igni, sed in Igne magis dominatur caliditas, quàm siccitas, ut Ignis sit calidus magis, quàm ficcus. Utramque verò ex his qualitatibus inesse Igni, sensu duce, manifestissimè apparet, ut nihil proindè clarius, & illustrius ad explicandam Ignis naturam hæc definitio afferre videatur. Maxima verò difficultas est in explicandâ causâ, & origine, cur Ignis sit calidus, & ficcus, & quâ ratione corpora calefacere, & exsiccare ille possit, de quo tamen Peripatetici solliciti esse non consueverunt, satis fore putantes, si hanc innatam esse Ignis qualitatem dixerint.

IV. Epicurus, & qui atomorum doctrinam a Gassendo nuperrimè instauratam sequuntur, existimant, Ignem ex corpusculis tenuissimis, rotundis, maximè mobilibus componi; quæ, cum maximâ, ac infinitâ ferè celeritate jugiter moveantur, & in singulas partes velocissimè abripiantur; non solum obvia corpora pervadere, incidere, agitare, comminuere possunt, sed etiam in nervorum fibrillis, quas celebri vibratione percellunt, lucis, & caloris sensum imprimere valeant; quæ deinde ad animam ipsam, modo opportuniùs alibi explicando, ferantur. Hinc utraque Ignis proprietas splendor, & calor ex unico veluti fonte, nimirum ex celeri, perturbatoque partium motu oriuntur: sicuti radii solares, qui lucidi, & calidi sunt; celerrimo, maximoque motu agitari, innumera ferè experimenta, quæ speculis ustoriis fieri solent; atque

(a) *Arist. II. Met. c. 2, tex. 4. & D. Tb. ibi.*

que ipsa Solis, & siderum scintillatio manifestissime ostendunt.

V. Ab ejusmodi sententiâ non plurimum differre videtur opinio, vel hypothesis Cartesii, qui primum elementum, tenuissimum nempe pulverem rapido, constanti, perennique motu a Deo semel impresso agitari, arbitratur; ubi verò corporum omnium poros pervadens crassiores tertii elementi particulas reperit, celerrimè illas agit, contorquet, impellit: quo motu particulis etiam secundi elementi, quæ rotundæ, ac mobiliiores sunt, communicato, istæ splendorem, & calorem in corporibus, & sensibus nostris excitant. Non omnes tamen, ut accuratiores Cartesiani fatentur, tertii elementi particulae igni excitando, vel generando aptæ videntur, sed illæ solum, quæ nitrosæ, sulphureæ, & oleaginosæ sunt. Compertum est enim, quod non ex omnibus tertii elementi particulis etiam celerrimè agitatæ, splendor, aut calor, aut Ignis excitari potest; sed aliqua determinata substantia requiritur, quæ *combustibilis*, & *inflammabilis* communiter dici solet.

VI. Inter has opinantium, & dissidentium Philosophorum ambages, quid certum sit, quænam Ignis natura, & essentia videatur, facile definiiri non potest. Id unum certò defendi, & innumeris experimentis confirmari posse videtur, quod Igni maxima partium mobilitas inesse debeat, neque splendor, neque calor fieri, vel explicari possit, nisi maxima, & celerrima partium agitatio supponatur. Quia verò causa, & origo, quâ tenuissimæ Ignis particulae agitantur, ferè insensibilis esse videtur; necessarium est, ut ab insensibi-

libus particulis oriatur, quales ætheris particulæ a Philosophis omnibus supponuntur: quia denique non in omni, sed in aliquo solum substantiæ genere, in quo nitrosæ, & particulæ uberiores sunt, facilius Ignis accenditur; hæc etiam partium proprietas ad Ignis generationem requiritur. Sic in pulvere pyrio incredibilis est illa celeritas, quæ illius accensæ partes agitantur, rarefiunt, dissiliunt; incredibilis etiam vis, & impetus, quo illæ circumposita corpora disiciunt, atque comminuunt. Quæ certè vis non aliunde oriri potest, quàm a partium illarum naturâ, ex quibus componitur. Compertum autem est pulverem pyrium ex decem nitri, seu salis petrae partibus, tribus sulphuris, & quinque carbonum componi; quorum quidem sulphur facillimè accenditur, nitrum dilatur, vimque elasticam insignem habet, quam permixtus carbo modificat. Hinc autem pulvis pyrius, si libere in aëre accenditur, nullum strepitum edit. Quodsi ex tribus nitri partibus, duas salis tartari, & una sulphuris componatur; etiam in aëre libero accensus maximum strepitum efficit, unde *fulminans* dici solet; quemadmodum etiam aurum *calcinatum*, hoc est Ignis vi, aquis Stygiis in cinerem resolutum, vel levi motu calorem concipit, accenditur, & fragorem edit, *et ab omni s. ab*

VII. Hinc explicari poterunt omnia phænomena, quæ in accensâ face observantur; dissimilis nempe partium color, inæqualis velocitas, calor, figura, &c. inferior itaque flammæ pars minùs calida, & cærulei coloris est, quod particulæ illæ in quarum celeri motu ignis natura consistit, nondum ab aliis cras-

fioribus, oleaginosi, a quibus obfidebantur, solutæ, liberæ, secretæ fuerint; deinde verò, cum celeriori motu agitantur, ab illis paulatim liberiores factæ emicant; majoremque lucem, & calorem fortiuntur; hinc media flammæ pars candidior, & calidior est; superior verò calidior adhuc esse debet, quia adhuc celeriori, & frequentiori motu, seu vibratione partes ibi impellantur; obscurior tamen est ob fumum, qui in mediâ flammæ parte ab Ignis partibus secernitur. Ubi denique Ignis particulæ a crassioribus, terrestribusque particulis omnino sejunctæ fuerint, splendescere desinunt, & liberius per aërem insensibiles jam factæ avolant; unde calor quidem supra facis accensæ apicem, sed non splendor percipitur. Flammæ figura acuminata videtur, quia Ignis particulæ celeriores factæ celerius avolant, & sursum tendunt, adeoque minus spatium occupare, siue minorem molem efficere debent; quemadmodum amplissimi fluminis aqua, quæ maximum alveum antea occupaverat, in angustum canalem redigi poterit, dummodo celerius moveatur.

Dissimilis autem color, qui in diversis liquorum, oleorum &c. generibus observatur, ut aliquando flamma albicans, nigra, fusca, candida sit; ex diversâ combustibilium partium naturâ desumitur: neque enim, ut alibi demonstrabitur, plantæ omnes, aliaque combustibilia corpora iisdem salibus, oleis, nitrosis, ac sulphureis partibus præditæ sunt.

De Aëre.

VIII. Igni finitimus est Aër, quem Aristoteles definit *Elementum calidum, humidum*; quamvis, ut ingenuè, & accuratè loquamur, neque calidus, neque humidus videatur, sed omnino indifferens ad omnes qualitates recipiendas, ut Aristoteles ipse docet verbis, quæ superiori loco retulimus. Sed eximius ille qualitatum elementarium ordo, & combinatio adeo Aristoteli placuit; ut illum impulerit, ut Aëri calorem, & humiditatem tribueret, quem experimenta frigidum potius, & siccum demonstrant. Certè dum aqua sereno etiam Cælo (ne venti vim causeris) congelatur; incipit concrefcere in exteriori parte, quæ Aëri exponitur; secus verò si in machinâ pneumaticâ glaciès fiat; quemadmodum lintea madida Aëri exposita sicca evadunt, & alia innumera experimenta solent afferri, quibus eadem Aëris frigiditas, sive saltem indifferentia ad frigus, aut calorem demonstretur.

IX. Sed, ut illustriùs hæc omnia intelligi possint, & errores, qui irrepere plerumque solent, omnes vitentur; notari plurimùm debet, quod duplex Aëris genus distinguitur. Alter enim est Aër, qui Telluri nostræ circumfusus, ipsam undique ambit, & *Atmosphæra*, sive *vaporum sphaera*, vel regio vocatur. Alter verò, qui purus, & simplex editiora montium culmina excedit, & *ætheris* etiam nomine intelligi solet. Si inferioris Aëris natura, vel conditio inquiratur; facilè apparet, quod ex halitibus, vaporibus, exhal-

lationibus, fumisque componitur, qui ex ipsâ Terræ, vel Aquæ substantiâ erumpunt, ut in sequenti capite demonstrabitur: ut optimè dixerit Balbus Stoicus apud Ciceronem, *Aërem ex respiratione aquarum oriri; earum enim quasi vapor quidam Aër habendus est* (a); Secus verò purior illa, sublimior Aëris regio, quò terrestres halitus non perveniunt, ab Aquæ naturâ plurimùm differt, adeoque illius natura hîc meritò seorsim inquiritur.

X. Quâ quidem in re Philosophorum omnium consensu, & innumeris experimentis probatur, quòd Aëris elementum ex tenuissimis particulis componitur, quæ celeri, perennique motu agitantur, ut in aëre radiis solaribus per fenestram trajectis illustratoprehenditur. Altera est etiam Aëris proprietas, quæ nulli fortasse ex Elementis convenit, quod nimirum illius particulæ maximam, & infinitam ferè vim elasticam habeant, quâ ad amplius spatium sese diffundant, & liberius expatientur. Addi postremo poterit, Aërem pellucidum esse, quòd a radiis solaribus ita penetretur, & illustretur, ut ultra ipsum conspici possit. Nihil est autem, cur qualitatum ejusmodi originem inquiramus, cum hoc uberrimè præstitum fuerit in Physicâ generali.

XI. Porro universam Aëris molem in tres veluti regiones, seu partes, veteres omnes, ac recentiores etiam Philosophi dividunt. Infima dicitur illa, quæ Telluris superficiei proximè adhæret, quam nos inspiramus, expiramusque, quæ terrestribus, & aqueis vaporibus

(a) De Nat. II.

bus immiscetur, unde Athmosphæra vocatur. Altera est illa, in quâ pluviae, fulmina, ceteraque id genus Meteora, formantur, quæ frigida etiam communiter haberi solet. Omnium denique suprema, vel tertia dicitur illa, quæ ad concavum Lunæ diffunditur, ceteris purior, levior, atque subtilior (a). Hinc universam Aëris extensionem ex Lunæ distantia, quam 60. semidiametrorum terrestrium esse jam diximus, facile coniecere possumus, si eò usque Aëris substantia, quod longè verisimillimum est, extendatur.

XII. De gravioris autem Aëris, vel Athmosphærae altitudine, non veteres modò, sed recentiores etiam Philosophi plurimùm inter se dissident; neque ex montium altitudine quidquam certi constitui potest, cum hac etiam in parte mirè dissentiant; neque inde certa Aëris altitudo desumi possit, ut ostendetur, cum de montibus ipsis agemus. Possidonius certè non minus quadraginta stadiorum a Terræ altitudinem esse putavit, in quâ nubila, & venti, nubesque proveniant; Inde purum, liquidumque, & imperturbata lucis Aerem. Plures autem nubes nongentis stadiis in altitudinem subire prodiderunt. Incomperta hac, & inextricabilia (b). Keplerus humidum Aërem, sive athmosphæram ad 2. tantùm milliaria Italica ascendere arbitratur (c); alii ad 8., alii ad 4., alii denique ad 5. (d), atque inter ceteros Tycho, qui unius milliari Germanici, hoc est quatuor Italicorum altitudinem constituit (e).

XIII.

(a) Vid. Sen. II. c. 10. (b) Plin. II. c. 23. (c) Astr. Opus (d) Ap. Ricciol. Geogr. VI. cap. 21. (e) Hamel. Astron. Phys. II. c. 6.

XIII. Quanta verò sit Aëris universi gravitas in Physica Generali Disp. III. c. 18. demonstravimus, ex quo facile inferri poterit, quanta sit Aëris nostri densitas, quanta sit ætheris, in quo sidera moventur, tenuitas, atque incredibilis ferè subtilitas. Si etenim spatia, in quæ comprimitur Aër, sunt ponderibus comprimentibus reciproce proportionalia, ut innumeris experimentis a D. Mariote (a), aliisque compluribus demonstratur; quàm exiguum spatium occupat Aër, immenso veluti superimposito pondere compressus? quàm liberè expatiabitur, & in immensum ferè diffundetur, si superimposita Aëris moles decreseat?

XIV. Hæc, aliaque innumera apud illustriores Philosophos inveniuntur; qui, ut accuratiùs Aëris densitatem, & leges, quibus illa decrescit, exponerent, Logisticam, sive Logarithmicam figuram usurparunt, cujus ordinatæ variis Aëris densitatibus responderent, ut Hallejus, Varignonius, Stancharius, aliique innumeri demonstrarunt (b); ideoque, licèt infinita foret Aëris hac lege, seu proportionem decrescens extensio, vel altitudo; illius gravitas tamen finita foret, sicuti spatium Logisticum infinitè longum, quo gravitates Aëris exhibentur, finitum, certo nimirum triangulo æquale, demonstratur in Institut. Math. lib. XII.

XV. In quo mirari certè debemus maximam, ac divinam ferè naturæ vim, ac energiam, quæ Aëris densitatem, ac raritatem
nul-

(a) *De nat. aer.* (b) *Vid. Varign. Hist. Acad. 1716, Herman, in Pha. Neut. II. prop. 21. 22.*

nullis ferè limitibus definivit, quamvis exigui, & angusti admodum sint illi, quos ab arte compertos esse didicimus; maxima siquidem Aëris condensatio, quæ arte fieri possit, ut plurima experimenta testantur, Aërem ipsum ad spatium 800. vicibus angustius redigit; interim verò, dum rarefit, ad spatium ferè 14000. vicibus majus extendi expertus est Boyle (a), quemadmodum alii (b) ad spatium 20000. majus Aërem extendi arbitrantur. Quod si densitas, vel gravitas Aëris cum Aquæ densitate, vel gravitate comparetur, juxta diversa experimenta, vel

juxta	{	Borellium	1175.
			692.
		Homberg	832.
			est 1087.
		Hallejum, & ut 1.	800.
		Hugenium ad	
		Hiræum	770.
		Perier	845.
		Cassinum	669.


Maxima denique Aëris condensatio ad maximam illius dilatationem erit juxta Borellium (c) ut 1. ad 2000. ; vel juxta Boyle (d) locus minimus, in quem redigitur compressus Aër, ad locum maximum, ad quem extendi, vel rarefieri potest, ut 1. ad 550000.

CAP.

(a) *Vid. Hist. Acad.* 1703. 1705. (b) *Graves. II. c. 13.*
 (c) *De mot. nat. prop. 120.* (d) *Tom. I. exp. 6, & Traité de mira Aer. raref.*

C A P. III.

De Aquâ, & Terrâ.

I.  I oculis ipsis iudicibus peragenda res foret; nihil purius, nihil simplicius, nihil denique clarius videretur Aquâ, quæ innumera ferè commoda nobis suppeditat, ut non immeritò prorsus Helmontius, & ex Veteribus Thales, alique rerum omnium principium illam esse putaverint, ut ait de Oceano Poeta,
 ——— de quo primùm sunt omnia nata (a).

Oceanumque patrem rerum, Nymphasque sorores (b).

Quamvis tamen Aquæ proprietates, & effectus perspectissimi sint; illius essentia, ex quâ proprietates illæ, veluti ex fonte, dimanant, omnino ferè nos latet; neque ulla nobis argumenta fortasse suppetunt, quibus id aliquando clariùs, & illustriùs assequamur. Locus itaque conjecturis solùm superest, quæ quidem diversæ a diversis Auctoribus afferuntur.

II. Peripatetici, qui de rerum naturis paullo liberiùs pronunciant, Aquæ naturam se explicare posse gloriantur, ubi servatâ superiori methodo dixerint, Aquam esse *Elementum frigidum, humidum*.

Quam-

(a) *Hom. Il. ̡. v. 246.* (b) *Virg. Georg. 4. v. 82.*

Quamvis hæc definitio nihilo clariorem efficiat essentiam Aquæ, neque enim rudiores etiam homines ambigere, vel ignorare unquam possunt, Aquam frigidam, & humidam esse, quod ipso sensuum experimento manifestissimè demonstratur.

III. Utinam verò Recentiores Philosophi melioris aliquid excogitassent! Gassendus, Lucretii, & Epicuri sui vestigiis hærendo, Aquam ex tenuissimis particulis compositam esse arbitratur; quæ, cum rotundæ, & lævissimæ, innumeris interstitiis, sive spatiolis vacuis distinctæ, ac veluti disjunctæ sint; facillimè dilabuntur, effugiunt, & manus motui facillimè obsequuntur. Quemadmodum tritici grana, alabastrum in pulverem, seu farinam comminuta, liquoris instar, fluida fiunt, & facillimè agitantur, & igni admota ebulliunt, quamvis nihil præter partium tenuitatem, ac divisionem recepèrint: ita quoque Aquæ partes fluidæ, & mobiles esse poterunt, dummodo tenuissimæ, nihil inter se implexæ, & rotundæ concipiantur: unde nec inculum assurgere, nec suspensæ hære poterunt, nisi ab aliquâ extrinsecâ vi comprimantur.

IV. Quamvis autem Ignis etiam particulæ rotundæ sint; plurimum tamen Ignis, & Aqua differunt, quodd Ignis particulæ longè subtiliores sint aqueis, & celeriori, vehementiorique motu ferantur; unde solidiorum etiam corporum poros Ignis particulæ, vel spicula pervadunt, quod tamen aqueis non licet. Neque enim ullâ ratione probari posse videtur opinio Galilei, qui particulas Aquæ omnes extensionis expertes existimat; quasi

ni-

nimirum, non in atomos modò, sed etiam in puncta Mathematica prorsus inextensa, & indivisibilia supponerentur, vel in puncta minima resoluta jam forent. Quemadmodum, ut alibi diximus, cum de corporis, sive continui Physici divisione, vel compositione res foret: corpuscula minima, quæ Continuum Physicum componunt, extensionem aliquam, & partes habere debent: ut innumera absurda vitentur, quæ manifestissimè sequerentur, ubi indivisibilia, vel inextensa supponerentur.

V. Non defuere tamen Philosophi, qui particulas Aquæ non rotundas, & læves, sed asperas potius, angulatas, & cubicas esse suspicarentur, quòd, Aqua comprimi, vel in minus spatium redigi non posse videatur, adeoque particulis illis composita sit, quæ ita disponi possunt, ut nullum interstitium, vel inane spatium relinquant. Id autem illos mirè fefellit, quod explicandæ resistantiæ ejusmodi, quam exerunt Aquæ particule, ne comprimantur, cubicam figuram necessariam, esse sunt opinati: cum æqualiter explicari illa possit, si rotunda, sive sphærica figura, solidis Aquæ particulis concedatur. Solida nimirum, & rotunda corpuscula, ubi mutuo contactu inter se arctissimè adhæserint, nullâ ratione comprimi, vel in angustius spatium constringi poterunt.

Quin etiam oppositum sequeretur. Si etenim Aquæ particule cubicæ forent, atque una alteram proximè, & immediate contingeret; ubi Aqua moveretur, quemadmodum sanè perenni illa motu agitur, partes illæ a mutuo contactu necessariò recederent, ordi-

nem, situm mutarent, quod certè fieri non posset, nisi interstitium aliquod, seu vacuum spatium admitteretur, ideoque Aquæ moles augetur.

VI. Quid si postremò particulas Aquæ non adeo elaterii expertes esse dicantur, ut aliquâ ratione comprimi non possint? Certè Verulamius (a) asserit Aquam in Stannæo vase inclusam ictu mallei compressam fuisse, cum ipsa rotunda vasis superficies introrsum cedere, ac decrescere videretur; factoque deinde foramine, Aqua violenter erumperet instar virgæ, quod etiam se expertum esse testatur Boyle, alique complures. Neque reponi poterit auctam fuisse ictu mallei extensionem vasis; tum quia id. facile deprehendi potuisset; tum etiam, quòd auctâ vasis capacitæ, & pristinâ Aquæ extensione superstitæ, Aqua violenter erumpere non potuisset. Sed hæc eo loco, & pretio habeantur, quo cuique placuerit, cum satis explorata non sint, & plurima experimenta soleant afferri, quibus oppositum demonstratur. Interim Aquæ corpuscula cubica non esse dicimus, præsertim, si figura ejusmodi non aliâ de causâ requiratur, nisi, ut Aquæ compressio impediatur.

VII. Cartesius Aquæ particulas teretes, & oblongas esse arbitratur, quæ anguillarum instar, vix inter se cohæreant, sed lubricæ, flexibiles, mobilissimæque sint, ac celerrimè a mutuo contactu, & a corporibus, quibus adhæreant, avellantur. Quæ quidem hypothesis, licèt ingeniosa, & explicandis Aquæ phœ-

(a) *Nov. Org. lib. II. n. 45. Et Stair. Expl. 9. 20.*

phænomenis accommodata videatur, paullo tamen liberius conficta, ipsisque rerum principiis contraria apparet. Prima enim corpuscula, vel rudimenta, quibus Aqua componitur, rigida, solida, inflexibilia esse debent, sicuti concipiuntur atomi inflexibiles. Quod si particulae, quibus speciatim Aqua coalescit, sint molecule quaedam ex pluribus atomis, vel tertii elementi particulis compositae; explicandum adhuc supererit, cur flexibiles sint, cur a mutuo quidem contactu facile separentur, sed aliquam tamen unionem, connexionemque habeant, cur sibi cohæreant, ut ex. gr. guttae ex arborum foliis pendentes in sphaericam figuram conformatae sint; quod sine aliquâ mutuâ partium annexione, & continuitate fieri certè non potest. Atque hæc fortasse ratio complures impulit, ut Aquæ corpuscula ramosa, undequaque aspera, & filamentis similia supponerent, quod certè Stair (a), & Borellius probavit, ut illud etiam explicarent, quomodo Aqua, dum vi frigoris in glaciem concrevit, rarefiat, extendatur; ramosis nimirum Aquæ partibus dilatatis, ac frigoris rigore a mutuo contactu diductis.

VIII. Sed quis dissidentes adeo Philosophorum opiniones in re, quæ alioqui clarissima, & quàm quæ maximè perspicuissima videtur, considerans, mentis humanæ tenuitatem ingenuè, ac liberè non fateatur? Etenim, ut Aquæ fluiditas, & mobilitas salvetur, sphaerica figura illius partibus tribuitur; sed hæc illius cohæsioni repugnat, neque il-

Y 2 lam

(a) Expl. 9.

lam ab igne, & oleo secernit : ut continuïtas illa, & cohæsiō explicetur ; asperæ, ramosæ, & flexibiles concipiuntur, quod tamen fluiditati opponi videtur. Quia denique Aqua vesicâ, aut folle contenta, si violenter comprimatur, illius poros pervadit, quod Aëri non conceditur, Aquæ particulæ, particulis Aëris subtiliores a Borellio defenduntur ; cum tamen major fluiditas, & levitas Aëris oppositum ferè persuadeat, & longè subtiliora esse Aëris, quam Aquæ corpuscula demonstrat. Variis itaque corporum effectibus in varias, & oppositas opiniones abducimur, nobisque rerum natura ferè illudit, & quò liberius hypotheses ad explicandas naturæ vires effingimus, gravius quoque ingenii nostri vires implicamus, & vix non obruimus.

De Terrâ.

IX. Reliquum est, ut aliqua posteriori loco de Elemento Terræ dicamus, quod etsi ceteris impurius, ac ignobilius haberi soleat ; ceteris tamen in componendis corporibus plurimum præstat : ut optimè proinde dixerit Plinius, quod *Terra uni rerum Natura partium, eximia propter merita, cognomen indimus materna venerationis* : ex illâ nimirum educti sumus, illâ pascimur, illâ denique omnia viventium, & plantarum genera foventur, & si Peripateticis credimus, producuntur. Perperam verò, atque inutiliter Terræ Elementum inquireretur in illâ terrestri superficie, quæ a nobis incolitur, oculisque nostris subjicitur ; cum ista non Aquæ solùm, Aëris, & Ignis particulis referta, ac permixta sit ;
sed

sed innumeris ferè , substantiarum generibus coalescat , nitro nimirum , sulphure , ut inferius accuratè ostendemus . Simplex itaque , ac purum Elementum Terræ , vel nusquam reperitur , vel certè intra viscera globi Terra-quei delitescit .

X. Quod ad hujus Elementi particulas pertinet , illud ex tertio Elemento suo compositum esse opinatur Cartesius , corpusculis nempe striatis , invicem implexis , contortisque : quemadmodum ferè Gassendus , & Epicuræi ex ansulis , & hamatis atomis illud coalescere putant .

Atque utriusque quidem opinio , dum primigenia Terræ corpuscula solida , asperæ , & irregularis figuræ supponit , longè verissimilima videri potest ; cùm certè id inertiae , gravitati , soliditati Terræ meritò concedatur ; quæ tamen accuratè figura concipi debeat , vix conjecturâ consequi possumus . Quæcumque tamen illa supponatur , optimè explicari poterit , quomodo Terra Elementum frigidum , & siccum ab Aristotele definiatur ; cùm certè experimentis ipsis , si Terra ab Aëre , Igne , vel Aquâ sejuncta concipiatur , sicca simul , & frigida videatur .



C A P. IV.

*De Exhalationibus, & Vaporibus,
sive de materiâ Meteororum.*

I. ongiùs fortasse, quam par fuerat, in exponendâ Elementorum naturâ digressi fuimus; sed illa accuratè, & quâ meliori poterat, claritate explicanda fuerant, ut cetera faciliùs intelligi possent, quæ ad Meteororum originem pertinent. Pauca sunt igitur illa, quæ de halitibus ex Terræ, vel Aquæ substantiâ erumpentibus dicenda remanent, quæ singula hoc Capite complecti libuit.

II. Duplex halituum genus ab Aristotele, & omnibus Philosophis optimè distingui solet, *Vapor*, & *Exhalatio*, quorum ille ab Aquâ, hæc autem ex Terrâ oriatur; quemadmodum enim ex Aquâ Aëri, Solique expositâ plurimæ partes avolant, quæ in Aëre dissipantur; ita etiam ex Terrâ plurimæ erumpunt, quæ Aërem ipsum pervadunt.

Vaporis igitur nomine nihil aliud intelligitur, nisi congeries plurium particularum. Aquæ, quæ, cum tenuissimæ, maximè disgregatæ, & ab invicem secretæ, sejunctæque fuerint, Aëri permiscentur; illumque crassiorem efficiunt, ut in humido Aëre apparet; unde vapor humidus, & frigidus esse debet. Exhalatio verò, quæ *fumus*, *fuligo*, *nidor* etiam appellatur; est congeries corpusculorum, quæ

quæ ex Terræ, vel terrestrium corporum substantiâ erumpunt, Aëremque permiscent, ut cum ex accensâ face fumus erumpit, qui Aërem aliquando obscuriorem efficit; sed, si amplius dilatatur, rarior, & insensibilis etiam evadit. Hinc exhalatio sicca, & arida dici solet. *Est enim vaporis natura humidum, & calidum; exhalationis autem calidum, & siccum (a).*

III. Quod autem ex Aquæ, vel Terræ substantiâ tenuissimæ partes illæ, vel corpuscula erumpant, & in Aërem evehantur, manifestum adeo, & evidens est; ut inutile, prorsus sit innumera experimenta, quæ rudioribus etiam obvia sunt, hic uberius exponere: cum præsertim ex Meteororum origine, quæ sequenti Capite declarabitur, id invictissimè demonstretur. Itaque id unum, quærendum supererit, quomodo, & quâ de causâ tenues illæ particule contra insitas gravitatis leges a reliquis crassioribus separantur, & sursum ferantur.

IV. Communis est Veterum, & Recentiorum opinio, quod calore Solis, vapores, & exhalationes in sublime ferantur. Cum etenim Sol Tellurem ipsam calefacit, perturbato quodam motu, qui calorem ipsum necessario consequitur, ejusdem Terræ, vel Aquæ partes exagitat, commovet, ac impellit; unde subtiliores a crassioribus, leviores a gravioribus, quibus implexæ fuerant, secernuntur. Quia verò minimæ Aquæ, vel Terræ particule crassioribus Aëris particulis leviores, subtiliores, & mobiliiores sunt; ab his sursum.

(a) *Arist. Meteor. I. c. 4.*

impelli, sustineri, sensimque in sublime ferri debent, donec ad æquilibrium cum Aëris partibus illæ perveniant: tunc enim Aëri velut insidentes, & innatantes quiescent.

V. Id sensibilibiter ferè experiri licet in fumo, qui in Aëre dissipatur. Injectâ siquidem super accensos carbones Thuris, vel ceræ particulâ, hæc Ignis calore in plurimas alias, ac infinitas ferè particulas concisa, subdivisa a circumpositi Aëris gravitate sursum protruditur, sensimque latius diffunditur, ac rarefit, ut omnino insensibilis videatur. Quod si in Machinâ pneumaticâ Ignis, aut certè fumus producat; hic, non sursum avolare, sed deorsum eruere conspicitur, quodd tunc ab Aëre sustineri, vel expelli non possit.

VI. Adejusmodi etiam motum, quo tenuissimæ vaporum, vel exhalationum particulæ specificè graviores Aëre æqualibus particulis Aëris sublevantur, plurimùm confert continuïtas illa, vel unio, quâ vapores illi, & exhalationes Aëris corpusculis adhærent, & arctè cum illis implexæ divinciuntur: inde etenim oritur, quod si partes ipsæ Aëris, quæ supra Telluris superficiem reperiuntur, calefiunt, & rarefiunt; ab aliis Aëreis frigidioribus, & gravioribus expelluntur, & ipsas quoque vaporum, & exhalationum particulas sibi arctissimè implexas secum abripere, & in sublime ferre debent: eo prorsus modo, quo Borellius observavit, non solum ignem in camino ardentem a circumposito Aëre sursum extrudi, sed ipsum quoque Aërem, qui cum igni proximior sit, continuè calidior, & rarior efficitur; a remotiori Aëre, frigidiori, graviorique propellitur; unde strepitus

tus ille oritur, qui ascendente flammâ percipitur.

VII. Accuratiores tamen, & illustriores Philosophi (a), non modò Solis calorem, sed ipsum quoque calorem, quem in Terræ visceribus copiosum esse ait Aristoteles, & nos alibi manifestissimè demonstrabimus, vaporibus, & exhalationibus efferendis requirunt: neque etenim fieri posse videtur, ut Solis calor, qui vix aliquos Terræ palmos pervadit, externumque solùm illius veluti corticem penetrat, tantam vim exerat, quâ non terrestres modò, sed salinas etiam, nitrosas, sulphureas exhalationes ex ipsis ferè fodinis, ac profundioribus Terræ visceribus educat; sicuti Metallarii testantur, halitus infra 500. hexipedas erumpere, quod tamen facillimè præstari posse concipitur ab Igne, vel calore, qui in iisdem Terræ fodinis existit: præsertim cum ad secernendas Terræ, vel Aquæ particulas, non Ignis *actualiter* accensus requiratur, sed Ignis, vel calor ille sufficiat, qui *virtualis*, vel *potentialis* vocatur, qualis in Calce Aquâ effusâ excitatur, & fumum producit; quemadmodum innato viscerum, & sanguinis calore corporis nostri pori dilatantur, per quos sudoris, cibi, humorum particulae per insensibilem transpirationem jugiter erumpunt; hinc ubi major, & uberior est Ignis, vel caloris subterranei vis, & copia, major etiam exhalationum, & vaporum copia reperitur, ut suis in locis opportunè ostendetur.

VIII. Quo quidem in loco notari debet, quod plurima sint exhalationum genera, ac
toti-

(a) *Meteor. I. c. 4. & 9. & II. c. 4.*

totidem. ferè quot sunt ea corpora, quæ in Telluris superficie, vel visceribus continentur. Nullum est enim corpus, quod halitus suos, sive subtiliora corpuscula non emittat, suamque veluti atmosphæram circumpositam non habeat. Quid enim aliud, ut Recentiores omnes existimant, diversi diversorum corporum odores, sapores, & agendi vires ostendunt? Quomodo Magnes allicit ferrum, Torpedo piscatoris manum stupefacit, diffunditur veneni vis, nisi per corpuscula, quæ ab uno corpore ad aliud transferuntur? Exhalationes itaque aliæ sulphuræ, aliæ nitrosæ, aliæ terrestres erunt, quodd. partim ex sulphure, nitro, partim ex Terrâ emittantur.

IX. Quamvis autem corporum particulae, quæ exhalationem componunt, tenuissimæ, ac ferè indivisibiles sint; propriam tamen naturam, ejusque corporis vim, ac proprietates conservant, ac mirè retinent, ex quo exierunt: unde quæ ex sulphure prodierunt, sulphuræ sunt, sulphureum etiam odorem præferentes; quæ ex nitro nitrosæ; quemadmodum quæ ex infectis, venenatisque locis erumpunt, venenatæ similiter, & mortiferæ sunt: ut in agro Puteolano lacus quidam halitus emittit sulphureos avibus ipsis perniciosos, quod in Averno etiam lacu contingit. Atque hinc intelligi faciliè poterit, quod exhalationes aliæ sunt aridæ, & flammæ veluti resistentes; aliæ faciliè combustibiles, & inflammabiles, ut nitrosæ; aliæ acres, ut Salis; aliæ pinguiore, & oleaginosæ, ut bituminis. Quod æquali jure de vaporibus ipsis ex Mari, vel ex fluminibus evectis dici potest.

Incredibile est ergo, quàm dissimilium cor-

pu-

pusculorum copiâ inferior hic Aër Telluri circumfusus, quem inspiramus, expiramusque, refertus esse debeat: & incredibile est etiam, quàm gravis corporibus nostris pernicies impenderet; nisi celeri, perennique ventorum, radiorumque Solarium motu agitatûs Aër particulas illas uniri, & concreſcere non ſineret. Facile ſiquidem, quæ cervicibus nostris imminere, non ſine maximo timore, ſuſpicimus; Fulmina, Tonitrua noſtros ante oculos fieri intueremur. Maximâ verò, & admirabili optimi Artificis operâ, & conſilio factum eſt, ut vaporum, & exhalationum, particulæ tandiu raræ, diſgregatæ, Aëre leviores conſerventur, quandiù ad mediam, vel frigidiorem ipſius regionem pervenirent. Ideo verò inferior iſta Aëris regio mediâ, vel ſecundâ calidior ſupponitur; vel quòd in illâ Solares radii reflectantur, adeoque duplicem ſerè vim exerant; vel quia ab exhalationibus terreſtribus, & ignibus ipſis, qui in Terrâ accenduntur, calorem aliquem fortaſſe concipiat. Quid autem vapores illi, & exhalationes efficiant, ubi ad mediam Aëris regionem pervenerint, ſequenti Capite demonſtrabitur.



C A P. V.

De Meteoris Igneis.

I.  Tsi communis sit omnium Meteororum, quæ Ignea, vel Ignita dicuntur, materies, terrestres illæ nimirum exhalationes, quæ ex nitrosis, sulphureis, combustibilibusque corporibus erumpentes, Solisque calore, modo superius explicato, in mediam Aëris regionem evehæ, ibique condensatæ accenduntur; plurima tamen illorum genera numerari solent, quæ nos hîc breviter ordine complectemur.

Fulgur, Tonitru, & Fulmen.

II. Si terrestres illæ exhalationes in mediam Aëris regionem evehæ, aut frigoris circumpositi, aut venti impellentis viribus condensentur, atque concrecant, particulis etiam aqueis, sive vaporibus, hoc est ab aliquâ nube obsideantur, & quodammodo coerceantur; tumultuario quodam, perturbatoque motu agitari, simulque contorqueri incipient: ex quo motu lenis primùm, tum intensior, ac vehemens deinde calor oriri debet, ac postremò, cùm maximus calor evaserit, ignem illæ concipient. Frequenter id vespere æstatis tempore fieri conspiciamus; ubi exhalationes diurno Solis calore in aërem jam sublata, tenui nocturni frigoris vi condensantur, nulloque edito fragore accenduntur. Quod si nitrosæ, sulphuræ exhalationes intra nubis cavitatem motum, calorem, ignemque conce-

pe-

perint, maximâ, & infinitâ ferè vi rarefiunt, ac dilatantur, & circumpositam, seu circumobfistentem nubem scindunt. Ignis ille, qui, discissâ, & apertâ nube, conspicitur, oculosque nostros repentè ferit, Fulgur, sive Fulgetra vocatur; vehemens illa aëris commotio, vel sonus, qui a discissâ, disjectâque nube creatur, sensimque in aëre ad nos usque diffunditur, dicitur Tonitru; quod si crassior, gravior, & compressior sit illa materies, in quâ Fulgur accenditur, & ex circumpositâ nube solutâ deorsum ruat, flammamque secum rapiat, donec altiora montium culmina, vel ipsam quoque Telluris superficiem feriat, tunc Fulmen appellatur: ut optimè dixerit Seneca, *Fulgur esse ignem latè explicitum; Fulmen verò ignem coactum, & impetu jactum; & Fulgur esse flammam, qua futura erat Fulmen, si plus virium habuisset* (a).

III. Hæc autem omnia, quamvis ipsa per se clarissima sint, familiari tamen, notissimoque pulveris pyrii exemplo illustrari maximè poterunt. Si etenim pulvis ille pyrius, quem sulphure, nitro, &c. componi diximus, Terræ cuniculo, sive in bombâ inclusus, celeri, perturbatoque motu agitetur, ut admoto igne fieri solet; protinus incalescit, tandemque flammam concipit, & vehementer adeo dilatatur, ac rarefit; ut incredibili, ac infinitâ ferè vi circumposita corpora disrumpat, latera Terræ commoveat, ejusque partes, quibus angusto veluti carcere, coercebatur, violenter ejaculetur. Cùm itaque bomba, sclopetum, cuniculus ille, quo ignis continebatur, diss-

(a) II. c. 16.

diffiluit, Fulgur quodammodo creari dixeris; cum vehemens aëris commotio, vel fragor aures percellit, Tonitru; cum denique inconstipatori nitri, vel sulphuris materiâ ignis adhæserit, quæ concepto semel impetu aliquo feratur, Fulmen ipsum fieri suspicaberis.

IV. Quemadmodum verò, si plures ejusmodi cuniculi, vel tormenta bellica, sive sclopeti ordine dispositi sint, ut aliquo tamen veluti tramite, sive sulphureæ materiæ ductu jungantur; ubi unus accenditur, & strepitum edit, flamma paullatim ex illo ad aliud diffunditur, & communicatur, sicque repetita Fulgura, Tonitrua sentiuntur: ita prorsus, si plures veluti exhalationum glomeres in Aëre reperiantur; ubi unus accenditur, & Fulgur, Tonitru, ac Fulmen edit; eadem flamma alteri vicino glomeri communicata, novum Fulgur, Tonitru, & aliquando Fulmen excitat, unde pluries interjecto aliquo brevi, vel longiori tempore tonare, fulgurare, & fulminare conspicitur.

V. Quamvis autem ex hæcenus explicatâ Fulguris origine, manifestum sit antea scindi nubem, & neri Tonitru, quàm ignis in illâ inclusus appareat, & Fulgur conspiciatur; attamen prius a nobis Fulgur conspicitur, quàm audiatur Tonitru; quia flammæ quidem splendor, sive lux, in instanti ferè ad oculos nostros pervenit; aëris verò commotio, vel sonus lentè admodum, & tardiùs aliquando, quàm Fulmen ipsum propagatur, adeoque nonnisi post aliquod temporis spatium percipitur. Hinc, ut optimè dicebat Seneca: *nemo unquam timuit Fulmen, nisi qui effugit: antequam enim Fulminis concepti fragor, &*
in.

indiciū, hoc est Tonitru, ad aures nostras perveniat; jam in Terras Fulmen pervenit, easque strages edidit, quæ maximo Fulminis impetu caussari solent, ut mox dicemus.

VI. Antequam tamen admirabiles Fulminis effectus exponamus; explicanda nobis videtur opinio Cartesii de Fulguris origine, & si quæ fuerint aliæ Philosophorum sententiæ, quæ a superiori fortasse dissideant: neque enim, ut meritò Epicurus dicere consueverat, unicus est modus, quo rerum Natura effectus suos producit; unde *qui unicum, & singularem explicandi modum perditè depereunt; & apparentibus subinde repugnant, & ab eo, quod homini contemplari fas est, aberrant (a).*

Cartesius itaque existimat, quod cùm aliqua nubes superior repentè in aquas soluta, & gravior effecta in inferiorem incidit, ita ut tamen superioris incidentis latera, vel extremæ partes prius subjectæ nubis superficiem contingant, quàm illius pars media, ac si nubes superior excavata foret; tunc aër unâ cum nitrosis, sulphureis particulis, quibus componitur, inter utramque nubem interpositus, vehementerque compressus maximam vim elasticam exerit, quâ subjectam nubem, vel in inferiori parte, vel ad latera disrumpit, celerique motu violenter exilit, atque aërem commovens Tonitru fragorem excitat. Quemadmodum ferè, si viride arboris folium circulo ex sinistrae manûs pollice, & indice in se curvatis superextendatur, & dexterâ volâ paullisper excavatâ feriat, folium ipsum in inferiori parte disrumpitur, & non mediocrem strepitum edit.

Quia

(a) *Epic. epist. ad Pytho.*

Quia verò sulphuræ, nitrosæque particulae a primo Elemento celerrimè torquentur, & abripiuntur, dum oculos nostros percellunt; lucis imaginem, vel sensum excitant, ac imprimunt, unde Fulgur conspicitur. Quod si crassiores etiam, compactæque exhalationes simul concreverint, eoque motu ignem conceperint; hæ deorsum ruere, obvia corpora dissicere, ac Fulmen ipsum efficere solent.

Hinc plurima explicari facile possunt, quæ circa Fulminum originem observantur. Quò gravior enim fragor percipitur, eò proximior est nubes, quæ disrupta Fulgur, & Fulmen emittit, unde gravius periculum. Si nubes illa ad excelsum aliquod turris, vel rupis latus inciderit; ibi disrumpitur, ac Fulmini viam aperit: unde editiora loca offendunt, *feriuntque summos Fulmina montes*. Si dum nubes ipsa concrevit, densior, gignendoque Fulmini aptior efficitur, campanæ pulsantur; istæ aërem commovent, & nubem ipsam attenuant, ut facile dissolvatur: si tamen illæ pulsantur, dum nubes ipsa concreta est, & campanariæ turri jam imminet; disrumpitur illa in inferiori parte, indeque Fulmen emittit, quod ipsi turri stragem, ac perniciem sæpius affert.

VII. Cartesio præluxisse videtur Democritus, qui Fulgur esse putavit *collisionem nubium, quâ corpuseula ignis effectricia, variisque affrictionibus apparent* (a); quemadmodum Stoici *collisionem nubium esse Tonitru* (b) docuerunt, & Fulgur *inflammationem ex affrictione* (c); & Plinius asseruit, *posse & attritum*

(a) *Ap. Stob. Ecl. Phys.* (b) *Plut. III. c. 3.* (c) *Plin. II. c. 43.*

dum in praeceptis feratur, illum, quisquis est, spiritum accendi posse, & conflictu nubium elidi, ut duorum lapidum scintillantibus fulgetris (a).

Neque ab illâ plurimum abhorret Epicuri, Leucippi, Anaximandri, Anaximenis, & Metrodori sententia (b), qui Tonitru fieri arbitrantur ex aëris intra nubes circuitu, sive volutatione: cum enim spiritum intra se claudere nubes, in concavis partibus earum volutatus aër similem edit mugitibus sonum, raucum, æqualem, & continuum, quemadmodum etiam cavernis inclusus, & agitatus aër mugire dicitur,

*Venti indignantes magno cum murmure montis
Circum claustra fremunt (c).*

VIII. Quaecunque tamen Fulminis natura, & origo juxta memoratas veterum, & recentiorum hypotheses verisimilior appareat, admirabiles certè videntur esse effectus illi, qui ab ipso fieri plerumque solent. Incredibile est enim, quâ vi solidiora quoque corpora disrumpere, incendere, homines afflatu ipso aliquando interimere consueverit: quodque longè admirabilius est, ubi per fenestram in superiorem ex. gr. domus partem inciderit, ibique stragem ediderit; obliquo, & fortuito quodam impetu ex illius angulo per scalam erumpit, subjectam aedificii partem ingreditur, quædam corpora repentè, ac violenter incendit, ac disiecit, alia tantummodo obscurat, ab aliis veluti religiosè abstinet, ac demum extinguatur. Quæ certè non aliâ ratione explicari posse videntur, quàm si plures illi materiae

Tom. IV.

Z

com-

(a) Plin. II. c. 43. (b) Ap. Stob. Plur. Gen. loc. cit.
(c) Virg. Æn. I. ver. 59.

combustibilis veluti glomeres in Fulmine supponantur, qui successivè accendantur; & quò liberior est aditus, aut quâ ignis vis impulerit, perturbato motu ferantur; quod in projectis ignibus ex pulvere pyrio arte efformatis exprimitur.

IX. Atque, ut illustrior adhuc, & accuratior hæc pulveris pyrii, tormentique bellici cum Fulmine comparatio videretur, vulgaris est plurium opinio, quod unâ cum Fulmine ignitus lapis, quemadmodum ferè cum pyrio pulvere ferreus, aut plumbeus globus, emittatur. Plures ex his lapidibus enumerat Cardanus (a) adiciens anno 1510. in agrum Abduæ vicinum mille, & ducentos circiter ingenti strepitu cecidisse, ferrugineo colore, odore sulphureo, maximâque duritiâ, & ex his unum centum viginti libras, alium sexaginta pependisse. Neque fortasse minor, aut abfimilis videtur esse lapis, quem in Egos insulam decidisse ferunt Anaxagoræ ætate, qui & illius casum prædixisse fertur, & siderum substantiam ignito lapidi similem existimasse (b) *Decidit autem cum flammâ pariter circumrotatâ, trajectionibusque emissis micante, & postquam incola pavore sedato, ad casûs locum accurrerunt, repertum quidem lapidem, at longè minorem eâ specie flammâ, quam per ærem observaverant* (c).

X. Sed ex ipsâ ne Aëris regione, inquires, unâ cum Fulmine lapides illi descendunt? Ita prorsus fieri solere plerique existimant: suspicantur enim intra nubium cavitatem crassiores

(a) *De Variet. cap. 72.* (b) *Laët. II. seg. 10.*
(c) *Plutar. in Lys. & Plin. II. c. 28.*

res etiam, & impurioreſ aliquando terreſtres exhalationeſ reperiri, quæ arctiùſ inter ſe conjunctæ, concretæ, ſeſeque mutuò comple- xæ ſoliditatem acquirere, & in lapidem con- verti poſſint; adeoque, ubi ex nube Ful- men erumpit, lapidem illum ſecum abripiat, eoque ſtrageſ, & perniciem afferat. Cùm ve- teres tamen Philoſophi nihil de fulmineo la- pide dixerint, nec Ariſtoteleſ ipſe, qui re- rum illarum naturam, originem &c. uberrimè pertractavit, uſquam memoret fieri, aut de- labi cum Fulmine lapidem, omniumque pri- muſ Avicennæ lapidem unâ cum Fulmine (non ſecus, ac lanam, & vitulum cum pluviâ) de- ciſiſſe prodiderit; longè verſimiliùſ exiſti- mari debet, aliunde lapideſ illoſ oriri, ac delabi: cùm prætereâ vix, ac ne vix quidem in tantâ magnitudine, gravitate, & durtie in nubium viſceribuſ efformari poſſe videantur.

Cùm itaque Fulmen celerimè agitarum in aëre furit, ac debacchatur; facile ex turriſ, alteriuſve editioriſ loci faſtigio, aut ex mon- te lapidem avellere, contorquere, ſecumque abripere poterit, qui in Terram unâ cum Ful- mine illiſuſ ex aëre, vel nube prodiiſſe exiſti- metur. Fieri quoque potuit, ut lapideſ illi, qui *Fulminei* dicuntur, non revera cum Ful- mine deciderint, ſed cùm in iſſ lociſ antea exiſterent, in quæ Fulmen ipſum repente de- cidit, a Fulminiſ flammâ inſuſcati, ſulphureo odore tincti fuerint. Utrumque certè pluribuſ experimentiſ probari, & illuſtrari poſſe de- monſtrant accuratiores Philoſophi, a quibuſ lapideſ illi, qui *Fulminei* dici, & haberi ſo- lent, diligenter obſervati ſunt.

XI. Quid verò de aliſ Fulminum porten-

tis credi par est, quæ fusæ a Plinio, & Senecâ memorantur? *Dolia* nimirum ab illo exhauriuntur, intactis operimentis, nulloque alio vestigio relicto; aurum, & as, & argentum, liquatur intus, sacculis ipsis nullo modo am-
bustis, ac ne confuso quidem signo cera; quin etiam *Martia* princeps Romanorum ista gravi-
da, partu exanimato, ipsa vitra ullum aliud incommodum vixit (a)? Certè si ejusmodi por-
tenta olim contigisse credantur (rariùs enim hisce temporibus observantur) dici fortasse poterit hæc oriri ex partium illarum tenuitate, quæ cujusque corporis etiam solidioris poros pervadere possit: cùmque sulphuris, & nitri corpuscula non eadem vi omnia corpora aequaliter lædere consueverint, ut ignis ipse bitumini facilè adhæret, illudque incendit, vix Salamandram, &c. suspicari fortasse possumus eâ de causâ intacto dolio consumi, vel exiccari vi-
rium, &c. quod si dolium ipsum consumitur, vinumque incolume adhuc supersit; necessarium est, ut interior dolii superficies, & cras-
sior illa vini pars, quæ dolium intrinsecus ambit, Fulminis calore exiccata, & indurata dolii vices subierit. Incolumis verò *Martia* Fulmine tacta esse potuit, quia nonnumquam Fulmen hominem ferit, cùm ferè elanguerit, viresque prorsus amiserit; unde nullam, aut levem noxam illi infert: fætus autem interi-
mi potuit, tum quia tenerior erat, & gra-
viùs Fulminis vim pati debuit, tum etiam quia terror ipse matris in causâ esse potuit, ut etiam sine Fulmine fætus occideretur.

In-

(a) *Plin. II. cap. 51. Sen. II. c. 31. Boyle de efflu-
effluviis, c. 15.*

Incolumis etiam fuisse dicitur ille, qui dormiens Fulmine est ictus (a), quemadmodum etiam innoxie Fulmine ferri dicuntur Aquila, vitulus marinus, laurus, hyacinthus lapis, &c. sed aut fabulam hæc sapiunt, cum tactam Fulmine laurum referat Vico-Mercatus (b), aut certe fortuito contigerunt. Neque enim inter ejusmodi corpora, & Fulmen ipsum aliqua cognatio, vel societas reperitur, quod ab illo violari non possit; nisi fortasse dicatur, quod unam potius, quam aliam combustibilem substantiam, & halitus ex una potius, quam alio corpore erumpentes Fulminis flamma depascatur. Potuit itaque aliquando contingere, ut Fulmen cum, extincto fere illius impetu, elanguere debuit, in laurum, hyacinthum fortasse inciderit, adeoque innoxia illa fuerint; unde a superstitiosis hominibus vulgatum deinde sit, lauros, &c. Fulmini obnoxias non esse,

XII. Et incredibile est certe quanta veterum Ethnicorum animis religio infederit, in inquirendis, explicandisque Fulminum, Fulgurum etiam, & Tonitruum causis, & præsignificationibus. Hæc etenim Deorum immortalium consilio aliquid humano generi felix, aut adversum portendere credebantur. Cumque Cælum in 16. partes divisissent, pro ut ex his, aut illis Cœli partibus Tonitru, vel Fulgur emittebatur, bonum, aut malum omen ostendi opinabantur. Sic apud Virgilium

— subitoque fragore

Z 3

— in-

(a) *Plut. Symp. IV. ques. 2.* (b) *Ap. Conimbr. vid. Scalig. Exerc. 13.*

intönuit levum (a).
*Aspicit hæc, an Te, Genitor, cum Fulmina
 torques;*
*Nequicquam horremus, cæcique in nubibus ignes
 Terrificant animos; & inania murmura mi-*
seent (b)?

Hoc itaque inter nos, & Tuscor, quibus sum-
 ma persequendorum Fulminum est scientia, in-
 terest; nos putamus, quod nubes collisa sint,
 ideo Fulmina emitti; Tuscæ existimant nubes
 collidi, ut Fulmina mittantur. Nam, cum om-
 nia ad Deum referant, in eâ sunt opinione, tan-
 quam, non quia facta sunt, significant, sed
 quia significatura sunt, fieri (c).

Quid autem ignaros, & superstitiosos ho-
 mines, ut impius alioqui, Divumque contem-
 ptor Epicurus ait, impulerit, ut Fulmina ab
 Jove mitti putarent, egregie docet Cicero,
 qui errorem etiam illum exagitabat. Nonne,
 inquit, perspicuum est ex primâ admiratione
 hominum, quod Tonitrua, illiusque Fulminum
 extimuisse, credidisse ea efficere rerum omnium
 præpotentem Jovem? Sed quod vi Natura, nul-
 lâ constantiâ, nullo rato tempore videmus effi-
 ci; ex eo significationem consequentium rerum qua-
 rimus: scilicet, si ista Juppiter significaret, cur
 tam multa frustra Fulmina emitteret? Quid
 enim proficit, cum in medium mare Fulmen ja-
 cit? quid cum in altissimos montes, quod ple-
 rumque sit? quid cum in desertas solitudines?
 quid cum in earum gentium oras, in quibus
 hæc ne observantur quidem (d)?

XIII.

(a) *Æneid. II. ver. 492.* (b) *Æneid. IV. ver. 208.*
 (c) *Sen. 2. t. 32. vid. Empyr. adv. Math.* (d) *Cic. II. Divin.*

XIII. Quamdoquidem verò Cicero docet Fulmina nullo rato tempore fieri; notandum est, quod, etsi frequentius æstate, quam hyeme fulminet, & Cœlo nubibus, atraque caligine obducto; in *Catilinianis* tamen prodigiis, Pompejano ex Municipio M. Hortensius Decurio serenò die Fulmine ictus est (a); quemadmodum dixit Horatius

— — — — — diespiter

Plerumque per purum tonantes

Egit equos, volueremque currum (b).

atque eleganter etiam Lucanus

Emicuit, rupitque diem, populosque paventes

Territat obliquâ perstringens lumina flammâ (c).

— — — — —

Stella cadentes, Ignes Lambentes,

Dracones, Caprea &c.

— — — — —

XIV. Explicatâ jam Fulminis naturâ, & origine, intelligi faciliè poterunt illa, quæ de reliquis igneis Meteoris dicenda nobis supersunt. Ejusmodi sunt stellæ, quæ dicuntur *cadentes*, quæ nimirum aëre sereno, nocte in-
eunte, præsertim in æstate, & autumnò, Cœlo delabi obliquè videntur, ut inquit Poeta

Sape etiam, stellas vento impendente videbis

Præcipiter Cœlo lapsi, noctisque per umbram

Flammæ longos a tergo albescere tra-

ctus &c. (d)

Gassendus tamen stellam perpendiculariter cadentem interdum observavit; sicuti Germanico Casare gladiatorum spectaculum edente, fassem præter ora populi meridiano transcurrisse

(a) Plin. II. c. 51. (b) l. I. Ode 34. (c) Lucan. I. v. 153.
(d) Virg. Georg. I. ver. 365. vid. Ovid. Meta. II. 321.

testatur Plinius (a); & aliæ ab ortu in occasum ferri visæ sunt. Cum itaque tenuis, sulphureus, & viscosus halitus in aëre libero agitur, incalcescit, & accenditur, tum deorsum ruit; sive quoddam ibi concreverit, graviorque evaserit; sive quia alimentum veluti quærens, sensim halitum ex inferiori in superiorem partem ascendentem depascitur.

XV. Quod si halitus, ille, vel exhalatio, mucronis instar, acuitur *Pyramis*; si teres, & oblonga sit, *Columna*, sive *Cylindrus*; si latiori fastigio scintillet, *Fax*; si rotunda sit, *Clypeus*; si in transversum extendatur, *Trabs*; si distinctæ veluti virgæ accensæ appareant, *stipula ardent*; si in mediâ sui parte ferè intumescat, *Draco*; si denique laxiores ignes veluti capillitium, circa accensum aliquem globum luxurientur, *Capra saltantes* dicuntur; & si quæ fuerint alia nomina, quibus hæc Meteora a Plinio, Apulejo, Senecâ, Varenio, pluribusque aliis insignita sunt, ex diversâ solum partium dispositione, fortuitaque accensæ flammæ figurâ pendere solent, cum quâ etiam levis aliquis fragor conjungi potest. Hinc intelligi, & explicari debent ignium portenta à Plinio, aliisque compluribus memorata (b), Armorum nempe crepitus, & tubarum sonitus auditos e Cœlo, itemque spectata arma cœlestia ab ortu, occasuque inter se concurrentia, pulsus, quæ ab occasu erant; nisi fortasse fabulosa censerî illa debeant.

XVI. Huc etiam revocari debent *lambentes ignes*, qui circa hominum caput, aut aliâ corpora visi sunt. Celebris est ille, qui circa
Ser-

(a) II. c. 26. (b) Vid. *Johnson de adm. Meteor. c. 12.*

Servii Tulli caput apparuit, eique regnum, portendere creditus est (a). Visus est etiam circa Scipionis Africani ad populum, & Martii Romani militis ad socios perorantis caput (b), quod antea Ascanio contigisse refert Poëta:

: *Ecce levis summo de vertice visus Julj*
 : *Fundere lumen apex, tactuque innoxia molli*
 : *Lambere flamma comas, & circum tempora*
 : *pasci (c)*

Memorat etiam Seneca Gylippo Syracusas petenti visam fuisse stellam super lanceam consistere (d), & Plinius vidisse se narrat, nocturnis militum vigiliis inharere pilis pro villo fulgorem. Plurimi denique, & frequentiores Ignes circa equorum capita, in cæmeteriis, in patibulis, ac universè in locis, unde pinguiusculæ exhalationes erumpere, & accendi possunt, oriri solent; unde Fluddus, qui se unum ex illis ignibus assequutum esse ait, viscosam, & crassiusculam materiam seprehendisse testatur (e).

XVII. Eadem est Ignium illorum causa, & origo, qui circa navigia videntur; & si quidem unus appareat, *Helena*; si duo *Castor*, & *Pollux*, vel *DioscURI*, vel, ut ait Poëta, *Fratres Helena*, *lucida sidera (f)* vocantur: oriuntur enim cum pinguiorès halitus exagitato jam mari, & ex navibus ipsis pice, ac bitumine illitis erumpentes accenduntur; quamvis Metrodorus existimet *Dioscuros*, non veros ignes esse, sed micantes ex oculis fulgebras

(a) Liv. lib. I. (b) Id. lib. 25. (c) *Æneid.* II. ver. 692.
 (d) Lib. I. c. 1. & 14. (e) Vid. Gassend. (f) Horat.
 lib. I. ode 3.

tras, cùm nauta pavidì, perculsiq̃ue cernunt (a). atq̃ue Xenophanes, nubeculas eos esse ad motum nescio quem praterfluentes. Hinc etiam caussa melioris spei esse solent, quod jam appareat frangi tempestatem, & desinere ventos (b), quibus furentibus, ac æstuante mari, ignes accendi, fursumque liberè avolare non possent: unde vana videtur esse illorum opinio, qui unicam flammam infausam, duplicem faustam esse putarunt, ut apud Plinium, cùm solitaria flamma venere, graves sunt, mergentesq̃ue navigia, & si in carina ima deciderint, exurentes; gènsina autem salutare, & prosperà cursûs prævincia, quarum adventu fugari diram illam, ac minantem, appellatamq̃ue Helenam ferunt, & ob id Polluci, & Castori id numen assignant, eosq̃ue in mari Deos invocant (c).

Nonnumquam tamen tres, & quatuor, aut etiam quinque simul apparent; nostrisque temporibus a nautis religiosè observantur, quos etiam ignes *S. Telmi*, *S. Ermi*, vel melius *S. Erasmi* vocare consueverunt.




CAP.

(a) *Plut. II. c. 18.* (b) *Sen.* (c) *Plin. 2. c. 37.*

CAP. VI.

De Meteoris Aqueis.

I.  Uemadmodum ex terrestribus illis exhalationibus, quæ a calore Solis ad mediam Aëris regionem evectæ accenduntur, Fulmina, Tonitrua, ceteraque Meteora fieri diximus, quæ *ignea* vocari solent; ita ex vaporibus, qui in eadem Aëris parte concresecunt, Nubes, Pluvix, & alia plurima Meteora formantur, quæ *aquea*, vel *humida* nominantur. Illorum omnium natura, origo, varietas, accidentia breviter hic explicanda nobis occurrunt, atque ut ordine progrediamur, ab ipsâ Nube incipiemus.

Nubes.

II. Nubes itaque efficitur, cum plurima vaporum corpuscula simul vi frigoris concresecunt; quamvis innumeræ terrestris etiam exhalationis particulæ permixtæ illi fuerunt; unde Nubes ex aqueis halitibus, veluti filamentis quibusdam contexta, videri potest, quibus atque Terræ particulæ intertextæ fuerint. Eâ verò de causâ Nubes in Aëre pendere, ac veluti insidere videntur, quoddam illarum particulæ maximè disgregatæ, sint aëre leviores, & interdum etiam a vento sustineantur. Et certè, si acriori vi frigoris illæ magis condensantur, graviores fiunt, ac liberè in pluvias solutæ decidunt.

Quamdiu tamen halitus illi, vel Nubes in
Aëre

Aëre reperiuntur; opacæ, variis coloribus admirabili quodam modo distinctæ videri solent: quodd illarum particulae, quamvis tenuissimæ sint, si tamen invicem uniantur, ac veluti congerantur; opacæ esse debeant, omnemque ferè lucem reflectere: ex reflexis autem, & refractis radiis Solaribus fieri colores alibi demonstrabitur.

III. Nihil est autem, cur plures, majoresque fieri Nubes, quemadmodum etiam pluvias, dicamus in vallibus, iisque locis, quæ fluminibus proxima, palustria, vel humidiora sunt, ut in Italiâ frequentiores sunt, quam in Galliâ; cum facile intelligatur, ex iis locis uberiores aquæ, particulas, seu vapores emitti, qui in Nubes concrecant: hinc in Ægypto, Libyâ, & Indiâ rarè Nubes, & pluviae conspiciuntur; quia cum arida sint ea loca, vapores emittere nequeunt, aut Solis calore dissipati in alias regiones illi transferuntur: quod etiam de Paphiæ Veneris arêa, & de Insulâ Pelopis dici poterit, in quibus nunquam Pluvias, Nubesque conspici ferunt. Intelligitur etiam Nubium altitudinem inæqualem esse oportere; cum aliquando citius, aquei vapores concrecant, tardiùs aliquando, ideoque Nubes humiliores hyeme, altiores autem æstate videantur. Maxima tamen Nubium altitudo quinque milliarium Italicorum deprehendi solet. Unde, qui Pyrenæos, aut Carpathium montem conscendunt; cum ad Nubium regionem perveniunt, spissam, ac densam nebulam subire videntur; deinde verò, ac veluti sibi subjectas, Nubes raro sanè, jucundoque spectaculo intuentur. Sed hæc opportuniùs, cum de montium altitudine differetur.

AN-

Aura Serotina.

IV. Quod si diurno Solis calore, vapores, & halitus ad aliquam altitudinem in Aëre evehantur, sed in illo diutius hærere, ac veluti pendere non possint, & ingruente vi frigoris post Solis occasum, in tenuissimas guttas soluti decidant; *Auram serotinam* efficiunt. Hæc multis perniciosa esse solet, iis præsertim, qui corporis fibras laxiores habent, & quibus apertiores sint pori: cum etenim halitus ille acrioribus corpusculis permixtus sit, quæ ex palustribus maximè, graveolentibus, & mineralibus locis erumpunt; capitis, membrorumque poros faciliè subire, eorumque texturam turbare poterit: unde dolores dentium, capitis distillationes, vigiliæ, raucedines, aliaque incommoda oriri poterunt. Rarior autumnò, & hyeme esse solet *Aura serotina*, quòd languidiori Solis calore, vapores sursum evehi non possint; quemadmodum etiam flante vento facillimè dissipantur, & pluvio, udoque Cœlo in pluviam convertuntur.

Ros, & Pruina.

V. Eadem ferè videtur esse Roris origo; cum enim tenuissimæ, ac invisibiles Aquæ particulæ diurno Solis calore sursum evectæ nocturno frigore condensantur; & in sensibiles Aquæ guttas concrescunt, & paullò ante Solis occasum, cum Aër ipse frigidior est, supra herbarum, & arborum folia decidunt; *Ros* efformatur, quem proinde Alemanius Poë-

ta Solis, *Lunaque filiam* dicit (a). Cùmque ex salinis, & acrioribus nitri particulis Ros componatur, plurimùm quidẽ ad Insectorum generationem, & Terræ sæcunditatem conferre debet; sed aliquando tamen messibus perniciem affert, cùm spicâ exceptus, calore Solis in illâ putrescit, unde *messum rubigo* (b).

Ubi vero Ros in Terram, vel in herbarum folia deciderit, si intensiori frigore glaciatur, efformatur *Pruina*. Quemadmodum ex Roris, & Pruinae reliquiis Solis calore exsiccatis filamenta quædam, telæ araneæ instar, in æere volitantia formantur, quæ *Capillitium*, sive *Capilli Veneris* dici solent.

Mel.

VI. Ipsum quoque *Mel* genus aliquod Roris videtur esse, cùm primâ Aurorâ folia arborum melle roscida inveniuntur, ac, si qui matutino sub dio fuere, unctas liquore vestes, capillumque concretum sentiunt (c).

Neque enim *Mel* ex aëre decedit in siderum exortibus, ac dum Iris incubuerit, ut effingi dixit Aristoteles, neque est sudor, aut quædam siderum saliva, (eorumque præsertim, qui alibi divina, & incorruptibilia corpora dixerunt) neque purgantis se aeris succus (d).

Ut igitur Mellis origo verisimilius explicetur, communis est Philosophorum omnium opinio, quod ex singulorum arborum foliis te-

(a) ap. *Plut. de fac. in or. Luna.* (b) *Plin. XVIII. c. 17. 29. 28.* (c) *Plin. II. c. 12.* (d) *Arist. Hist. Anim. V. c. 22.*

tenuis quidam, & viscosus humor exsudat, qui in ipsâ foliorum superficie, decidenti Rosi permisceatur, tenuique calore partim Solis, partim illo, qui plantæ ipsius proprius, ac ingenitus est, percoletur, concoquatur, & purior fiat. Hinc infra foliorum superficiem melleus humor, ut plurimum reperitur, quem apes probosciculis exsugunt, ut in narcisso præsertim, thymo, aliisque floribus observatur. In his etenim purior, & dulcior succus exhalatur, adeoque magis ad illa properant apes, indeque humorem illum studiosius colligunt. Quin etiam ex variâ florum naturâ, ex quorum foliis Ros ille, vel tenuis humor colligitur, diversæ quoque Mellis qualitates oriri solent, ut aliud suavem, aliud insuavem odorem habeat, aliud dulce, & salutare, amarum aliud, ac venenatum appareat.

VII. Sed dubitare plerique solent (neque enim satis id constat) utrum succum ex floribus ducant apes, qui protinus Mel sit, an qua collegerunt, in hunc saporem, mixturâ quadam, & proprietate spiritûs sui mutant: quibusdam enim placet non faciendi Mellis scientiam esse illis, sed colligendi; quidam existimant conditurâ, & digestionem in hanc qualitatem verti, qua ex tenerrimis virentium, florentiumque decerpserint, non sine quodam, ut ita dicam, fermento, quo in unum diversa coalescunt (a).

Verisimilius est igitur humorem illum ab apibus in arborum, florumque foliis colligi, in stomachum transmitti, & alteram quidem illius partem in alimentum converti, alteram
verò

(a) Sen. ep. 84.

verò lactis instar, in Mel converti, & in alvearium loca, sive ore, ut Aristoteles, & Plinius opinantur, sive aliâ ex parte egeri; difficile est enim alterutrum certò definire.

Complures tamen existimant Mel ab apibus non probosciculis exfugi, & intra stomachum ad alvearia deferri, sed illas potiùs ad alvearia redire putant alis, cruribusque Melle onustis: quamvis id volatùs naturæ, & ipsi Mellis formationi repugnare videatur. Quæcumque tamen ex his opinionibus verisimilior appareat, incredibile est certè, quàm admirabile, ac divinum ferè sit studium, solertia, & ingenium, quibus apes mellificio incumbunt, ut Sapientissimi Viri in hoc explorando maximam, diuturnamque operam collocaverint, & elegantissimi Poëtæ illud carminibus sint prosequuti, præsertim verò Virgilius Georg. IV.

Manna.

VIII. Quemadmodum verò Mel ex floribus, ita ex nonnullis arboribus Manna colligitur. Si etenim Ros in quorundam arborum folia inciderit, & halitibus, sive crassiusculis succis ex foliis arborum erumpentibus permixtus, concretus, tenuique calore, concoctus fuerit; *Manna* formatur. Enumerât Theophrastus (a) arbores; ex quibus Manna colligitur, quercum, & tiliam; Calabri fraxinum, Syri cedrum adjiciunt, quibus & abies ipse accenseri fortasse poterit, cùm ipse quoque pinguiorem; resinæque similem succum

(a) de Plantis.

cum emittat, ut inde Manna elici posse videatur.

Nobilioris tamen originis erat, & naturæ, Manna, quo pasti sunt Hebræi in deserto, & quod intuentes illi dixerunt: *Manhu*, quid est hoc (a), unde etiam nomen accepit Manna. siquidem apud Veteres, & apud Galenum *alæreum*, & *roscidum Mel* vocabatur; & Theophrastus, cum tria Mellis genera distinxisset, quorum aliud ex floribus, aliud ex arboribus, aliud ex arundinibus colligeretur; priori quidem genere Mel propriè dictum expressit; altero Manna; tertio denique dulcis substantiæ speciem significavit, quæ nunc Arabicâ voce *Saccharum*, & ab antiquis quibusdam *Sal Indicum* appellatur. Saccharum quippe ex arundinibus extrahitur, concoquitur, & Salis instar defæcatur, & aquâ dilutum bibitur; quem usum non Recentiores modò, sed Veteres etiam novisse videntur, ut ait Lucanus:

*Quique bibunt tenerâ dulces ab arundine
succos (b).*

Pluvia.

IX. Sublati in Aerem vapores, si intensiori vi frigoris condensentur, in guttas crescunt, graviorefque Aëre effecti, & in Pluviam conversi celeriter in Terram decidunt. Credibile est etiam, non modò vi frigoris Pluviæ guttas formari, sed aliquando etiam ventorum operâ id fieri: si enim ventus mediocri impetu in rariorem nubem impingat, nec violenter illam impellat, secum-

Tom. IV.

A a

que

(a) *Exod. c. 16. v. 15.* (b) *Lib. 3. ver. 237.*

que abripiat, tenues, dispersasque illius particulas paullatim cogere, & unire poterit, ut simul concretæ, & graviores factæ deorsum ferantur. Quin etiam minores, & leviores guttæ, dum decidunt, aliis admoventur, implicantur, & adhærent, unde majores, & graviores fiunt. Certè æstatis tempore, quo vapores altius elati è sublimiori loco decidunt, & majus spatium in Aëre percurrunt, Pluviæ guttas ampliores efficiunt: hyemis autem tempore, vel sublatis e Terrâ vapores citius concresecunt, & in minutiores guttas delabuntur, vel altius eVecti in nivem abeunt.

X. Ex his intelligi poterit, quæ fides habenda sit ingruentis, & adventantis pluvie indiciiis, sive præfagiis, quæ plurima afferri solent apud Theophrastum, qui integrum eâ de re libellum composuit, quem etiam Aratus, & Virgilius pluribus carminibus sunt prosequuti. Sic boves extento collo Cælum suspicere dicuntur, corvi, facto veluti agmine, gravius crocitare, muscæ acrius pungere, ranæ frequentius coaxare, stridere fores, ligna, vel oleum accensum crepitare, lumbrici erumpere è terrâ, cùm formicæ secus in anfractus, sinusque suos se recipiant, Solem cœruleo colore tingi, Lunamque pallefcere, &c. Hæc siquidem, aliaque innumera plerumque dubia, incerta, & falsa sunt: quamvis explicari faciliè possint, eorumque ratio reddi ex majori, vel minori vaporum copiâ, quæ in Aëre reperjatur; unde gravior, aut levior, densior, aut rarior, siccior denique, aut humidior aër efficiatur, adeoque inæqualiter teneriores animalium, aliorumque corporum fibras afficiat. Neque aliâ certè de
caus-

caussâ ope barometri nuperrimè inventi futura pluvia, ceteræque Aëris mutationes feliciter novo quodam, & admirabili præfagii genere prædicuntur: nisi quodd cum pluvia jam imminet, aut decidit, levior efficitur Aër, ut alibi diximus, ideoque Mercurii altitudo decrescit; sin verò augeatur, & altiùs ille ascendat, graviorem fieri, & sereniorẽ Aërem oportet.

XI. Atque utinam quidem pari loco habenda forent, & parem fidem mererentur illa, quæ de prodigiosis pluviis sæpius ab Autoribus memorantur. Singulis enim annis pluuisse lapidibus ait Plinius (a), qui L. Volumnio, & Serv. Sulpitio Coff pluuisse carnem scribit. Sanguinem in Sveviâ anno 1534. decidisse refert Agricola; quod Vendelinus Bruxellæ, & alibi contigisse Gemma (b) commemorat. Lacte similiter, & sanguine pluuisse, frequenter aded apud Historicos legitur, ut ipsa rei frequentia admirationem cum novitate ademerit. Quid: quod lanam, coctos lateres, ferrum spongiæ instar, Cælo delapsum Plinius (c), argentæum imbrem Dion, ranas, quæ cessante pluviâ pulverulosæ videntur, & quas supra pileum se deprehendisse testatur Porta, Ælianum (d) citans, ingentem ferri massam, unde arma fieri potuerint, ac (ne minora portenta deessent, majorique minoribus fidem adstrueret) vitulum quoque cum pluviâ decidisse scribit Avicenna? Mirum est certè, quod hæc portenta, siue spe-

A 2 2

sta-

(a) III. c. 12. (b) *Cosmocr.* II. c. 2. (c) II. c. 56: 57. (d) *Hist. Anim.* II. cap. 56. & XVII. c. 41.

stacula, quæ priscis illis temporibus frequenter adeo videbantur; nunc raro, vel nunquam occurrant, neque ulla nobis ejusmodi portenta suppetant, quorum memoriam ad posteros traducamus.

XII. Sed rejectis fabulis, id unum hîc afferri posse videtur, ut explicentur admirabiles illæ pluvix, quæ olim fortasse, & superioribus etiam seculis sunt observatæ, vapores, & exhalationes, quæ in mediâ aëris regione in pluviam concresecunt, pluribus salis, mineralium, &c. particulis admixtas esse, unde aliquis color illis inesse poterit; sic ex asphalticorum, & calchantinorum halituum commixtione aqua rubescere, & pluvia sanguinea videri potuit: ex gypsi, aliorumque albescere, flavescere, ut lac, & rubigo appareat, &c. Illud est etiam ingeniosè a Peireskio, aliisque observatum, quod sanguineæ veluti maculæ, quæ post pluviam in parietibus conspiciuntur, non è Cœlo cum pluvîâ deciderunt, sed oriuntur ab involucris, quæ parietibus adhærentia relinquunt erucæ, sive chrysalides, dum in papiliones mediâ æstate convertuntur, & avolant, quæ cum aquâ diluta fuerint, rubeum colorem præferunt, & tenacius corporibus adhærent, ut vix divelli possint, quod in sanguineâ quoque pluvîâ contingere est a Veteribus traditum.

De ranarum pluvîâ, & origine ex putrescenti, madidâque materiâ dicetur, cum animalium origo explicabitur. Lapides autem illi, qui frequenter adeo deciderunt, grandinei fuisse videntur paullo majores, & crassioribus etiam terræ partibus sibi permixtis, lapidum instar, opaci, ut in Scripturâ dicitur, quod

quod *Deus misit lapides de Cælo, & interfecti sunt multò plures lapidibus grandinis, quàm quos filii Israel interfecerunt gladio (a)*. Ferri denique, lanæ, laterum, vituli pluvia intelligi poterit ex iis, quæ de fulmineo lapide jam dicta sunt.

Nix.

XIII. Reliquum est, ut cetera, quæ supersunt, humida Meteora breviter explicemus. Itaque si vapor in Aëre paulò concretus vi frigoris serè glaciatur, in nivem conversus decidet, quæ non guttulis, sed floccis veluti constare videtur, quod ex tenuissimis veluti filamentis aquæ, quibus plurimus aër, & nitri particulæ permixtæ fuerint, componatur. Hinc arvis quidem fertilitatem affert, sive quod externam Terræ superficiem obducatur, & fœcundos halitus, caloremque Terræ, qui alioquin erumperet, coerceat, sive quia nitrum ipsum ex naturâ suâ fœcunda corpora efficiat, unde ait Plinius: *Vota arborum, frugumque communia sunt, nives diuturnas insidere, non solum quia animam Terra evanescentem exhalatione, includunt, & comprimunt, retroque agunt in vires frugum, atque radices; verum quòd & liquorem sensim præbent purum, prætereaque levissimum (b)*. Animalium tamen corporibus perniciofa nix esse solet, tum excitando, visum lædendo, &c quia acriores nitri particulæ internam asperæ arteriæ membranam irritare, & retinæ fibras vehementiùs percellere debeat.

A a 3

XIV.

(a) *Iosu* 10. ver. 11. (b) *Plin.* XVII. c. 2.

XIV. Plerumque verò, dum ex sublimiori loco nix decidit, in pluviam convertitur, quodd inferior, Terræque proximior Aëris regio calidior sit, adeoque halitus, & exhalatio repentè erumpens è Terrâ, nivis floccos dissolvere, & in aquam convertere possit. Hinc altiora montium culmina nivibus obducta sunt, dum interim accliviora, depressioraque Terræ loca pluviam madefiunt; cumque in declivioribus montium lateribus, sive radicibus nix faciliè solvatur; in illorum culminibus adeo vi frigoris indurescit, ut insequentem annum alicubi conservetur. Tanta, nimirum est vis frigoris in aquæ particulis glacie constringendis, ut, veluti crySTALLUS, illa indurescat. Sed hæc explicata jam sunt, cum de frigore ageretur: nunc obiter addi poterit, ipsum quoque gelu, vel glaciem inter Meteora aliquibus enumerari, ut quemadmodum, nix, & pruina eandem habent causam, ita eadem ferè sit grandinis, & glaciei origo. Aristoteles tamen, *nihil grandini fieri simile, dixit* (a), cumque alibi docuisset, *glaciem esse excessum frigoris, ut ignis est excessus caloris* (b), nihil de illius naturâ, & origine in Meteorologicis disputavit.

Grando.

XV. Vapores illi qui in Aëre sublimiori in guttas concresecunt, si intensiori adhuc frigore congelantur, in grandinem convertuntur. Quod si, aut mediocri frigidioris venti impetu plures grandinis globuli congerantur, &

(a) *Meteor. I. c. 11.* (b) *De Gener. II. c. 3.*

& uniantur, ut simul adhæreant, majores inde grandinis sphaeræ decident, ut pluries in Galliâ anno 1703. sunt observatæ, quarum maximæ pugno, minimæ duorum pollicum globulo, mediocres verò ovo gallinaceo pares fuerunt (a). Hexagonum verò, sive stellæ, suis veluti spiculis, aut cuspidibus insignitæ figuram acquirunt: cùm circuli, vel sphaeræ proprietas sit, ut una sex aliis æqualibus sphaeris undique tangi, & ambiri possit, quod experimento facillè apparet, si plumbei, vel eburnei globuli simul comparantur.

Frequentior autem est grando æstate, quàm aliis anni temporibus, quia grando ex sublimiori Aëris loco decidere debet, quod nubes, non hyeme, sed æstate solùm, ob acriorem Solis calorem, ascendere, ac pervenire solent. Hinc etiam, antequam grandinet, fragor in Aëre sentitur, quod concretæ jam, & congelatæ grandinis sphaeræ concutiantur, unaque in aliam concurrat. Nihil itaque mirum, si dum præcipiti motu deorsum ruit, ingentes adeo vires acquirat, ut obvia corpora frangere, animalia interimere, domorum tecta, dissicere, ac pervadere consueverit. Hinc veteres Ethnici, sacrificiis, atque carminibus pluviam, & grandinem avertere, ac veluti placare studebant: suspicabantur enim esse, in sanguine potestatem avertendæ nubis, ac repellendæ: quamvis alii, ut sapientissimos decet, negarent posse fieri, utrum grandine aliquis pascatur, & tempestates munusculis redimat: sed quantò expediens erat dicere; mendacium, & fabula est.

(a) *Hist. Acad.* 1703.

Credibile est tamen, & negari certè non potest grandinem, pluvias, &c. etsi ferè semper a naturalibus causis originem sortiantur, aliquando tamen divino consilio, potentiâ, virtute fieri, ut ex innumeris ferè exemplis manifestissimè demonstratur; undè meritò, cùm grandinis tempestas ingruerit, ad preces, Deumque convertimur, ut *Ignis, Grando, Nix, Glacies, spiritus procellarum, qua faciunt verbum ejus*, dissolvantur, a nobis avertantur, aut mitius certè nos feriant.

C A P. VII.

De Ventis.

I.



IN explicandâ Ventorum naturâ, & origine, non veteres modò, sed recentiores etiam Philosophi plurimùm differunt, ut *posse Ventos ex arido, siccoque balitu Terra gigni atbitrentur; posse & ex aquis aëra expirantibus; posse & Solis impulsu, pluribusque modis: quoniam Ventus non aliud intelligatur, quàm fluxus aëris (a)*. Hinc meritò Venti non inter ignea, vel humida Meteora recenseri, sed incerto quodam, distinctoque Meteorì genere collocari debuerunt.

II. Quamvis autem innumeræ ferè sint causæ, a quibus Ventorum originem pendere, vel explicari posse videtur; omnes tamen Philosophi in hoc mirè consentiunt, *nihil aliud*

*aliud esse Ventum, quàm ipsum aërem commo-
tum, ac agitatum, quod in loco tranquillissi-
mo, & ab omnibus Ventis quietissimo, vel bre-
vi flabello probari potest (a).*

*Ventus enim fit, ubi est agitando percitus aër (b).
Hinc ait Hippocrates, Ventum esse aëris flu-
xum (c); quemadmodum hoc etiam Anaxi-
mander, & Anaxagoras asserunt apud Plutar-
chum (d), & Laërtium (e). Quamvis autem
asserat Cicero, placere Stoicis, eos anbelitus
Terra, qui frigidi sint, cùm fluere ceperunt,
Ventos esse (f): celebris est tamen Stoicorum
opinio, omnem Ventum esse aëris fluxionem (g);
ut hoc intersit inter aërem, & Ventum, quod
inter lacum, & flumen (h).*

III. Maxima tamen difficultas est, opinionum-
que discrimen in explicandâ causâ, vel ori-
gine, quæ aërem commoveat, Ventumque
efficiat. Complures enim id a Terræ exha-
lationibus, alii ex vaporibus, alii denique a
Sole pendere arbitrantur: unde opiniones om-
nes ad tria hæc veluti Capita revocantur.

Prior illa sententia auctorem præcipuum
habuit Aristotelem, qui siccas, & aridas exha-
lationes ex Telluris substantiâ erumpere, ca-
lore Solis ad supremam Aëris regionem evehi,
ibique Cœli motu circumagi existimavit; un-
de illarum motu agitatus aër inferior Ven-
tum efficiet. Sed Aristotelis auditor Theo-
phrastus (i), cùm exhalationes illas partim
ex igne, partim ex terrâ constare putaret,
atque

(a) *Aug. de quant. Anim. c. 4.* (b) *Lucr. VI. ver. 685.*
(c) *Lib. de Flasi, & ap. Olymp. in I. Meteor. c. p. 13.*
(d) *III. c. 7.* (e) *VII. sep. 153.* (f) *Divin. II. (c) Plut.*
ibi. (h) *Sen. V. c. 6.* (i) *Olymp. in I. & II. Meteor.*

atque igneas quidem vim exercere, quâ sursum avolarent, terreas verò deorsum niti; ex oppositis ejusmodi viribus, sive motibus, tertium quendam motum oriri posse putavit, quo obliquè terrestres, & igneæ simul particulae moverentur, & aërem commoverent.

Cùm tamen oppositæ vires illæ, quæ a Theopraсто concipiuntur, aut nullæ sint, aut certè aëri commovendo impares videantur; cùmque Aristoteles ipse perperam, atque inutiliter ad Cœli motum confugerit; Recentiores Peripateci longè verisimiliùs existimant, quod exhalationes ex Terrâ erumpentes, ubi calore Solis, aut perturbato, conceptoque motu, aut ingenitâ vi elasticâ rarefiunt, dilatanturque, aërem proximum impellere, & commovere possint. Hinc validiores, & frequentiores esse Ventos observant, cùm uberiorès è Terrâ exhalationes erumpunt, ut vere, & autumnò; Ventos ex inferiori Aëris parte, quæque Telluri proximior est, incipere; cetera denique Ventòrum phænomena feliciter explicare solent, quæ inferiùs afferrentur.

IV. Altera opinio, quod ex aquæ particulis, sive vaporibus Ventorum origo repetenda sit, Metrodoro tribuitur, qui Ventum definivit *aquosi anbelitus æstus* (a): quemadmodum etiam Anaximander ad Ventorum originem, non tenuissimas solùm, & calidas aëris, sed humidissimas etiam aquæ partes requirit. Eadem fuisse videtur opinio Vitruvii, qui ait: *Ventus est aeris fluens unda cum incertâ motus redundantia. Nasçitur autem cum*
fer-

(a) *Plus. III. c. 7.*

fervor offendit humorem, & impetus fervoris exprimit vim spiritus flantis. Id autem verum esse, in Æolipilis xreis licet aspicere. Fiunt etenim Æolipila ars cava. Ha habent punctum angustissimum, quo aqua infunduntur, collocanturque ad ignem, & antequam calefiant, non habent ullum spiritum; simul ac autem fervere caperint, efficiunt ad ignem vehementem flatum. Ita scire, & judicare licet ex parvulo, brevissimo spectaculo de magnis, & immanibus Cæli, Ventorumque rationibus (a). Idque illustrari, vel confirmari posse videtur, quod boreales Venti vehementiores esse consueverint, ex uberiori fortasse halituum copiâ; quemadmodum etiam ex voraginibus, profundisque Terræ cavernis validi plerumque Venti, veluti ex angusto Æolipilæ orificio, erumpere solent ex humo:is illius rarefactione. Sed hæc opinio ferè obsoleverat, cùm illam Cartesio instaurare, eodemque Æolipilæ exemplo probare libuit, cui deinde plurimi sunt suffragati.

V. Non defuere tamen ex Veteribus, neque ex Recentioribus, & Cartesianis ipsis defunt, qui commotionem Aëris in Solem veluti causam referendam esse putaverint. Sic etenim Anaximander, & Anaxagoras (a) aërem ipsum arbitrantur Solis calore rarefieri, tenuari, ac dilatari; unde vehemens illa agitatio oriri deberet. Illud est etiam a Senecâ observatum, quod Elementa singula proprios veluti motus habent, quibus agitentur, ut in Aquâ, Igne &c. experimur, adeoque verisimile etiam fore,

(a) Lib. 1. c. 6. (b) Plut. III. c. 7. Laërt. II. sec. 9.

fore, ut Aër ipse celeri quodam, perturba-
toque motu ex naturâ suâ commoveretur.

Neque alia certè, ut Cartesiani quidem
existimant, videtur esse caussa, & origo pe-
rennis illius Venti, vel motûs aëris, qui in
Zonâ torridâ sub Æquatore ex oriente in oc-
cidentem quotidie percipitur, & diurno Tel-
luris motui ab occasu in ortum in Coperni-
canâ hypothefi tribui solet; nisi quodd aër ipse
Telluri circumfusus, a Sole, qui sensim ex or-
tu in occasum movetur, successivè calefit, at-
tenuatur, maximèque rarefit, ac versùs occi-
dentem paullatim impellitur, aëremque sibi
proximum commovet, unde continuus veluti
Ventus sentiatur (a).

VI. Sed, quamvis hæc omnia ingeniosè ex-
cogitata sint, & maximâ cum probabilitate
dicantur, verisimilius est tamen, non unicam
esse Ventorum originem, sed plures interdum
caussas ad illorum productionem concurrere;
ita ut partim ab aëre, partim a Sole, par-
tim a terrestribus exhalationibus, partim de-
nique a vaporibus oriantur. Si etenim accu-
ratè singulas Ventorum caussas, quæ superiùs
allatæ sunt, intueamur; manifestissimum erit,
illarum singulas admitti posse: cum certè aë-
rem agitare, & commovere illæ possint; nul-
la tamen fortasse definiri poterit, quæ Ven-
torum omnium origini, & accidentibus ex-
plicandis par videatur. Plures itaque genera-
les Ventorum causæ admitti poterunt, quæ
aut simul eundem Ventum efficiant, aut cer-
tè variis temporibus in excitandis Ventis suam
vim exerant.

VII.

(a) Vid. Voss. de motu Mar. & Vent. c. 21.

VII. Quin etiam ex pluribus aliis, veluti specialibus causis Ventī oriri solent. Sic, ex gr. dum nubes aliqua in Aëre dissolvitur, sive id ab extrinseco Solis calore, sive ab internā partium agitatione oriatur, proximum aërem commovere, Ventumque creare poterit. Nives etiam, & glacies, dum exsolvuntur, & in aquam abeunt, Ventum efficiunt, quod exhalatæ salis, & nitri particule aërem commoveant. Sæpius etiam Ventī, non supra Telluris superficiem, vel in Aëre formantur, sed in subterraneis specubus excitati inde erumpunt; quemadmodum ait Seneca: *edi e specu Ventos, recessuque interiore Terrarum*; hinc Aëre sereno Mare intumescit, ac tempestatibus agitatū fuit: quod infra ejus alveum halitus erumpat, qui Maris aquam commoveat, ingentesque procellas excitet. Hinc etiam plurimi sunt montes, in quibus ex aliquo aperto latere vehemens oritur Ventus, quales in Angliā, & alibi memorantur. Sed celeberrimus est ille mons, qui in Provinciā prope Lausonem positus ad boream, & ad austrum perforatus, in utramque partem, sive per utrumque hiatum simul, eodemque tempore Ventum emittit (a).

VIII. Addi postremò poterit, quod nulla propemodum est regio, qua non habeat aliquem flatum intra se cadentem, & circa se nascentem (b); ideoque præter communes illas Ventorum causas, quæ ubique Terrarum vigeant; peculiare aliquæ enumerandæ sunt, quæ in certis regionibus, certo quodam tempore spirent. Sic *Etesia*, *Ornitbia*, seu *Chelidonii* cer-

(a) Goss. (b) Sen. VII. c. 17.

cæteris quibusdam temporibus, statisque locis spirant, ut post Aristotelem (a), Plinium (b), Senecam (c) fusè, distinctèque expònit, illorumque originem ex solutis nivibus repetit Varenius (d). Admirabilis est ille Ventus, qui in Delphinatu inferiori singulis diebus æqualiter spirat, vix ad duo, vel tria milliaria, excurrens, cùm intra unius latitudinem coerceatur; æstate quidem ab aurorâ ad octavam horam matutinam; hyeme a mediâ nocte, in decimam matutinam; vere, & autumnò ab horâ quartâ post mediam noctem, usque in meridiem semper frigidus, & salutaris incolis, a quibus *Ponthias* vocatur. Innumera aliorum exempla apud Plinium, Senecam, Agellum, & Varenium occurrunt.

IX. Quæcumque tamen hypothesis, aut opinio eligatur, omnia Ventorum phænomena, & effectus explicari faciliè poterunt, usurpatâ præsertim fluctuum similitudine; sicut enim fluctus ex aquæ, ita Ventus ex aëris agitatione oriri jam diximus.

Quemadmodum igitur, si in aquam stagnantem, & quietam lapillus injiciatur. aquam contiguam hic commovet, & in circulum aqua ipsa veluti crispatur; prior hic circulus proximam sibi aquam impellit, & circulum alium paulò majorem efficit, hic alter circulum tertium ampliorem adhuc efformat, sicque successivè novi semper, amplioresque circuli efformantur; tandiuque aquæ agitatio perseverat, quandiu aquæ resistentia, vel ex illius gravitate, vel densitate orta, aquæ motum

(a) *Meteor. II. cap. 5.* (b) *Lib. XVIII. cap. 21.*
 (c) *Quæst. Nat. V. c. 2.* (d) *Geogr. I. c. 21. pr. 4.*

tum paulatim minuit, ut omnino denique languescat ille, prorsusque extinguatur: ita, si halitus, vapor, aut exhalatio ex aliquâ Terræ parte erumpens in aëre calore Solis, aut ingenitâ vi elasticâ, aut concepto ex motu calore rarefiat, dilatetur, &c. proximum aërem commovebit, impellet, & circulariter extrudet, proximus ille aëris circulus alium majorem efformabit, sicque deinceps aëris agitatio, vel Ventus communicabitur, & celeri motu ad maximum etiam spatium extendetur.

X. Neque mirari quis poterit tenuem halitum e Terrâ erumpentem tantâ vi plerumque moveri, ut validissimum Ventum excitare possit, quo arbores, ædificia agitari, subvertique soleant. Quamvis enim minima videatur vis illa, vel impetus, qui in unicâ aëris, vel halitus rarefacti particulâ reperitur; cùm tamen innumeræ, atque infinitæ ferè sint illæ particulæ, quæ rarefiunt, & collectis veluti, ac unitis viribus aërem impellunt, cumulus, congeries, & aggregatum harum omnium virium, maximus, & incredibilis esse debet. Id sæpius in Physicâ Generali pluribus experimentis est observatum, præsertim cùm de acceleratione motûs agebamus. Diximus enim, quòd si eâdem vi, eodemque impetu globus eburneus successivis ictibus percutiatur, initio quidem tardè movebitur, deinde verò sensim velocior factus, incredibili demum celeritate moveri poterit, quod in corporibus etiam constanti, & æquali vi gravitatis decidentibus observatur. Cùm igitur aër frequentibus ictibus ab aëre rarefacto impellatur, celerrimè tandem moveri debet;

hinc

hinc initio Venti tardiores, levioresque, deinde validiores, celerioresque videri solent. Experimur etiam Ventos, non continuo, perennique motu spirare, sed, factâ veluti vi, repentè erumpere, deinde sensim decrefcere, ac veluti per intervalla, vires renovare: quia nimirum halituum rarefactiones, & eruptiones eâdem leg. fieri videntur.

XI. Quod ad Ventorum qualitates, & accidentia pertinet, non ita singulis Ventis inesse illas existimandum est, ut ab origine suâ, sive in loco in quo aërem agitare incipiunt, aliquis calidus, aliquis humidus existat. Verisimilius est enim, quod omnes Venti ejusdem naturæ sint, quippe qui nihil aliud sint, quàm aëris agitatio; diversa verò accidentia a regionibus ipsis, sive locis, ubi spirant, & per quæ transeunt, acquirant, & fortiantur. Si etenim vaporibus ex aquâ erumpentibus nitri, salisque communis particulæ admisceantur, Ventus frigidus orietur; sal enim, & nitrum frigoris excitandi vim habent: si verò aluminosis, ac præsertim ammoniacis spiritibus halitus ille refertus sit, calidus Ventus percipietur: si plurimæ sint aquæ particulæ, quæ paulld densiores, & concretiores effectæ corporum superficiei adhæreant, humidus: si denique aër ipse purus agitetur, siccus videbitur; sicque de ceteris intelligi debet.

XII. Incredibile est tamen, quod Venti qualitates illas, sive salium particulas secum deferant ab extremis usque Terræ cardinibus, sive regionibus, unde oriri dicuntur; ita ut ex. gr. boreas frigidus sit, quia a regionibus polo subjectis, sive ex Zonâ frigidâ

dâ erumpat; auster calidus, quia per Zonam torridam, & loca Soli subjecta transeat, &c. Vix etenim Venti, vastas adeo, regiones percurrunt, sed plerumque circa regionem aliquam oriuntur; deinde verò nulli per æstatem frigidi, aut hyeme calidi forent, si locorum conditionem sequi deberent. Comperitum est denique eundem Ventum in diversis regionibus diversas habere qualitates, ut alibi calidus, alibi frigidus, alibi noxius, alibi salutaris habeatur. Sed hæc, aliæque id genus innumera, præsertim verò Ventorum præsentia, quæ accuratissimè apud Plinium (a), Virgilium (b), Varenium (c), descripta sunt, libenter omittimus; cum facile ex superioribus intelligi fortasse possint, aut certe muneris nostri non plurimum videantur.

XIII. Fortasse tamen operæ pretium, huiusque loci videbitur aliqua Ventorum genera exponere, quæ, etsi a communibus Ventis plurimum differant, & turbines soleant vocari; similem tamen, ac illi, causam habere videntur. Ejusmodi verò sunt *Typhos*, *Præster*, *Ecnephias*, *Exhydrias*, quorum discrimina non eadem ponuntur ab Auctoribus (d).

1. Communiter tamen *Ecnephiæ* nomine, ventus ille, vel turbo intelligitur, qui ex discissæ nubis sinu, rectâ, & perpendiculariter maximâ vi erumpens, in Terram celerrimè ruit. Hic certissima navium perniciēs est, præsertim, si plenis velis ille ferantur: tunc enim

Tom. IV.

Bb

se.

(a) XVIII. c. 35. (b) Georg. I. v. 452. (c) Georg. I. c. 20. prop. 17. (d) Vid. Plut. II. c. 3. & Lært. VII. Plin. II. c. 48. Sen. V. c. 13.

se se velis implicat, suoque pondere navem deprimit (a).

2. Longè vehementior, & periculosior est Typho, qui ex nubis cavitate repente profiliens, non rectè, sed spiraliter, & vorticoso motu in Terram decedit, tantoque impetu subjecta corpora contorquet, ut arbores eradicare, lapides attollere, integra quoque navigia, non frangere modò, ac invertere, sed celerrimè torquere, in altum abripere, suspensa in aëre agitare, tandemque in mare dejecta deprimere consueverit, ut ait Poëta :
(*Torquet agens circum, & rapidus vorat aquo-
re vortex* (b))

3. Quod si fortasse Typho, vel Ecnephias ignem secum deferat ex eadem nube erumpentem, dicitur Præster, quem optimè Seneca (c) definiit turbinem igneum, in quo tanto vehementior esse vis debet, quanto validior est ignis simul, & aëris impetus, quàm si solus aër agitaretur; unde mirum esse non debet, si horum turbinum incredibiles, portentoque simillimi effectus in historiis memorantur.

4. Exhydrias denique est turbo, qui aliorum instar, e nube egreditur, sed uberrimam simul aquæ copiam largissimè effundit.

XIV. Sed quid ingentem, ac infinitam ferè Turbinibus vim inesse mirabimur, quando in communibus etiã ventis maxima interdum, & incredibilis violentia reperitur? Certè, qui medius occasum inter, ac Boream spirat, & *Caurus*, vel, ob imperium, quod in Aëre exercere

(a) *Varen. l. 6. 21. pr. 10.* (b) *Virg. Æn. l. 12. ver. 121.*
(c) *V. 6. 13.*

cere videtur, *magistralis* dicitur, *clarissimus* est ventorum, nec ulli violentiâ inferior. *Armatus enim hominem, plaustrum oneratum, percellit* (a). *Eo ferunt & lapides agitari, & volvi, & homines de vehiculis deturbari, ac vi flatûs, armis, vestibusque nudari* (b): quæmadmodum Seneca ait, eodem *adificia quasi* fari. Et tamen incolæ gratias agunt, tanquam *salubritatem Cæli sic debeant ei*. Certè *Augustus Templum illi, cùm in Galliâ moraretur, & vovit, & fecit* (c).

XV. Id unum postremò explicandum superest, qui sit numerus, & divisio ventorum, eorumque nomina suis locis apponenda. Atque inutile quidem est veterem divisionem hîc exponere, cùm neque in ventorum numero, neque in regionibus, unde spirant, neque in ipsis nominibus illi consentiant (d). Ut illam igitur divisionem hîc exponamus, quæ a recentioribus omnibus admitti solet; quatuor sunt venti *Cardinales*, vetustissimis etiam Homeri temporibus cogniti, quæ a quatuor *cardinibus* oriuntur; quatuor alii sunt *collaterales*, qui inter cardinales spirant; octo iterum alii inter superiores medii collocantur, ut omnes sexdecim fiant, quibus cùm totidem alii intermedii inserantur, triginta duo evadunt, insertisque iterum totidem aliis, omnes omnino venti 64. in accuratissimâ, quæ hæcenus fieri, & a nautis præsertim adhiberi contigit, ventorum divisione numerantur. Id clariùs intelligi, deprehendique poterit in schemate ventorum, ubi non loca solùm, sed etiam illorum nomina exprimuntur,

B b 2

CAP,

(a) *Gell. II. c. 12.* (b) *Strab. I. & Plin. II. c. 47.*
 (c) *Senec. II. c. 22.* (d) *Plin. II. c. 47.*

C A P. VIII.

*De Iride, aliisque emphaticis
Impressionibus.*

I.



Nter Meteora, sive sublimia corpora, quæ in Aëre conspiciuntur, postremo denique loco ponitur Iris, quæ alioquin, ob egregiam sui pulchritudinem, principem ferè locum mereretur. Tanta nimirum est Iridis pulchritudo, ut non ab Hesiodo (a) solùm, Platone (b), aliisque veteribus Ethnicis *Tbaumantias*, sive *Admirationis filia* dicta sit, quod mortales, rei miraculo adductos finxisse ait Plutarchus (c); verùm etiam ipsæ quoque divinæ Literæ illius præstantiam mirificè nobis commendent -- *Vide arcum, & benedic eum, qui fecit illum: valde enim speciosus est in splendore suo* (d); *manus Excelsi aperuerunt illum* (e). Inde verò præsertim oritur species Iridis, & pulchritudo, quòd in illâ mira colorum varietas, & ordo reperiatur, ipsa deinde figura, quæ semper eadem, & circularis videtur. Hæc itaque duo explicanda nobis occurrunt in Iride, colorum, rotundæque figuræ causa, & origo.

II. Et ad colores quidem quod attinet, tres illi enumerantur ab Aristotele (f), puniceus, viridis, purpureus; flavum enim, qui inter
pu-

(a) Theog. (b) Theat. (c) Plut. III. c. 5. (d) Ecclesi. c. 43. ver. 12. (e) Ibi. v. 13. (f) Meteor. I. c. 1.

puniceum, & viridem reperitur oriri putat ex commixtione viridis cum puniceo; quamvis ipse potius viridis, ut Pictores norunt, ex flavo, puniceoque permixtis efformetur. Iris itaque apud Aristotelem tricolor dicitur, apud alios quadricolor, puniceo nempe, viridi, flavo, purpureo colore distincta: sed Ptolemæus, cum in ipsâ duorum unione, vel commissurâ, tertium quendam ex utroque permixto creari putaret, septem in illâ colores discrevit, unde septicolor Iris diceretur. Verùm si intermedii quoque colores, & qui ex præcipuis simul unitis, atque permixtis efformantur, enumerari deberent, non septem modò, sed mille potius, aut innumerî colores in Iride viderentur, undè ait Poeta:

Mille trahit varios adverso Sole colores (a).

In quo, diversi niteant cùm mille colores,

Transitus ipse tamen spectantia lumina fallit:

Usque adeo quod tangit idem est; tamen ultima distant (b).

Quatuor itaque sunt nobiliores, & præcipui Iridis colores, extimus omnium ruber, sive puniceus, flavus, viridis, cæruleus, sive violaceus aut purpureus, in quo recentiores omnes, & ex veteribus plerique mirè consentiunt.

III. Plurimùm tamen in explicandâ colorum origine inter se differunt, quamvis omnes ingenuè fateantur, Iridis colores apparentes esse, eosque fieri partim a nube roridâ, partim a Sole, nubem ipsam illustrante. Aliqui a Senecâ memorati arbitrantur

B b 3

gut-

(a) Virg. Æne. V. ver. 88. (b) Ovid. Met. l. VI. v. 65,

guttulas nubis alias rariores, & pellucidas esse, densiores alias, & opacas, adeoque alias a luce penetrari, in aliis umbram creari, & ex diversâ lucis, & umbræ mixturâ varios colores efformari. Metrodorus (a) autem existimat puniceum, sive rubeum Iridis oriri a Sole, cæruleum verò, sive violaceum, aut purpureum a nube, ceteros autem, qui inter hos extremos medii sunt, ex illorum admixtione creari, ut Seneca quoque arbitratur. Aristoteles (b) ait, nubem esse veluti speculum, in quo aspectus noster, vel radii Solis refringantur, aut reflectantur; puniceum verò colorem fieri, quòd in parte proximiori nubis altiùs illam penetrent radii, & nitorem quandam inducant; viridem, quòd in parte remotiori nubis minùs immergatur, purpureum denique, quòd in parte adhuc remotiori reflexio fiat; flavum etenim ex punicei, & viridis admixtione creari suspicabatur; quæ colorum causâ, & origo, non solum Cardano, sed Peripateticis etiam probatur. Scaliger autem existimat, nubem illam, in quâ formatur Iris, ex singulorum Elementorum particulis compositam esse oportere, ut pars Iridis superior punicea sit, quòd ignis particulis componatur, secunda flavescat aëreis, tertia ex aqueis virescat, quarta, vel infima ex terreis purpurescat.

IV. Sed quis apertè non videat singulas opiniones illas partim rudes, & imperfectas esse, partim etiam a vero abhorreere, cum ludricas, & inutiles colorum causas afferant, quæ cum rebus ipsis coherere vix possint? Id

opti-

opti-

(a) *Ap. Plut. III. c. 5.* (b) *Vid. Plin. II. c. 59.*

optimè noverat Cartesius, remque totam, ex superioribus Opticæ legibus diligenter adeo demonstravit, ut nihil ferè optandum reliquissè, & hoc uno ingenii sui specimine immortalè gloriam consequutus esse, ceterisque Philosophis Newtono in primis Rohaultio, Wolfio præluxisse meritò videatur.

V. Cùm itaque ex unanimi Philosophorum omnium consensu, ut antea dicebamus, compertum sit, Iridem formari in nube, quæ Soli opposita sit, rotundisque veluti aquæ particulis, seu guttis componatur, in quibus radii solares refrangi, reflectique debeant; experiri voluit Cartesius, quid in ampliori aquæ guttâ, vel spherâ contingeret, ut inde facilè subtiliorum quoque phænomena scrutaretur. Quâ verò ratione id ille præstiterit, & quàm feliciter illi res cesserit, breviter ostendemus. Siphysa rotunda vitrea B C D. * aquâ impleatur, & ita Soli exponatur, ut inter illam, & Solem intuentis oculus reperiat; oculo nimirum posito in E, Sol posteriori parte effulgeat, radiumque A B emittat, qui in physæ superficiem incidat in puncto B; ejusmodi radius, cùm ex rariori medio in densius transire debeat, ita aquam ingrediens refringetur, ut ad punctum C perveniat, ubi ob aliquam physæ opacitatem reflectetur in D, atque iterum ex aquâ in aërem transiens refringetur in D, & ad oculum E tandem perveniet, punctum verò D rubro colore tinctum videbitur, dummodo linea D E cum alterâ E F, quæ sit radio A B parallela, hoc est, a centro Solis per oculi centrum ducta, ac indefi-

B b 4

nitè

nité producta concipitur, angulum contineat graduum 42. 2.¹ Quod si angulus ille dilataretur, & amplior fieret, statim evanesceret color; sin verò contractior, vel minor fieret, color ille rubeus in plures alios successivè degeneraret, & primò flavus, tum viridis appareret, ac postreimò, cum angulus F E D evasisset 40. 17.¹ violaceus, sive purpureus videretur,

Quod si phyalà remotius ab oculo ponatur in Q P O N, & angulus aliquis F E Q assumatur, qui contineat gradus 50. 57.¹ rubeus color iterum observabitur in punto Q, in quo refrangi, & prodire deprehenditur radius, qui a puncto Solis M alteri radio A B parallelus in phyalæ superficiem incidit, atque refrangitur in puncto N, deinde reflexus in O, & in P, iterum refrangitur in Q; sicuti si angulus ille paullatim amplior fieret, alii colores successivè apparerent, flavus; viridis; ac denique ubi angulus ad gradus 54. 7.¹ pervenisset, violaceus videretur.

VI. His itaque suppositis, facile colores Iridis explicantur. Concipiatur enim in nube roridâ * guttula B C D, in quam incidens radius solaris A B refringatur in B, reflectatur in C, & refringatur iterum in D, & ad oculum E perveniat sub angulo grad 42. 2.¹, radius ille rubro colore tinctus videbitur, radius autem G H, qui in guttulam H I K incidens, & bis in illâ refractus, semelque reflexus ad oculum perveniat sub angulo 40. 17.¹ violaceum, sive purpureum colorem inducet; quemadmodum radii, qui intermedios angulos

* Fig. XIX.

los in intermediis guttis efficiunt, intermedios etiam colores flavum, & viridem efformabant.

Rubeus iterum color in altiori gutta Q P O N efformatur a radio solis M N, qui post duplicem refractionem, & reflexionem ad oculum perveniet, angulum efficiens 50. 57.^x sicuti violaceus, sive purpureus fit in guttâ X V T S a radio R S, qui similiter bis in illâ reflexus, & refractus oculum ingreditur sub angulo 54. 7.^x & intermedii colores in intermediis guttulis ab intermediis angulis orientur.

Si itaque radius E K, manente angulo K E F, circa rectam E F veluti immobilem axem circumducatur; omnes guttæ, quæ sub eodem constanti angulo in aëre videbuntur, eodem cæruleo colore tinctæ apparebunt, ideoque fascia, vel zona cærulea in aëre conspicietur; zona similiter punicea formabitur ab angulo F E D, flava, ac viridis zona ab angulis intermediis, ideoque integra zona, vel Iris primaria, ejus latitudo 2. graduum esse solet, vel secundaria, quæ 3. gradus latitudinis habet, quatuor partialibus zonis distincta videbitur, atque Iridis forma semper rotunda, ac veluti in Coni superficie depicta conspicitur.

Inferioris Iridis colores, cum unicam reflexionem patiantur, vivaciores, & clariores erunt, unde Iris primaria dicitur; alterius verò, vel superioris Iridis ob duplicem reflexionem, paullo dilutiores, languidioresque sunt, unde Iridem secundariam efficiunt. Illud est etiam in primariæ, vel secundariæ Iridis coloribus maximè mirum, quod in primariâ

mariâ supremus omnium, & extimus color est puniceus, vel rubeus, deinde flavus, tum viridis, postremò violaceus, sive purpureus; in secundariâ verò supremus, & extimus est purpureus ipse, seu violaceus, infra hunc viridis, tum flavus, tum denique ruber, sive puniceus.

VII. Quâ verò de causâ radii lucis refracti, sive reflexi, colores illos induere possint, difficilius est, quàm hætenus explorari, vel definiri potuerit. Quod a Cartesio, aliisque recentioribus hac in parte tentatum fuerit, alibi demonstrabitur, cùm de coloribus dissetur; interim cum Gassendo ingenuè fatendum est, id hætenus ignorari, ideoque solum supponi meritò posse, hanc esse lucis naturam, ut certâ quadam lege modificata, in certos colores abeat; hanc esse roridæ nubis conditionem, ut radios ad certum angulum refractos certis coloribus depingat; cùm præsertim in hac hypothesi omnia Iridis phænomena faciliè deducantur.

1. Sic intelligitur, quod non eadem Iris singulis hominibus, ac omnibus in eodem loco videbitur; cùm idem radius in eadem guttâ respectu omnium oculorum eandem refractionem subire nequeat. Certè si quis moveatur, locumque mutet, Iridem quoque moveri conspicit, etsi celerrimè equitando, transgrediatur, eâdem velocitate, moveri Iridem non sinè maximâ jucunditate intuebitur.

2. Neque in aëre modò hæc mobilis Iris observatur, sed in virenti quoque campo, vel herbâ rore perfusâ ita conspicitur, ut si spectator locum incedendo mutaverit, arcus etiam incedere videatur.

3. In-

3. Intelligi quoque potest, quod, cum contra Solis, oculi nostri, & Iridis in eâdem rectâ lineâ collocata esse debeant; Iris etiam futura sit inæqualis portio ejusdem circuli: ita ut si Sol in horizonre reperiatur, ipsum quoque Iridis centrum infra horizontem occultabitur, unde minus circularis Iridis segmentum videbitur. Si denique Sol paullò infra horizontem, aut oculus supra horizontem (ut in montis fastigio) reperiatur, tunc Iris semicirculo major conspicitur. Sed quamvis rotunda dicatur Iridis figura, tamen ob refractiones paullò depressior videtur, unde velut ellipsis segmentum apparet.

4. Fieri postremò potest, ut integer Iridis circulus quandoque videatur. Si Sol in horizonte reperiatur, spectator autem in editâ, sublimique turri, ut Iridis centrum tantò supra Telluris superficiem elevetur, quanta semidiameter, vel radius Iridis esse solet.

5. Quod si tunc in superiori parte rorida nubes rarior, ac interrupta foret; inferior tantùm semicirculus Iridis, vel Iris inversa videretur, quod Scriptores aliqui incredibili cum admiratione spectatum referunt. Inversa etiam hæc Iris observari potest, si Sole supra horizontem elevato gr. 41. 46. Solares radii in lævem patentis lacûs superficiem inciderent, atque in nubem roridam lacui imminentem reflecterentur: oculus enim in medio lacûs positos radios ita a lacu reflexos in nube coloribus tingi aspiceret, ac si rectâ a Sole infra horizontem posito ad nubem tenderent, nisi quod inversi in nubem reflecterentur, ut in speculo, & aquæ super-

perficie inverso ordine corpora repræsentantur.

VIII. Perperam itaque, atque inutiliter rotunda Iridis forma, ex rotundâ Solis figurâ repeti solet; quasi nimirum Iris a rotundo Sole formata, rotunda quòque esse debuerit: cum tamen effectus in suâ figurâ causæ assimilari non debeat, & nulla fere sit inter Solem, & Iridem similitudo; alioquin circulus Iridis integer, nullo colore distinctus longè major, si veram Solis magnitudinem, longèque minor, si apparentem consideres, esse deberet. Plerisque tamen ex Veteribus hæc explicandi ratio, maximè arrisit, ut Anaxagoræ, & Anaximeni, qui Solis imaginem in nube, veluti in speculo accuratè depingi opinabantur, adeoque Iridem rotundam esse oportere. Plinius autem Stoicos imitatus existimat, rotundam esse Iridis formam, quòd in concavâ nube depingatur, quemadmodum Seneca: *in eadem*, ait, *sententiâ sum, quâ Possidonius, ut arcum, judicem, fieri nube formatâ in modum concavi speculi, & rotundi, cui forma sit partis e pilâ secta*; quod Palianus etiam, Artemidorus, & Auctor libelli de Mundo sunt arbitrati. Aristoteles verò nihil de rotundâ Iridis formâ definit, sed asserit solùm illam esse veluti sertum ex totidem imaginibus Solis simul contextis, complexisque formatum, quot sunt guttulæ roris, quæ in nube repiuntur, & circularem fortasse Iridis figuram ab ipsâ Solis figurâ repetendam esse putavit.

IX. Quemadmodum verò Sol, ita etiam Luna propriam Iridem habere dicitur; quod Aristoteles (a), nulli quidem ex Veteribus

(a) Meteor. III. c. 1. vid. Plin. II. c. 59.

observatum esse, suâ tamen ætate bis contigisse commemorat, eamque accuratè describens asserit, illam albam omnino videri, non nisi post maximum temporis intervallum redire, & in Plenilunio solùm spectari. Ceteri tamen, qui rarum hoc spectaculum in Aëre observarunt, ab Aristotele plurimùm dissident: nam Gemma Frisius coloratam illam aspexit anno 1569. Snellius bis intra duorum annorum spatium, Albertus denique Lunâ, extra Plenilunium positâ, Lunarem Iridem observavit. Fortasse tamen tum Aristoteles ipse, tum reliqui Astronomi Coronam, aut Halonem, quæ circa Planetas videntur, ut mox dicemus, Lunarem Iridem esse putarunt, cum maxima sit Iridis, & Halonis similitudo,

.. XI. Quin etiam Iris Lunæ, vel Solis splendore, non in nube solùm, & in aëre sublimi, sed interdum etiam variis in locis, modisque circa nos ipsos formari videtur. Sic ubi virentia prati gramina rore conspersa sub ipsum Solis exortum intuemur; singulos Iridis colores in illis spectare licet, cum singuli globuli eosdem exhibeant: quemadmodum etiam in aquæ guttis ex arborum foliis pendentibus in triangulari crySTALLINO prismate, & in candido columbæ collo observatur. Fieri etiam potest, ut ex aliquo fonte ita aqua profiliat, & per aërem in tenuissimas particulas dissolvatur, ut roridam, ac tenuem nubem efficiant; tunc in illâ Iris accuratè depingetur; sicuti depingi solet in fluviolo quodam a Gassendo memorato, qui cum ex præcelsâ rupe maximo impetu decidat, circumfusum quendam veluti vaporem emittit, in quo perennes ferè colores Iridis apparent.

Ap-

Apparent etiam in aquâ, quam, tergo ad Solem converso, ex ore in oppositam Solis partem diffundimus, ut hoc illustre Iridis spectaculum innumeris ferè modis expressum, & multiplicatum admiremur (a).

Halo.

XII. Iridi simillimus est Halo, sive Corona, hoc est circulus ille, vel Zona, quæ interdum Lunam, & Solem ambire solet, ita, ut Sol ipse, vel Luna semper Halonis, vel Coronæ centrum videatur. Nihil ab Iride differt Halo, nisi quod ille unius plerumque coloris est, Iris autem multicolor (b). Iris opposita Soli, & Halo Soli concentricus sæpius a Sole, quàm a Lunâ formatur Iris: frequentior autem est Halo circa Lunam, quàm circa Solem, unde Seneca, & Aristoteles observant, Solarem a compluribus Græcis, aut ignoratum, aut negatum esse, quod rarissimè videatur. Porro Gassendus Halonem circa Lunam rarè sibi observatum esse testatur, ab exeunte Majo in extremum Septembris; cùm sexdecim tamen ille observaverit, in quibus intimus color fuit ruber, medius flavus, exterior denique viridis. Rariùs adhuc Halo, sive Corona circa Venerem, & Jovem est observata, nunquam verò circa Planetas alios, & fixa sidera, quod debiliores sint illorum radii, quàm ut rite refrangi possint, Coronamque producere.

Ex explicatâ superiùs Iridis origine constat,

(a) *Vid. Plut. III. c. 5.* (b) *Carr. Meteor. c. 9. Nunt. Optic.*

stat, Halonem fieri, cum aër, & vapor in-
tenuem nubem concrefcit; in hoc enim, dum
infra Solem, & Lunam reperitur, Lunæ, vel
Solis radii refringuntur, & ad oculum no-
strum veluti colore perfusi, vel imbuti, per-
veniunt. Celebris est Halo Romæ, tunc tem-
poris observatus, cum Augustus Romam in-
gressus est, quem, utpote variis illis coloribus
distinctum, versicolore Plinius, & Seneca
appellant.

Virga.

XIII. Alterum quoque Iridis genus esse
videntur Virgæ, cum nempe radii Solares
per hiatus, cavitates, & quasi foramina nu-
bium trajiciuntur, & ad Terram descendunt:
si enim tenuem, rarioremque nubem, sive
vaporem pervadant, ita refringuntur, ut va-
rios Iridis colores induant; unde optimè di-
xit Aristoteles (a): *Virgas esse Iridis speciem-*
rectam, ut Seneca, *in rectum jacentem*. Quam-
vis etiam Virgæ Parhelii fragmenta vocari
possint; quæ, cum interrupta sint, & exiguam
circuli portionem exhibeant, a rectâ lineâ
non distinguuntur. Utrumque verò ex loco, &
positione Virgarum, & Parhelii circa Solem
facile demonstratur.

Parbelium.

XIV. Parhelium itaque nihil est aliud, ut
ipsa vox exprimit, quàm spurius, & ementi-
tus Sol; quamvis a Plutarcho (b), & Clome-
de

(a) *De Mundo* c. 4. l. 1. c. 9. (b) *Plac. III.* c. 6.

de Anthelium dicatur, quasi vero Soli oppositus, aut æmulus foret. Quemadmodum enim, si speculum Soli opponatur, aut Solis radii in aquæ superficiem incidant, Solis imago accuratissimè in speculo, vel aquâ, depingitur, ut illa vix a vero Sole distingui possit: ita plerumque in Cœlo ad veri Solis latera in 22., 34., aut etiam 45. graduum distantia, unus, aut plures eementiti Soles apparent, qui veri figuram, lucem, & magnitudinem subtiliter adeo æmulantur, ut oculis faciliè imponant. Tres in Cœlo Soles suis temporibus observatos esse Plinius commemorat, hoc est duo simul Parhelia: posteriori tamen ætate longè plura sunt observata, & accuratissimè descripta (a), ut quinque Romæ Scheinerus anno 1629. & anno sequenti septem omnesque hyeme deprehendit; sex in Polonia, anno 1625. aliaque plurima aliis temporibus.

Quodque maxime mirum est, & explicandæ Parheliarum origini plurimum confert; vix Parhelia videri solent, quia simul, eodemque tempore circa Solem Corona Iridis coloribus ornata appareat; sic ubi Parhelia Romæ observata, & a Cartesio descripta, visa sunt, duplex erat Corona, cujus medium Sol occupabat, & rarè Solaris Corona cernitur, quin etiam ex utrâque parte, seu latere Parhelia videantur.

Plerumque etiam præter hanc duplicem Coronam circulus candidior horizonti fere parallelus per centrum Solis transiens apparet.

Hinc autem meritò conjici posse videtur,
can-

(a) *Cart. Meteor. c. 10.*

eandem esse Aëris dispositionem, eandemque vaporis tenuitatem, quâ Coronæ, vel Parhelia creantur. Verisimilius est enim fieri Parhelia circa Solem, quando radii Solares in aliquâ nube densiori, & æquabili reflexi ad oculum nostrum feruntur. Quod enim putat Cartesius fieri Parhelium, cum Solis radii in nubem glaciata, veluti in speculum, incidentes ad nos reflectuntur, absurdum certè, aut inutile videri poterit: quandoquidem radii Solares etiam a nube non glaciata reflecti possunt, & nubes illæ vi frigoris congelatæ, nullo certo argumento probantur.

Quæcumque tamen sit Nubis substantia, in quâ Parhelia depinguntur, certum est, quod illa brevi dissipantur, ac prorsus intereunt. Complura siquidem vix ad horæ spatium perveniunt, alia 4. horis durarunt; quamvis aliqua ab Aristotele memorentur, quæ ab ortu Solis ad occasum apparuerunt.

Paraselene.

XV. Quæ de Parheliis, sive mentitis Solibus dicta sunt, intelligi facile, & explicari poterunt de Lunis spuris, quæ rariùs tamen, & Lunâ plenâ, vel Plenilunio proximâ, in Aëre conspiciuntur, & Paraselene dici consueverunt. Tres Hevelius anno 1660. observavit, sæpius duæ a Cassino, aliisque sunt deprehensæ. Duas similiter eodem tempore contigisse refert Plinius; quod etsi fieri potuerit, fortasse tamen, non Lunæ imagines, sed accensæ in Aëre faces, Draconum, vel clypeorum instar, fuerunt; cum præsertim quinquies aliquando Lunâ majores illæ appa-

ruerint; quemadmodum etiam de accensis ignibus, non de Parafelene intelligi poterit, quod Cicero (a). *Solem noctu visum* asserat; neque enim Parafelene, vel e mentita Lunæ forma eximium adeo fulgorem emittere posse videtur, ut Solis imaginem æmuletur. Fortasse tamen, & ipse Sol, postquam occiderat, radiis in Aëre plurimum refractis supra horizontem, apparere potuit, ut fusè explicavimus, cum de refractionibus ageremus.

Aurora Borea.

XVI. Atque hæc illustriora sunt Meteora, quæ in Aëre apparent, cumque in solâ lucis, colorisque apparentiâ consistent, emphatica, vel apparentia meritò nominantur. Quandoquidem verò inter illa a compluribus haberi etiam solet tenuis ille splendor, qui in parte Cœli Boreâ conspicitur, & Aurora Borea communiter appellatur; hinc aliqua veluti Coronidis loco de illâ attexenda videntur.

Sæpius itaque a compluribus, præsertim verò a Gassendo in eâ Cœli parte dilutior quædam, & rarior lux apparuit, in quâ tamen vivaciores adhuc aliqui fulgores liberius in ortum, aut in occasum volitare conspiciebantur. Aliquando etiam rubor aliquis veluti erumpere supra horizontem, & pyramidis instar, illi insistere videbatur. Tanta verò fuit hujus æmulationis amplitudo, ut sexaginta ferè gradus in horizonte occupaverit, ad altitudinem 40. elevata, tandem post plures

(a) *Divin. I.*

res horas, variasque admirabiles mutationes evanuit.

Hujus autem admirabilis phœnomeni, quod anno 1726. die 19. Octobris illustrius apparuit, caussa, & origo videtur ex terræ vaporibus, aut exhalationibus repetenda: istæ nimirum in sublimiorem Aëris regionem evectæ, ita radiis Solaribus illustrari poterunt, ut veluti accensæ, tenuique flammâ fulgentes appareant, quod verò densior, aut rarior, quod regerendis radiis Solaribus accommodatior illa fuerit; vivacior quoque; aut dilutior, clarior, aut obscurior Aurora Boreæ videbitur. Quod si fortasse hæc explicandi ratio minùs arrideat, facilè suspicari quis poterit, fulgorem illum ex accensis exhalationibus oriri: quemadmodum certè Seneca Auroram Boream, inter accensa phœnomena enumerare videtur, cùm ait: *Quædam certo loco permanent, & tantum lucis emittunt, ut fugent tenebras, & diem representent; donec consumpto alimento, primùm obscuriora sint, deinde flamma modo per assiduam diminutionem redigantur in nihilum (a); & post Senecam Plinius: Lumen de Cælo visum commemorat, ut diei species noctu luceret (b);* quæ de Boreali lumine, vel Aurorâ Boreâ intelligenda fore videtur.

(a) I. c. 15. (b) II. c. 35.



PHYSICÆ
PARTICULARIS
TRACTATUS PRIMUS.



DISPUTATIO IV.

De Corporibus Terreſtribus.



Uamvis, ut optimè a Cicerone dictum accepimus, sint e Terrâ homines, non ut incolæ, sed quasi spectatores superarum rerum, atque cœlestium; plerisque tamen Philosophis id non immeritò fortasse vitio verti solet, quod oculos, animumque ad superna convertant in jucundissimâ cœlestium, sublimiumque corporum contemplatione defixi, ea verò, quæ in amplissimâ Telluris superficie, veluti pulcherrimo quodam theatro, mirâ partium varietate, ac ordine conspiciuntur, sive in ar-

ca-

canis illius visceribus, veluti in uberrimo, fœcundoque sinu continentur, aut prorsus negligant, aut celerî quodam, levique studio percurrant. Quis etenim furor, ut inquit Plinius, extera, ac remota corpora curiosius scrutari, eorumque substantiam, magnitudinem, periodum diligentius inquirere; nostræ verò Telluris, quam veluti sedem, ac domicilium incolimus, partes, ordinem, ceteraque id genus admirabilia, quæ sensibus ipsis observantur, contemnere? illorum ferè instar, qui de remotissimæ alicujus Urbis mœnibus, civibus, legibus solliciti forent, patrios verò, atque domesticos etiam lares ignorent. Facturos itaque nos operæ pretium, confidimus, si cœlestia, ac sublimia corpora jam contemplati, terrestria denique, sin pari, quâ meliori tamen licebit diligentia, complectamur. Cùmque *Telluris*, *Mundi*, vel *Terræ* nomine, universa Terræ simul, & Aquæ congeries, hoc est *Globus*, & *Orbis Terraqueus* intelligatur; nos hoc ordine progrediemur, ut antea Telluris ipsius locum, magnitudinem, figuram, partes, montes, & quæ ex illorum visceribus effodiuntur, metalla, fossilia, &c. exponamus; tum oceani divisionem, altitudinem, æstum, &c. fontium originem, & si quæ sint alia, quæ ad Aquæ Elementum pertineant, prosequamur; sicque, explicatis omnibus, quæ de Cœlo, & Mundo dicenda fuerant, suprema tandem manus primo huic Physicæ Particularis Tractatui, quod felix, faustumque sit, imponatur.

CAPUT PRIMUM.

De Terræ loco, & quiete.

I.



Uem in Universo locum Tellus obtineat, quo cum ceteris Universi partibus ordine conjungatur, quam denique motus, aut quietis sortem sortita fuerit, satis, ut opinor, explicatum videri poterat, cum varia Mundi systemata, præsertim verò Copernicanam hypothesim exponeremus. Diximus enim plerisque videri, Tellurem, veluti immobile centrum in Universi medio positam esse; cum alii nobiliorem illi locum cum Pythagorâ, aliisque compluribus tribuentes, inter Planetas, qui perenni motu circa Solem torquentur, illam collocaverint. Sed ipsa tamen loci opportunitas, rerumque dicendarum ordo exigit, ut ex Veteribus Philosophis, qui Pythagoricam, sive Copernicanam hypothesim averfantur, huc quoque plurima deducantur; ut inde appareat, quibus illi rationibus medium, ac immutabilem Telluri locum concefferint.

II. Tellurem itaque in centro Mundi positam esse, partim ex cœlestibus observationibus, partim ex ipsâ Telluris naturâ, partim ex Dei voluntate communiter ostendi solet.

1. Cum etenim ex singulis Terræ partibus, sive in quâlibet regione, dimidia Cœli pars, sive alterum hæmisphærium videatur, ac supra

pra horizontem emineat, alterum verò infra horizontem deprimatur; necessarium est, ut hic horizon, qui per Terram transiens hæmisphæria dividit, per ipsum quoque Universi, vel Cœli centrum transeat, alioquin inæqualiter Cœlum divideret.

2. Ex ipsis etiam Lunæ eclipsibus id manifestissimè demonstratur: tunc enim eclipsim patitur Lunâ, cùm est opposita Soli diametraliter, hoc est ab illo recesserit integrâ circuli semiperipheriâ, sive grad. 180., quod certè fieri non posset, nisi Terra, cujus interpositione inter Lunam, & Solem, radii solares impediuntur, in hac ipsâ Cœli diametro, sive Cœli, & Universi centro reperiretur.

3. Cùm denique bis in anno Æquinoctia, hoc est diei, noctisque æqualitas observetur; faciliè apparet, quod Sol circa Tellurem ita diurno motu circulum describit, ut in illius centro Tellus existat, adeoque dimidia circuli pars supra horizontem visibilis, altera verò infra horizontem, ac invisibilis describatur.

Hæc itaque sunt argumenta, quibus *persuadent Mathematici*, Terram in medio Mundi sitam ad universi Cœli complexum, quasi puncti instar, obtinere, quod centrum illi vocant (a).

III. Quandoquidem verò Lunæ, vel Solis eclipses, eorumque causa, & origo, vel antiquissimis temporibus innotuerat, ut certâ quadam lege, ac periodo fieri, ac prædici posse viderentur, quod de Chaldæis, & Thaletæ memoratur; mirari certè quis poterit, cur primus Parmenides fuisse dicatur a Laërtio, qui Terram globosam, ac rotundam, &

in medio sitam docuerit (a) ; cùm præfertim, Thales ipse , & Thaletis æmuli Terram mediam existimaverint (b), & Thales obliquitatem Zodiaci , annuam Solis periodum circa Terram , varias anni tempestates deprehendit, quod , nisi supposito superiori Telluris loco, præstari non poterat.

IV. Aristoteles verò , quemadmodum Peripatetici nostri , superiora quidem argumenta afferunt , quibus Tellurem in medio Universi collocatam esse Veteres arbitrabantur ; sed aliâ tamen , atque , ut ipsis videtur , meliori , & invictâ ratione ex ipsâ Telluris naturâ desumptâ id se conficere posse opinantur . Supponit itaque Aristoteles hanc esse corporum , gravium naturam , ac legem , ut ad Universi centrum ferantur : *naturam enim habet id , quod gravitatem habet , ut ad medium feratur ; ita ut si quis etiam latis particulis ipsius Terræ , antequam cadant , subtrahit Terram ; tamen illa ferentur deorsum , nullo obistente (c)* ; deinde Terram esse gravem ostendit , quodd singulæ illius partes , vel singula terrestria corpora gravia sint , ideoque multo gravior sit ipsa Terræ moles : *quomodo enim parva Terra particula , si elevata demittatur , fertur , & manere non vult , & major semper velocius ; totam autem Terram si quis demittat , cùm elevata fuerit , non utique feratur (d)* ? Sed quàm præjudicata quædam , & vulgaris opinio Aristotelem hac in parte fefellerit , alibi ostendimus , cùm hypothesi Copernicanæ hæc eadem Terræ gravitas obiceretur . Demonstravimus enim

(a) *Laër. IX. seg. 21.* (b) *Plin. II. c. 11.* (c) *Tex. 104.* (d) *Tex. 77.*

enim certum quidem esse, quòd omnes Terræ partes, sive terrestria corpora, ad Terræ centrum, vel medium feruntur; sed quòd omnia corpora, quæ gravia sunt, ad Universi quoque centrum moveantur, non aliâ ratione ostendi posse, quàm si perperam, atque inutiliter supponatur, quod idem sit centrum Universi, ac centrum Terræ: quod fallaciæ genus Aristoteles ipse commisit, & illi meritò a Recentioribus opponi solet. Sed etiamsi concedatur corpora gravia ad Universi centrum ferri oportere; nihil tamen efficeret Aristoteles, nec ullâ ratione Tellurem ipsam gravem ostenderet: quamvis enim singulæ Terræ partes seorsim sumptæ graves sint, quia inditam habent vim, quâ ad ceteras terrestris molis, sive compositi partes accedant, & illis uniantur, atque ad centrum extra se positum ferantur; omnes tamen simul sumptæ, vel tota Terræ moles gravis esse non potest: cùm neque sit alterius compositi pars, neque proinde punctum habeat extrinsecum, ad quod ferri debuerit: & sicuti quælibet pars est essentialiter minor toto, sed omnes partes simul sumptæ toto minores esse non debent, quia proprietas illa, quod minor sit toto, convenit parti, ut pars est; ita singulæ quidem partes Terræ graves erunt, non verò tota illorum omnium congeries, & aggregatum, vel tota Terra; quia similiter gravitas convenit parti, ut pars est, & centrum habet extrinsecum, ad quod innatâ vi impellitur, quod toti convenire non potest.

V. Immobilis est itaque Tellus, non quòd rapido Cœli motu coerceatur, ut Empedocles existimavit, non quòd aëre, ut Anaximeni, vel

vel aquâ, ut Thaleti videbatur, sustineatur ; sed solum quodd , ut Anaximander putavit ; quocumque demum in loco posita, vel initio creata fuerit, cum sit gravitatis, ac levitatis expers, locum deferere, vel mutare non potest, nisi illius imperio, & voluntate, qui *fundavit Terram super stabilitatem suam (a)*, & *commovet Terram de loco suo (b)* .

VI. Rationes autem illæ, quibus communiter ostendi solet Tellurem in Universi medio positam esse, non adeo certæ, perspectæque censeri debent, ut illis opponi plura non possint. Quamvis enim Terra ab Universi, vel nostri vorticis medio, seu centro, pluribus etiam millionibus leucarum distaret ; in ipso tamen Universi medio sensibilibiter appareret, atque altera sphaeræ cœlestis medietas supra horizontem visibilis foret, invisibilis altera infra horizontem ipsum occultaretur. Certè qui Copernicanam hypothesim amplectuntur ; atque Tellurem annuo motu circa Solem torqueri existimant, in circulo, cujus radius, sive distantia Telluris a Sole, seu centro Universi, sit 33. millionum leucarum, hoc est, 100. millionum miliarium Italicorum ; sensibilibiter tamen illa in Universi medio collocatam esse arbitrantur, ut nulla siderum parallaxis, aut hæmisphaerii inæqualitas oriri inde debeat. Quid quod Planetarum, atque etiam fortasse siderum orbita Telluri excentrica, adeoque inæqualiter ab horizonte divisa concedi debet, quid etiam, quod Planetarum eclipses ob refractiones accurate curate


(a) *Psal.* 103. v. 5. (b) *Job.* c. 9. v. 6.

curatè fieri, vel observari non possunt eâ lege, quæ illorum motibus conveniret?

Sed ne his, quæ dubia, & incerta sunt immoremur, communis est Philosophorum omnium opinio, quod etiamsi Tellus in Universi medio accuratè posita foret, atque unum, & idem utriusque centrum existeret; attamen nobis, qui a centro Terræ integrâ semidiametro terrestri, hoc est ferè 4000. milliariis Italicis distamus, dimidia Cœli pars apparere debet, ac si in ipso Universi, vel Terræ centro reperiremur. Quemadmodum igitur 4000. milliarium intervallum ob infinitam ferè cœlestium corporum distantiam, insensibilis est; quid ni insensibilis etiam foret duplo minor distantia: cùm præsertim ipse Sol, quamvis hyeme 100. circiter semidiametris terrestribus, sive 300000. milliariis Italicis Telluri proximior sit, quàm æstate; nihilo tamen major, aut clarior oculis judicibus appareat? Nulla igitur certâ ratione demonstrari unquam poterit Tellurem in vero Universi medio positam esse, sed ex verisimili solum conjecturâ, & ex sensibili siderum apparentiâ non infeliciter deduci poterit, aut in ipso Universi centro collocatam esse, aut insensibili certè, nobisque inconspicuo intervallo distare.

C A P. II.

De Telluris Figurâ, ejusque dimensionibus juxta veteres.

I.  Unc celeberrima quæstio de verâ Telluris Figurâ, ejusque dimensionibus exponenda, ac, si fieri fortasse poterit, dirimenda nobis proponitur, quæ meliora veterum, recentiorum Philosophorum ingenia semper exercuit: ut nihil ferè illustrius in hoc Physicæ Particularis Tractatu reperiri possit, quod accuratioribus studiis exploratum esse videatur.

Cùm verò innumeræ ferè sint opiniones, quæ hac in parte ab illustrioribus etiam Philosophis inter se dissidentibus afferuntur; juverit illas hoc ordine exponere, ut principem, ut par est, veteribus locum concedamus, eorumque Placita breviter, & accuratè nunc complectamur; deinde verò nuperrima recentiorum inventa ex ipsis ferè Astronomiæ, ac severioribus Physicæ fontibus derivata prosequamur.

II. Tellurem itaque columnæ, vel cylindro similem esse putavit Xenophanes, cùm *in infinitum fibratam*, ac extensam esse docuerit (a); Scaphæ figuram illi concessit Heraclitus (b), atque Chaldæi (c), Leucippus tympani

(a) *Plutar. II. cap. 11.* (b) *Laër. IX. seg. 8.*
(c) *Di. n. II.*

ni (a), disci Democritus, nonnulli pyramidis (b), alii pineæ nucis (c), veteres Orphici, alique plures Ovi; plerique tamen, ut Epicurus, Anaximenes in planam veluti campi superficiem extensam esse putarunt.

III. Illustriora tamen veteris sapientiæ lumina Plato (d), Parmenides (e), Stoici, Thales, Pythagoras (f), & Aristoteles (g) sphaericam esse Telluris figuram existimarunt; quemadmodum etiam Anaximander, etsi cylindricam, aut columnarem figuram illi tribuisse perperam dicatur (h); *Globosam* tamen, ac *rotundam esse*, & *medio loco veluti centrum constitutam* (i) expressè docuit; neque intelligi sanè, vel explicari posse videtur, quomodo conversiones Solis, & æquinoctia notaverit, primusque Terræ, Marisque circuitum descripserit, & sphaeram insuper construxerit; nisi opinionem illam a præceptore traditam de sphaericâ terræ Figurâ supposuerit. Quis autem in hac asserendâ Telluris figurâ ceteris præluxerit definiri vix potest, cum id Aristoteli, Stoicis, Parmenidi, Thaleti, & qui omnibus antiquior est, Hesiodo tribuatur (k).

IV. Credibile est tamen opinionem illam longè vetustiorē esse, ut non immeritò prorsus ad Assyriorum, vel Chaldaeorum tempora

(a) *Plut. loc. cit.* (b) *Apud Cleom. I. c. 8.* (c) *Plin. II. c. 64.* (d) *In Phædo.* (e) *Laër. IX. seg. 21. Plut. III. 10.* (f) *Laër. VIII. seg. 26.* (g) *II. de Cæl. c. 109.* (h) *Laër. II. & Plut. III. cap. 20.* (i) *Laër. II. (k) Vid. Laër. VIII.*

ra referatur; cùm præsertim terrestris Globi rotunditas ex Astronomicis observationibus, quarum illi peritissimi fuerunt, facile demonstretur.

1. Si enim ad aliquam Mundi partem, ex gr. ad boream, accedatur; horizon ex illâ parte deprimi, polus, & sidera æquabiliter, ac certâ lege elevari videntur: cùm in oppositâ parte deprimi, & occultari sidera, ac horizon elevari conspiciatur. Sic etiam ad Orientales Mundi regiones properanti Sol citius oritur, tardius illi, qui ad occidentales accederet: quæ certè fieri, vel explicari non possent, nisi devexa, vel rotunda foret Telluris superficies.

2. Rotunda certè, vel circularis est umbra, quæ ex Terrâ in partem Soli aversam proiicitur; idque apparet in Lunâ, dum ex interpositione Telluris, terrestrem scilicet umbram subiens, ut antea diximus, eclipsim patitur. Cùm igitur rotunda, vel circularis umbra nonnisi a rotundo, vel circulari corpore oriri possit; necessarium est, ut ipsa quoque Telluris Figura rotunda dicatur; præsertim si cum Pithagorâ in Copernicanâ hypothesis eadem Tellus inter Planetas, qui certè rotundi sunt, enumeretur.

3. Quod si Astronomicis observationibus Physica experimenta conferre libuerit, innumera ferè videntur esse, quæ rotundam hanc Terræ figuram ostendant. Sic navis in Oceano æquabili, ac pacato motu delata, atque ad litus properans, non tota simul ex litore conspicitur, sed antea mali fastigium, deinde inferior antennarum pars sensim elevari videtur, ut nonnisi post aliquod temporis spatium
pup-

puppis, & prora, ac denique carina conspiciatur: quemadmodum prorsus qui in navi positi, optatumque litus intuentur, primum quidem turrium, ac phari fastigia, sensim, que deinde depressiora loca, & litora conspiciunt, videnturque sibi ex Oceano in litus descendere, secus ascendere, dum ex litore in altum properant. Hæc autem omnia, quæ, quàm, quæ maximè, explorata sunt, circumnavigatâ jam sæpius totâ Tellure, quid aliud evincunt, nisi convexam, & sphericam esse maris superficiem, in quâ aquæ veluti cumulo intumescant, & navem inter, & oculum in litore positum interjectæ visum impediant; ideoque cum eadem ferè sit Telluris, & Oceani superficies, ipsa quoque Telluris Figura rotunda esse debeat?

4. Neque alia certè esse potest, ut olim egregiè demonstravit Archimedes in libro *de iis, quæ vehuntur in fluido*, quàm rotunda maris, fluminum, & Oceani superficies. Cum etenim ingenita sit corporum gravium conditio, ut certo quodam impetu, ac vi gravitatis, ad Terræ centrum; quò propiùs poterit, nitantur accedere; necessariò fit, ut si quæ partes elatiores, sive a centro remoniores fortasse fuerint, in decliviora loca ruere debeant, donec æqualiter partes omnes a centro distent, & æquilibrio factò, immobiles perseverent; partes autem illæ æqualiter undique a centro distantes sphericam formam acquirere, & rotundam Oceani superficiem efficere debent. Cum verò litorum, ac universæ Terræ superficies, ut antea dicebamus, eandem ferè cum aquâ maris convexitatem, & a centro Terræ distantiam fortiatur; ipsa quoque Ter-

Terræ figura rotunda censerî debet; non accuratè quidem, & mathematicè; sed physicè solùm, ac sensibilibiter; cùm montes, qui Telluris superficiem inæqualem, & asperam reddunt, ad totam illius molem, eorumque altitudo ad Telluris semidiametrum vix ullam sensibilem proportionem habeant, ut opportuniùs, & accuratiùs alibi demonstrabitur (a). Interim hîc meritò supponi poterit sphaericam esse Telluris figuram, ut inde faciliùs illius dimensio juxta Geometriæ leges exhibeatur: compertum est enim, quod ubi cognita sit semidiameter, aut radius sphaeræ, illius etiam perimenter, sive circumferentia maxima, singuli gradus, ac universa moles erigitur; cùm Archimedes ostenderit inter diametrum, & peripheriam circuli, ex cujus revolutione generari concipitur sphaera, esse eandem ferè proportionem, quæ inter 7., & 22. reperitur; sive ut accuratiùs a Metio definitum est, atque ab Astronomis, & Geographis Parisiensibus in celeberrimâ Telluris dimensione usurpatum, inter 113., & 355.

V. Ejusmodi verò dimensiones Telluris a veteribus factæ, ut aliqua posteriori loco de ipsis addamus, innumeræ circumferuntur, quarum plurimæ, non modò rudes, ac imperfectæ censerî debent, sed ab ipsâ veritate mirificè abhorrentes, tantoque accuratiores existimari poterunt, quanto recentiores fuerint. Celeberrima est inter veteres Eratosthenis dimensio, quæ, cùm Eratosthenis ipsius libri III. *de Geographia* perierint, a Cleomede exhibetur, tantique a veteribus est habita, ut illam

(a) *Vid. Sen. IV. c. 11.*

lām geometricam demonstrationem Cleomedēs ipse vocaverit (a), indubitabilem, ac evidēzissimam Macrobius, Plinius denique ausum ita subtili computatione comprehensum, ut pudeat non credere, cū Eratosthenes fuerit in omnium quidem literarum subtilitate, & in hac utique præter ceteros solers (b). Eratostheni hac in parte præluxerat Hipparchus, quemadmodum Eratosthenem sequutus est Possidonius, & Dionysiodorus ille, in cuius sepulchro epistola ad superos reperta dicitur, in quā ad infimum Terræ locum pervenisse se ferebat, esseque eò stadiorum 42. millia; ex quo consequuta computatio est circuitum esse 252000. stadiorum (c). Marinus quoque Tyrius, Theon, alique complures id operis sunt aggressi, ac præsertim Arabes, cum Snellius reliquorum omnium industriam superans, novam, & accuratam Telluris dimensionem Rhinlandicis pedibus definivit. Quod alii denique Snellium æmulati, ut Ricciolius, Tycho, &c. tentarunt.

VI. At superiori seculo Picartus, accuratorem adhuc Telluris dimensionem exhibuit, quæ a sequentibus illustrata, & si quis error irrepsit, emendata est. Ingeniosa verò methodus, quā veteres, aut recentiores illi Geographi dimensionem ipsam sunt assequuti, apud Ricciolium, Varenium, Picartum legi poterit: nos etenim accuratiores illorum quidem dimensiones subjecto schemate oculis exhibere par duximus, cetera tamen ex Geographis ipsis petenda fore arbitramur.

Tom. IV. D d Ty.

(a) I. c. 10. (b) II, c. 108. (c) Plin. II, c. 109.

	Gradui.	Circumf.	Semidia.
Snellius mill.	60. $\frac{2}{5}$	14614.	3918.
Ricciolius stadia fere	652.	134796.	37388.
Picartus hexa- pedas Parisie.	57060.	10541600.	3269197.
Cassinus	57192.	1062512.	
Picartus millia- ria Florent.	63. $\frac{7}{20}$	11806.	7167. $\frac{3}{4}$
Norwoodus a- pud Newton			
III. prop. 19.	57360. h.	10618000.	

VII. Cum verò Geographi diversis mensuræ generibus in peragendâ, vel exponendâ Terræ magnitudine usi fuerint, juverit illa inter se comparare, eorumque proportionem ostendere: ut, si fortè dimensionem ab aliquo in uno mensuræ genere traditam in alio genere exhibere, vel duas inter se conferre libuerit, id accuratè, ac certò fieri possit; cum præsertim eadem mensurarum proportio innumeris etiam aliis experimentis, & observationibus intelligendis plurimùm conferat.

1. Romani itaque hac ratione metiebantur, ut ex punctis lineam, ex 12. lineis pedem, ex 5. pedibus passum Geometricum, ex 125. passibus stadium (quo Græci uti consueverunt) ex octo stadiis, sive passibus 1000. milliaria componerent: quod si vetera cum recentioribus milliariis comparentur, inæqualia deprehenduntur, ut vetus milliare Italicum ad recens sit ut passus 1000. ad passus

fus 984. sive ut 20. ad 25. quod observari plurimum debet.

2. In Galliâ ex 12. lineis pollices, & 12. pollicibus pedes componuntur, ut ex 6. pedibus hexapedæ, seu *toises*, ut inquit, & ex hexapedis leuca; ita ut leuca Parisiensis, quâ Cassinus, Picartus, aliique communiter utuntur, contineat hexapedas 2000. communis Galliæ 2282. leuca maris 2853.

3. Pertica Rhenensis, Leydensis, sive Rhinlandica, quâ usus est Snellius, continet pedes Rhinlandicos 12. & milliare Rhinlandicum perticas 1500.

4. Milliare Florentinum componitur ex 3000. ulnis Florentinis, quarum singulæ sunt ad hexapedas Parisientes ut 9. ad 32.

5. Milliare Bononiense perticis Bonon. 500. quarum singulæ 10. pedes Bonon. continent.


6. Milliare Germanicum est æquale 4. Italicis.

VIII. Diversorum autem pedum proportio ita a Cassino, aliisque accuratissimè definitur, ut si linea, vel duodecima pars pedis Parisiensis in 10. particulas æquales divisa concipiatur, earum particularum contineat pes Parisiensis

Parisiensis	1440.	
Bononiensis	1682.	
Danicus	1404.	
Leydensis	1390.	
Londinensis	1350.	
Svevicus	1316.	<i>Hist. Acad.</i>
Romanus Capitolii	1306.	1718.
Amstelodam.	1256.	
Ulna Bononi.	2640.	
Ulna Flor.	2430.	
Palmus Rom.	990.	

C A P. III.

*De Circulis , Zonis , Climatibus
Terræ , sive de illius divisione
astronomicâ ,*

I.  Edium Universi locum, si non verè, & accuratè, saltèm sensibiliter, & apparenter a Tellure occupari, ejusdemque Telluris figuram juxta accuratiores Philosophos veteres, sphæricam esse satîs, ut opinor, in superiori Capite demonstravimus. Quandoquidem verò eadem ferè divisio, quæ ab Astronomis omnibus usurpatur in Cœli superficie, quam similiter rotundam, & sphæricam esse supponimus, in ipsâ quoque Tellure, quæ Cœli, ac Universi veluti centrum supponitur, fieri debet, ut quemadmodum Cœli superficies pluribus circulis in Armillari Sphærâ descriptis distinguitur, iisdem quoque terrestris etiam superficies dividatur. Singulas itaque divisiones illas Terræ, quæ ex cœlestium corporum motu, vel ordine, hoc est ab ipsis Astronomiæ legibus oriuntur, hîc ordine subiiciemus. Vix etenim plurima intelligi posse videntur, quæ de Telluris figurâ juxta recentiores, de aquæ motu, aliisque innumeris inferiùs dicenda nobis occurrent, nisi priùs hæc divisio accuratissimè peragatur.

II. Suos itaque polos arcticum, & antarcticum habere concipitur Terra, circa quos ipsa diurno motu juxta Copernicanam hypothèsim

tor-

torqueatur; habet, & axem, qui Tellurem ipsam per centrum in medio trahiciens utrumque polum Terræ conjungat, & si utrâque ex parte protraheretur, in Universi, vel Mundi ipsius polos incideret.

Deinde circulus æquinoctialis, vel æquator in illâ describitur; horizon, meridianus, obliqua Zodiaci fascia, Tropici, & polares circuli; & quemadmodum ejusmodi circuli in Cœlo descripti, si meridianum, & horizontem exceperis, immobiles, & immutabiles sunt, ita quoque meridianus, & horizon terrestris in variis regionibus variari debet, ceteri verò immutabiles, & in diversis etiam regionibus iidem sunt, unde sphaeræ inæqualitas, dierum, annique tempestatum vicissitudo, præsertim verò Zonarum, Climatorum, & umbrarum varietas, & numerus oriatur.

III. Antequam tamen hæc omnia suis in locis inferiùs exponantur, nonnulla de *longitudine*, & *latitudine* regionum dicenda sunt, quæ ex meridiano, vel æquinoctiali circulo Terræ desumitur; & ex quibus infinita serè lux in Astronomicis, & Geographicis rebus haberi solet.

Nihil autem aliud est longitudo alicuius loci, vel regionis, quàm distantia, quæ reperitur inter meridianum circulum illius loci, & primum meridianum; latitudo verò distantia illius loci ab Æquatore terrestri, sive distantia puncti verticalis, aut Zenith ejusdem loci ab Æquatore cœlesti. Hinc longitudinis gradus, sive meridianorum distantia, ab occidente in orientem supra Æquatoris gradus meridianorū circulis interpositos numerantur; latitudinis verò per gradus illius meridiani,

qui per datum locum, aut ejusdem loci Zenith transire concipitur. Eâ verò de causâ longitudinis gradus ab occidente in orientem, latitudinis verò ab Æquatore ad polos numerari solent, quia Telluris superficies, & extensio veteribus cognita major erat ab ortu in occasum, quàm ab austro in boream, unde hæc illius latitudo, illa longitudo vocari consuevit.

Ut igitur alicujus propositi loci longitudo reperiat, inveniri debet arcus ille Æquatoris, qui inter primum meridianum, & meridianum loci propositi reperitur: quemadmodum ut dati loci latitudo, vel, ut inferius ostendetur, altitudo poli habeatur, inquirendus est arcus meridianus, qui ab Æquatore, & puncto verticali, sive Zenith intercipitur.

IV. Inveniendæ verò longitudinis methodus a Veteribus usurpata fuit observare eclipses Lunæ, quæ in diversis locis diverso tempore apparere debent, & ex temporum intervallo, quibus eclipses illæ diversis locis incipiunt, eorundem locorum distantiam scrutari. Cum enim spatium 24. horarum cœlestia corpora periodum integram, hoc est 360. gradus, circa Tellurem perficiant, singulis horis 15. gradus percurrent; adeoque si Sol ex. gr. Florentiæ meridianum attigerit horâ 17. Lutetiæ verò 18., aut, si eclipsis Lunæ Florentiæ incœperit horâ 12. Lutetiæ verò 13., necessarium est, ut inter meridianum Florentiæ, & Lutetiæ 15. gradus interjecti sint, sicque locorum omnium meridiani circuli, sive longitudines haberi poterunt; cūque singulis Terræ gradibus 63. milliaria tribui consueverint, facile inferri poterit, & in mil.

milliaribus exhiberi distantia unius ab alio loco. Quia tamen Lunæ eclipses, aut rarè contingunt, aut interpositis nubibus observari non possunt; illarum loco ab Astronomis adhiberi solent eclipses Satellitum Jovis, sive immersiones, & emersiones illorum ex umbrâ Jovis: eclipses enim ejusmodi frequentes adeo sunt, ut singulis diebus illarum aliqua observetur, earumque periodus a Cassino accuratissimè definita est. Attamen Cassinus filius eclipsim siderum omnium, dum interpositâ Lunâ occultantur, verisimiliùs, atque feliciùs adhiberi posse putavit, quòd extrema pars Satellitum Jovis, quæ omnium postrema umbram ingreditur, nonnisi longioribus telescopiis deprehendi possit, atque ex utriusque luce spuria varietas aliqua oriatur, quod infixis sideribus, si præsertim obscuriori Lunæ (a) limbo occultentur, fieri non potest. Harum igitur alterutrâ, facili, & expeditâ methodo divinitus fere nobis oblatâ locorum distantia inter se comparantur, eorumque longitudo accuratissimè deprehenduntur.

V. Sed quia longioris operæ, ac prolixum fuisset urbis alicujus longitudinem ex incognitâ alterius urbis longitudine expiscari, atque hujus iterum ex alterius longitudine; hinc certus aliquis, constans, & generalis veluti terminus in Telluris superficie constitui debuit, a quo longitudinis gradus numerari inciperent; ut illa alicujus urbis longitudo diceretur, quæ inter primum omnium meridianum sic constitutum, & dati loci, meridianum reperitur. Cum verò primi meridia-

(a) *Vid. Hist. Acad. 1705.*

ni circuli constitutio ex solo Astronomorum arbitrio pendeat, ac omnino perinde sit unum potius, aut alium locum eligere, per quem ille ducatur, ideo plurimum inter se Astronomi differre solent, ut Tycho Uraniburgum suam, alii Toletum, Lutetiam alii elegerint: Ptolemæus, aliique Veteres, quemadmodum etiam Geographi Galli, ex edicto Regis Ludovici XIII. Insulam Ferri, quæ inter Fortunatas, sive Canarias occidentalior est, adeoque ultima Telluris Veteribus cognita regio habebatur; Geographi denique Batavi Terzeram inter Azores maximè occidentalem assumunt, ut primus meridianus, a quo ceteri numerari incipiunt, per eadem loca transire concipiatur.

Incredibile est autem quantus ex hac accuratâ longitudinum cognitione in Geographiâ splendor affulserit; quàm graves Scriptorum melioris quoque notæ errores emendati jam fuerint, innumera loca propriis sedibus restituta, certa regionum magnitudo, eorumque limites definiti, quæ apud Geographos ipsos observari maximè poterunt (a). Sic Asia 500. leucis proximior nobis ostenditur, quàm antea crederetur: America 6. gradibus, vel 150. leucis remotior: Urbs Siamensis, quæ in longitudinis gradum 145. coniecebatur, in gradum 121., ut par erat, est revocata: pars illa Italiæ, quæ *magna Græcia* dici, in Tabulis tamen minor Hellade repræsentari consueverat, revera Græciâ, sive Hellade major demonstratur.

VI. Paullò difficilior est latitudinis, sive

ar-

(a) Hist. 1706.

arcus meridiani circuli, qui ab *Æquatore*, & puncto verticali alicujus dati loci continetur, inquisitio. Duplici tamen ratione id fieri poterit. Primò quidem si explorata sit elevatio poli supra horizontem, quæ latitudini æqualis esse debet: cum enim arcus meridiani, qui inter æquatorem, & polum reperitur, æqualis sit arcui ejusdem meridiani inter horizontem, & Zenith intercepto (uterque enim est circuli quadrans) si communis illorum pars, hoc est arcus inter polum, & Zenith auferatur, arcus residuus inter horizontem, ac polum, sive elevatio poli, æqualis erit arcui inter æquatorem, & Zenith, sive latitudini loci.

Cognosci autem poterit elevatio poli, si in plano horizontali *A B* * infigatur stylus *C D* perpendiculariter illi insistent; deinde notetur aliquis locus *E*, in quem proiciatur, & desinat umbra styli ante meridiem, describaturque circulus *E F G* circa stylum veluti centrum; umbra siquidem sensim brevior fiet, donec Sol meridianum attigerit, tunc verò sensim crescere incipiet, noteturque in peripheriâ punctum *G*, in quo rursus umbra pomeridiana desinat, dividaturque bifariam arcus *E G* in *F*, & jungatur *F C*, linea *C F* erit meridiana, quod ex Solis motu, meridiani circuli proprietatibus, faciliè intelligi poterit. Ubi verò meridiana linea descripta fuerit * erigatur Quadrans super ipsam: hinc etenim vera polaris sideris altitudo, juxta celebres Astronomiæ leges apparebit, quod in subiecto aliquo schemate faciliùs intelligetur.

Quod

* Fig. XIII. * Fig. XII.

Quod si, ob refractiones, error aliquis in inquirendâ poli altitudine irrepere fortasse potuerit, altera methodus securior, & accuratior adhibeatur, quâ ope ejusdem quadrantis alterius sideris verticî nostro proximioris, dum per meridianum transit, elevatio, sive distantia ab horizonte inveniatur; tunc enim si cognita ex astronomicis Tabulis ejusdem sideris declinatio, sive distantia ab Æquatore, vel polo ex exploratâ jam elevatione rite auferatur, vel addatur, altitudo poli, sive latitudo loci demonstrabitur.

VII. Quemadmodum verdè ex meridiano, vel æquatore circulo, qui in cœlesti sphærâ describitur, terrestris etiam æquator, meridianus, longitudo, vel latitudo locorum distinguî solet, ita prorsus ex aliis circulis in cœlesti superficie designatis, alii quoque circuli in Telluris superficie concipiuntur, unde aliæ divisiones oriuntur. Sicut igitur Cœlum in quinque Zonas dividitur, ita quoque tropici, polaresque circuli in Terrâ descripti in totidem Zonas Thaleti, Pythagoræ, atque Parmenidi memoratas (a) Telluris superficiem dispartiuntur, ut spatium illud, quod a tropicis continetur, & ab æquatore medium dividitur, *Zona torrida*, Soli subjecta dicatur; spatia, quæ hinc inde a tropicis, & a polaribus circulis finiuntur, mediocri Solis calore affecta, duæ *temperata*; spatia denique, sive terrestris superficieî segmenta, quæ circa polos a polaribus circulis continentur, *Zona frigida* nominantur, quod ob maximam Solis distantiam, & obliquitatem acerrimo frigore premantur.

VIII.

(a) *Plur. II. c. 14. & Posidon. apud Strab. I.*

VIII. Sed quia hæc sola quinque Zonarum divisio, singulis terrestribus superficiei partibus accuratè describendis, variis temporum, ac dierum accidentibus explicandis par esse non poterat, Astronomi, atque Geographi, novam adhuc, & accuratiorē divisionem excogitarunt, quā pluribus circulis Æquatori, non secus ac Tropici, & Polares circuli, parallelis, Zonas ipsas in plura *Climata*, veluti in plures minores, & inæquales Zonas, juxta inæqualem dierum longitudinem distinguerent. Cū enim, ut in Armillari Sphērâ jam diximus, Telluris regiones, quò longiùs ab Æquatore recedunt, longiorem diem solstitialem habere debeant, per ea loca, quorum longissimi, ac solstitiales dies semihorâ inter se differunt, circulos æquatori parallelos Astronomi duxerunt, ut ex. gr. primū Clima inciperet ab Æquatore, ubi longissimus solstitialis dies est 12. horarum, delineret in illâ regione, quæ longissimum diem haberet 12. horarum cum dimidio; secundum Clima exinde ad parallelum aliud extenderetur, in quo dies solstitialis foret 13. horarum, sicque deinceps, donec sequentes dies non semihorâ, sed integris diebus, & mensibus etiam præcedentes excederent, ut circa polos fieri oportere jam demonstravimus.

IX. Ex variis etiam Zonarum, & Climatorum positionibus intelligi faciliè poterit, cur aliqui populi, aut aliquarum regionum incolæ *Antaci*, *Periaci*, vel *Antipodes* dicantur. Si etenim sint in eodem parallelo, sive eandem latitudinem habeant, sed in diverso ejusdem meridiani semicirculo reperiantur, *Periæci*, vel *circumhabitatores* vocantur. Si verò in eodem

eadem meridiano, vel longitudine collocati; hinc inde ab Æquatore æqualiter versùs utrumque polum recedant, hoc est æquales habeant latitudinis gradus, erunt Antæci, vel *contra habitatores*. Quod si non diversam solum ejusdem meridiani circuli partem incolant, sed diametraliter etiam invicem opponantur, Antipodes dicentur.

X. Intelligi quoque poterit alia incolarum divisio, quæ, etsi ab umbrâ, quæ meridiano tempore ab illis projicitur, desumi soleat, ex variis tamen Zonarum positionibus oriri debet, ut aliqui dicantur *Ascii*, *Amphyscii*, *Eteroscii*, *Periscii*, *Ascii-Amphyscii*, *Ascii-Eteroscii*.

1. *Ascii* dicuntur illi, qui meridiano tempore nullam Solis umbram projiciunt.

2. *Periscii*, qui uno, eodemque die umbram Solis circulariter in singulas horizontis plagas dirigunt.

3. *Eteroscii*, quorum umbra meridianæ semper in alterum polum determinatè projicitur.

4. *Amphyscii*, quorum umbræ meridianæ nunc in Boream, nunc in Austrum feruntur.

5. *Ascii-Eteroscii*, qui uno die nullam, ceteris semper in unum polum umbram mittunt.

6. *Ascii-Amphyscii*, qui duobus quidem diebus nullam meridianam umbram projiciunt, reliquis verò partim in unum, partim in alterum polum hanc dirigunt.

Qui regiones torridæ Zonæ subjectas incolunt, sunt *Ascii-Amphyscii*, bis enim in anno, cum Sol ab uno ad alium. & ex hoc iterum ad primum tropicum accedendo, ver-

tici

tici illorum imminet, nullam in meridie umbram projiciunt, unde sunt Ascii; reliquis autem diebus, prout Sol ab illorum vertice, vel Zenith versùs unum, aut alium tropicum, sive polum digreditur, nunc in unam, vel aliam partem, hoc est oppositam illi, in quâ Sol reperitur, meridianam umbram dirigunt.

Quorum verticale punctum, sive Zenith in alterutro tropico reperitur, sunt Ascii-Eteroscii, quia semel in anno, cum Sol ad tropicum pervenerit, verticaliter illis imminet, unde nulla umbra orietur; ceteris autem diebus meridianam umbram in eandem semper Cœli partem, vel oppositum tropicum dirigunt. Qui in temperatis habitant, sunt Eteroscii; nunquam enim Sol illis verticalis esse potest, sed obliquè semper ex eadem Cœli parte illos respicit, adeoque semper in eandem partem illorum umbræ feruntur.

Periscii denique sunt, aut certè forent, quæ regiones polis subjectas incolerent, & sphaeram parallelam haberent; iis etenim Sol diurno motu circulos horizonti parallelos describeret, ideoque Solis umbra in singulas horizontis plagas circulariter moveretur.



C A P. IV.

De Telluris figurâ juxta Recentiores.

I.



Beatissimas Plato futuras dicebat Respublicas, si aut Philosophi dominarentur, aut saltem hi, qui gubernant, divitiâ quadam sorte philosophentur. Nos verò Philosophis ad solam rerum contemplationem destinatis, non Philosophiæ inodò, sed omnibus etiam bonarum artium generibus præclare consultum iri putamus, si hæc gravissima naturalium rerum tractatio digna Principibus, digna Regibus, illorum operâ, & auspiciis promoveatur. Quàm verò feliciter Platonis, bonorumque omnium vota impleverit immortalis ille vir Ludovicus Magnus Galliæ Rex omnium optimarum artium splendore maximè commendatus, universa ferè Parisiensis Academiæ monumenta uberrimè ostendunt. Quidquid enim ab illius Sociis feliciter inventum, præclare demonstratum, aut mirificè illustratum est, in Regis ipsius munificentiam, & amorem, quo literas, eisque deditos homines complectebatur, referri debet. Quod cum innumeris aliis exemplis, tum verò præsertim ex nuperrimâ hypothese de Telluris figurâ, & dimensione, quæ nunc animo nobis obversatur, intelligi potest; experimentis enim, & accuratissimis observationibus, quæ

tan-

tanti Regis auspicio superiori seculo a Clarissimis Viris factæ sunt, dum incredibili apparatu, & studio per universum Galliarum Regnum meridiana linea describeretur, aut in exteris regionibus Astronomiæ observationes fierent, manifestissimè demonstratum est Telluris figuram non sphericam esse; quamvis non omnes in definiendâ hac novâ Telluris figurâ conveniant. Nevvtonus siquidem, & Hugenius, alique complures sphaeroidem hanc esse circa polos compressam, ad modum capræ, arbitrantur; Cassinus verò, Mairanius, alique sphaeroidem potiùs oblongam, sive imitar ovi prolatam existimant. Utramque hypothesim, & experimenta, quibus illæ innituntur, quo meliori poterit ordine, subiciemus; deinde verò, quæ verisimilior appareat, ostendemus.

§ II. Atque, ut ex Hugenii sententiâ, juxta temporum seriem exordiamur, anno 1672. cum Richerius in Cayennam Americæ insulam Regis jussu missus esset, ut Astronomicas, & Physicas observationes ibi conficeret, fortèprehendit Pendulum, sive Horologium oscillatorium, quo ad distinguenda tempora utebatur, tardius ibi oscillare, sive itum, reditumque conficere, quàm Parisiis; ita ut Ulisippone spatio 24. horarum 2. minuta prima, & 13. tertia adjungi deberent. Paraibæ verò 4.^a 12.^{ta}, ut totidem vibrationes efficeret, quot Parisiis spatio solùm 24. horarum accuratè conficere solebat. Itaque, ex notissimis Penduli, sive Horologii oscillatorii legibus, ejusdem Penduli Parisiis singulis minutis secundis, sive arteriæ pulsibus, oscillantis longitudinem minuendam esse putavit; ut si

Pa-

Parisiis ex Richerio fuerat ped. 3. lin. $8\frac{1}{5}$,
 five ex Nevvtono ped. 3. lin. $8\frac{5}{9}$, in Cayen-
 nâ pendulum singulis minutis secundis oscil-
 lans adhiberetur, quod longitudinem haberet
 ped. 3. lin. $7\frac{1}{4}$, sic etenim vibrationes suas
 æquali tempore iis in locis, ac Parisiis confir-
 cere deprehendebatur.

III. Quod autem Richerius ferè fortuitò
 animadverterat, a compluribus aliis consultò,
 ac diligentissimè exploratum, & confirmatum
 est. Sic Hallejus anno 1677. in Insulâ S. He-
 lenæ reperit Horologium oscillatorium tar-
 diùs moveri, quàm Londini; ut proinde ex
 illius longitudine lineam 1. cum dimid. detra-
 xerit. Quemadmodum etiam D. Varin, &
 Des-Hayes 1681. in Insulâ Goreâ Penduli
 longitudinem 2. lineis Parisiensibus minorem
 esse oportere experti sunt, & D. Couplet an.
 1697. Ulissipone Pendulum lin. 2. cum dim.
 brevius Parisiensi; Paraibæ verò lin. $3\frac{2}{3}$
 adhibuit. Sed ceteros diligentia superasse vi-
 detur Des-Hayes, qui anno 1700. Penduli
 longitudinem in diversis locis invicem com-
 ferens, hanc certâ quadam lege decrescere
 demonstravit, ut in Insulâ

	latitudinis	Pendulum foret
Granade	12. 6. ¹	p. 3. l. $6\frac{1}{2}$
Martinica	14. 44. ¹	p. 3. l. $6\frac{1}{2}$
S. Chrystophori	17. 19. ¹	p. 3. l. $6\frac{1}{4}$
S. Dominici	19. 48. ¹	p. 3. l. $7(a)$ unde

(a) Hist. Acad. 1700, 1701, Nevv. III. prop. 20.

unde subductis erroribus, aut inæqualitatibus, quæ irreperere fortasse potuerint, universaliter constitui posse videtur, ut mediocris differentia inter longitudinem Penduli, quæ Parisiis, & prope Æquatorem assumi debet, ut isochronas, vel æquidiuturnas oscillationes efficiat, sit 2. linearum.

IV. Vix autem Richerius inæqualem esse, Penduli longitudinem Parisiis, & in locis Æquatori proximioribus observavit, cum ejusdem corporis gravitatem Parisiis, & prope Æquatorem inæqualem esse oportere feliciter, & ingeniosè conjecit, cum longitudines Pendulorum æqualibus temporibus oscillantium sint, ut gravitates ipsæ. Sed Hugenius, quo erat acerrimo, & divino ferè mentis acumine, observationum illarum lumine, ulterius adhuc progressus, Telluris figuram immutandam esse suspicatus est, ut illa, non sphaerica, sed sphæroidi circa polos compressæ, & ad Æquatorem elatæ similis videretur.

I. Cum etenim, ut nos alibi demonstravimus, ejusdem corporis gravitas in diversâ distantia a centro Terræ diversas exerat vires, ut gravitates ipsæ, vel pondera æqualium corporum sint reciprocè, ut distantia, vel potius distantiarum quadrata a centro Terræ; si corpus aliquod grave majores in uno vires exerat, quàm in alio loco, non æqualiter a Terræ centro distare debet, sed ubi gravius est, proximius erit, remotius ubi levius, aut minus grave, adeoque Terræ partes, aut terrestria corpora remotiora sunt a centro Terræ sub Æquatore, quàm prope polos, sive Terra ad Æquatorem elatior, &

circa polos compressior, sphæroidis compressæ formam habere debet.

2. Quod ex diurno Telluris motu confirmari, & illustrari posse videtur. Cum etenim ex circulari corporis motu vis centrifuga oriatur, quâ corpora ipsa circulariter circumducta a centro motûs recedere nituntur, & quod velocior est motus circularis, sive circulus ipse, qui describi solet, ed major, ac vehementior etiam vis centrifuga haberi debeat, Terræ partes sub Æquatore positæ, quæ maximum circulum describere, adeoque velociori motu circumagi debent, majorem quoque vim centrifugam concipient, quæ, cum centripetis, vel gravitatis viribus opponatur, illam minuere debet, ut proinde Terræ partes, sive terrestria corpora prope polos collocata minùs gravitent; atque, ut æquilibrium, quod in singulis Terræ partibus inesse debet, salvaretur; major Terræ moles, & elatior sub Æquatore, minor, sive compressior prope polos est admittenda. Inito autem calculo facilè demonstratur quantal esse debeat diversitas inter axem, & diametrum Æquatoris, quæ a Nevvtono, aliisque statuitur milliarium $31\frac{2}{3}$; ut semidiameter maxima ad Æquatorem sit pedum Parisiensium 19767630.; minima, sive semiaxis ad polos, ped. 19609820.; mediocris 19688725.; ut axium differentia sit milliarium Italicorum $31\frac{2}{3}$. Illustriores itaque Astronomi, atque Philosophi Richerii observationibus innixi in hoc mirè consensere, Telluris figuram sphæroidem esse circa polos compressam, quamvis in illius dimensione non accuratè conspirent.

V. Cùm

V. Cùm verò Einsenschmidius Strasburgen-
 sis universas, quæ plurimæ, ac inter se,
 plurimum dissidentes circumferuntur, dimen-
 siones Telluris a diversis Auctoribus diverso
 tempore peractas accuratissime contulisset; non
 sinè maximâ admiratione deprehendit, quod
 juxta Snellii dimensionem gradus terrestris
 in Hollandiâ minor erat terrestri gradu,
 quem in Galliâ Picartus dimensus fuerat;
 quemadmodum hic etiam minor erat terrestri
 gradu, quem in Italiâ Ricciolius prodiderat,
 atque iste demum minor illo, quem Eratho-
 stenes in Syene, & Alexandriâ; ut certâ
 quadam lege fieri videretur, ut gradus sem-
 sim ab Æquatore versùs polos decrescerent,
 hoc est, ut in superiori Capite ostendimus,
 quò propiùs ad polos ascenditur, eò minor
 terrestris meridiani pars percurri debeat, ut
 novus gradus in altitudine poli acquiratur.
 Inde verò Telluris figuram iterum mutan-
 dam esse putavit, ut sphæroidi quidem simi-
 lis haberetur, sed non circa polos compres-
 sa, qualem Hugenus, aut Nevvtonus prodi-
 derant, sed potiùs oblongam instar ovi, geni-
 tam nempe ex ellipsi circa proprium axem,
 sive majorem diametrum revolutâ.

VI. Id ante Einsenschmidium, sed aliâ
 ratione, conjecerat Burnetus in *Theoriâ Sacrà*
Telluris. Cùm enim Tellurem, & aquam,
 diurno motu, juxta Copernicanam hypothe-
 sim, celerius in Æquatore moveri supponeret;
 inde fieri oportere putavit, ut eadem Tellus,
 & aqua majorem ibi vim centrifugam acqui-
 rerent, quâ a centro motûs recedere niteren-
 tur; sed cùm a superincumbentis aëris pres-
 sione prohiberentur ne fursum exilirent,

senſum ad latera diffuere cogeantur, ut inde tota aquæ moles, & Terra circumpoſita, ſphæroidis oblongæ formam conciperet; ſed ipſa rei difficultas Hugenii, & Nevvtoni, qui duo veluti lumina Recentioris Phyſicæ meritò haberi ſolent, Einfenſchmidium impulit, ut nihil definiendum putaverit, donec accuratiſſima Telluris dimenſio, & meridiani circuli in totâ Galliâ deſcriptio, quæ Regiis auſpiciis anno 1683. a Caſſino ſulcepta fuerat, abſolveretur; plurimam ſiquidem inde lucem opinioni ſuæ accedere poſſe augurabatur.

VII. Neque Cl. Viri deſiderium exitus ſeſellit, ſed illa graduum inæqualitas, cui nova hæc opinio unicè innitebatur, melioribus, & accuratiſſimis obſervationibus ita confirmata, atque illuſtrata eſt, ut nihil aliud ferè ſperari poſſe videatur, ut ſphæroidis oblongæ forma Telluri conveniens, invictiſſimè demonſtretur.

Plurimis etenim, accuratiſſimiſque obſervationibus compertum eſt gradus in meridiana Galliæ parte majores eſſe, minores in boreali, ut tendentibus ex Pariſienſi obſervatorio ad Boream, gradus terreſtris 57055. hexapedarum repertus fuerit; ut inde in auſtrum 57126. cum dimid. (a); & ex nuperrimis dimenſionibus, quibus D. Maraldi in boreali, Caſſini filius, & De la Hire in Auſtrali Galliæ parte meridiana lineæ deſcriptionem perfecerunt, gradus Auſtralis 57097. hexapedarum, Borealis verò 56060. deprehenſus ſit; ſive, ut Caſſinus ait, prope Æquatorem hexapedarum 58079., at prope polos

(a) Hiß. 1701, 1718;

Ios 56224. sive denique, ut Mairanus, prope Æquatorem hexapedarum 57097. at prope polos hexapedarum 56960.

Inde verò axium differentia, vel excentricitas Terræ facilè definita est, ut axis Terræ hexapedas 6579368. contineret, diameter ad Æquatorem 6510796.; illorum differentia 68572., hoc est 34. leucarum, quæ est 95. pars diametri Æquatoris; cùm tamen Hugenus 578., & Nevvtonus 230. posuerit; distantia inter focos, quibus ellipsis illa describitur, hexaped. 94734., circumferentia sub Æquatore hexap. 20454274., ejusque 360. pars, sive gradus, hexap. 56817. ellipsis, aut evoluta meridiani 20563100. excessus supra Æquatorem hexap. 108826., sive leucarum 54. Quod si mediocris quædam graduum magnitudo desideretur, hæc optimè haberi poterit ex Regni Galliarum dimensione. Cùm etenim illius latitudo, sive distantia inter *Collioure*, & *Dunkerque*, deprehensa sit hexap. Parisiensis 486156., & gradus 8. 31. 11. 50. contineat, inito calculo, singulis gradibus hexapedæ 57061. concedi debent, cùm revera Picartus 57060. tribuerit (a).

VIII. Sed mirari certè quis poterit, quomodo dissidentes illæ, & oppositæ prorsus hypotheser de Figurâ Telluris ex clarissimis, certissimisque principiis deducantur; ut tardiores quidem Penduli vibrationes, & vis centrifugæ leges sphæroidem compressam illam esse demonstrent; cùm tamen alterâ ex parte graduum inæqualitas omni argumentorum genere comprobata, sphæroidis oblongæ

E c 3

for-

(a) *Hist.* 1718.

formam præferat. Hæc itaque observatio-
num repugnantia plurimos impulit, ut in al-
terutram errores irrepsisse suspicarentur; aut
illam amplecterentur, quæ aliunde hypothesi
jam semel assumptæ, magis cohæreret.

Nuperrimè tamen, duodecim nimirum ab
hinc annis, scrupulum omnem adempsit Mai-
ranus, qui non solum posteriorem illam Ein-
fenschmidii, Cassini, Maraldi sententiam cer-
tiorè esse demonstravit; sed etiam factio ve-
luti opinionum fœdere ostendit, quod si sphæ-
roidis oblongæ forma Telluri tribuatur, non
solum inæqualitas graduum, sed ipsa quoque
Penduli diminutio optimè salvari potest; ut
immeritò prorsus eâ solum de causâ sphæ-
roidis compressæ forma Terræ concedatur.

IX. Supponatur enim Tellus genita ex el-
lipsi, vel evolutâ $A B C$ *, cujus centrum
sit O , focus F , evolvens $F G H I$, radii
osculatores $I B$, $H D$, $G E$, $F A$: demon-
strat Mairanus, quod corpora gravia, quæ
perpendiculariter in Telluris superficiem in-
cidunt, sive per radios osculatores, curvæ
 $A B C$ perpendiculares moventur, vim exe-
runt, ut, non ad centrum O ferantur, sed
ad puncta K, L in axis parte inter focos po-
sitâ, quam ille *locum tendentia* vocat, per-
veniat; unde vires gravitatis in aliquo cor-
pore, quod in punctis E, D, B collocetur,
non erunt reciproce, ut quadrata distantia-
rum $E O$, $D O$, $B O$; quemadmodum in
hypothesi Telluris sphericæ verificatur, sed
ut inverse rectangula radiorum evolutæ in
illorum partem, quæ perpendicularis curvæ
evo-

* Fig. XIV.

evolutæ ad axim usque extendatur; hoc est, ut rectangulum $H D L$ ad rectangulum $G E K$; ideoque, cum rectangula ejusmodi, dum ex polo A ad Æquatorem B acceditur, majora esse debeant, reciprocè corporis gravitas, dum ad Æquatorem ipsum acceditur, decrescere debet, ideoque Penduli longitudo contrahi, ut illius vibrationes æquali tempore peragantur, quod Hugenius, atque Nevvtonus, suppositâ in Tellure sphæroidis circa polos compressæ figurâ, explicaverant. Cum igitur omnia phœnomena, quæ diversas hypotheses exigere videbantur, in hac hypothesi mirè conspirent, & in illâ explicari commodè possint, manifestè apparet, quod hæc unica sit admittenda.

X. His etiam accedit, quod hypothesis illa Nevvtoni, & Hugenii non admodum certis observationibus, & argumentis innititur. Si etenim inæqualis illa corporum gravitas, & Penduli longitudo ex inæquali distantia terrestrium corporum a centro Terræ oriretur, id certâ quadam lege, ac periodo fieri deberet, ut in locis, quorum latitudines sensibilibiter differunt, sensibilis quoque gravitatis, & Penduli varietas haberetur, quod tamen ab experimentis abhorret; eadem quippe est Penduli longitudo, quam Parisiis, Bayonæ Uranoburgi Picartus, Hiræus observarunt, quamvis ea loca in latitudine plurimum differant. Quid quod eadem Penduli longitudo, non ex imminutâ corporis gravitate, sed pluribus aliis ex causis minui fortasse potuit? Compertum est enim experimento, quod linea ferrea, quæ gelido aëri exposita 6. ped. fuerit, ubi calori exponatur, deprehenditur

sex pedum cum $\frac{2}{3}$ lineæ; quemadmodum aliàs linea 3. pedum, longitudinem $\frac{3}{4}$ lineæ acquisivit; præsertim cùm aëris humiditas in causâ esse potuerit, ut penduli longitudo inæqualiter augetur (a).

XI. Quod autem ex diurno Telluris motu vis centrifuga, sive elevatio partium sub Æquatore oriri debuerit, facile refelli potest. Primò quidem, quia Telluris motus, & Copernicana hypothesis veluti certa supponitur, quod tamen fieri non posse jam diximus ubi de eâdem hypothese, & origine gravitatis contra Cartesium disputavimus.

Deinde verò, ut vi centrifugâ terrestria corpora sub Æquatore elevari, & Tellus ipsa sphæroidis circa polos compressæ formam induere possit, supponendum est illam ex homogeneâ materiâ fuisse compositam; cùm ipsa tamen in sui origine ex partibus circa Æquatorem gravioribus constare potuerit, adeoque sphæroidis oblongæ, vel ovi formam præferre, quæ diurno quidem motu, & vi centrifugâ aliquatenus elevari ad Æquatorem, & ibi ampliôr fieri, non tamen figuram accuratè sphæricam, multòque minùs sphæroidis compressæ, acquirere debuerit.

XII. Quod illis etiam reponi meritò poterit, qui Aquæ, ideoque etiam Telluris figuram accuratè rotundam, & sphæricam esse, paullò liberius existimant; quamvis enim hæc aquæ natura, & proprietas sit, quod in decliviora loca descendere debeat, donec ad æqualem a centro distantiam pervenerit; si


(a) H β . 1703.

tamen terrestria corpora, sive Telluris partes centro circumpositæ, eterogeneæ sint, ac inæqualis gravitatis, ut prope Æquatorem graviores, circa polos leviores fortasse sint, tunc, ut æquilibrium inter Telluris, & Aquæ partes simul sumptas salvetur, non sphærica, sed oblonga forma Aquæ, vel globo terraqueo concedi debet.

Id mirificè confirmatur ex umbrâ Telluris, quæ in Lunam projicitur; quamvis enim hæc sphærica, seu circularis haberi soleat, revera tamen elliptica ab Hevelio, aliisque compluribus est observata; ut in illius *Selenographiâ*, & in Actis Lipsiæ anno 1686. & 1687. describitur.

C A P. V.

De Geographicâ divisione Telluris, ejusque regionibus, quæ Veteribus cognitæ fuerunt.

- I.  Eliquum foret, ut explicato jam loco, figuræ, magnitudine Telluris, ac traditâ illius divisione in Zonas, & Climates, quæ, cum ex cœlestium corporum aspectibus desumatur, *Astronomica* vocari solet, nunc alteram illius divisionem prosequeremur, ac innumeras ferè Provincias loco, magnitudine, moribus mirificè dissidentes, eâ ferè methodo, quâ plerumque Geographi uti solent, exponeremus. Sed cum id operis ad Geographos ipsos pleno quodam jure spectare videatur, nobisque mens fuerit hæc opportuniùs, & accurat-

curatiùs alibi pertractare, nunc summa veluti rerum capita percurrentes, Antipodes tantùm, & Americanos memorabimus.

II. Antipodas nullibi existere constanter asserit Beda (a), atque Lactantius (b) acriter adeo illorum opinionem, qui Antipodas esse crederent, insectatur, ut dixerit: *Est ne quisquam tam ineptus, qui credat esse homines, quorum vestigia sint superiora, quàm capita (c)?* Eisdem etiam negasse ferunt Divum Augustinum (d); & celebre est Zachariam R. Pont., Vigilium Salisburgensem Episcopum a Bonifacio Moguntino Archiepiscopo Apostolicæ Sedis Legato antea damnatum, iterum veluti reum edixisse, & Episcopali Sede amovisse, quoddam ille Antipodas esse defenderet (e).

Verùm non superioribus tantùm seculis Antipodes illi Geographis, atque Philosophis innotuere, ut nulla jam de iis dubitatio supersit, sed illustriores etiam ex Veteribus illos existere constantissimè docuerunt. Certè Pythagoras Terram rotundam esse, & circumhabitari dixit; esse autem Antipodas, nobisque adversa vestigia premere (f); quemadmodum etiam Plato, qui omnium primus oppositos nobis Antipodas nominavit (g), etsi id Pythagoræ Laërtius concedat (h). *Antipodas esse*, inquit Strabo (i), *nesci non sumus*; quod Mela (k), Martianus Capella (l), Plinius (m), aliique complures apertissimè sunt amplexi, qui, non ex ipsâ solùm Telluris figurâ, quam

spha-

(a) De ration. Temp. c. 25. al. 52. (b) III. cap. 23. (c) Vid. Lucian. in Demonac. (d) De Civ. XVI. c. 9. (e) Bekman. Hist. Orb. Terr. (f) Laërt. VIII. seg. 11. (g) Laërt. III. (h) Lib. VIII. seg. 22. (i) Lib. I. (k) Lib. I. c. 1. (l) Lib. VI. c. 3. (m) II. c. 65.

sphæricam esse, partim ex fiderum observationibus, partim ex viribus gravitatis, ut antea diximus, existimarunt, sed etiam ex Zonarum divisione id faciliè inferre poterant. Nam si nobis vivendi facultas est in hac Terrarum parte; quam colimus, quia calcantes humum Cælum suspicimus super verticem, quia Sol nobis, & oritur, & occidit, quia circumfuso fruimur aëre, cujus spiramus haustum; cur non & illis aliquos vivere credamus, ubi eadem semper in promptu sunt? Idem Sol illis & obire dicetur nostro ortu, & oriatur, cum nobis occidet; calcabunt aquè, ut nos, humum, & semper verticem, semper Cælum videbunt: nec metus erit, ut perperam, ac ineptè Lactantius, alique suspicabantur, ne de Terrâ in Cælum decident; cum nihil unquam possit ruere sursum, ubi est Cælum, illis quoque sursum erit, quod si enim nobis deorsum habetur ubi est terra, & illi sursum de inferiore suspicient; nec aliquando in superna casuri sunt, cum omnia nutu suo pondera in Terram ferantur. Postremò quis ambigat in spharâ Terra ita ea, qua inferiora dicuntur, superioribus suis esse contraria, ut est oriens occidenti, nam in utrâque parte per diametros habetur; cum ergo & orientem, & occidentem constet habitari, quid est quod fidem hujus quoque diversa sibi habitationis excludat (a)?

Hoc ipsum egregiè docuit Augustinus, cum ait: Terra; quæ videtur in medio, ubique subtus est, & Antipodes nostri, qui nobis dicuntur figere adversa vestigia, Cælum super se habent (b). Quod si Antipodas alicubi negare videtur, non aliâ de causâ negavit, nisi ut in-

(a) *Macr. somn. II. c. 3.* (b) *Lib. Categor. c. 10.*

innueret id a Philosophis certò demonstrari non posse. *Nam etiam si Telluris figura conglobata, & rotunda esse credatur, sive aliquà ratione monstretur; non tamen est consequens, ut etiam ab illâ parte habitetur, & aquarum congerie nuda sit Terra (a).* Maxima etiam ratio, quæ Augustinum, aliosque Patres impulit, ut opinionem illam de existentia Antipodum insequerentur, fuit, quod ex illâ veluti necessario sequi oportere videbatur Antipodas, non ab Adam, ex quo uno fecit Deus omne genus hominum inhabitare super universam faciem Terra (b), sed ab alio homine genitos fuisse; quod hæresim, aut certè errorem redolebat; neque enim rudioribus illis temporibus iidem ipsi, qui Antipodas esse affirmabant, concipere, vel explicare fortasse poterant, quomodo ex Asia, vel Europâ Adæ nepotes in incognitas, & dissidentes adeo regiones penetrare potuissent. Augustinus certè, cum præmississet Antipodas, idest homines in contrariâ parte Terræ, adversa pedibus nostris calcare vestigia, nullâ ratione credendum esse, statim causam addit, *nimis absurdum esse, ut dicatur aliquos homines ex hac in illam partem, Oceani immensitate trajectâ, navigare, ac pervenire potuisse: ut etiam illic ex uno illo primo homine genus institueretur humanum (c).* Ceterùm regiones illas habitari posse plerique sunt arbitrati, neque enim de inanibus Lactantii argumentis solliciti sumus. Hæc autem de Augustino, & Zachariâ Rom. Pont. dicta sint, ne illorum auctoritas, veluti ma-

ni-

(a) *De Civit. XVI. c. 9.* (b) *Act. c. 17. ver. 26.*
 (c) *Aug. loc. cit.*

nifestissimæ veritati contraria paullò liberius , & indecorè traducatur , ut fieri solet ab iis , qui illorum sensus , & miserrimam eorum temporum , quibus illi floruerunt , conditionem ingenuè non perpendunt ; ut mirari certè non deceat rudiores homines vix intelligere tunc potuisse , quâ ratione non homines solum , sed omnia ferè animalium genera , maximo , & incredibili Oceani intervallo superato , ad oppositas nobis regiones appulerint , cum id nostris adhuc temporibus , cum regiones ipsæ innotuerint , ægrè concipi , vel explicari videatur .

III. Plurimi quidem existimant id divinitus contigisse , abreptos nimirum homines quosdam ex Asiâ , vel Europâ in Americam , ut regiones illas incolerent . Cum verò ad divinam potentiam , veluti ad aram confugere , paullò liberius , & ab optimo philosophandi genere remotius videatur , suspicantur alii id fortuitò contigisse , quodd homines aliqui circa Europæ , vel Africæ littora navigantes , ventorum impetu , ac tempestate in opposita Americæ littora abrepti fuerint . Sed , etiam si hoc illis de hominibus liberaliter concedatur , explicari fortasse non poterit , quomodo equi , tigres , leones , aliaque ferarum genera , quæ nuperrimè in illis regionibus reperiuntur , hac eadem fortuitâ tempestate in Americam appulerint ; neque enim effingi poterit , illas natando , immensum Oceani spatium superasse , nam potuerunt quidem ad insulas natando transisse , sed proximas ; sunt autem quædam tam longè positæ a continentibus terris , ut ad eas nulla bestiarum natare possit .

IV. Verisimilior est itaque opinio, quod illa regio nuperrimè ab *Americo Vesputio* Florentino, Regis Lusitaniae auspiciis, anno 1497. reperta, (cùm anno 1492. à *Christophoro Colombo* Januensi tres illius insulae *Cuba*, *Hispaniola*, *Jamaica* deprehensae feliciter fuissent) quam ex *Vespucii* nomine Americam dicimus, non solum veteribus cognita, sed etiam Europae nostrae finitima, proxima, ac ferè conjuncta fuerit.

Id invictissimè probari posse videtur ex celeberrimae illius *Athlantidis* insulae historiam, quae apud *Platonem* in *Critia*, sive *Athlantico*, atque *Timaeo*, & a compluribus aliis nobilioris notae Scriptoribus memoratur. Inducit itaque *Plato Solonem*, qui, cùm de vetustatis memoriam ab *Aegyptiis* Sacerdotibus, qui in hac re ceterorum peritissimi erant, (antiquissimarum enim rerum apud *Aegyptios* monimenta servantur, quaecumque ab illis, sive ab aliis nationibus gesta sunt memoratu digna in eorum Templis descripta sunt) quaesisset; inter alia plurima accepit: *Atheniensem* Civitatem restitisse olim innumeris hostium copiis, quae ex *Athlantico* mari profecta, prope jam cunctam Europam, Asiamque obsederant. Tunc enim, fretum illud navigabile erat, habens in ore, & quasi vestibulo ejus Insulam, quas *Herculis* columnas cognominamus, ferturque Insula illa, *Libia* simul, & *Asia* major fuisse, per quam ad alias proximas insulas patebat aditus. Reliquus illud verum mare, terraque illa verum continens. In hac *Athlantide* Insula maxima, & admirabilis potentia extitit Regum. Post hac ingenti terra motu, jugique diei unius, & noctis illuvione factum est, ut terra debiscens bellicosos

fas homines absorberet, & Athlantis insula sub vasto gurgite mergeretur. Quam ob causam innavigabile pelagus illud propter absorpta Insula limum relictum fuit. Quod iterum Plato accuratissimè describit etiam in *Critiâ*, sive in *Athlantico*; sicuti etiam Diodorus (a), & Aristoteles (b), vel quisquis Auctor libelli de *Admirabilibus* habeatur; ita ut, supposito loco, & magnitudine illius Athlantidis Insulæ, in quibus illi mirè consentiunt, necessariò dicendum sit, totum id Americæ nostræ convenire.

V, Non defuere tamen Philosophi, qui hanc esse fabulam, aut allegoriam putaverint, ut Porphyrius, & Origenes. Ceteri tamen omnes, & illustriores Platonici Interpretes Crantor, Proclus, Ficinus, hanc veram historiam esse, testantur, cum ipse Plato veritatis homo amicissimus, ejusque omnibus exhibenda promptissimus (c) hanc plenam veritatis historiam, non fictam a se fabulam semel, atque iterum fateatur. Illam similiter veluti historiam amplexi sunt Strabo, Tertullianus, Plinius, Pamelius, Vossius, Mercator, Bekmannus, Turnebus, aliique plurimi. Hanc itaque nos quoque amplectimur, & si quæ sint in Platonis historiâ circa annorum numerum, vel aliquid aliud hujusmodi, quæ scrupulum fortasse iniicere posse videantur, hæc ab ingenuis, eruditisque hominibus facilè explicari, vel salvari posse arbitramur. Quòd enim terræmotûs impetu Athlantis Insula ab Europâ evelli potuerit, aliaque id genus opportuniùs alibi demon-

(a) Lib. V. (b) De Admirab. (c) Gell. X, c. 22.

monstrabuntur, ubi de Terræmotûs origine, & mutatione Mundi pluribus differetur, aliaque exempla ex veteribus, certissimisque Scripto-ribus afferentur.

C A P. VI.

*De Montium origine, structurâ,
& altitudine:*

I.



Errestris hujus Globi, cujus figuram, magnitudinem, locum hætenus contemplati sumus, præstantia, atque mira propemodum pulcritudo præsertim oritur, ut omnes optimè norunt, ex terrestrium partium ordine, ac varietate, quæ partim decliviores, humilioresque sunt, ut valles; partim elatiores, sublimioresque, ut colles, & montes; partim etiam excavatæ, ut voragines, barathra, &c. unde innumera ferè substantiarum genera, ut inferiùs ostensuri sumus, educi solent. Operæ pretium itaque facturi videbimur, si antequam singulas terrestrium corporum species exponamus, de Montium origine, structurâ, altitudine, & si quæ fuerint alia, quæ huc loci spectare debeant, solitâ methodo differamus.

II. Ut a montium origine exordiamur, communis est omnium ferè Philosophorum opinio, quibus præsertim ex sacris Literis splendor affulserit, montes non in primo die creationis conditos fuisse, cùm adhuc

Unus erat toto Natura vultus in Orbe,

Quem

Quem dixere Chaos, rudis, indigestaque moles (a)

Et tenebra essent super faciem Abyssi (b),

ideoque Terræ particulis utpote gravioribus, sensim subsidentibus Aqua Telluris superficiem accuratè sphæricam undique obduceret; sed tertiâ demum die cum divinus Artifex sejunxisse dicitur *Aquas* ab *Aridâ*, ut *Aquæ* in locum unum congregatæ *Maria* componerent; continentes autem, & insulæ *Arida* dicerentur, montes ipsos hac lege ab illo formatos esse, ut Terra, quæ ad efficiendos Oceani alveos excavata, ac veluti effossa fuit, in plures ferè aggeres congesta in cumulum, ac denique montem surrexerit.

III. Non defuere tamen, qui montium originem ad universalis Diluvii tempora referrent; existimabant enim tunc singulas Mundi partes violento, turbatoque motu disruptas, inversas, agitatas, suisque sedibus evulsas fuisse, ut deinde impetu cessante ingentes Terræ moles huc illuc temere dispersæ subsederint, quæ montes dicerentur.

Sed his Scripturarum auctoritas opponi solet, in quibus ante diluvium montes memorantur, cum illius aqua ascendisse dicatur supra verticem montium, deinde apparuisse montium cacumina, Arcam denique Noe in uno montium Armeniæ constitisse (c).

IV. Addi postremò solent aliæ causæ, a quibus montium origo repeti posse videtur, ut ex. gr. quòd subsidentibus Terræ partibus scopulo circumpositis scopulus ipse cum circumjectâ sibi terrâ elevatior fieri, & montis instar

Tom. IV.

Ff

af-

(a) *Ovid. Metam. I. vers. 6.* (b) *Gen. c. 1. ver. 2.*
 (c) *Gen. c. 8. ver. 4.*

assurgere potuerit; quòd vi terræmotûs ex visceribus terræ maxima terræ, lapidumque congeries erumpat, ut in agro Puteolano factum legitur; quòd denique insanâ vi turbinis alicujus arena, aut pulvis in plures veluti tumulos congeratur, quod facili experimento, & exemplis innumeris probari posset. Sed incredibile illa magnitudo, quæ in montibus ipsis conspicitur, illorum structura, & partium varietas ostendit, quòd exigui quidem colles eâ de causâ fortasse extiterint, majores verò montes aliam omnino originem sortiti fuerint.

V. Itaque, cum in singulis explicandis rationibus difficultas aliqua reperitur, Thomas Burnetus novam hypothesim excogitavit, quâ non solum montium sed etiam universalis diluvii causa, & origo, nisi feliciter, saltèm ingeniosè exponatur. Supponit itaque Burnetus initio Mundi extitisse Chaos, in quo Elementorum omnium particulæ permixtæ forent, cùmque paulatim crassiores a subtilioribus, leviores a gravioribus secernerentur, fieri debuisse, ut in infimum locum Terræ particulæ subsiderent, quibus Aquæ corpuscula incumberent, hisque Aëris particulæ longè subtiliores, levioresque insiderent; unde triplex Elementorum ordo prodiiisset. Cùm verò liquores ipsi partim pingues, partimque macri sint, &, si aëri libero exponantur, ita separentur ab invicem, ut pingues macris insidere, vel innatare videantur, oportuit, ut pinguiusculæ illæ liquorum partes ceteris aquæ particulis innatarent. Cùmque non omnes terræ partes per aërem dispersæ eodem impetu, eâdemque velocitate ad infimum

num locum subsederint, sed aliquæ celerius, aliquæ tardiùs post aquam descenderint, fieri debuit, ut ejusmodi Terræ particulæ adhuc in aëre volitantes, sensimque subsidentes crassioribus, sive pinguioribus Aquæ particulis permixtæ, ac irretitæ fuerint, ut veluti mollem, luteamque crustam Aquæ circumfusam formaverint, quæ deinde aëri, Solisque radiis exposita, durior, atque compressior effecta ab hominibus incoli potuerit. Itaque diluvii tempore ingens ille, solidusque cortex, qui ab hominibus incolebatur, atque intra se ingentem veluti aquarum abyssum continebat, variis in partibus ita disruptus est, ut illius partes, ac veluti fragmenta gravitatis vi inclinata, & subsidentia infra subterraneæ abyssi superficiem descenderint, ideoque evaporatâ sensimque exsiccâtâ aquæ mole, prærupta, obliqua, dissecta corticis fragmenta apparuerint, quæ asperam, & inæqualem Telluris faciem formaverint. Hujus autem hypothesis lumine explicari posse ait Burnetus quomodo Deus *super maria fundaverit orbem Terra, firmaverit Terram super aquas (a)*, quomodo Cælum, & Terra ex aquâ, & per aquam consistens (b), quamobrem is, qui tum erat, *Mundus aquâ inundatus perierit (c)*, quomodo in veteri ante diluviano Orbe, neque illuviones, neque Oceani tempestates contigerint, sed tranquillior ubique aëris status fuerit, diuturnæque Patriarcharum ætati maximè consentaneus.

VI. Quæ quidem ingeniosa Burneti hypothesis, etsi fabulam sapere plerisque videatur,

F f 2

non

(a) *Psalms. 24.* (b) *Psalms. 136.* (c) *Petr. epist. II.*

non plurimum tamen ab ipsâ rerum naturâ fortasse abhorreret ; quin etiam ex ordine, magnitudine, structurâ, quæ nunc in montibus ipsis conspicitur, mirificè illustrari posset, cum hæc omnia faciliè in hac hypothese explicentur, vix autem, ac ne vix quidem in aliis. Ac certè quod ad illorum ordinem, ac magnitudinem perfinet, si quis ex altissimi montis vertice, aut, si liceret, ex mediâ Aëris regione circumposita, vel subjecta montium juga intueri posset, dubitari non potest, quin horrenda veluti dissecti corporis membra, aut ingentis cujusdam ædificii ruderâ nullâ lege congesta intueri sibi videretur. Tanta siquidem est illorum inæqualitas, ut unus alteri non respondeat, nec uniformi ductu cum illo continuetur, sed plerumque, inter ipsos voragines, aut humiliora loca intercipientur. Ex montibus alii acuminati sunt, alii in longos, sinuososque tractus exporrecti; alii in apertam planitiem desinunt, alii leviori clivo sensim ascendunt; alii præruptis, exesis, ac ferè in Aëre pendentibus rupibus impervii sunt; alii ferè solitarii, a ceteris sejuncti sunt, quod tamen rarius est, alii verò veluti coronam quandam efficiunt. Quàm verò faciliè, ac feliciter hæc singula concipiuntur, si illa terrestris corticis violenta fractio, & perturbata partium subsidentia supponatur! Quod si internam montium structuram, partiumque formam scrutari libuerit, id accuratiùs adhuc, & illustriùs apparebit; plerique enim maximas cavitates continent, aquarum, aut subterranei ignis conceptacula, aut ferarum latibula; quodque maximè mirum est, cavitates illæ efformantur, ab ingentibus

tibus stratis lapideis, quorum unum alteri temere impositum ab illo fulciatur; quin etiam exterior ipsa montium superficies, seu latera stratis ad horizontem inclinatis teguntur, ac si fatiscentibus, diruptisque partibus Terræ, quæ jam æquabiles, & horizonti parallelæ fuerant, sensim prolapsæ ad horizontem inclinentur, planam tamen superficiem in se retineant.

Quid quod plurimi montes saxa, alii marmora, & silices continent, alii fumum, & ignes evomunt, omnes ferè cavitates, & cavernas habent; quæ vix, ac ne vix quidem intelligi possent, si illi ex solâ partium congestione in primævâ Mundi origine, aut diluvii tempore formati fuissent; cùm tamen, si exterior illa Telluris facies, & cortex disruptus supponatur, omnia prorsus illâ ratione contingere, ac superesse debuerint, quo revera nos illa nunc intuemur? Cetera argumenta, quæ elegantissimè a Burneto plurima afferuntur, omittimus, tum quòd prolixiores essemus, tum etiam quòd ex iis, quæ hæcenus dicta sunt, hypothesis illa de montium origine, atque structurâ satis intelligi posse videatur.

VII. Nunc montium numerus, & altitudo explicanda nobis occurrit. Utrumque verò, cùm ad Geographos pleno jure pertineat, breviter complectemur. Celeberrimi sunt apud veteres *Atblas*, *Atbos*, *Pelios*, *Olympus*, *Ida*, *Casus*, *Caucasus*, &c. de quorum altitudine plurima Veteres ipsi, licèt inter se dissidentes, prodiderunt.

Dicaarchus Vir in primis eruditus Regum curâ permensus est montes, ex quibus altissi-

num prodidit Pelion 1250. passuum ratione perpendiculari (a), hoc est milliarius Italicorum 1. $\frac{1}{4}$ Geminus autem ex Dicæarchi sententiâ Cyllenem Arcadiæ montem stadiorum 15. Sabirium 14. & Caucasum ipsum 10. constituit (b). Herodotus ait Caucasum esse maximam vastitatis, & summa altitudinis (c), quod Aristoteles ipsæ commemorat cum ait Caucasus mons est eorum, qui ad æstivum Solis ortum vergunt, multitudine aquæ, ac altitudine maximus, summitates ejus ad tertiam usque partem noctu ab Aurorâ, mane, & vespere radiis Solis illustrantur (d). Maximam quoque montis Athos altitudinem esse putarunt (e), quod oppidum sit Lemno Myrrhina, in cujus forum mons Athos in Macedoniâ umbram jacit; quod non frustra inter miracula notaverunt, locumque aræa buculâ designaverunt, cum Athos a Lemno sex, & octuaginta millibus passuum separaretur. Est sanè Athos sublimis adeo, ut altior existimetur, quàm unde imbres cadunt (f). Meliori tamen jure hoc inter commenta, quàm inter miracula notandum fuerat, non quod incredibilis aliqua montis illius altitudo inde consequeretur, vix enim duorum milliarius altitudinem excedere debuisset, aut trium circiter, ut probat Varenius, sed quod Athus a Lemno distantia sit solum 55. milliarius, neque ad hanc ipsam distantiam illius umbra proiici possit.

VIII. Quid verò de Olympi altitudine, quam omnium maximam Lucanus, Claudianus,

(a) *Plin. II. c. 65.* (b) *Elem. Astr. c. 14.* (c) *Lib. 1.*
 (d) *Meteor. I. tex. 63. c. 13.* (e) *Plin. IV. cap. 10.*
 & *Solin. cap. 16.* (f) *Plus. de fac. in ore luna.*

nus, Homerus, aliique veteres existimarunt? Hanc 10. stadia excedere tradidit Xenagoras, & quamquam Geometra affirmant neque altitudinem montis, neque maris profunditatem 10. stadia excedere (a), quemadmodum Cleomedes dixerat (b), neque editior est mons 15. stadiis ad perpendicularum, neque maris profunditas 30. stadiorum ad summum, tamen non temere, sed arte, & instrumentis adhibitis eam dimensus videtur Xenagoras (c). Illud etiam ingentis hujus altitudinis Olympi argumentum afferri solet, quod ille supra atmosphæra, sive infimæ regionis Aëris confinia, in quâ nubes, & fulmina, ac venti formantur, emineat, & caput Cœlo inferat; adeoque, cum purior ibi, imperturbatusque sit aër, is veluti Deorum sedes haberi consueverit. Philoponus (d) certè novisse se hominem refert, qui, cum Olympum montem conscendisset, nubes, & fulgura infra se formari vidit; quemadmodum etiam fertur in Olympi vertice olim Diis sacra fieri consuevisse, sacrisque cineribus characteres inscribi, qui sequenti anno redeuntibus iidem prorsus apparebant.

Athos etiam adeo elatus est, ut credatur altius assurgere, quàm unde imbres cadunt: cœpit autem opinio fidem quia de aris, quas in vertice sustinet, non abluitur cinis, sed, quo relinquitur, aggerè manet (e); quemadmodum Athlas ipse usque in confinia lunaris circuli evelsus ultra nubium potestatem sidera sustinere creditur (f). Quod autem de Olympo, &

F f 4

Atho

(a) Plut. in Vita Pauli Æmil. (b) I. c. 10. (c) Plut. ibi. (d) Ricciol. Geogr. VI. c. 21. (e) Melæ. II. c. 2. (f) Capella c. 4. Plin. V. c. 22.

Artho veteres commemorant, superiori seculo in *Carpatio* Hungariæ monte exploratum esse alibi diximus. Is enim, qui illius verticem ascendit, non solum fulgura, nubes, & fulmina infra se ad montis latera fieri conspexit, sed ab exploso ibi sclopeto (*) nullum excitari fragorem admiratus est, quod maximam aëris tenuitatem ibi reperiri demonstrat.

IX. Fallax est tamen hoc argumenti genus, nec alicujus montis altitudo ex nubium, vel atmosphæræ altitudine coniici debet; fieri enim aliquando potest, ut nubes in aliquo monte, licet humiliori, non formentur; alterius verò, licet elatioris, verticem nubes obsideant; quod tum ex circumpositæ plerumque Telluris conditione oritur, tum ex ipsâ montium substantiâ, ex quâ particulæ erumpere debent, ut nubes fiant; tum denique ex Solis, vel Terræ calore, quo tenuissimæ partes illæ secerantur, & in Aërem eleuantur. Sic alibi diximus altiùs assurgere nubes æstate, quàm hyeme; altiùs similiter circa æquatorem, quàm prope polos, quia vapores hyeme majori frigoris vi citiùs condensantur, æstate verò majori vi caloris rarefiunt, ac in sublime feruntur. Accuratiores itaque methodus est adhibenda, ut certa montis altitudo definiatur, ut a Ricciolio, Varenio, aliisque compluribus præstitum est.

X. Altiores igitur totius Terræ montes, Varenius existimat esse *Picum* in *Tenariffâ*, cujus vertex a navigantibus cernitur usque ad distantiam 60. milliarium Germanicorum, hoc est 240. Italicorum, sive 4. graduum ter-

re-

(*) Vid. Ricciol. Geogr. VI. c. 21.

reftrium. Nonnifi Julio, & Augufto mense in illum ascenditur, reliquo enim tempore nive obducitur, quæ tamen in circumpositas regiones nunquam decidit. Porro inito ex Geodesiæ legibus calculo, ita ut, sepositis refractionibus, solum in distantia graduum $2. \frac{1}{2}$ videatur, illius altitudinem definit (a) Varenius unius circiter milliaris Germanici, sive 4. Italicorum; cum Ricciolius illius perpendiculum 9003. passuum Bononiensium, sive milliarium Italicorum 9. existimet, Snellius milliarium Italicorum 9. $\frac{1}{2}$ Gassendus saltem 5., & Harduinus 47812. passuum, hoc est ferè 44 milliarium, Conimbricenses denique 60.(b).

XI. Aliâ, meliorique methodo montium. altitudo nuperrimè observari cœpit ope nimirum Barometri, ex cuius altitudine, quæ modò major, modò minor deprehenditur, inæqualis etiam montium altitudo deducitur. Cum enim quò depressior est locus, gravior ibi sit Aër, & altior Mercurius in tubo suspensus, quò altiùs ascendetur, gravitas Aëris, & altitudo Mercurii decrefcere debet. Id autem hac lege fieri putat Mariotte, ut si per decem hexapedas, vel 60. pedes altiùs ascendatur, Mercurius primâ lineâ descendat, sicque deinceps. Certè Scheuchzerus observationes (c) Academiae Parisiensi communicavit, quibus ex diversâ Barometri altitudine diversam montium altitudinem dimensus fuerat, eademque prorsus illorum altitudo ex aliâ methodo deducebatur.

Ab

(a) *Lib. I. c. 10. prop. 31.* (b) *III. De Calo quæst. 3. o. 1.* (c) *Hist. 1703. 1705. 1708.*

Ab experimentis tamen, & hypothesi D. Mariotte plurimum differt Hiræus, qui statuit uni lineæ Mercurii 76. pedes Aëris respondere; supposito tamen, quod æqualia sint illa volumina Aëris, quæ inter se, & uni lineæ Mercurii æquiponderant, cum revera inferiora volumina graviora sint, & minora.

Cassinus itaque & Maraldi coniiciunt hac lege Mercurii altitudinem decrescere, ut primæ lineæ 60. pedes debeantur, 62. secundæ, tertiæ 63., sicque deinceps usque ad altitudinem semileucæ, sive hexapedarum 1000. in quâ altitudine experimenta fieri possunt.

XII. Verùm plurimi in dimensiones istas errores irrepere potuerunt, cum calor, frigus, humiditas Aëris illius gravitatem augere, vel minuere possit; adeoque ex Mercurii altitudine nihil de Montium altitudine definire liceat, nisi plurima nobis accuratissimè priùs perspecta fuerint, quæ adhuc nos latent.

C A P. VII.

De Salibus.

I.



Xternam veluti Telluris formam hætenus prosequuti, nunc interiorem illius substantiam, & innumera ferè rerum genera, quæ ex illius visceribus effodiuntur, adeoque *Fossilia* communiter a Philosophis, & Chymicis vocantur, oculis exponemus. Ac ne fortuita, vel perturbata rerum series difficultatem, & obscuritatem ingerat, ve-

te-

terem Avicennæ (a) divisionem sequuti omnia Fossilium genera ad quatuor veluti capita revocabimus, *Sales* nimirum, *Sulphura*, aut *Olea*, *Lapides*, & *Liquabilia*, sive *Metalla*. Quamvis enim plurima sint ex Fossilibus, quæ ab his differunt, ad illa tamen satîs accomodè referri possunt.

II. Sal itaque est corpus, quod in se quidem durum est, sed in aquâ positum solvitur; unde *Vitriolum* ipsum, & *Alumen*, veluti Salium species haberi solent, quod ipsa quoque solvantur aquâ, etsi ad succos potiùs alioquin pertineant. Plurimæ verò sunt illius species; *Sal commune*, *Vitriolum*, *Nitrum*, *Alumen*, &c. quæ non solâ partium figurâ, & colore inter se differunt, sed etiam sapore, aliisque qualitatibus, ut inferiùs ostendetur. Sal communis, quo nimirum cibi condiri solent, particulas habet quadratas, vel cubicas tesseræ similes; ita ut, si crassiores quædam illius partes aquâ aspergantur, in plures alias longè tenuiores particulas similiter cubicas resolvantur. Nihil autem est, quod illius saporem, & ceteras qualitates hîc ostendamus, cùm hoc experimento meliùs intelligi, quàm verbis exprimi possit.

III. Quod ad illius originem, alter est Fossilis, qui *sal gemma* vocari solet, cùm ex fodinis ipsis eductus instar gemmæ pelluceat, ut in Indiâ, Perside, locis mari Caspio finitimis, Tirolensi Comitatu, Transilvaniâ, Insulâ Ormuz in Persico sinu, in quâ parietes ipsi domorum Sale construuntur, Poloniâ, præsertim verò prope Cracoviam conspicitur.

Is

(a) *Lib. de Mineral. c. 3.*

Is autem componitur ex sale communi, cui plurimæ nitri fixi partes permixtæ fuerint. Alter verò est *marinus*, qui nimirum ex aquâ maris solaribus radiis expositâ educitur. Ubi enim aqua maris in foveis, quæ prope littora effodiuntur, reperitur, calore Solis sensim evaporatur, & post 15. ferè dies salis particulas in modum crySTALLI concretas in fundo relinquit (a). Quod si non aqua maris Soli exposita in vapores abeat, sed ex aliquo, vel fonte, vel puteo hauriatur aqua, & in lebetibus ad ignem evaporetur, ut in salinis Volaterranis experimur, tunc similiter aqua in fundo lebetis concrevit in sal. Eâ verò de causâ, ut alibi demonstrabitur, maris, & fontium aqua salis particulas continet, quòd in ipsis Terræ visceribus, maris alveo, iisque locis, per quæ fontium, & maris aquæ labuntur, plurimæ salis fodinæ reperiuntur, ex quibus plurimæ salis particulas aquæ corrodunt, secumque deferunt, quibus confertæ, ac veluti gravidæ fiant. In Africâ certè sal veluti candidi, rubei, & cinericii coloris effoditur. Sic in Peruviâ octodecim milliaribus a Limâ in austrum incredibilis salis copia educitur, quæ continuò reparatur; sic in regno *Musillipatan* Indiæ, Coromandelis, aliisque innumeris in locis, quæ apud Scriptores memorantur.

Nitrum.

IV. Nitri nomen, five *balinitri*, a *Natro* sale, qui ex Nilo, vel ex alio Ægypti lacu, seu

(a) *Varen. lib. I. c. 11.*

seu fluvio educebatur, desumptum videtur; etsi revera nitrum illud a nostro plurimum differat. Ægyptii Natro, cum lixiviale sit, ad abstergenda lintea, & vitrum conflandum utebantur; ut Tacitus proinde dixerit, quod *circa os fluvii inter Ægyptum, & Palestinam arena collecta admixto Nitro in vitrum excoquantur* (a), quod tamen Nitro communi convenire non potest. Quemadmodum etiam id, quod in sacris Literis dicitur *acetum in Nitro, qui cantat carmina cordi pessimo* (b), vel, ut clarius in Hebraico textu legitur *afflicto*, de vulgari Nitro intelligi non potest, quod aceto permixtum non effervesceat, neque tumultuatur, cum tamen Ægyptium Nitrum aceto affusum mirè ebulliat, & agitetur.

Nitrum igitur commune, sive *sal-nitrum*, vel *sal-petra* efformatur ex aëris particulis, quæ salinis, & acris particulis admixtæ in terrâ nitrosâ, vel nitrosis lapidibus, præsertim si humido aëri expositi sunt, adhærescunt, ut in humidioribus cellis vinariis, dirutis ædificiorum ruderibus observamus. Hinc ipse sal communis, si calci vivæ permixtus in humidiori loco aëri exponatur, aëri permisceatur, & in Nitrum, seu salem petraë convertitur. Id verò in Nitro mirum videtur, quod si solitariè sumatur, accendi, flammamque concipere non potest; facillimè verò, si cum aliquâ terrestri materiâ, aut carbone accenso, aut sulphure, &c. jungatur,

Alu-

(a) *Annal. V.* (b) *Prov. c. 25. ver. 20.*

Alumen, & Vitriolum.

V. Si aëreus ille, vel aridus sal terræ petrosæ permixtus fuerit, tunc in Alumen con-
crescit, in quo maxima vis *styptica*, vel *astringens* reperitur. Hinc antequam lanæ coloribus imbuantur, Alumine aquâ soluto tinguntur, ut inde colores ipsos tenaciùs amplectantur, & imbibant; quemadmodum etiam charta alumine inficitur, ut atramentum retineat. Plumeum, vel plumosum Alumen dicitur quædam *Talci* species, quæ plurimis filamentis contexta videtur, sed ab Alumine salino maximè differt, neque aliud est, quàm *asbestos* lapis, aut *amyanthos*, ut inferiùs dicitur.

VI. Acris ille, vel, ut ait D. Duclos, aëreus sal, ubi ferrugineis, & cupreis terræ partibus adhærescit in *Vitriolum*, sive *Atramentum sutorium*, sive *Chalcantum*, ut Græci vocant, convertitur. Plurimæ, ac variæ sunt illius species, quemadmodum etiam plurimis ex locis effodi solet, ut in Hungariâ, Cypro, &c. Pulverem sympaticum ex illo fieri jam diximus, cum de occultis rerum qualitatibus ageremus.

Ex his quoque salium generibus in tenuissimas particulas solutis, ac inter se permixtis *Aqua stygia* formari solent. Ex paribus itaque, vel æqualibus Vitrioli, sive Aluminis, & Nitri partibus fit *aqua fortis*; quibus si octava pars salis communis addatur, vel quarta salis Amoniaci pars, qui olim ex arenâ colligebatur, nunc autem ex quinque partibus urinæ humanæ, & unâ salis communis, & dimidiâ fuliginis lignorum simul permixtis componitur, fiet *Aqua regalis*. Ce-

Ceteros inter effectus , qui his aquis stygiis præstari solent , recenseri debet dissolutio , vel *calcinatio* metallorum . Nam aquâ forti Argentum , & Plumbum ; aquâ regali Aurum (quod ubi in pulverem solutum , sale amoniaco præcipitatum , & aquæ communi antea perfusum fuerit , *Aurum fulminans* facile inflammabile efficitur) similiterque Ferrum , & Stannum dissolvitur . Utrâque illarum solvitur cuprum , & hydrargyrus . Illarum enim particulæ , cùm tenuissimæ , acuminatæ , perennique motu agitatae sint , subtiliores etiam corporum poros pervadunt , illorum texturam dissolvunt , atque illa in cinerem , sive liquorem abire cōgunt . Hinc cera , & vitrum neque aquâ forti , neque regali dissolvi potest , quod aquæ stygiæ partes ab oleosis , crassioribusque illorum partibus devinciantur , & impediantur ne poros liberè penetrent ; & quod adhuc admirabilius est , aqua fortis argentum , non aurum , aqua regalis aurum , non argentum dissolvit ; non aliâ certè de causâ , nisi quod aquarum illarum particulæ , vel potius metallorum poruli diversâ figurâ præditi sint , quæ nonnisi a particulis certâ quadam figurâ dotatis penetrari possint . Hæc , aliæque id genus plurima a Chymicis afferri solent ; nobis autem , qui summa hic veluti rerum capita breviter complectimur , hæc satis , superque sint .

Vitrum .


VII. Aliqua tamen posteriori loco de Vitro dicenda remanent , quod inter salium genera numeratur , cùm ex particulis salium , quæ
ex

ex lapidibus, aut plantis educuntur, conflare soleat. Si etenim robur, aut silex vehementiori ignis vi comburatur, plurimæ salium particulæ ex illis educuntur vitris efformandis idoneæ. Adhiberi etiam solent lapides quidam candidi calcinati, quales præsertim Ticino Venetias advehuntur; adhibetur etiam aliquando subtilior arena, ut Stampensis, quæ circa Stampas Urbem Galliæ colligitur. Maximè verò componitur Vitrum ex cineribus cujusdam herbæ, quæ a Græcis *Anthillis*, *Kali* ab Arabibus, & a nostratibus dicitur *Soda*, cujus sapor falsus est, & circa Beræonsem, aliasque Salinas reperitur, ut est a Gassendo observatum, quamvis major illius copia ex Ægypto adsportari consueverit. Sal autem, qui ex illâ educitur, & *Alkali* vocari solet, ad salis communis potiùs, quàm ad nistri naturam accedit, cùm igne liquefiat, secus ac nitrum.

Artificum verò solertiam in elaborando Vitro, ac admirabilem prorsus facilitatem, quâ in plures partes, prout libuerit, Vitrum deducitur, cyathis, laminis, imaginibus, & si quid aliud elegantius hominis ingenium effingere possit, efformandis, faciliè prætermittimus, cùm neque satis laudari illa possit, neque unquam illustriùs explicari, quàm si oculis judicibus res peragatur.

C A P. VIII.

De Succis oleosis, & variis Terræ generibus.

I.  Ulphuris; & Olei nomine intelliguntur omnia, quæ pingua, & viscosa sunt, quamvis illa inter se plurimum differant. Sulphur ex pyrite lapide, aut minerâ educi solet, præsertim ubi montes ignivomi reperiantur; dumque ex Terræ visceribus eruitur, cinereum ferè colorem exhibet, & si illi aqua fortis effundatur, non mediocriter ebullire, & effervesce solet. Deinde verò, cùm arte perficitur, flavescentem induit colorem, nec ampliùs in aquâ forti effervescit.

II. Bituminis etiam plurimæ sunt species. Aliud nimirum, olei instar, liquidum est, & ex lapidibus ipsis, veluti ab interno Telluris calore exsudatum, colligitur, ut pluribus Italiæ, & Siciliæ locis, adeoque *Petroleum* vocari solet. Aliud paullò densius, & concretius est, & dicitur *Maltha*. Quod si densius adhuc, & durius fuerit, sed tamen candidum, & purum, vocatur *Napha*. Sin verò nigrum, & foetidum sit, communi *Bituminis* nomine donatur, Hòc idem bituminis genus in Mari mortuo, vel Asphaltite lacu Palæstinæ purpureum est, veluti pice, & Asphalto compositum, ut proinde meritò *Pisaspphaltum* vocetur. Mauritanii verò illud *Mumiam* vo-

Tom. IV. G g cant,

cant, quo fortasse Ægyptii cadavera condire consueverunt, quæ, cum illius virtute incorrupta conseruentur, *Mumia* à vulgo vocari solent. *Gagates* denique bituminis duri, quod expoliri possit; species est; quemadmodum, etiam *Carbo fossilis* inter bitumina recensetur, & fortasse etiam *Camphora*, quæ in Indiâ exsudari dicitur, quamvis illam ex arboribus erumpere Mauri referant.

III. Paullò nobilior bituminis species *Succinum*, sive *Electrum* haberi solet. Quamvis enim plerique Veteres existimaverint succinum ex arboribus, resinæ instar, prodire, ut Ovidius de arboribus illis commemorat, in quas Heliades Phaëtonis sorores circa Padum, vel Eridanum mutatæ sunt, cum ait:

Inde fluunt lacryma, stillataque Sole rigescunt

De ramis Electra novis, qua lucidus amnis Excipit, & nurbus mittit gestanda Latinis (a); & Tacitus etiam *Succum arborum illud esse* testetur, quia terrena quadam, atque etiam volucris animalia plerumque interlucent, quæ implicata humore mox materiâ durescente clauduntur (b). Quemadmodum Plinius memorat ex Indiâ Succinum, sive Electrum advectum fuisse cum cortice; quamvis, inquam, Electrum, resinæ, vel gummæ instar, quibus certè simillimum est, arborum succus videatur; certissimum tamen, exploratumque est, ipsum quoque inter mineralia, vel bituminum genera numerandum esse. Quomodo enim fieri potest, ut succinum, ex arboribus decidat, cum tamen in Maris alveo, præ-

(a) *Metam. II. ver. 363.* (b) *Annal.*

sertim in Mari Balthico, eâ potissimùm parte, quâ Prussiam alluit, finitimisque locis educatur? Aut quæ tanta Electri copia ex arboribus exsudare poterit, ut ingentes illius massæ congerantur? Explicandum denique superest, ex quonam arborum genere succinum educatur: quandoquidem in Europâ nostrâ infrequentes aded sunt arbores, ex quibus Electrum educi possit. Quod verò formicæ, volucres, &c. in succino reperiantur, ut Tacitus ipse commemorat, & elegantissimo Epigrammate testatur Martialis:

Flentibus Heliadum ramis dum vipera serpit,

Fluxit in obstantem succina gemma feram;

Qua dum miratur pingui se rore teneri,

Concreto riguit vincla repente gelu (a).

& Electrum ipsum cortice obvolutum aliquando fuerit; explicari faciliè poterit, quòd animal ejusmodi succino, dum adhuc liquidum, & tenerum in Maris littore jacebat, irretitum, & illo sensum crescente, & duriori facto, inclusum fuerit; quemadmodum certè exigui pisciculi, & piscium ossa, non in Electro solùm, sed in ipsis etiam lapidibus inclusa memorantur, ut accuratè ostendetur, cùm de formatione lapidum inferius res erit.

IV. Unde verò electrica virtus, quâ nimirum paleas, ligni frustula, & exigua corpuscula trahit Electrum, aut suspensa retinet, oriatur; in Phisicâ Generali, cùm de occultis rerum qualitatibus ageremus, explicatum est. Diximus enim id ex viscosis halitibus, qui ex succino erumpunt, ac veluti fibræ

corpusculis illis tenaciter adhærent, illisque devinciuntur, oriri debere; quod ex ipsâ succini, vel Electri substantiâ, quæ nunc exponitur, illustrari, & confirmari maximè poterit.

V. Quod reliquum est, variis salium, & succorum generibus, plurimæ terræ species oriuntur; quæ, non a Veteribus modò, sed a Recentioribus etiam Philosophis memorantur. Quamvis enim una, eademque sit Terræ substantia, ubi tamen huic, vel alteri salis speciei permixta, aut certo quodam oleosi succi genere veluti imbuta fuerit, novas etiam proprietates induere videtur.

Hinc aliquæ Terræ pingues, & frugifera, aliæ steriles, & crassæ, & arenosæ sunt, aliæ veluti rubent, aliis nigrantibus, &c. plurimæ denique, aut medicâ virtute præditæ sunt, aut accidentibus aliis insignitæ, ut *argilla, bolus, &c.*

VI. Quæ steriles sunt plerumque arenosæ deprehendi solent; adeoque, cum in plurimas veluti particulas concisæ sint, in lutum con crescere, humoremque alendis frugibus necessarium retinere non possunt; unde faciliè per laxiores poros illæ, trajiciuntur. Sterilis tamen est etiam argilla, sive terra densior, atq; tenacior tum quodd humore dilui, & penetrari non potest, tum etiam, quodd, viscosior cum sit, humor in illâ percolari, & plantarum poros pervadere nequit, quin etiam illos obducere solet. Quod si neque arenosa sit terra, hoc est particulis omnino disjunctis, concisis componatur, neque omnino viscosa, tenax, & argillosa, sed mediocri quadam partium cohesione prædita, sit; tunc pinguis, & frugifera haberi solet.

Quamquam præcipua Terræ fecunditas ex

admixtis salium particulis maximè repetenda est. Sal enim sulphureus, & nitrosus, qui pinguior est, non acidus, aut vitriolicus, qui acidi, & corrosivi sunt, ad Terræ fertilitatem plurimùm conferunt. Hinc peculiare illud Terræ genus, quod a Germanis *Marga*, a Gallis *Marna* vocatur, cùm plurimo sale abundet, ubi in pulverem fatiscit, fecundandis agris mirificè inservit; ut omnium primis Britannię, Gallięque populis exploratum esse refert Plinius (a).

VII. Neque fecunditas solùm, sed ceteræ etiam terrarum qualitates ab admixtis salibus oriri debent. Sic Terram *Samiam*, quæ olim maximo in pretio fuerat, & Stellæ imagine notabatur; pinguem, mollem, candidam, & bituminis instar viscosam fuisse refert Galenus. Pinguis etiam, densa, mollis est Terra *Lemnia*, quæ olim capræ imagine, nunc Turcicis quibusdam characteribus insignitur, & *sigillata* vocari solet, & *stipticam*, vel adstringendi vim habet.

Chia, *Melia*, *Selinusia*, *Melitenfis*, *Armena*, seu *Bolus*, *Tripolitana* contra venena, aut sanguinis fluxum adhiberi solent; quemadmodum aliis Terræ generibus admirabiles aliæ virtutes non immeritò tribuuntur; faciliè enim atramentosus, aluminosus, sulphureus succus terræ permixtus, diversas illi qualitates largietur.

Quin etiam admirabilis illa colorum varietas, quæ in diversis terris observatur, quibus præsertim Pictores uti solent, ex salibus ipsis, aut succis, quibus Terræ partes ube-

G g 3

rius

(a) Lib. XVII. c. 6.

rius imbuuntur, oriri debet; quod accuratius adhuc intelligi poterit, ubi de colorum origine differetur, nunc autem Lapidum origo est exponenda,

C A P. IX.

De Lapidibus, ac Gemmis.

I.



Uid *Lapidum*, *Gemmarumque* nomine intelligatur, quoque discrimine, & *Lapides* ipsi, & *Gemmae* inter se differant, clarius, & illustrius est, quam ut uberius huc exponi debeat. Inquirenda solum, & explicanda superest illorum structura, & origo, & variae illorum species ad certa veluti *Capita* sunt revocanda, Quamvis autem hae lapidum species innumeræ ferè sint; triplici tamen genere continentur, ut alii sint, ac vocentur lapides *communes*, alii *Marmora*, alii denique *pretiosi* *Lapides*, aut *Gemma*.

Communis autem omnium *Lapidum* materia est terrestris substantia, quæ, prout variis salibus, aut succis imbuitur, permiscetur, variosque colores, duritiem, gravitatem, &c. inducit, ut mox ostendetur.

II. *Lapides* itaque, qui *communes* dicuntur, a Philosophis definiri solent *corpora fossilia*, quæ ex *terrestri*, *salinâ*, & *sulphureâ* materiâ componuntur, dura, compacta, friabilia, non *dustilia*, neque *liquabilia*, quæ singulæ lapidum proprietates, si accuratè expendantur, lapides ipsos a ceteris *fossilium*.

ge-

generibus omnino distinguunt; nisi fortasse, quod posteriori loco positum fuerat, lapides nimirum liquari non posse, respuatur, quoddam filex ipse vi caloris liquefiat. Lapides verò ex terrestri simul, salinâ, & sulphureâ substantiâ componi diximus; quia, si sola Terra admitteretur, hæc in pulverem faciliè abiret, & lapides ipsi fatiscerent, instar luti; si verò sola aqua, vel humor, aut succus aliquis effingatur, hic etiam vi caloris consumaretur. Itaque requiritur Terra, quæ duritiem, & soliditatem largiatur; requiritur etiam humor, & quidem viscosus, & tenax, quo terrestres illæ particule devinciantur, qui succus *lapidificus* a Philosophis vocari solet; neque aliud fortasse videtur, quàm humor, & aqua lapideis particulis veluti prægnans, qui, cum Terræ substantiam sensim pervadat, ac penetret, illas invicem uniat; quemadmodum certè, dum plantarum, aut animalium fibras ingreditur, illas indurat, ac lapidescit, ut innumeris observationibus demonstratur. Interim verò notari potest, fieri posse lapides arte, qui vix a naturalibus distinguantur; si nimirum pulveri ex fluvialibus lapidibus detricto resina, aut viscosus alius, & glutinosus humor permisceatur, & massa inde efformata calore induretur. Particulæ denique, salis ad mutuam partium terrestrium cohesionem plurimum conferunt, cum innumeris ferè experimentis appareat, salern, aut nitrosurn, qualis in calce reperitur, aut acidum, qualis in *Marcaffitis*, aut etiam utrumque simul permixtum, concretionem aut coagulationem efficere. Hinc, ubi metalla soluta fuerint, sale infuso concresecunt, & indurantur,

ut Conchylia, ovorum testæ, corallia, aliaque id genus ex sale duritiem contrahunt, ac ferè lapidescunt, cùm materia sale destituta, nunquam lapidescere videatur.

III. Sed, ut illustriùs adhuc intelligi, & accuratiùs explicari possit, quomodo ex terrestri substantiâ viscoso halitù, vel succo lapides efformentur; notari plurimùm debet, quod lapides ipsi in sui origine non illam duritiem, ac soliditatem habent, quam deinde præferunt; sed potiùs ex fluidâ, molli, cedentique materiâ componuntur. Molliores etenim, & ferè lutei ex fodinis eruuntur; & ubi aëri expositi fuerint, expresso, vel evaporato alumine indurantur. Hinc intra lapidum substantiam, non modò ferrum, conchylia, pisces, & diversa mineralium frusta, sed etiam aliquando, ut Gassendus memorat, clavi, gladiatorum fragmenta, soleæ, quibus eorum ungulæ muniuntur, inventæ sunt, quod certè explicari non potest, si in suâ origine lapides duri, compactique fuissent; facillimè verò explicantur, ubi supponatur aliquam argillæ partem, cui illa corpora infixæ adhæserint, dum adhuc fluida; & mollior esset, sensim induruisse, & lapidis soliditatem esse assecutam.

IV. Paullò nobilior est altera lapidum species, quæ Marmor vocatur. Hæc terrestri quidem materiâ, non secus ac lapides alii, componitur; sed tamen duriori, & plerumque eadem duritie, variisque coloribus insignis est. Aliud enim marmor est candidum, ut *Parium*, *Cbium*, *Proconeosum*, & *Carrariense*; aliud est viride, ut *Laconicum*; aliud rubrum, ut *Porphyrites*; aliud nigrum, ut quod

quod dicitur vulgo *Paragone di Fiandra*, &c. plerumque tamen marmora versicolora sunt, & admirabili prorsus colorum varietate, quæ incerto quodam ordine permixti sunt, insigniuntur. Colores autem ejusmodi, non solum ex diversis succis, & halitibus, quibus marmorea substantia, dum mollior adhuc, & fluida foret, est imbuta, repeti debent, quemadmodum de venis illis, quæ in arboribus apparent, suo loco ostendetur; verum etiam ex ipsâ terrestris substantiæ naturâ, quæ, cum etherogenea sit, diversos in diversis partibus colores induere poterit; unde etiam ejusdem marmoris partes discolores, inæqualiter duræ aliquando deprehenduntur, quod idem succus lapidificus, non eandem singulis Terræ partibus duritiem largiatur.

Hæc illustrari maximè poterunt ex artificiosâ marmorum formatione, quæ nuper tentata est. Si enim Carrariensis, aut alterius candidi marmoris moles sumatur, ejusque superficies lævigata, cum jam mediocri, lenique calore sensim calefacta fuerit, variis coloribus therebintino oleo, alioque viscoso liquore permixtis depingatur, illi marmoris poros vi caloris antea dilatatos ita pervadent, ejusque fibras ita coloribus inficient, ut eadem marmoris superficies Porphyrium, vel Granitum mirificè exhibeat, vixque a naturali marmore distinguatur.

V. Explicanda denique superest Gemmarum natura, & origo, quæ, non raritate solum, & exiguitate (quamvis Theophrastus (a) asserat Smaragdum repertum esse, cujus longitudo

(a) *Lib. de Lapid.*

tudo erat 4. cubitorum, latitudo 3.; & Plinius (a) Cryſtallum 50. librarum; quemadmodum Hottingerus (b) de alio 60. librarum, & Kirk: 100. librarum) (c) ſed egregiis etiam qualitatibus, quibus præditæ ſunt, maximo in pretio haberi, & pretioſi lapides vocari ſolent. Quâ quidem in re veriſimillimum eſt Gemmas, præſertim quæ pellucidæ ſunt, initio quidem fluidas eſſe, & molles; deinde verò ſenſim concreſcere, ac ſolidiores fieri. Id ſuadere videtur, non modò pelluciditas ipſa, quæ ſine aliquâ fluiditate acquiri non poteſt, ſed etiam conſtans illa, veluti Geometrica, figura, quæ in ipſis deprehenditur; ut in amethyſto *hexahedrica*, *octahedrica* in Adamante; *dodecahedrica* in Smaragdo, &c. maximè verò, quòd in Adamante, aliſque gemmis veluti commiſturæ, & fibræ, venarum inſtar, conſpiciuntur; juxta quas ab Artiſtibus tranſverſim ſindi poſſunt; commiſſuræ autem ejuſmodi ex laminulis oriuntur, quibus adamas ipſe componitur, quod ſine fluiditate aliquâ fieri, vel explicari certè non poteſt.

VI. Quin color ipſe Gemmarum argumento eſſe poteſt, Gemmas in ſui origine molles, ac fluidas eſſe: Color enim Gemmarum non aliunde oritur, quàm a ſuccis, qui, cùm viſcera Terræ pervadant, puriorem illius partem, quæ in Gemmam concreſcere debet, penetrant, & pro diverſâ vi, quâ pollent, certo quodam colore inficiunt. Hinc Gemmæ, quæ coloratæ ſunt, circa Metallorum, aut Mineralium fodinas reperiuntur, atque interdum

— (a) XXXVII. c. 2. (b) *Differt. de cryſt.* (c) *Hiſt. Acad.* 1702.

nam ex loci conditione fieri solet, ut quæ alioquin certo colore præditæ esse deberent, coloribus omnibus destituantur, aut alienis certè imbuantur. Sic Adamantes ipsi aliquando ita flavescent, ut Topazia, vel Smaragdi videantur; quemadmodum etiam, si ex rupe, aut vicinis locis eruantur, puriores, macularum omnium expertes sunt; sin verò ex Terrâ effodiantur, varios illius colores concipiunt. Aliæ verò Gemmæ, ut de Smaragdis præsertim commemorat Acoſta, alterâ sui parte candidiores, alterâ virides, alterâ alio colore, vel tincturâ præditæ conspiciuntur; quodd succus ille, sive pigmentum toti Gemmæ inficiendæ, impar fuerit, vel diversa etiam pigmenta eandem Gemmam pervadant, suoque colore tingant.

Admirabilem hanc Naturæ vim, ac solertiam in variis Gemmarum coloribus æmulati sunt Artifices illi, qui crystallum, & vitrum, quo libuerit, colore tingere solent; flavum etenim colorem, admixtâ ferreâ rubigine, vitrum inducit; cæruleum si cuprum, rubrum si sæpius id calcinatum permixtum habeat; viridem denique, ubi minio, aut rubrâ plumbi calce, vel calcinato cupro, simulque rubigine ferreâ commisceatur.

VII. Quod autem ad singularum Gemmarum colores attinet, aqueum colorem præferunt, etsi candidæ communiter dicantur, *Adamas*, *Iris*, *Crystallus*. Crystallus enim, non purissimi gelu species, ut perperam Plinius (a), Diodorus (b), aliique putarunt; sed veluti Gemma putari debet, cum aquâ, & glacie longè gravior sit, neque calore lique-

fiat,

(a) XXXVII. c. 2. (b) Lib. II.

fiat, neque in montibus perenni gelu, vel nive obductis reperiatur. Cæruleus est *Cyanus*, & *Sapphirus*, perspicuitate, & duritie Gemmas omnes, præter Adamantem, superans; rubeus, & micans *Rubinus*, sive *Carbunculus*, sive *Pyropus*; *Sarda* similiter, *Carchedonius*, & *Granatum*, quod rubro colore mali granati, vel punici instar, dilutiori tamen; & ferè flavescente effulget. *Beryllus*, *Prasius*, *Smargadus* virides sunt. *Topatius*, *Chrysolitus*, auri instar, flavescent. *Amethistas*, *Hyacintus* purpureæ sunt. Pallidus est *Onyx*, nigricans *Morion*; *Asterius*, *Opalus*, &c. versicolores. Atque istæ quidem pellucidæ sunt; aliæ nimirum Gemmæ, etsi puriori Terræ substantiâ componantur, suisque coloribus insigniantur, opacæ sunt; ut *Jaspis* diverforum colorum, *Achates* mirè coloribus variegatus; *Turchina*, sive *Turcois* ex cæruleo simul, & viridi permixta; *Lazuli* cæruleo solùm colore præditi auro permixto, &c. Ac, ut innumera alia Gemmarum genera omittamus, *Uniones* ipsæ, quæ in Conchyliis efformantur, parum pellucidæ sunt, neque ullum ferè colorem exhibent, Crytallo ferè; vel Adamanti similes. *Coralium* verò rubrum colorem exhibens, etsi inter Gemmas haberi soleat, attamen, non inter lapides, sed plantas referri debet, cum celebre sit, quod

— *Coralium*, quo primùm contigit auras
Tempore, durefcit: mollis fuit herba sub undis (a).

unde *Coralii* plantulæ, non solùm scopulis, sed etiam ferri frustis, ossibus, humano cranio, ut in Pisano Gimeliarcho ostenditur, adnasci solet.

VIII.

(a) Ovid, *Metam.* lib. XV. v. 382.

VIII. Ad hæc potiùs lapidum pretiosorum, vel Gemmarum genera revocari facilè poterunt lapides illi, quibus aut calor, aut medica vis, aut aliud ejusmodi inesse dicitur. Sic *Alectorides*, *Chelidonia*, *Cbelonita*, quæ in animalium corporibus nascuntur; *Hamatites* fistendo sanguini usurpatus; *Smyris*, qui, cum durissimus sit, poliendis Gemmis adhibetur; *Selenites*, cujus maculæ crescentes, decrescen-tesque, Lunæ phases æmulari dicuntur, *Helites*, in quâ nimirum aurea macula diurnum Solis motum sequatur, eundemque Solem semper respiciat; *Phosphorus*, aut *Bononiensis* qui, ubi Soli expositus fuerit, in obscurum locum delatus, per aliquod temporis spatium collucet, ut cum de lucis origine agetur *Florentini*, in quibus rupes, ac veluti diruta ædificiorum rudera conspiciuntur; *Ceraunius*, qui cum fulmine, ut alibi diximus, delabi creditur, sicuti, qui cum tonitru *Brontias*, *Obrias*, cum imbre; *Lydius*, quo aurum, aliaque Metalla probari solent; *Cos*, quâ ferri acies acuitur; *Talcus*, qui in plurimas lamellas dividitur; *Lapis specularis*, qui non modò in laminas, sive bracteolas tenuissimas, sed etiam flexiles diducitur; *Alumen plumeum*, vel *amiantos*, sive *asbestos*, hoc est igne in-
consumptus, quo, cum in fila diduci, distra-
hique possit, non ellychnia modò, quæ per-
petua dicuntur, efformari solent, sed etiam
olim lintheamina conficiebantur, quibus invo-
luta Principum cadavera pyræ, vel rogo im-
ponebantur, ut, incombusto lintheamine, ci-
neres deinde colligi possent. *Mappas* etiam
ex eo in focis conviviorum ardentes se vidisse,
ait Plinius, sordibus exustis magis splendere
igni,

igni, quàm possent aquis. Regum funebres inde tunicas, quibus combusta cadavera a reliquo cinere separantur; rarum inventu, difficile textu propter brevitatem. Sed nimii, ac ferè infiniti essemus, si singula horum Lapidum genera, illorumque vires, quæ plerumque tamen fabulosæ sunt, prosequeremur. Qui plura desiderat, Cl. Virum Robertum Boyle, aliosque adire poterit, qui de singulis Lapidum generibus, illorumque virtutibus uberrimè, & egregiè scripserunt.

C. A. P. X.

De Metallis, aliisque Mineralibus.

I.  Upereff modò, ut aliqua de Metallorum naturâ, & origine, quandoquidem ipsa quoque ex Terræ visceribus effodiuntur, hîc exponamus. Metalla verò dicuntur ea corpora, quæ licèt solida, compactaque sint; tamen vi caloris liquefieri, vel fundi possunt, aut malleo distrahi, vel duci, quibus proprietatibus, ac veluti characteribus a reliquis fossilium generibus distinguuntur.

II. Inde autem facîle constare poterit Metallorum numerus, qui incertus admodum est: quamvis enim illa communiter septem haberi soleant, *Aurum, Argentum, Æs, Ferrum, Plumbum candidum, sive Stannum, Plumbum nigrum, & Argentum vivum*; sive *Mercurius*; plerique tamen existimant, quod *Mercurius* ipse, vel *Argentum vivum*, quod in
Pe-

Peruviâ copiosissimum effoditur, inter Metalla numerari non debeat, cum neque distrahi, neque liquefieri possit, aliorum Metallorum instar; sed potius inter Mineralia, vel Metallica corpora reponi debeat, nisi fortasse, cum Chymicis, veluti communis Metallorum omnium materies habeatur. Alii verò, etsi Mercurium omittant, septenarium hunc Metallorum numerum tuentur, cum inter Plumbum, & Stannum, tertiam quandam plumbi cinericii speciem nuper repertam collocent, quam *Bisemutum* vocant; alii denique Bisemutum quidem ad plumbum nigrum referunt, sed ab Ære communi distinguere solent *Æs Cyprium*. Verisimilius est tamen sex solum esse Metalla, nimirum *Aurum*, *Argentum*, *Æs*, *Stannum*, *Plumbum*, *Ferrum*; cum æris, aut plumbi genera solo colore, aut regione, unde effodiuntur, differant; aut si Plumbum ipsum cum Stanno confundere, vel complecti malueris, quinque solum superessent Metalla a Lucretio memorata:

Quod superest Æs, atque Aurum, Ferrumque repertum est,

Et simul Argenti pondo, Plumbique potestas (a).

III. Quicumque tamen illorum numerus eligatur (neque enim de iis sollicitos esse nos decet) intelligi facile potest, Principem inter Metalla locum Aurò deberi, non modò, quòd fulvo, eximioque colore fulgeat; ceterisque omnibus gravius sit; verùm etiam, quòd si igne vehementissimo lique scat, ac maximâ visum diù, ignis instar, ferveat, ac ebulliat,

nul-

nullâ suâ molis, ac ponderis parte minui deprehendatur. Incredibile est etiam quanta sit in illo ductilitas, ut fidem omnem, ac imaginationis nostræ vires excedat subtilitas illa, ad quam Auri bracteolæ, tenuissimæque laminulæ distrahuntur, ut alibi memoravimus, cum de Continui, sive corporis divisione ageretur. Nullam denique rubiginem continet Aurum, nullo modo a corrosivis aquis consumitur, nullas rebus, quibus affricetur, sordes, aut notas relinquit.

IV. Quas quidem admirabiles prorsus Auri proprietates, ex incredibili particularum tenuitate, quibus illud componitur, repetendas esse jam diximus. Major enim corporis gravitas nonnisi ex densiori, confertiori, compactiorique partium numero oriri potest; quemadmodum insignis, & maxima ductilitas ex earundem partium tenuissimarum nexu, quæ, annulorum instar, invicem implexæ, arctissime devinciuntur.

Hinc, si Auri substantiæ, heterogeneæ quædam particulæ aliorum Metallorum, vel Mineralium permixtæ fuerint, ut fieri certè solet, cum ex fodinis Aurum educitur; ab illo facile secernuntur, ac separantur, Aurumque *obrizum*, vel purum relinquunt; neque enim tantâ vi, tantoque nexu cum aureis heterogeneæ illæ particulæ cohærent, ut ab illis facile avelli, vel separari non possint. Aliquando tamen Aurum *obrizum*, vel purum, ex ipsis etiam Terræ visceribus educitur, vel a fluxibus defertur, unde *auriferi* dicuntur, *Hebrus* in Thraciâ, *Pactolus* in Lydiâ, *Padus* in Italiâ, *Tagus* in Hispaniâ, *Rhodanus* in Galliâ, aliique plurimi, quia nimirum Auri

ramenta a fontibus ipsis, dum intra Telluris viscera serpunt, ac per aliquam Auri fodinam transeunt, celeri motu, & agitatione ipsâ poliuntur, ac demum arenæ granulis permixta in fluviorum alveis deponuntur. Ditiſſimæ verò Auri fodinæ in *Peruvia*, & *Castellâ aureâ* reperiuntur, aliisque in locis, quæ accuratè a Varenio (a) describuntur.

V. Proximè post Aurum, coloris elegantia, ductilitate, ac puritate sequitur Argentum, quod etiamſi, dum ex fodinis, quæ præstantiſſimæ sunt in Japoniæ Insulis, & *Potosi* monte Peruvix, eruitur; impurum, aliisque Metal-
lis permixtum sit; ubi tamen expolitur, purgatumque fuerit, pulcherrimum, candi-
dumque colorem induit, quem aliquando etiam exhibet, non secus, ac cetera Metalla, dum ex fodinâ educitur, quamvis id Plinius (b) solius Auri proprium fore putaverit.

VI. Argento, si colorem, gravitatem, ductilitatemque consideres, simile est stannum ab Homero *Cassiteris*, & a Latinis veteribus *candidum*, vel *argentarium*, hoc est Argento simillimum vocabatur. Quod enim veteres ipsi *stannum* vocabant, non peculiare quoddam Metallum erat, sed argenti, & plumbi mixtura, ex quâ præsertim specula fieri consueverunt. Ex pluribus verò stanni generibus, copiam, candore, ductilitate, & elegantia maxime commendatur illud, quod in *Cornubiâ* Angliæ Provinciâ effoditur; quod, etiam si plumbo, & reliquo stanno tenacius, & purius sit; tamen vi ignis in *lythargyrum*, hoc est

Tom. IV.

H h

in.

(a) Varen. I. c. 16. prop. 18. Kirch. Mund. Subter.
Tom. V. sect. 2. c. 3. (b) lib. XXXIII. c. 16.

in spumam argenteo lapidi similem, resolvitur.

VII. Eadem ferè plumbi, quæ stanni conditio videtur, ut ab aliquibus uno, eodemque plumbi genere utrumque contineatur. Longè tamen impurius, & gravius est plumbum, in quo nigricans, aut cinereus color reperitur; facilius etiam liquatur, aut funditur, & ignis vehementiâ consumitur, ac in auras avolat. Hinc mirari certè quis poterit, cur dixerit Plinius (a) plumbum materiæ facilitate, & gravitate præstare auro; quamvis inferiùs asserat omnia Metalla, excepto auro; innatare, vel insidere mercurio, adeoque aurum gravius esse plumbo: cùm revera duplo ferè gravius sit aurum plumbo, ut in III. Parte Physicæ Generalis cap. 14. dictum est, ubi specificam Metallorum gravitatem exposuimus.

VIII. Præter hæc quatuor Metallorum genera, quæ mollia ferè vocari possunt, & antequam liquefiant, ignescere solent; alia reperiuntur, quæ liquefieri non possunt, ut Ferrum; & Æs. Quod ad ferrum pertinet, igne, non secus, ac plumbum, facile consumitur, nisi ictibus mallei confipetur, indureturque. Non mediocris est in illo ductilitas, præsertim cùm excanduerit. Nigricans est illius color; & fuscus; quamvis, dum expolitur, candorem induat. Si ferri fodinæ cum ceteris metallicis comparentur, non solum frequentiores sunt, sed etiam majores, & ampliores, nam *Cantabria maritima parte, quam Oceanus aluit, mons præruptè altus (incredibile dictu) totus*

(a) Lib. XXXIII. c. 3. & 16.

totus ex eâ materiâ est (a). Ex fodinis, quæ in Germaniâ plurimæ sunt, impurum ferè semper eruitur, deinde vi ignis excoquitur, & purius evadit: quod si purior, solidior, ac tenacior ferri substantia ex aliquâ fodinâ eruat; non ferrum, sed *Calybs* vocatur, sive quodd omnium primi Calybes populi illum adhibere consueverint, sive quodd præstantius, & elegantius illud paraverint. Quin etiam arte ferrum ipsum durius, & fragilius efficitur, dum candens in subjectam aquam demergitur, ac temperatur, & ductilitatem amittit, quam iterum candescens acquirit, ut in Physicâ Generali jam diximus.

IX. Mira postremò est æris, quod *cuprum*, vel *Cyprium* vocatur, quodd primum in Cypro inventum fuerit, varietas in coloribus, quos, aut ab ipsis fodinis, quarum feracissima in Sveciâ reperitur, desert, aut ab artificibus accipit. Dum enim effoditur aliquando fuscum, candidius aliquando, ac sæpius etiam rubrum, auroque simile apparet. Hinc varios colores a Chymicis fortitur, ut aliquando aurum videatur: si etenim cum magnetide terrâ commisceatur, albescit; si cum terrâ Cadmiâ, vel calamitari lapide fossili, flavescit; unde *aurichalcum*, sive *montanum as* vocari solet. Quod si, non fossilis terra, sed alia metallorum genera cum ære commisceantur; inde variæ æris species prodibunt, ut æs *Corinthium*, quod incensâ Corinthi Urbè, fusis, liquatis; commixtisque variis Metallorum generibus conflatum est; *Ollarium*, ut vocant, admixto plumbo, *Campanarium*, & *Cananarium*

H h 2

rium

(a) *Plin. XXXIV. c. 14.*

rium, admixto stanno, sicque de ceteris. Id verò in singulis æris generibus notari plurimum debet, quod, etiamsi ex Metallis, quæ seorsim ductilia sunt, componantur, ut stanno, plumbo, &c. plerumque tamen, non ductilia sunt, sed malleo confusa franguntur, dissiliunt. Cujus quidem phœnomeni ratio repetenda videtur ex diversâ particularum figurâ, & nexu, quo conjunguntur; itaut heterogeneæ stanni, & æris particulæ non adeo inter se mutuis annulis, & ansulis devinciuntur, ut arctè cohæreant, & vehementius illisæ, & confusæ continuitatem, & unionem adhuc conservent.

X. Verùm, ut accuratiùs adhuc intelligi possit hæc mira Metallorum varietas, & proprietates illæ, quæ in singulis reperiuntur; requirenda supereft illorum origo, sive materia, ex quâ in Terræ visceribus efformantur. Hanc Aristoteles (a) esse putat halitum, vaporemque humidum, qui inter aridos, siccosque lapides sensim concreseat, & induretur, admixto præsertim alio halitu sicco, qui ab ipsis Terræ visceribus elevetur.

Alii, ut Agricola (b), terram, & aquam simul veluti communem Metallorum materiam assumunt, quæ variè inter se commixtæ, concretæ, concoctæque in Metalla convertantur: præsertim, ut Albertus (c) existimat, si terra exusta, ac veluti in cineres iis simillimos, unde vitrum confari solet, soluta sit, & viscosus humor illi affundatur. Chymici verò post Avicennam existimant, omnia Me-

talla

(a) *Meteor.* III. c. 6. (b) *Lib. V.* (c) *Lib. de Mineral.*

talla componi, vel coalescere ex sulphure, & mercurio; quamvis recentiores aliqui *sal astramentosum*, seu *vitriolicum* insuper requirant. Aurum itaque ex illorum sententiâ constabit mercurio purissimo, ac tenuissimo, cui parum sulphuris puri, fixi, rubentis admixtum, concoctumque fuerit. Argentum ex uberiore, puriorique mercurio, ac paucissimo sulphure, sed minus puro, & excocto. Plumbum similiter ex utroque impuriori, imperfectissimèque elaborato, sive permixto. Ferrum ex pauciore mercurio, uberiorique sulphure, sed fixiore, & albicante. Æs denique pauciolem, crassiolemque mercurium, uberius sulphur rubrum, impurum contineat.

XI. Celebris autem hæc Chymicorum opinio, quam Gassendus, & Cartesius (a) ipse complectitur, experimentis, quæ in effodiendis, præparandis, expoliendis, purificandisque Metallis fieri solent, confirmari posse videtur. Compertum est enim quod Metallarii, vel Metallorum fossores, coctoresque, eas plerumque ægritudines contrahunt, quæ a mercurio, vel sulphure produci solent. Metalla omnia vi Chymicâ in argentum vivum, sive mercurium purum a communi dissimilem resolvuntur. In Metallis omnibus sulphuris, & mercurii nitor, rubor deprehenditur; circa Metalla plerumque sulphuris, aut mercurii reliquæ reperiuntur, quæ metallicæ venæ jam efformata superfuerint, atque, ut cetera omitamus, non alia certè verisimilior Metallorum materia definiri posse videtur, quàm mercurius ipse.

(a) Princ. IV. n. 70.

XII. Atque utinam quidem opinionem hanc de Metallorum origine, non ineptissimis fabulis, quibus illorum ars mirificè abundat, Chymici deturpassent! Nunc autem, cum & sulphur Metallorum patrem, & mercurium matrem appellent, *seminalem, plasticam, sive formatricem vim*, qualis in stirpibus, & animalibus inest, illis tribuant, siderum, aliorumque cœlestium corporum vires, & influxus requirant, cum Metalla singula in aurum convertere, *lapide Philosophorum, Panaceam*, sive universalem medicinam conflare se posse gloriantur; nugas istas veluti arcana, ac divina quædam mysteria malè cautis subdolè venditare, rem domesticam insumere, sibi, ceterisque pauperiem conquirere soleant, a sapientioribus meritò irrideri, veluti perditum, perniciosum æruscatorum hominum genus haberi consueverunt.

XIII. Neque fortasse feliciùs, aut accuratiùs efficientem Metallorum causam Peripatetici, cum Astrologis comminiscuntur (a). Existimant enim utrique singulos Planetas proprium Metallum producere, ut occultâ quadam vi, & influxu Solis producat aurum, a Lunâ argentum, ferrum a Marte, stannum a Jove, cuprum, vel æs a Venere, plumbum a Saturno, mercurium denique a Mercurio. Quàm verò liberiùs, & fabulosè hæc omnia conficta fuerint quis apertè non videat, cum, aut nulla prorsus sit illa virtus, & influxus siderum, ut alibi ostendimus, aut certè Metallis producendis impar existat? Cur enim, si Metalla in Terræ visceribus, quò neque calor

(a) Scalig. de Subtil. Exerc. 106. sect. 2.

calor Solis, licet vehemens adeo, pervenire potest, Sol Metalla producit, cur inquam non arbores singulæ, lapides, marmora, &c. peculiarem Planetam habeant, a quo producantur; sicque sidera singula in omnium corporum generibus quædam fortiantur, quibus efformandis, nutriendis, conservandisque invigilent?

Efficiens itaque Metallorum causa est calor ipse Telluris, qui, cum varios halitus, succosque a sapientissimo Naturæ Artifice in ipso Telluris sinu, veluti fecundâ rerum, omnium origine, jam inde ab initio positos, excoquat, fermentet, agitetque: ubi simul plures ex illis certâ quadam mole, ac ratione concreverint, ut antea dicebamus, in varias Metallorum species abeunt, quæ colorem, gravitatem, ductilitatem, &c. a particulis ipsis, quibus coalescunt, fortiantur.

XIV. Plurima porro memorari solent indicia, quibus abditæ Metallorum fodinæ deprehendi possint. Sic, ubi montes steriles fuerint, proceræ in illis arbores adolescere non possint, calidus, & fœtens vapor ex illis erumpere, nives brevi liquari, præsertim verò metalli ramenta cum fontium aquâ exire videantur; metallicam venam ibi latere conjiciunt (a), quæ, ubi semel reperta est, perennis ferè videtur, cum semel exhausta, iterum post longum spatium temporis restauretur, novisque succedentibus, ac coalescentibus succis repleatur (b), quod in lapidicinis ipsis fieri solere jam diximus.

H h 4

XV.

(a) Vallemour, *Act. Erud.* an. 1696. (b) *Boyl. de Gen. Metal.*


XV. Ad Metallorum naturam maxime accedere videntur quædam alia fossilia corpora, quæ, cum inter Metalla, & lapides ferè media sint, peculiari *Mineralium* nomine distinguuntur. Ejusmodi sunt *Stibium*, sive *Antimonium*, quod metallicis, ac sulphureis partibus componitur; *Auripigmentum*, vel *Arsenicum*, quæ, cum sulphure, & sale *caustico* consent, solo colore differunt, hoc enim candidum est, illud flavum, quod si rubrum sit, *Sandaracha*, vel *Realgal* vocatur, & a Pictoribus, & Medicis adhibetur. Sic etiam *Pyrites* lapis, vel, ut Mauri vocant, *Marcasita*, cui Metalla sæpius adnascuntur, & adhærent, & si nulli aliquando metallicæ venæ permixta sit, hæc plerumque auro, vel argento, frequentius tamen æri permixta est; cumque insignem dūritiem habeat, ignis ex illâ, silicis instar, excutitur: sic etiam lapis ille, qui *Plumbarius*, vel *Plumbago* vocatur, plumbi, vel interdum etiam argenti particulas admixtas habet. Ex hoc plumbario lapide *minium* illud efficitur, quod *secundarium* dicitur; primum enim, atque præcipuum ex hydrargyro, sive mercurio formatur, qui, cum ex fodinâ educitur, non nigricans, ut alius, sed rubescens est.

Addi quoque potest *Cinnabaris*, nempe mixtura quædam ex mercurio; & sulphure. simul concretis, atque, ut Chymici loquuntur, *sublimatis*, composita: quæ aliquando quidem naturalis est, & ex Terræ visceribus effoditur, sæpius tamen arte conficitur. His accenseri denique potest *terra Cadmia* fossilis nigricans, aut cinerea, quæ auro similiter, argento, & frequentius æri permixta eruitur, & æri deinde concocta aurichalcum efficit, ut paullo superius innuimus, XVI.

XVI. Plurima hîc addi possent de variis, & insignioribus Metallorum, aut Mineralium fodinis; de arte, quâ probari, purificari, vel perfici, simulque misceri solent, aliisque sexcentis id genus; verùm hæc ex aliis Auctoribus repeti facillè possunt, præsertim ex Varenio, qui hæc omnia accuratè prosequitur; cùm satîs superque, quod ad institutum nostrum attinet, non de Metallis solùm, ac Mineralibus, sed universè de omnibus Fossilium generibus dictum sit.

C A P. XI.

*De Calore, & Igne subterraneo,
Montibus ignivomis,
& Thermis.*

I.  Ræter innumera Fossilium genera, quæ in Terræ visceribus contineri jam diximus, continet etiam Terra in se se, ut aqua, ita spiritûs; ignisque scaturigines, quarum quædam sub terra latent oculis hominum subdûcta, multa spiracula habent, emissariaque vaporis, ut Lipara, ut Ætna, ut Eolia insula, qua quidem sæpe & ipsa fluminum more fluunt, candentesque evomunt massas. Quin etiam aliqua ex ipsis secundùm fontes aquarum sita, aquas ipsas manantes calefaciunt, adeo ut, quædam ex ipsis tepentes, effervescentia alia, nonnulla egregiè temperata emittantur (a). De Ther-

(a) Arist. de Mund. cap. 4.

Thermis itaque, ignovimis montibus, ac interno Telluris calore, quæ plurimum connexa, sibi que cohærentia sunt, hæc agemus.

II. Ac de subterraneo quidem calore, qui in Thermis se prodit, ambigere solent Philosophi, utrum ille sit *actualis*, hoc est actualiter quædam terrestria corpora, sive terrestris substantiæ partes calidæ sint; an potius *Virtualis*, seu *potentialis*, ut solum quædam corpora in Terræ visceribus existentia, cum in se frigida sint, calorem tamen concipere possint, aut alia corpora calefacere; ut fieri sæpe videmus, quod ubi frigida calci aqua frigida effusa fuerit, calor ab illâ concipitur. qui non actualiter, sed virtualiter solum in illâ reperiebatur; quemadmodum etiam ex frigidis liquoribus una permixtis, liquor efficitur, qui non solum calorem concipiat, sed etiam, ignis instar, fervere videatur.

Complures itaque existimant, quod subterraneus calor sit actualis, sive quod in Terræ totius mole, aut substantiâ, quemadmodum, ferè in corpore animato, detur perennis agitatio, vel motus partium, unde calor oriri possit, præsertim si corpora, quæ agitentur, facile calefieri, incendique possint, ut nitrum, bitumen, sulphur, &c. sive etiam quod in visceribus Terræ, magna ignis copia perenniter ardeat, quem, cum in centro Telluris positum arbitrentur, *centralem* vocant; ejusque rei argumentum esse coniiciunt, quod aliquando disruptis Terræ partibus ignis ille erumpat, ut in Ethnâ, &c. conspicitur: & actualis hic calor Terræ, proximis etiam aquæ fontibus communicetur, unde sunt Thermæ.

III. Sed verisimilior tamen est opinio illorum

rum, qui constanter asserunt innatum Terræ calorem, non actualem esse, sed solum potentialem; neque actualiter in Terræ visceribus ignem ardere, sed alimenta solum in iis reperiri, quæ interdum fortuitâ agitatione calefieri incendique possint.

1. Cùm enim ea sit ignis natura, quod alibi quoque diximus, ut solum in aëre libero produci, conservarique possit, atque ubi in angusto loco coercetur; opprimatur, serè langueat, ac prorsus extinguatur; quâ fieri poterit, ut in occultis Terræ visceribus ignis, præsertim verò per aliquod spatium temporis vi-geat, vel conservetur?

2. Neque actualis ille calor requiritur, ut omnia phænomena, quæ in Thermis, aut ignivomis montibus observantur, explicari possint: quemadmodum enim mox ostendetur, montes ignivomi, Thermæ, vel loca calida ostendunt quidem, quod aliquis calor in Terrâ reperitur, atque ignem etiam aliquando concipiat, & foras erumpat; non tamen quod ille calor semper in Terræ visceribus ardeat.

IV. Quod, ut clariùs intelligi, & accuratiùs explicari possit, recolenda sunt illa, quæ paullo superiùs innuimus de succis oleosis, & salibus, quæ in Terræ visceribus continentur. Diximus enim ibi maximam esse nitri, bituminis, sulphuris, olei copiam, aliorumque corporum, quæ inflammabilia, vel combustibilia dicuntur, quæ, licet in se actualiter frigida sint, si celeri tamen, rapido, perturbato, vel intestino, ut ajunt, motu tenuissimæ illorum partes agitentur; priùs calorem sensum concipient, & si aliqua aëris libertas

dabi-

dabitur, in ignem denique convertentur. Id experiri licet, ut antea adnotavimus, in calce, cui si aqua effundatur, calorem acquirit, tenuesque fumos emittit; experimur etiam in pulvere pyrio, qui ex solo motu calorem, & flammam concipit; experti denique sunt pluri in auro fulminante, quod ubi leni, tenuique motu agitetur, statim incenditur.

Si igitur illa fossilium genera, *quæ virtute, sive potentiâ calida sunt*, ex aliquâ causâ motum concipiant, calefieri statim poterunt; motus autem ille repeti poterit, sive a continuo ætheris, tenuissimæque alterius substantiæ motu, sive a particularum terræstrium agitatione, adhibitâ quoque caloris animalis analogiâ. Quin etiam calor, & motus oriri poterit aliquando ex aquâ ipsâ, vel frigore, ut nitrum, ac sulphur calefiant, cum ipsis aquæ particulis permisceantur, sive quodd, ut Peripatetici existimant, ex *antiperistasi*, vel *circumobistentiâ* contrariorum, quædam veluti pugna excite-tur; sive quodd contrariorum corporum particulæ contrariis motibus agitentur, sibi-que mutuò occurrentes ita affricentur, ut calorem concipiant, quod sæpius memorato calcis exemplo optimè declaratur, & evidentius adhuc in his mixturis conspicitur, quæ nitro simul, ac sulphure, bitumine, & calce compositæ; solâ humidi alicujus ex. gr. sputi aspersione, flammam concipiunt.

V. Atque hinc intelligi fortasse poterit, cur aquæ calidæ, sive Therinæ in aliquibus Terræ locis reperiantur. Si etenim per aliquam montium partem, in quâ sulphuris, aut bituminis fodina reperitur, fons aliquis, aut aquæ rivulus præterlabatur; aquæ particulæ
nitro

nitro, sulphurique commixtæ calorem efficiant, quibus sulphur ipsum, & aqua mutud sensibilibiter ita calefiant, ut adhuc calida, ex montium lateribus erumpere possit. Abradet etiam, secumque deferet aqua sulphuris, &c. particulas, quæ perennem veluti motum, & agitationem, adeoque calorem in aquâ conservent; nisi fortasse verisimilius videatur, quod, licet aqua sulphuri non permisceatur, calorem tamen concipiat, ex eo quod prope ea loca transeat, in quibus calor, aut ignis aliquando reperiatur.

VI. Quod ad ignivomos montes attinet, hi plurimi recenseri solent a Geographis in singulis ferè Terrarum regionibus, sed celeberrimi sunt *Ætna*, *Vesuvius*, de quibus inferius, mons *Hecla* in Islandiâ, vel Thule, in quo præter flammæ, ingentesque lapides erumpentes, strepitus quidam, ejulatum instar, audiuntur. Mons in Javâ Insulâ, qui anno 1586. maximâ incolarum strage ardere cæpit, tantamque ignis, & fumi copiam emisit, ut sole tecto, tenebras ferè induxerit. Eo quoque tempore mons in unâ Badanarum Insulâ exarsit, incredibilem cinerum, saxorum, &c. vim jaculatus. Sic plurimi in Moluccis Philippinis insulis, alique montes ejusmodi reperiuntur, qui, aut semper ardent, fumosque, & cineres evomunt, aut interjectis temporibus erumpunt, ut elegantissimè ostendit Varenius (a)

VII. Quæ cum ita sint, quis apertè non videat, non aliâ de causâ montes illos ardere, cineres, fumum, & saxa jaculari posse, quàm

(a) *Lib. I. prop. 3.*

quàm quoddam maximam, & ferè incredibilem nitri, sulphuris, bituminis copiam in se contineant, quæ, cum alicubi accensa fuerit, cuniculi militaris instar, per montis viscera serpat, maximoque impetu, quâ datâ portâ ruat; hoc est ubi debiliorem obicem reperit, erumpat, secumque circumposita saxa abripiat, horrendâque vertigine jaculetur? Accedit etiam quod ignis, & cinerum eruptiones cum vehementi agitatione aëris conjungantur; quemadmodum plerumque a Ventis ipsis, qui per occultas Terræ speluncas cœco impetu excurrentes flammam excitant, aut excitatam impellunt. Sic in Ternatensi monte, Veris, & Autumni tempore, borealibus ventis flantibus, cum *horribili fremitu flamma atro fumo permixta, & cum favillis erumpunt, atque loca omnia latè cineribus complent* (a). Sic etiam Sicilia non frequentioribus modò terræ motibus, sed Æthnæis etiam ignibus obnoxia creditur; quoddam Sicilia terra cavernosa, & fistulosa sit, quo sit, ut ventorum flatibus pateat, unde ignis concipitur; intrinsecus sulphur habet, & bitumen; in qua, ubi ventus per spiramenra incubuerit, diu luctatus, ignem concipit, sicque Æthna durat incendium (b).

Id eleganter expressit Ovidius, causam inde repetens, cur ignivomi montes aliquando incipiant ardere, tandemque ardere delinunt.

Nec, qua sulphureis ardet fornacibus, Æthna Ignea semper erit, neque enim fuit ignea semper (c).

VIII.

(a) Varen. loc. cit. (b) Trogus apud Strab. in III. Æneid. VIII. (c) Metam. XV. vers. 203.

VIII. Quod autem olim augurabatur Ovidius, id sæpius contigisse a scriptoribus peribetur. Plurimi enim montes olim ignivomi, nunc ardere desierunt, ut aliqui in Congo, & Angliâ, in Insulis Azoribus, ac præsertim Terzerâ, in Queimadâ insulâ ad litora Brasiliæ. Sic etiam in Insulâ S. Helenæ, alibique reperiuntur montes cineribus, ac fuligine, &c. obducti; quod argumento est montes illos olim arsisse, etsi nunc rarè fumum, numquam ignem emittant. Vesuvius certè rariùs nunc, quàm olim accenditur, atque ita sensim consumitur, ut, cùm olim præaltus foret, nunc humilior appareat. Quamvis enim nitri, bituminis veluti semina in terræ visceribus reperiuntur, atque, ubi semel igne correpta, consumptaque fuerint, aliis venarum instar concrescentibus renovari possint, ut iterum ardeant, evomantque; non ea tamen sulphuris copia renascitur, quæ conservandis ignibus par esse possit, aut certè erumpentibus simul cum sulphure accenso lapidibus, avulsisque flammarum impetu solidioribus montium visceribus, montes ipsi tandem fatiscere, & subsidere debent. Plerumque tamen hæc montium subsidencia ex terræ motibus oriri solet, quibus Telluris, & montium partes vehementer adeo concutiuntur, ut sensim delabi, ac in præceps ruere debeant. Sed hæc in sequenti capite exponentur, quo terræ motuum causam, & originem inquiremus.

CAP. XII.

De Terræ motu.

I.



*U*ramus ergo, quid sit, quod Terram ab infimo moveat, quid tanti molem corporis impellat, quid sit illâ valentius, quid tantum onus vi suâ labefactet, cur modò tremat, modò luxata subsidat, nunc in partes divisa discedat, nunc omnes magnitudinis non nota convertat introrsus, nunc novos exprimat, aperiat aliquando aquarum calentium venas, aliquando refrigeret, ignesque emittat, aliquando notor, & per secula nobiles comprimat, mille denique miracula moveat, faciemque mutet locis, dum defert montes, subrigit plana, valles extuberat, novas in profundo Insulas erigit (a). Antequam tamen id operis aggrediamur, juverit illustriora veterum Philosophorum placita exponere, ut verisimilior opinio clariùs appareat.

II. Celebris itaque Babyloniorum Sententia fuit, cœlestem esse Terræmotûs originem, hoc est a viribus, & influxibus siderum aliquando concuti. moverique Tellurem, & Assyrios (b) æmulati Romanorum Pontifices existimant ab aliquo Deorum, Dearumque agitari Terram, eique, suppresso nomine, sacra offerre consueverant, *Quoniam*, & quâ vi, & per quem Deorum, Dearumque Terra tremet

(a) *Sen. VII. c. 4.* (b) *Plin. II. c. 67.*

ret, incertum esset (a). Quamvis Philostratus memoret (b) Telluri, & Neptuno sacra a Veteribus fieri consuevisse.

Ab inani semper Assyriorum superstitione plurimum abhorruit Epicurus,

*Quem nec fama Deum, nec fulmina, nec
minitanti*

Murmure compressit Cælum (c),

ac veram Terræmotûs originem explicaturus, plurimas hypothesès proposuit, quibus hæc difficilis, & obscura quæstio solveretur, mox recensendas, & etiam si, solitam methodum secutus, nullam unicè adamaverit, omnes tamen verisimiles esse putavit; nec immeritò fortasse, cum plurima sint argumenta, quibus illarum singulæ probari posse videantur.

Quod enim Terræmotûs origo ex subterraneis aquarum alveis repetenda sit, ut olim Democritus existimaverat (d), innuere videtur immensa fere aquarum copia, quæ in Terræ visceribus celeri, perennique motu agitata, & montium stratis, veluti rupibus, scopulisque illisa, reperitur. Quis enim ignorat infra Telluris superficiem maximos lacus, & ingentia flumina existere? Certè, ut innumera alia loca omittamus, quæ fusiùs, & opportunius in sequenti capite demonstrabimus, infra solum Mutinense vattissimum flumen celeri impetu fertur, ut excavatâ foveâ, vel terebratâ terrâ, subterranei fluminis fragor, & strepitus audiat, & illius aqua sursum profiliat. Itaque hæc subterranea flumina inter-

Tom. IV.

I i

nas

(a) Varro ap. Agell. II. c. 28. (b) In vitâ Apollon.
(c) Lucr. lib. I. ver. 69. (d) Plur. III, c. 15. vid.
Arist. II. Meteor. c. 7. Sen. loc. cit.

nas Terræ partes, quibus exterior, & habitata illius superficies, veluti fulcris innititur, paullatim exedunt, corrodunt, extenuant, ut tandem superior, ac superimposita Terræ pars dehiscere, ac moveri debeat, vel terræ motum efficere. Hinc antiquissimi Græcorum videntur existimare, Terramotus aquarum subter in Terrarum cavernis undantium fluctibus, pulsibusque fieri; unde Neptunum terra motorem, vel quassatorem appellavere; atque eo præsertim argumento, quod plerumque in terræ motibus maxima aquarum vis ex Terra visceribus erumpere deprehendatur (a).

III. Sed Anaximenes, non modò aquarum subter labentium impetu interna Terræ fulcra exedi, consumique arbitratur, verùm etiam subterraneorum ignium viribus id fieri posse putavit, quod ex Aristotele, Plutarcho, & Senecâ apparet. Hoc etiam fortasse addere poterat Anaximenes, Terrarum subsidentiam, ex solâ partium non aptè inter se cohærentium gravitate, ex temporis injuriâ, quâ sæpe solidiora etiam corpora corrumpuntur, aliisque id genus causis oriri posse. Quid verò Thaletis Sententiam de terræmotûs origine alibi commemoratam, iterum explicemus? Ille nimirum, cùm Tellurem Oceano circumfuso, veluti navigium insidere, ac innatare putaverit, tunc illam tremere dixit, vel fieri terræmotum, cùm Tellus ipsa, navigii instar, fluctuaret, & ex unâ in alteram partem inclinaretur. Anaximenis præceptoris Sententiam deferens Anaxagoras (b), cùm Tellurem ab aëre substineri putaret, tunc illam mo-

veri

(a) Agell. II. c. 28. (b) Ap. Orig. de Sensis.

veri censuit, cùm superior, vel extrinsecus aër in subterraneum aërem decidens, illum commoveret, unde ille commotus, & agitated Tellurem ipsam super impositam moveret.

IV. Atque ab hac quidem Anaxagoræ sententiâ, quæ Stoicis, Callistheni, Theophrasto, Straboni communis est, parum differt opinio Aristotelis(a), qui etsi Tellurem ab aëre subfineri non dixerit, ut Anaxagoras, maximam tamen aëris copiam in specubus, cavernisque Terræ reperiri arbitratur, qui si aliquâ ex causâ rarefiat, ad circumposita Cavernarum latera illiditur, indeque resiliens, ac reciproce, perturbatoque motu vehementior effectus, latera commovet, unde terræ motus in superimpositâ regione sentitur. Suspiciatur tamen Aristoteles externum etiam aërem ad Telluris motum conferre; quatenus hic per aperta montium latera ingressus, subterraneum aërem commoveat, excitet, ac impellat. Id certè docuerat Archelaus, qui apud Senecam: *Venti, inquit, in concava Terrarum deferuntur, deinde, ubi jam omnia spatia plena sunt, & in quantum aër potuit, densatus est; is, qui supervenit, spiritus, priorem premit, & elidit, ac frequentibus plagis primò cogit, deinde perturbat. Tunc ille quarens locum, omnes angustias dimovet, & claustra sua conatur effringere; sic evenit, ut Terra, spiritu luctante, & fugam quarente, moveantur* (b). Epicurus autem, ut antea diximus, illorum omnium sententiam amplexus, non solum fieri posse putavit, ut Terra, cùm in partibus suis inferioribus rimosa sit, ac variè dispersa, & in ca-

(a) Sen, VI. c. 13. 21. (b) c. 13.

vernosa ejus cavitates incidente spiritu concutitur, sed hanc quoque verisimiliorem est arbitratus, cum nullam causam motus majorem esse, quam spiritum existimaverit.

V. Sed, ut ingenuè loquamur, ex tot opinionibus, quas Epicurus enumerat, nulla verisimilior videtur, quam, quæ ex calidâ vi spiritûs in ignem versâ, & fulmini simili, terræmotûs originem repetendam esse arbitratur, ita ut motus, & agitatio Telluris, non a ventis, aut ab alveis præterfluentibus, sed a subterraneis ignibus originem fortia-
tur.

1. Et quod ad subterraneos alveos pertinet, poterunt quidem subterranea flumina Terrarum fulcra exedere, sensim extenuare, ut illis tandem consumptis, super imposita regio collabatur, maximoque impetu dehiscat; sed illa terræmotum excitare non poterunt, in quo eadem Terræ pars prius elevata, deinde deprimatur, &, si in dexteram horizontaliter impellatur, ad sinistram, factâ veluti inclinatione quadam, revertatur. Thaletis autem opinio, quamvis admitti posset, infelicitè etiam terræmotûs originem explicaret; supponeret enim singulas Terræ partes eodem impetu, eodemque tempore agitari, quemadmodum certè singulæ navigii partes in Oceano fluctuantes agitantur, quod tamen ab experimentis ipsis, & a veritate plurimum dissidet, ut Aristoteles ipse (a), Plato, Parmenides, ac Democritus observaverunt (b). Eruptiones itaque aquarum, mutati fluviorum alvei, exsiccatum mare, aliaque id genus in

no-

(a) II. Meteor. (b) Ap. Plut. III. c. 15.

nostrâ etiam sententiâ explicari optimè poterunt, ut inferiùs constabit.

2. Qui verò ad aëris rarefactionem confugiunt, non plurimùm quidem a verâ terræ motûs origine abhorrent, non omnem tamen quæstionem dirimunt, neque accuratam illius causam ostendunt. Quamvis enim maxima, & incredibilis sit vis elastica, quæ reperitur in aëre, adeoque maximam vim exerat aër, dum violenter compressus pristinam extensionem recuperat, ac rarefit, ut alibi quoque docuimus; inverisimile est tamen, quod vehemens adeo sit aëris rarefactio, ut cavernas perrumpere, super impositas, amplissimasque regiones disicere, universam denique Telluris compagem solvere, ac commovere possit. Quin etiam paullò liberiùs assumitur ingentem adeo esse aëris compressionem, sive densitatem in subterraneis specubus; cùm explicari certè non possit, a quâ potissimùm causâ aër ibi comprimatur. Quod enim ab exteriori aëre, qui Terræ poros pervadere nititur, id fieri existimant, falsum omnino censerì debet, cùm nulla sit ea vis, quâ exterior aër in Terræ viscera adigatur; aut, si aliquâ vi impelli, protrudique posset, eâdem certè resili-
laret, atque in apertum aërem sursum avvo-
laret. Id unum reponi fortasse poterit, aërem internum a subterraneo calore rarefieri, ac dilatarì, atque, dum interim, veluti ferveat, obsistentia corpora perrumpere, disicere, commovere: sed responderi quoque facilè poterit, primùm quidem in hac etiam hypothesi calorem ipsum, & ignem subterraneum primam terræmotûs causam dici oportere; cùm ipsa quoque aëris rarefactio ab igne, sive ca-

lore subterraneo oriatur; deinde verò aëris rarefacti agitationem imparem esse tot, tantisque terræmotûs stragibus explicandis.

VI. Verisimilior itaque terræmotûs origo a subterraneis ignibus ita repetenda nobis videtur: ut, cùm aliqua sulphuris, nitri, bituminis copia, quam in Terræ visceribus plurimam esse jam diximus, aliquâ de causâ sæpius etiam expositâ, in speluncâ, vel liberiori loco accendatur, sensim rarefiat, atque ubi omnem cryptæ amplitudinem occupaverit, majus adhuc spatium requirens, circumposita Terræ latera, sive superiorem veluti fornicem urgeat, impellat, ac super impositas regiones valido tremore concutiat.

1. Certè qui infinitam ferè vim ignis elasticam, dum repentè in sulphureâ, nitrosâque materiâ reperitur, attentè consideret; nullus dubito, quin terræmotûs originem non alteri causæ, quàm igni verisimiliùs adscribi posse deprehendat: cùm planè compertum, perspectumque sit, non aliud esse corpus, quod majorem vim elasticam exerat, quàm ignis.

2. Quod, ut illustrius appareat, simulque sensibili experimento exposita terræ motuum causa manifestissimè confirmetur; quanta nam in pulvere pyrio, quem sulphure, nitro, carbone, iis nimirum corporibus, quæ in Terræ visceribus reperiuntur, componi diximus, vehementia deprehenditur? Exigua nimirum pulveris pyrii pars sclopeto inclusa, dum flammam concipit, vehementer adeo rarefit, ut plumbeum globum ad maximam distantiam vehementer explodat, & si ferreo excavato globo includatur, accendaturque, globum ipsum

in-

ingenti fragore dificiat, ædificia, turres, objectaque corpora perrumpat.

Quod si, horrenda illa quidem, sed accuratior adhuc terræmotûs imago desideretur, hæc in militaribus cuniculis, quas *minas* vocant, haberi faciliè poterit. Ubi enim Telluris substantia, subterranea veluti fovea excavata fuerit, hæc pyrio pulvere repletur, qui, cùm semel ignem conceperit, vehementer adeo rarefit, ut disruptis Terræ lateribus, discissâque superiori parte, quâ liberior est aditus, immensâ vi furens erumpat, super extructas arces, ac universam urbem ejaculetur, ut immixtæ caligini turres, ac ædificia in aërem protrudantur. Quid itaque mirum, si accensa nitri, sulphuris, ac bituminis ingens copia Terræ latera concutiat, impellat, & horrenda terræmotûs phœnomena efficiat?

3. Accedit etiam, quod ea plerumque loca terræ motibus agitantur, in quibus major sulphuris, ac bituminis copia reperitur, ut sunt maris litora, Sicilia, Campania, Ferrariensis, & Senensis ager. Ægyptus verò terræmotibus obnoxia non credebatur, quòd ex limo tota concreverit, neque cavernas habet, in quibus ignis liberè concipiatur; quemadmodum etiam insulam Delos immobilem existimarunt, quòd cavernis abundet, ac ubique perviæ sint, per quas conceptus ignis liberè egrediatur. Sed movetur. & Ægyptus, & Delos, quam Virgilius stare iussit, auctore Pindaro:

Immotamque coli dedit, & contemnere ventos (a).

I i 4

quod

(a) *Æntid. lib. III. ver. 78.*

quod etiam Thucydides, & Callisthenes prodiderunt.

4. Neque alia certè Terræ motûs origo videtur esse, quàm hic accensi bituminis impetus; compertum est enim, quod in subterraneis locis, antequam Terræ motus contingat, gravis bituminis odor sentitur; unde Phærcidem Syrum Pythagoræ Præceptorem, vel, ut Ammianus putat, Anaxagoras, sive, ut alii censent, Pythagoras ipse haustâ aquâ putei, Terræ motum brevi futurum prædixisse fertur, quod posterioribus seculis observatum esse memorat Plinius, asserens: *Terra motu imminente, aut secuto, esse in puteis turbidiorem aquam, nec sine odoris tadio (a).*

5. Quin etiam ignis ipse, & accensi bituminis flamma plerumque conspicitur. Sic in horribili Terræ motu, quo superiori seculo ora Siciliæ Æthnæ proxima tribus diebus quassata est, quarto tandem die flammæ, & cinerum flumen erupit (b). Sic in Peruviano inferiùs memorando flammæ visæ sunt; quemadmodum etiam anno 7 Justinî Cæsaris, cum Terræ motu, qui totam ferè Antiochiam diruit, sulphureus ignis ex Terræ visceribus erupit (c). Sic etiam, ut ex Etruscorum libris Plinius commemorat: *In agro Mutinensi montes duo inter se concurrerunt strepitu maximo assultantes, recedentesque, inter eos flammâ, fumoque in Cælum exeunte, interdium spectante in viâ Emiliâ magnâ Equitum Romanorum, familiarumque, & Viatorum multitudine (d);* quod etiam portentum de Ossâ, & Olym-

(a) II. c. 81. (b) Borell. de incen. Æth. (c) Evag. V. c. 2. (d) Lib. II. c. 83.

Olympo traditur, qui, cùm antea conjuncti forent, unumque montem efficerent, Terræ motu sejuncti, & ab invicem avulsi fuerunt: quod in Pyrenæis etiam montibus contigisse, putatur, cùm gibbosæ unius partes, aut rupes cavis oppositis rupibus optimè corresponderent, & anno 1617. in alpihus Rhætici oppidum Chavelle montibus interjectum, montibus ipsis utrinque coalescentibus, obrutum est (a); sic denique, ubi vi Terræ motus insulæ, aut abortivæ, aut natæ sunt, ubi fluminum, & Maris alvei mutati, ubi vehementiori impetu Terræ compages agitata est, erumpentes etiam ex apertis Terræ voraginibus flammæ, aut bituminis, aut sulphuris ardor est observatus.

VII. Quandoquidem verò natas, aut abortivas insulas, mutatas Oceani sedes, &c. memoravimus, dicendum superest aliquid de Terræ motuum effectibus, cùm innumera sint exempla, quæ a Veteribus, Recentioribusque Philosophis afferuntur, aliqua solum hîc exponemus, quibus illorum vis, & origo uberiùs adhuc ostendetur.

Absorptam itaque Terræ motus impetu Helicem, & Buram, urbemque aliam Sidoni proximam, cùm totâ ferè Sidone ipsâ Strabo, Diodorus, Plinius (b), alijque prodiderunt. Duodecim urbes in Asiâ Tiberii Cæsaris ætate unius noctis spatio prostratas esse, ait Strabo; quemadmodum nostrâ ætate plures etiam in Neapolitano Regno dirutas accepimus; quodque fidem excedere videtur, anno 1604.

non

(a) *Du-Ham. Histor. Acad. lib. II. sect. II. cap. 3.*

(b) *Lib. XII. & Tac. Ann. II.*

non procul a Limâ (a) in Peruviâ horrendus adeo, immanisque Terræ motus contigit, ut horæ octante, montes omnes, ac sylvas, flumina, regiones, & urbes ad tercentarum leucarum spatium, juxta litora, & septuaginta versùs continentem maximo impetu, & incredibili clade subverterit; cùm ante aliquot dies ex Orate monte cineres erupissent, tumque primùm mons ipse commoveri cœpisset.

IX. Quas tamen insulas, & regiones in aliquâ parte Terræ motus absorbit, & apertâ voragine in imum dejecit, aliâ in parte restituit; sic enim inter Theram, & Therasiam Terræ motûs impetu nata est insula ambitûs stadiorum 12., erumpentibus interim flammis ex medio Mari, quod fervere videbatur. Sic anno 1538. prope insulam S. Michaelis Azorum unam ex Mari 160. ulnis profundo, insula erupit, cujus longitudo 9. miliarium, latitudo ferè 5., dum maximus interim veluti revolutorum lapidum fragor audiretur: quod ne mirari possemus, nuperri-
mè anno 1707. prope Theram, & Therasiam, vulgò *le Santorine*, nova insula nata est; sicuti in agro Puteolano anno 1538. montem unius miliarii altitudine ex cineribus, eructatisque pumicibus coaluisse ferunt: quemadmodum etiam, ut auctor est Aristoteles, in Hierâ insulâ intumuit aliquâ Terrâ, & ascendit veluti collis moles cum sono; tandem autem rupta, exivit spiritus multus, & favillam, & cinerem elevavit, & Liparaorum civitatem existentem non longè omnem incineravit, & ad quasdam in Italiâ civitatum venit, & nunc
ad hoc

(a) *Furn. Hydrogr. XV. c. 18.*

adhuc ubi exsufflavit (a). Hinc mirari certè non liceat, quod a Clarissimis Scriptoribus memoratur, Athlantidem ab Europâ, Eubœam ab Atticâ, Siciliam ab Italiâ vi Terræ motûs aliquando sejunctam esse, ut ait Poëta :

————— *Trinacria quondam*
Italia pars una fuit, sed pontus, & æstus
Mutavere situm; rupit confinia Nereus
Victor, & abscissos interluit aquore montes (b).

X. Quo sanè fieri oportuit, ut flumina, & maria alveos mutaverint, ut nova flumina, veteribus evanescentibus, nata sint; cùm etenim avulsis, discerptisque continentis partibus, inter utramque regionem Maris aqua illabatur, veterem alveum relinquere debet; sicuti etiam flumina obstructis fontibus, vel montium lateribus, unde prodierant, alibi montem perrumpunt, ut exitum sibi faciant, aut occultentur, ut de Alphæo, Peneo, & Ladone a Veteribus memoratur:

————— *Alphaum fama est hunc Elidis*
amnem

Occultas egisse vias subter Mare, qui nunc
Ore, Arethusa, tuo Siculis confunditur an-
dis (c).

ingens denique aquarum copia, quæ in subterraneis cavernis stagnabat, per aperta montium latera violenter erumpit. Quin etiam, si infra Maris alveum Terræ motûs vi vorago quædam oriatur, tota ferè Maris aqua repentè absorbetur, ut in Liguriâ II. Bello Punico, in Lusitaniâ, sub Emanuele Rege, Constantinopoli sub Theodosio, atque alibi
 fæ-

(a) *Porta de conflagr. agri Puteol.* (b) *Claud. l. 1. de rapto. v. 40.* (c) *Virgil. Æn. III. ver. 694.*

sæpius contigisse memoratur; hinc verò, quæ nova rerum facies, quanta futura sit Orbis terraquei mutatio facillè apparet; sed hæc ferè fusiùs, quàm par erat.

X. Id unum postremò dicendum superest; quo tempore, quibus modis Terræ motus fieri soleant. Ac de tempore quidem Aristoteles ait, frequentius Terram tremere Cœlo tranquillo, quàm turbato; noctu, quàm die; Veris, Autumnique tempore, confligentibus Aquilone, & Austro; &, ne siderum quoque vis desideraretur, paullò antequàm Luna deficiat. Sed has tenuissimas, & inanes conjecturas esse, quis apertè non videat, cum innumera experimenta demonstrent, singulis anni temporibus, singulis horis, quacumque aëris dispositione Terræ motus promiscuè contigisse?

Tunc itaque Terræ motus oriri debet, cum subterranea sulphuris, bituminis materia flammam conceperit, ac juxta varia combustibilis materiæ loca, varia similiter Terræ motûs species oriatur.

XI. Hinc Aristoteles duo Terræ motûs genera accuratè distinguit, *Tremorem*, ac *Pulsus*: quorum ille fieri dicatur, cum partes horizontaliter in unam, aut alteram partem moventur; Pulsus verò, vel, ut Possidonius ait apud Senecam, *Succussio* fit, cum semel, aut sæpiùs Terra sursum impellitur, ac deorsum ruit. Plerique tamen cum Senecâ aliam Terræ motûs speciem inter utramque mediam agnoscunt, quâ Terra navigii instar in unam, aut alteram partem inclinatur, unde *Inclinatio* vocatur. Ex his verò, quæ de communi Terræ motûs causâ, & origine superiori lo-

co tradita sunt, facilè apparet, unde hæc illorum varietas oriatur. Cùm etenim circumposita Terræ latera vi accensi ignis urgentur, ac impelluntur, in eam potissimùm partem impelli debent, quæ minùs resistat. Si itaque superimposita Terræ pars faciliùs dimoveri, impellique possit, tunc, illâ elevatâ, ac subsidente, sequitur Pulsus; sin verò faciliùs in laterales Terræ partes impetus propagetur, Tremor, aut Inclinatio sequitur, juxta diversam motûs vim, quam illæ recipient. Hæc autem omnia pulveris pyrii, bombarum, cuniculorum exemplo illustrari, confirmarique possunt.

XII. Nihil autem est, cur hic adjiciam, Terræ motus plerumque in iis etiam regionibus sentiri, in quibus ignis accensus non est. Intelligi nimirum facilè poterit, quòd, cùm sulphur, ac bitumen in Terræ regionibus, quæ Campaniæ subjecta sunt, accendatur, ibique tremorem efficiat, hic ipse tremor, ob regionum contiguitatem, ad maximam distantiam propagari debet; ita ut aliqua Telluris regio commota, proximam sibi commoveat, hæc iterum aliam, donec accensæ flammæ vis, & impetus sensim languescens extingatur. Sed quod maxime mirum est, Terræ motus interdum ad maximam, & incredibilem ferè distantiam diffunditur, & propagatur; eodemque tempore, quo in Italiâ locus aliquis tremit, sive concutitur, in alterâ quoque Provinciâ, ex. gr. in Hispaniâ, Terræ motus efficitur. Id verò non aliâ ratione fieri posse videtur, quàm quòd subterranea sulphuris, &c. semina venarum, aut cuniculorum instar, per Terræ viscera in-

plu.

plures regiones serpunt; adeoque, cùm accensæ fuerint in aliquâ regione, ibique tremorem prodixerint, in aliam quoque regionem accensus ignis, aut calor facilè propagatur. Hinc Terræ motus, ut est a Keplero, aliisque observatum, communicantur ab ortu in occasum, & a meridie in boream, quia sulphuris venæ eâ ratione dispositæ sunt (a).

XIV. Hæc eadem quoque causa videtur, cur Terræ motuum duratio sit inæqualis, cur semel, aut sæpius continuatis, vel interjectis motibus Terram commoveant, &c. quia nimirum ex accensi sulphuris copiâ major, aut minor, brevior, aut diuturnior impetus oriri debet; cùmque ignis, aut calor subterraneus per Terræ viscera ex unâ in aliam sulphuris fodinam propagetur, novum ibi tremorem efficiet; denique, cùm sulphuris, & bituminis copia continuè reparetur, reparari etiam, aut renovari poterit impetus, quo eadem regio succutiatur. Sed jam ferè dedecet in re clarissimâ diutiùs immorari: pulveris enim pyrii, cuniculorum, tonitru, &c. exempla sæpius allata rem totam mirificè ostendunt.




CAP.

(a) *Hist. Acad.* 1704.

C A P. XIII.

*De Maris divisione, altitudine, colore,
& salsedine.*

I.  Uplici præsertim Elemento, ut ipsa vox sonat, *Terraqueus* iste globus, vel *Terrarum* Orbis componitur, *Terrâ* nimirum, & *Aquâ*, quæ incerto quidem ordine, ac lege, sed mirâ tamen varietate universam *Telluris* superficiem ita dividunt, ut *Insula*, *Continentes*, *Isthmi*, *Peninsula* ex unâ parte; ex alterâ verò *Fontes*, *Flumina*, *Lacus*, & *Maria* videantur. Atque illa quidem, quæ ad elementum *Terræ* aliquâ ratione spectare poterant, superioribus Capitibus prosequuti sumus, nunc illa breviter tradituri, quæ ad elementum *Aquæ* pertinent, unde *Oceani*, primùm divisionem, altitudinem, colorem, motusque complectemur; deinde verò de fontium origine, atque de variis aquarum virtutibus differemus.

II. *Oceanus* itaque universam *Telluris* substantiam, a quâ secundâ die creationis sejunctus est, ambire, sive circumdare videtur, ut eleganter inquit *Ovidius*:

Sic, ubi dispositam quisquis fuit ille Deorum

Congeriem secuit, sectamque in membra redegit,

Principio Terram, ne non aqualis ab omni Parte foret, magni speciem glomeravit in orbis.

Tum

*Tum freta diffudit , rapidisque tumescere
ventis*

Jussit , & ambita circumdare litora Terra .

Addidit & fontes , & stagna immensa , lacusque ;

Fluminaque obliquis cinxit declivia ripis :

Qua diversa locis partim sorbentur ab ipsâ ,

In Mare perveniunt partim , campoque recepta

Liberioris aqua , pro ripis litora pulsant (a) .

Hinc Oceanus ex variis litoribus , sive locis , quæ alluit , varia sortitur nomina . Sic Oceanus *Atlanticus* dicitur ille , qui circa Africæ , & Hispaniæ litora reperitur , Africam , & Europam ab Americâ , hoc est veterem a novo orbe dividens . *Hyperboreus* est ille , qui hyperboreas , hoc est septentrionales regiones alluit ; *Australis* , qui inter Asiæ , & Africæ litora , ac regionem Australem incognitam excurrit ; *Pacificus* denique inter Americam , & extremas Asiæ partes diffusus . Quid enim de singulis Oceani partibus Tyrreno , Jonico , Indico , Persico , Gallico , quid de variis sinuum , fretorum nominibus , quid de Isthmis , Insulis , Peninsulis , quæ ex variis Oceani locis , & ordine oriuntur , plura commemorem , cum hæc in Geographorum tabulis accuratissimè descripta , atque oculis ipsis mirâ quidem arte veluti subjecta intueri liceat ? Dicendum itaque est potius de Maris substantiâ , ejusque loco , & figurâ .

III. Hanc autem sphaericam , & rotundam esse putavit Archimedes , Hypparchus , Strabo , qui propterea Marium superficiem æqualiter

(a) Ovid. *Metam.* I. ver. 28.

liter ubique a Terraquei globi centro distare docuerunt: quin etiam Erathostenes a Strabone reprehenditur, quod contra Archimedis sententiam, inæqualem hanc esse existimaverit.

Sed Erathostenem sequutus est Plinius, alii- que plurimi, & Aristoteles ipse; cum experimento compertum, perspectumque fuerit, *excelsius tribus cubitis fore Mare rubrum, quam terrâ Ægypti (a)*; unde, cum Darius, & Sesostris Ægypti Reges isthmum perfodere instituisent, qui Africam ab Asiâ dividit, hoc est, alveum ducere a Mari rubro ad Nilum, hac inæquali distantia, hac latitudine Maris exploratâ, imperfectum opus reliquerunt. Verebantur enim, ne si Mare rubrum, eique contiguum Indicum Mare in subjectam Ægyptum irrumperet, hæc aquis obducta inhospita redderetur, idemque timor Imperatores, & Ægypti Caliphas, sive Sultanos prohibuit, ne eidem operi manus admoverent. Verisimilius est tamen, quod operis difficultas, impendendi thesauri, Isthmi latitudo, quæ 120. milliaria Italica excedit, ac politica præsertim consilia, ne scilicet id in exterarum gentium, & Hispanorum præsertim utilitatem cederet, Reges illos, & Sultanos ab effodiendo Isthmo revocaverint: illa enim Maris inæqualitas Ægyptum obducere non potuisset. Quæcumque tamen causa, vel timor illorum animos occupaverit, id veluti exploratum assumi potest, Indicum, & Rubrum Mare, altiora fore Mari Mediterraneo; sicut Ligusticum, quod *inferum*, & Tyrrhenum vocatur,

Tom. IV.

K k

al.

(a) Plin. V. c. 29. (b) Dieß. II. & Strab. XVII. *vid. Hist. Acad. 1702.*

altius esse Adriatico, seu Veneto, quod *superum* dicitur, probat Cabæus. Oceanus certe Germanicus inter Frisiam, & Hollandiam excurrens, lacum prope *Harlem*, qui & *Harlemense Mare* dicitur, & sinum prope Lugdunum Batavorum efformat. Uterque autem sinus, & lacus æqualem altitudinem, eandemque superficiem sortiuntur; at Oceano Germanico uterque depressior est; cum enim sinus, & lacus infra Telluris superficiem reperiantur, Oceanus super illam adeo elevatur, ac intumescit, ut aggeribus coerceri debeat, ac Lugdunenses inceptum alveum ex urbe in Oceanum relinquere coacti sint, ne irrupens aqua Maris, subjectam regionem, & urbem allueret. Eadem ferè ratio demonstrat inæqualem esse Marium altitudinem in plurimis aliis regionibus. Sic Mare pacificum, altius creditur Mexicano; unde Isthmum effodere, quo meridionalis a septentrionali Americâ dividitur, non sunt aggressi. Sinus quoque Balticus altior habetur Athlantico Mari. Euxinus Propontide in quam illabitur, Euxino Hircanum; ac, ne singula commemorem, *bimarem* Corynthem ab inæquali Marium superficie hinc inde ambiri plurimi existimant.

IV. Itaque, ut hæc inæqualis Marium a centro Terræ distantia clariùs intelligatur, ejusque causa, & origo exponatur, illud est a Varenio (a) egregiè observatum, quod omnes Oceani partes eadem ferè rotundâ, vel sphericâ superficie sensibilibiter continentur, ideoque æqualem altitudinem, sive distantiam

a cen-

(a) *Geogr. lib. 1. c. 13. prop. 5.*

a centro sortiuntur; id enim gravitatis leges, & Archimedis ratio alibi exposita exigere videntur. Eadem quoque ratio probat de amplioribus etiam Oceani sinibus, in quos liberè aqua ex Oceano illabi potest. Oblongi tamen, angustique sinus, quique præsertim, per angustum fretum, & ostia ingrediuntur paullo humiliorem, depressioremque superficiem habent, & depressiorem adhuc, quò a freto longius recesserint. Sic Mediterraneum Gadibus receptum angustia loci impeditur, ne liberè, & æquabiliter influat, tum scopulis, promontoriis, ac Balearibus Insulis illisum repellitur, retunditurque; ad Siciliam tandem perveniens depressius illam alluit, atque ubi Adriatici sinus ostia, vel latera subit, minorem adhuc a centro Terræ distantiam sortietur, unde Oceanus Athlanticus Mediterraneo, Mediterraneum Adriatico sinu altius, vel a centro Terræ remotius videri poterit.

V. Ingenue tamen fatendum est cum Varenio, vix aliquid certò de variâ marium altitudine constitui posse, cum plurima adhuc experimenta, & observationes desiderentur, quibus obscuræ, difficillimæque rei aliqua claritas affundatur. Id unum hac in parte certò exploratum censerì poterit, quod hæc inæqualis marium altitudo, non ita intelligi, vel explicari debet, ut altiora sint illa, quæ polo boreali subjecta sunt, ut Aristoteles (a) olim existimavit, argumento deducto ex perenni motu, quò aqua maris a polo ad Æquatorem excurrit, sed ab aliâ particulari causâ superius explicatâ desumenda est. Id verò Ari-

K k 2

stote-

(a) De Cal. II. c. 2.

Stotelem, aliosque veteres fefellerat, quòd, cum polarem stellam supra horizontem elevatam intuerentur, Terram inclinatam esse, & ad Boream elatiorem putarunt, ut ingentia, proinde flumina, & mare ipsum ex polo in æquatorem, veluti in declivior locum illaberentur. Sed hæc in sequenti Capite, cum de variis Oceani motibus. Nunc Oceani ipsius locum, sive alveum, ejusque altitudinem contemplemur.

VI. Atque innumera quidem de maris alveo, sive cratere ex nuperrimis observationibus afferri possent, quibus ostenditur, hunc inæqualem, varium, & dissimilem esse, alicubi limo, bitumine obductum, alibi lapideis stratis æquabilem, hic in immensas voragine, & abyssos excavatum, illic scopulis, ac ferè rupibus præruptum, plerumque sterilem, aliquando plantis ornatum, communiter verò mirâ ostrearum, concharum, aliorumque corporum marinorum multitudine insignem, Id unum observari meritò poterit, quod alveus maris, quò profundior est, eò magis sensim contrahitur; ita ut Oceani litora, quæ inclinata semper videntur in maris fundo invicem ferè uniantur, quod in hypothesi, vel opinione Burnieti superius explicatâ facile intelligi potest.

VII. Hinc autem Oceani, sive maris profundum, & altitudo explorari, vel conici posse videtur; si etenim eâ inclinatione, quæ in litoribus maris observatur, illius alvei mutò sensim accederent, cognitâ, ac exploratâ maris superficie, juxta Geometriæ, leges illius altitudo manifestissimè ostenderetur; sed, cum Oceani litora, vel maris alvei, non

æqua-

æqualiter ubique inclinentur, illius profunditas hac methodo definiri non potest. Accuratiores itaque Geographi in inquirendâ maris altitudine, *bolide*, hoc est pondere funi, vel ferreæ catenæ alligato uti solent, quod ubi ex navi demersum fuerit, tandiu descendit, quandiu maris fundum attingat, adeoque submersæ funis, aut catenæ longitudine, maris altitudo in proposito loco deprehendetur.

VIII. Atque hæc eadem fortasse methodus ab antiquis etiam Geographis usurpata fuit, qui plurima de Oceani altitudine tradiderunt, quamvis illi non a recentioribus modò, sed etiam inter se maximè dissideant. *Altissimum enim mare Palædus*, sive Fabianus, 15. *stadiorum* tradit (a), hoc est vix duorum milliariū Italicorum, cùm tamen Cleomedes (b) triginta stadiorum altitudinem mari concesserit; licet Geometræ existimaverint, neque altitudinem montium, neque maris profunditatem 10. stadia excedere (c). Ex recentioribus autem Cabæus (d) 2. vel 3. milliariū posuit, paullo minorem altitudinem Blancanus (e); Varenius (f) hanc paucis in locis integri milliarii Germanici, hoc est 4. Italicorum deprehensam esse testatur, quemadmodum Leo Baptista Albertus (g) Patritius Florentinus, qui 4. ab hinc seculis *Vitruvii reditivi* nomine, & famâ hac de re plurima egregiè scripsit, maris altitudinem 36. stadia, sive 4. cum dimid. milliaria Italica vix excedere docuerat. K k 3 1X.

(a) *Plin. II. c. 102.* (b) *Lib. I. c. 70.* (c) *Apud Plut. in Vita Pauli Emil.* (d) *In I. Meteor. t. 20.* (e) *De Fabr. Mundi.* (f) *Lib. I. c. 13. prop. 6.* (g) *Architect. lib. X. c. 7.*

IX. Hæc autem omnia intelligi debent de illâ maris altitudine, quæ hætenus explorari potuit: *quis enim ignorat esse quædam stagna sinè fundo (a), aut profundum abyssi quis dimensus est (b)*. Certè circa Tapobranem maris altitudo explorari non potuit (c); sicuti circa Virginiam, Floridam, Sveviam, Norvegiam, ac prope polos frustra tentata est (d); atque, ut Aristoteles ipse memorat: *Profunda Ponti sunt infinita quædam maris profunditas; nullus enim unquam, qui urinaverit, potuit terminum invenire (e)*. Credibile est tamen non ingentem adeo in his etiam locis fore maris altitudinem, quæ ad 200. milliaria Italica extendatur, quemadmodum a nuperrimo Scriptore paullo liberius supponitur; neque enim concipi potest, quo usui futura sit tanta aquæ moles; atque ipsa litorum inclinatio; etsi inæqualis, & irregularis concedatur, vix patitur, ut ad 20. milliaria maris profundum extendatur, præsertim si Burneti hypothesis circa maris, & montium formationem eligatur.

X. Sed, quamvis Oceani profundum non ingens adeo concedatur, & aqua ad incredibilem altitudinem Telluris substantiam non penetret, maxima tamen est aquæ moles, quæ Terræ viscera pervadit, atque ad singulas illius partes uberrimè diffunditur; *nimis enim oculis ille permittit, qui non credit esse in abscondito Terra sinus maris vasti (f)*. Quod ita formasse artifex Natura credi debet, ut,
cùm

(a) Sen. III. c. 19. (b) Escl. c. 1. ver. 11. (c) Plin. VI. c. 22. & Solin. c. 54. (d) Vid. Ricciol. Geograph. lib. X. c. 1. (e) Meteor. I. c. penult. (f) Sen. VI. c. 6.

cùm terra arida, & sicca constare per se, & sine humore non posset, nec rursus stare aqua, nisi sustinente terrâ, mutuo implexu jungerentur, hac sinus pendente, illâ verò permeante totam venis, ut vinculis, discurrentibus (a).

1. Ac plurima certè sunt argumenta, quibus id a Veteribus ostendi solet; quî enim fieri posset, ut aliqui fontes, licèt a mari plurimum distent, salcedinem tamen, & omnes æstûs vicissitudines cum Oceano sortiantur, nisi cum ipso mari per occulta quædam foramina communicent, ut optimè opinatur Gassendus de fonte, qui in Insulâ Timavî faucibus oppositâ, unâ cum mari crescente, & decresciente deprehenditur, quodque de lacu Hurarum in Americâ bis in die intumescente, decrescenteque memoratur (b).

2. Id evidentiùs adhuc apparet in fodinis Hallensibus, ac Luneburgensibus, ubi aqua maris per tenues meatus, ac veluti canaliculos, quos Terræ poros dixeris, sensim philtrata, in excavatis foveis colligitur, ut inde calore Solis evaporata, sal in imo concreescens relinquatur.

3. Sed non exiguos solùm Terræ meatus pervadens Oceani aqua diffunditur, sed amplioribus etiam ductibus ad aliqua loca deferri conspicitur. Habet enim non tantùm venas aqua cum Terrâ, sed & amnes magnitudinis vastæ, quorum aliis semper in occulto cursus est, donec aliquo sinu devorentur, alii sub aliquo lacu emergunt (c). Sic in Stellâ Hispaniæ monte 12. leucis, hoc est 40. ferè millia-

K k 4

lia-

(a) Plin. II. c. 65. (b) Homel. H.ß. Acad. lib. II. fœd. II. c. 1. (c) Sen. III. c. 19.

liariis Italicis a mari dissito lacus reperitur, in quo, non æstus modò deprehenditur, sed aliquando etiam navium fragmenta videntur, quæ per occultas voragines ad montis verticem a mari delata fuerint (a).

4. Nonne plurima quoque sunt flumina, quæ infra Telluris superficiem ita ab occultâ quadam voragine absorbentur, ut nonnisi peracto maximo itinere sursum erumpant, ut de Ladone, Lyco Arcadiæ fluviis, præsertim verò de Alpheo memoratur, ut supra:

— *Alpheum fama est buc Elidis amnem*

Occultas egisse vias subter mare, qui nunc

Ore, Aretusa, tuosiculis confunditur undis (b), ac ne poëtica figmenta causseris, de Nilo in Ægypto, Anate in Hispaniâ, Nigro in Africâ, Tigri in Mesopotamiâ, aliisque pluribus invictissimè demonstratur? Quod si ingentia flumina cavernosa Terræ viscera subire, aut perrumpere, sibi que alveum, exitumque efficere possunt; quàm meliori jure hoc Oceani aquis celeri, perennique motu agitatæ, ac impulsis concedi poterit?

Quid verò quod infra solum Mutinense subterraneum flumen longè adeo, latèque diffunditur, ut illius fragor, terebratâ terrâ, & aquâ interim erumpente, percipiatur; quod pluribus aliis in locis contingere debet, atque in iis præsertim, quæ tremere, vel subsultare videntur, ut apud Fanum S. Audomari (S. Omer) in Belgio, in agro Brabantino conspicitur, quia nimirum Telluris substantia infernè a fluminum subterlatentium alveis excavata

(a) *Mercator. in Geogr.* (b) *Virg. Æneid. III, v. 694.*

vata est, adeoque insidentium, vel subsultantium corporum impetu facile concutitur? Sed nulla, aut verisimilior, aut efficacior ratio, quàm hæc Oceani diffusio per viscera Terræ ostendatur, afferri potest, quàm fontium origo. Cum enim Peripatetici communiter existiment fontes, & flumina oriri ab aquâ maris, necessarium esse arbitrantur, ut hæc ab Oceano per occultos Terræ meatus usque ad montium radices feratur, ibique in vapores soluta, ac levior effecta ad ipsorum verticem ascendat, per aperta deinde montium latera, vel sinus in fontem abitura.

XI. Plerique tamen existimant hæc Peripateticorum argumenta incerta admodum, & ambigua fore, cum phænomena, vel effectus omnes, qui ad hanc Oceani diffusionem referri solent, fortasse verisimilius ad alia causarum genera spectare possint. Sic fontium origo, subterlabentia flumina, maxima aquarum copia in subterraneis speluncis stagnans, fontes ipsos, quos falsos experimur, non a mari, sed ex dulci pluviarum aquâ potiùs oriri posse fusiùs, & opportuniùs alibi demonstrabitur, cum de fontium origine, & aquarum virtutibus differetur. Itaque maris diffusio ex internâ quidem dispositione Telluris, quæ pluribus in partibus pervia, & excavata videtur, ex iis fontibus, & puteis, qui æstuum vicissitudines unâ cum mari sortiuntur, ostendi poterit. Sed nulla tamen certa ratio afferri poterit, quàm id invicte ostendatur.

XII. Utinam verò in explicandâ maris salitudine veteres Philosophi feliciores fuissent, neque illius originem inquirentes, aut inanes con-

conjecturas sequuti, aut falsis etiam principiis usi fuissent. At celeberrimam quidem apud illos controversiam hanc fuisse, numerus ipse, opinionumque discrimen satis ostendit.

Anaximander, mare, ait, primi humoris esse reliquas, quarum major pars ab igne exsiccata, reliquum ob ardorem mutatum sit. *Anaxagoras*, cum humor ab initio stagnans a solari motu esset adustus, exhalassetque ejus pinguedo, reliquum salsugine, & amarore infectum substituisse. *Empedocles*, mare est sudor Terra adusta a Sole, cumque sudorem nimiam sui compressione emittentis. *Antiphon*, sudorem calidi, a quo excretum est, quod supererat humidum elixando in salsuginem conversum, quod in quovis fit sudore. *Metrodorus*, quia mare sit percolatum per terram, idem crassitiem ejus participasse: sicut evenit iis, quae per cinerem colantur. *Platonici*, aqua elementaris partem, aliam ex aëre frigore coactam extitisse dulcem, aliam, quae a terrâ ex ardore, & incendio exhalasset, salsam (a).

Aristotelis autem opinio fuit, quod calidae, & siccae exhalationes illae, vel terrestres halitus, quos alibi ex Telluris substantiâ erumpere, & ad mediam aëris regionem efferri diximus, ubi cum aqueis vaporibus in aëre permisceantur, atque in pluvias concre-scant, amarulentiam, pravamque saporem in illis efficiant; quemadmodum ferè calidae, adustaque particulae frigidis, humidisque permixtae in lixivio, salivâ, sudore, amarulentiam producant. Itaque cum falsa, & amarulenta pluvia in mare delabatur, salsedinem illi communicat. Ejus verò argumentum esse

(a) *Plut. III. c. 16.*

ait Aristoteles, quòd aliquando pluvia, atque in autumno præsertim, ac dum australes venti spirant, ex illâ terrestrium particularum admixtione salsa decimat: quod si terrestres illæ particulæ ab aquâ maris secermantur, illam falsedinem exuunt, ut fieri posset in sphaerâ cereâ excavatâ, quæ, si aquæ maris insideat, aquâ dulci repletur, quòd major in superficie maris, quàm in inferiori parte, vel alveo falsedo reperiatur, quòd demique majorem aqua gravitatem ex falsedine sortitur, unde sustinendis navibus par efficiatur, quod non aliâ ratione fieri posse arbitratur, quàm si terrestribus particulis densior, & gravior illa reddatur.

XIII. Melius fortasse gravissimo, sapientissimoque Philosopho consuluisse videremur, si Plutarchum æmulati, inter aliorum sententias hanc Aristotelis opinionem non enumerassemus. Sed veritatis amor, & accurata rerum cognitio non patiebatur, ut illustriorum Philosophorum sententias omitteremus. Ceterum mirari subit quid Aristotelem in sententiam illam manifestè falsam impulerit. Quî enim fieri posse putavit, ut aqua maris a pluvîâ falsedinem, atque amarulentiam contrahat, cum ipsa pluvia dulcis manifestissimè deprehendatur; ut ipsa quoque fontium, fluminum, lacuum aqua salsa non foret, cum tamen æqualiter a decidentibus, permixtisque pluviis illa augeatur, & alii plurimi sint fontes, etiam ab Aristotele memorati, qui falsi sunt, quamvis in illos salsa, & amara pluvia decidere non possit? Quid verò dicendum putabimus de experimento pilæ cereæ, de autumnalis temporis, ventorumque australium

con-

conditione; quam confidenter adeo ponit Aristoteles, nisi quod in utroque omnino ipse fallitur; aut alios certè fallere voluit, cum utrumque experimento facillimè revincatur? nec immeritò prorsus suspicari fortasse quis poterit, quod, cum plerique ex veteribus, recentioribusque Philosophis eas potissimum hypotheses eligant, quæ phænomenis, aut effectibus explicandis, quò fieri potuerit, propiùs accedant; ita ut ab effectibus illorum causa requiratur: hanc Aristoteles methodum adhiberit, quâ, ex principio, vel causâ ex conjecturis aliquibus jam constitutâ, phænomena, vel effectus plerumque experimento contrarii deducerentur? Sed hæc alibi sæpius.

XIV. Ut autem aliquid de ceteris etiam Veterum opinionibus attingamus, reprehendi debent Empedocles, Anaxagoras, qui ex admixtione Telluris, vel calore Solis, maris falsedinem oriri posse putarunt. Si enim, vel ex immixtâ terrâ, vel calore Solis mare falsedinem, ac amarulentiam contraheret, non modò maria, sed fontes etiam, & lacus amari, falsique forent; cum ipsi quoque solaribus radiis expositi, halitibusque terrestribus æqualiter permixti sint. Ad hæc, explicari non posset, quomodo unum mare sit alio falsius, cur aliqui solùm, non autem omnes amari, falsique fontes in Terræ visceribus reperiantur, aliæque id genus innumera, quæ, rem attentius cogitanti, statim occurrunt.

XV. Communis est itaque recentiorum omnium sententia, quod aqua maris non aliunde falsedinem, vel amarulentiam concipiat, quàm ex ipsâ salis substantiâ, sive salinis particulis, quibus permixta, ac referta est; quod
etiam

etiam olim Theophrastus apud Olymplodorum existimaverat (a). Maximam enim salium, & bituminum copiam in Terræ visceribus, ac in maris alveo repositam, atque, ut opinari fortasse liceat, in ipsâ Mundi origine, a Divino, sapientissimoque Artifice collocatam esse innumeris, & accuratissimis experimentis est observatum. Quin & ingentes etiam salis scopuli, & Insulæ ex variis salium generibus concretæ reperiuntur, ut Insula *Ormuz*, in quâ vel ædificia ipsa candenti sale, marmoris instar, exciso, elaboratoque construuntur. Cum itaque celeri, perturbatoque motu maris hæc salium, & bituminum congeries dissolvatur; manifestissimè apparet, cur ex admixtis salium, bituminisque particulis, aqua salsa, & amara fieri possit; præsertim si ea maris diffusio concedatur, quâ subterraneas salium fodinas alluere, dissolvere, tennesque inde particulas abradere possit; quibus refertum mare fiat. Nec aliâ certè ratione in plurimis fontibus falsedinem observamus, nisi quod ipsi ea loca præterlabuntur, in quibus salium fodinæ reperiuntur; pluribus enim salis particulis inde abradis, & dulcibus aquæ particulis permixtis, falsedo orietur.

XVI. Sed, ne rem conjecturis confecisse videamur, atque argumentum afferamus, quo manifestissimè proposita veritas confirmetur, illud est accuratissimè exploratum, quod ex aquâ Maris maximâ copia veri salis educitur. Sic enim in Hallensibus, Luneburgensibus fodinis, ubi fovea prope Maris litora excavata fuerit; hæc, aquâ Maris per Terræ po-

ROS

(a) In II. Meteor. Vid. Card. II. de sub.

ros sensim pervadente, ac veluti exsudante repletur, ac in infimâ illius parte, vel foveæ fundo tenues Salis particulæ simul concresecunt, ut inde colligi, & asportari possint. Interdum etiam aqua Maris in excavatos alveos derivatur, ut purior illius pars exposita radiis Solaribus evanescat, & in vapores solvatur, crassior autem, & Salis particulæ simul concresecunt in fundo relinquantur, quod si debiliior sit Solis calor, ignis adhiberi solet, quo aqua salsa lebetibus imposita evaporetur. Sic ubi Mare ab aliquo litore recesserit, maximam Salis copiam in illo relinquit, ut circa Ammonis templum in Phœniciâ factum Strabo, circa Angliæ litora, aliarumque regionum oras Varenius, ad ostia Tiberina Plinius commemorat. Cùm itaque verum Sal in aquâ reperiatur, & ea sit notissima Salis proprietas, ut aquæ permixtum falsedinem illi communicet, quis de verâ falsedinis origine dubitare jam poterit, cùm ipsa Salis substantia aquæ Maris permixta tot argumentis ostendatur? Quod quidem argumenti genus, cùm non invictissimum modò, sed etiam facillimum sit, mirari certè quis poterit, neminem ex Veteribus illud usurpasse, ut accuratam falsedinis causam ostenderet; nisi fortasse suspicari liceat id illis contigisse, quod nobis sæpius imponit, occultas nimirum plerumque causas inquirimus, cùm faciles, & proximas ante oculos habeamus; ac dedecori ferè vertimus causas illas, & rerum origines adhibere, quæ reconditæ, obscuræ, vel imperviæ non sint, & illas perditè consectamur, quas non sine maximâ ingenii laude inquiri posse censemus.

XVII. Exploratâ verò jam causâ falsedinis, cetera facillimè consequuntur, quæ circa ipsam mirari solemus.

1. Sic enim intelligi potest cur alicubi falsior, & amarior aqua deprehendatur, ut in Zonâ torridâ, vel Oceano Æquatori subiecto; quia nimirum, aut major ibi Salium copia reperitur, aut evaporatâ certè ob majorem vim Solis majori dulcis aquæ copiâ, gravior, falsior, & amarior relinquitur.

2. Intelliges etiam cur aqua Maris tot ingentibus fluviis, hoc est incredibili ferè dulcis aquæ copiâ receptâ, sensim dulcior non fiat, ut in aquâ alsâ, cui dulcis jugiter affundatur, fieri experimur; facile est enim respondere, quod sicuti receptis ingentibus fluviis Oceanus non exundat, quia æqualis, & longè etiam major aquæ dulcis copia ex Maris superficie in vapores sursum attollitur; ita cum eadem semper Salis quantitas in Maris alveo, vel Oceani substantiâ constantissimè relinquatur, eadem quoque, vel æqualis falsedo sentiri debet (a).

3. Quod si cui mirum videbitur, & a nobis inquirat, cur salis particulæ, quæ sunt aquæ particulis longè graviores, liberè tamen per istas diffusæ, ac permixtæ, natant, videantur, non verò omnes ad Oceani fundum, & litora sensim subsidant, & dulciorem aquam efficiant: id ex arctissimâ particularum texturâ, quâ Sal, & aqua mutuo devinciuntur, oriri posse dicemus. Dicemus etiam celerem, perturbatamque Maris agitationem in causâ fore, cur Salis particulæ, quæ

(a) V. d. Lucr. V. v. 607.

quæ alioquin subsiderent , aqueis permixtæ illarum motui obsequantur, illis inhæreant , ac innatent . Quamvis & hæc eadem difficultas Aristoteli , ceterisque opponi meritò posset , & ab illis inquiri , cur superior Maris aqua vi caloris falsior , & gravior effecta , aut certè cur terrestres halitus illi permixti sensim ad fundum Maris non descendant , locumque leviori , sive dulciori perpetuo ferè motu , sive locorum mutatione non cedant . Quod si hoc illi fieri posse reponent , quia tenuissimi terrestres halitus aquæ particulis arctissimè devinciuntur , ac innatant , quantò meliori jure nobis asserere id liceat , qui rationibus , & experimentis innixi , falsiorem , & graviorem esse defendimus aquam in fundo , quàm in superficie Maris , ac liberè , & ingenuè fatemur plures in fundo Maris , quàm in illius superficie Salis particulas reperiri ? Atque ista quidem de Maris falsedine dicta sufficiant .

XVIII. Quemadmodum vero Salis particulæ , quæ aquæ Maris permixtæ fuerint , falsedinem , & amarulentiam illi communicant ; ita particulæ Mineralium , &c. variis veluti coloribus illam inficient . Sic in Septentrionalibus locis atro , in Zonâ torridâ fusco colore tinctum Mare videtur , circa novæ Guinæe litora flavum est , quamvis alibi candidum colorem præferat . Prope Congi litora fluvius veluti rubescens in Mari effunditur , illique subrubrum colorem communicat , quem a rubrà Terræ fodinâ , sive minerâ , quam præterlabitur , acceptum esse conjicitur . Plerumque tamen , aut ab arenâ , aut ab herbarum foliis , aut ab animalculorum colore , varius

rius Oceani color repeti debet. Viridis enim color, qui in Mari *di Sangasso*, non procul a promontorio viridi Africæ videtur, oritur a foliis herbæ cujusdam *Sangasso*, quæ, cum tenuissima, & exigua sint, ita mutuo implicantur, ut totam ferè Maris superficiem obducant, quod alibi quoque aliarum plantarum folia, vel fruticum præstant.


At Belgæ non procul ab argentei fluvii ostiis, sive *del Rio della Plata*, aquam Oceani rubram, & sanguineo veluti colore infectam sunt admirati; cumque situlâ aquam hausissent, & accuratè observassent, id ex infinitâ ferè vermiculorum multitudine oririprehenderunt. Sanguineus etiam color, qui in Erithræo, vel Mari Rubro, vel Arabico sinu conspicitur, non ab Erithræo Rege, aut a radiis Solaribus inde reperiis, sed ex rubescente arenâ desumi debet; unde si vas aquâ impleatur, initio quidem sanguinea videbitur, deinde verò, arenâ sensim subsidente, clara apparebit.

XIX. Colores autem ejusmodi cum certo cuidam Mari ex aliquâ peculiari causâ convenient, obscurior ille color, qui Maribus omnibus communis est, & *cæruleus*, vel *marinus* vocatur, non ab aliquâ causâ reali, sed ex tenuissimarum particularum aquæ opacitate repeti debet. Quemadmodum enim æris particulæ, licet tenuissimæ, ac pellucidæ sint, in maximâ tamen mole, sive distantia sensibilem opacitatem acquirunt; ita ut non omnem lucem transmittant, sed aliquos lucis radios ad oculos nostros reflectant, qui certo colore imbuti cæruleum, sive cælestem in ære colorem nobis exhibeant; ita Maris aqua.

cùm crassior, minùsque pellucida sit, in mediocri profunditate eam opacitatem acquireret, quâ plurimos lucis radios ad nos regerens, cæruleum hunc colorem exhibeat. Hinc etiam in puteis, ac fluminibus ipsis, si profundiora sint, cæruleus idem color observatur, quod opportuniùs alibi explicabitur, cùm de lucis, & coloris origine differetur.

C A P. XIV.

*De vario motu, ac præsertim de
Ætu Maris.*

I.  E variis Oceani motibus, quod unum ferè jam superest, dicturi, illud ingenuè præfari posse videmur, quod olim a Cicerone (a) dictum accepimus, quod *etiam si causa istarum rerum non reperiantur, res tamen ipsa observari, animadvertique possunt; & si ad sapientiam pervenire difficile est, tamen nec modus est ullus investigandi veri, nisi inveneris, & quarendi defatigatio turpissima est, cùm id, quod quaritur, sit pulcherrimum (b).* Sed, ut meliori, quo fieri poterit, ordine in re obscurissimâ progrediamur, plurima motuum genera a Philosophis distingui solent, quibus aqua Maris impellitur, & agitur. Alii nimirum *perennes, sive perpetui* dicuntur, alii *temporales*, alii *certi*, qui certâ periodo, vel tem-

(a) *Divin. II.* (b) *Fin. I.*

temporis spatio renovantur, alii *incerti*, vel *irregulares*, qui nullâ certâ lege, vel tempore fiunt, alii denique in unam partem determinatè feruntur, alii in omnes temere, fortuitoque veluti irrumpunt.

Ac de illorum quidem causâ, & origine, qui temporales, & irregulares sunt, communique *tempestatum* nomine vocari solent, nihil est ferè, quod dicendum nobis supersit, cum varias Oceani tempestates, aut a calore Terræ, & subterraneis ignibus, aut a permixti nitri, vel bituminis rarefactione, aut præsertim a ventorum, ac turbinum impetu oriri fusiùs, & opportuniùs alibi sit explicatum, quod de pluribus, & Calcidenfi præsertim Euripo intelligi debet, qui septies in die fluere dicitur, quodd maximo, perturbatoque impetu ob incurrentes aquas, aut ventos agitatam continuo ferè motu concitetur (a). De certis itaque, regularibus, ac periodicis Maris motibus, eorumque causis agendum est: cumque ad duo veluti Capita omnes illi revocari facilè possint, ut alter perennis Oceani motus sit ille, quo singulis diebus ab oriente in occidentem movetur; alter verò, quo bis in die crescit, decrescitque; varias de utriusque origine Philosophorum sententias hic ordine subjiciemus.

II. Innumeris itaque experimentis, & accuratissimis observationibus compertum est, Oceanum quotidie, leni quidem, æquabili, & uniformi, sed tamen sensibili motu ex oriente in occidentem defluere, ac impelli. Id potissimum Nautæ experiuntur, cum ex Africæ,

Ll 2

vel

(a) Vid. Liv. Dec. III. lib. 8.

vel Europæ litore in Americam, aut ex Americâ in Europam feruntur; in primo etenim casu celeriores sunt, in alio verò lentiori, tardiorique motu vehuntur. Sic ab Indiâ in Madagascar, ex Japoniâ in Sinas, exinde in Americam facilius est iter, quàm e contra; & ex Oceano Pacifico per fretum Magellanicum in Atlanticum Mare celerrimè erumpit aqua, quod in pluribus aliis locis a Varenio enumeratis observatum est (x).

Hic admirabilis Oceani motus nulli Veterum, ut apparet cognitus, aut observatus est, cùm altero vix ab hinc seculo Lusitanis Zonæ torridæ litora navigantibus innotuerit. Hinc multæ sunt in explicandâ illius causâ, & origine hypotheses, sive sententiæ Veterum, sed hæc gloria Recentioribus solùm Philosophis reservata censi poterit.

III. Qui Ptolemaicam hypothesim, Cœlorumque soliditatem tuentur, perennem hunc Oceani motum ex ipso Cœlorum motu repetendum esse opinantur. Diurno siquidem Cœlorum motu, ut illi conjiciunt, non modò sidera Cœlis infixæ ex oriente in occidentem celerrimè torquentur, sed ipsa quoque ignis sphaera Lunari Cœlo finitima, & igni contiguus aër, & aqua Maris aëri subjecta eadem vertigine ex ortu in occasum abripitur, impelliturque. Hinc quemadmodum hæc aëris agitatio perennem, ut alibi diximus, ventum efficit, qui ex ortu in occasum continuò spirat; ita quoque aëris ipsius commotio aquæ Maris impressa, vel communicata perennem in illâ motum, aut fluxum efficere debet.

Sed

(x) *Geogr. lib. I, c. 6, prop. 7.*

Sed quo demum loco, vel pretio Ptolomaica hypothesis, Cœlorum soliditas, cœlestis ejusmodi motûs communicatio, quibus unicè hæc explicandi ratio innititur, habenda sit, alibi sæpius est observatum, præsertim cùm de Mundi systemate, Cœlorum substantiâ, & Cometarum motu res foret, adeoque quidpiam hîc illis adjicere nec juvat, nec decet.

IV. Quemadmodum verò, qui Copernicam hypotheseam amplectuntur, continuam æris commotionem, sive ventum ex oriente in occasum in diurnum ejusdem Telluris motum referunt, quòd tota æris moles, etsi eâdem vertigine cum Tellure circumducatur ex occidente in orientem, non æquabili tamen, ac uniformi impetu celeriores Telluris motum sequitur ær, adeoque sensim retro relictus, nobis ex occidente in orientem celerrimè abreptis, ær ipse in occidentem ex oriente moveri videatur; ita prorsus ex eodem Telluris motu, eâdemque lege perennem oceani motum ex oriente in occasum oriri posse arbitrantur. Cùm enim, inquiunt, ingens Oceani moles unâ cum Tellure celeri motu convertitur, non accuratè ipsius impetum, aut velocitatem sequitur, sed sensim retardata, ex oriente in occidentem ferri videbitur.

V. Plerique tamen, etsi Telluris motum ad hunc Oceani fluxum plurimùm conferre arbitrentur, aliâ tamen, longæque meliori ratione, sive principio id explicare solent: quos inter maximè excellit Cartesius, qui pulcherrimâ hypothesi, non generalem modò Oceani motum ex oriente in occasum, sed occultissimam quoque æstûs originem explicavit. Hinc antequam perennis hujus motûs causam, juxta

Cartesii sententiam exponere aggrediamur, de Maris æstu differemus, qui inter obscuriora Naturæ arcana, non a Veteribus modò, sed a Recentioribus etiam Philosophis haberi meritò solet, cùm illustriora quoque ingenia torserit, omnemque mentis humanæ vim hactenus eluserit, ut ex ipso opinionum¹, sententiarumque discrimine facilè demonstratur.

VI. Quo verò tempore, hæc constans Oceani vicissitudo primùm deprehensa, vel explicata fuerit, definiri vix potest. Credibile est tamen hanc Alexandri Magni, vel Scipionis Africani ætate nondum innotuisse, cùm illam portento similem, Deorumque miraculum ipsi existimaverint. Ferunt enim Macedones, cùm ex Europâ in Africam trajicere vellent, atque illò victricia arma inferre, Oceani aquam sensim a litore recessisse; quod cùm Alexander ipse, ejusque socii non sinè maximo stupore observassent, rem occulto Deorum consilio fieri existimantes, qui Alexandri victoriis, ac imperio limites constituerent, spe frustrati in patriam rediere. Quod si per breve temporis spatium in litore substitissent, easdem Oceani aquas ad litus sensim accedere, ac intumescere deprehendissent, fortunatoque auspicio confirmati, novas Provincias occupassent. Hæc etenim celeberrima, ac notissima. Æstûs proprietas est, ut aqua Maris per sex horarum spatium sensim ad litus accedat, ibique ad aliquam altitudinem augeatur, ac veluti intumescat; deinde verò per æquale temporis spatium sensim decreseat a litore recedendo; tum per alias sex horas iterum affluat, augeaturque, ac denique per totidem horas refluat, ac minuatur, ita ut 24. ho-

horarum spatio bis in aliquo litore, motu reciproco, fluxus, & refluxus aquæ contingat; fluxus quidem, vel affluxus, cùm in litore, augetur aqua; refluxus verò, sive defluxus, cùm in eodem litore minuitur; quamvis uterque motus unico *Æstus* nomine significari jam soleat.

VII. Atque, ut omnia simul phænomena, quæ in maris *Æstu*, non a veteribus solum, sed a Recentioribus etiam accuratissimè sunt observata, oculis ipsis quodam ordine subiiciamus,

1. Illud in primis exploratum esse jam diximus, quod aqua maris in aliquo litore bis in die fluere, ac refluere videtur; quod enim in Chalcidenfì Euripo, septies id fieri memoretur, ad alias omnino causas superiùs expositas referri debet, quamvis & ipsum certâ, communique periodo, ac lege bis solum in die fluere, ac refluere nuperrimè sit observatum.

2. Ita verò fluere, ac refluere plerumque solet Oceanus, ut sex horis augeatur, sex detumescat, sex aliis iterum augeatur, & reliquis sex deprimatur.

3. In Aquitanico tamen litore septem horis affluit mare, quinque refluit, cùm in Canadensì quinis horis accedat, septenis regrediatur, & prope Guineæ litora quatuor horis ascendat, reliquis verò octo descendat.

4. Quod ad magnitudinem *Æstus* pertinet, in Molucis, & Philippinis insulis vix duorum, aut trium pedum altitudinem acquirit. In Insulâ D. Thomæ sub æquatore positâ quatuor, cùm tamen ad oram Cambayæ 30. vel 40., in Lusitaniâ, & Caleti 18., in Bel-

gico litore 70., prope Bistoliam 66., in freto Magellanico ferè 60., in oppositis Angliæ, Galliæque oris prope S. Maclovium *S. Mald* 70.; denique supra Britanniam ad 120. pedes accedat, quemadmodum *ostrogenis cubitis supra Britanniam intumescere Æstus, Pytheas Massiliensis auctor, est (a).*

5. Non eadem tamen in singulis anni temporibus Æstuum magnitudo deprehenditur, sed æquinoctiorum tempore majores, minores verò in Solstitiis Æstus experimur. Quemadmodum etiam, dum Luna est in Syzygiis, hoc est opponitur, vel conjungitur soli, uberiores sunt affluxus, sensimque decrescunt; donec ad quadraturas Luna pervenerit, in quibus illi minimi sunt, atque iterum sensibilibiter augentur, dum ad Syzygias illa regreditur.

6. Neque solum irregularis ille maris motus, quem menstruum, & annum vocare solent, cum annuâ, & menstruâ Lunæ periodo conjungitur, sed diurnus etiam fluxus, & refluxus cum diurno Lunæ motu mirè connectitur. Quemadmodum enim Luna, dum diurno motu circa Tellurem convertitur, singulis diebus tardiùs ad aliquod horizontis, vel meridiani punctum revertitur, ex quo discesserat, quia nimirum proprio motu ex occidente in orientem sensim progreditur, adeoque diurnus illi oppositus ita retardatur, ut solo 24. horarum spatio integram periodum absolvere nequeat, sed insuper 50. minuta temporis requirantur: ita prorsus Æstus, vel affluxus initium in aliquo litore, non eadem semper horâ contingit, sed singulis diebus per

(a) *Plut. II. c. 97.*

per spatium 50. minutorum retardatur hoc ordine, ut dum Luna horizontem alicujus loci attigerit, fluxus incipiat, donec sex horarum spatio ad meridianum illa perveniat; tum refluxus totidem horis sequatur: atque, ubi Luna in occidentalem horizontem descenderit, affluxus iterum incipiat per sex horas, totidemque horis aqua refluere videatur.

7. Sed non æquabili, ac uniformi motu aqua fluere, vel refluere videtur: si etenim fluxûs, & refluxûs tempora comparentur, celerius, majorique impetu descendit, vel recedit a litore, quàm accesserit; atque initio affluxûs celerius accedit, quàm in fine, dum affluere cessat; contra verò dum refluere incipit velocior est aqua, quàm refluxus ipse jam desinit.

VIII. Sed, ut occultissima hujus phænomeni causa, & origo inquiratur, Pythagoras, Stoici, atque etiam fortasse Platonici, cùm Tellurem animatam esse putarent, refluxum maris, ab anhelitu ejusdem Terræ fieri posse dixerunt (a), ut illà nimirum nunc maximam aquarum copiam in visceribus reconditam evomeret, nunc absorberet: eâ ferè periodo, & lege, quâ in animalium corporibus sanguinem perenni circuitu moveri jam constat. Hinc *cognitum adhuc satis non esse* queritur Mela, *anhelitu ne suo id Mundus efficiat, retractamque cum spiritu regerat undam, si, ut doctioribus patet, vivum animal est* (b). Nec defuere Philosophi, ut Athenodorus apud Strabonem (c), qui seriò pulmones, nares &c. Telluri tribuerent, ac assererent, *in profundis*

(a) Ap. Stob. (b) Lib. III. c. 1. (c) III.

dis Oceani naves quasdam Mundi constitutas, per quas emissi anbelitus, vel redditi modò efflent maria, modò revocent (a). Dedecet autem hanc fabulam alibi explosam hìc iterum fusiùs explicare: juverit hoc unum adiicere, quod aqua maris, non in fundo solùm, sed etiam infra paucas a superficie hexapedas placida, ac ferè immota deprehenditur, ut ibi nullæ tempestates, nulla reciproci motûs varietas sentiatur.

IX. Hanc tamen hypothesim æmulati ferè videntur illi, qui infra Telluris superficiem ingentem aquæ copiam veluti abyssò, voragine, barathro inclusam existere sunt arbitrati, quæ cùm statis temporibus, certâque periodo per vortices quosdam, ac veluti fauces in ipsis Terræ polis existentes erumpat, atque ab illis iterum absorbeatur; quemadmodum, ferè, diducto, contractoque corde, sanguis ab illo erumpit, vel in ipsum recipitur; ita ad Oceani litora sensim affluere, vel refluire debeat aqua, ut in illis intumescere, ac detumescere compellatur. Certè ex litoribus polo proximioribus maxima aquarum vis ad æquatorem sensim impellitur: quod aliâ de causâ fieri non posse videtur, nisi quodd ingens illa aquarum copia ex polaribus, ut ita dicam, vorticibus erumpere videatur (b).

X. Sed innumera ferè sunt illa, quæ huic sententiæ facilè opponi poterunt. Quis etenim apertè non videat, quod regularitas illa, vel certa periodus, quæ Æstu maris deprehenditur, in hac hypothesi salvari non potest, neque ullâ ratione explicari, cur aqua
non

(a) *Ap. Solin. c. 16.* (b) *Bekman. bistor. Orbis.*

non ex polis in æquatorem, sed ex oriente in occidentem affluere videatur, neque ulla denique caussa effingi, ex quâ reciprocus ille motus efficiatur? Perennis autem affluxus, quo aqua ad æquatorem accedit, inde facile oriri potest, quod in æquatore major aquæ copia ob maiorem vim solis in vapores avolat, ideoque, ut æquilibrium in singulis Oceani partibus conservetur, a polis ad æquatorem nova aquæ copia dilabatur.

XI. Nec multò certè verisimilior est opinio Timæi, qui *Æstuum caussam esse existimat flumina per Celtarum montes in Athlanticum mare irrumpentia. Protrudendo enim impetu suo maris Æstum ciere, contraque remisso mare retro denuo agere, Æstumque refluxum facere (a).* Quamvis enim flumina, dum in Athlanticum, aliudve mare illabuntur, illud augere, & fluxum, & affluxum quendam efficere possint; refluxu tamen, & ad fontes redire non possunt, nisi violento quodam, ac insolito ventorum impetu repellantur; adeoque explicari non potest quomodo maris aqua decrescat, etsi flumina continuo, perennique motu eandem semper aquæ copiam in illud deferant; tantumque abest, ut Æstus maris ab illabentium fluviorum aquâ efficiatur, ut ingentia flumina plerumque ab Æstu, vel affluxu maris prohibeantur, ne in mare se exonerent, quod præsertim ad fauces Indi, & Galegos, & fluminis Amazonum, quibus in locis vehementior Æstus percipitur, est observatum. Sed quod omnem prorsus dubitandi locum, si quis fortasse superest, evertit, si universa flumina

(a) *Plur. III. c. 17.*

num aqua super Oceani superficiem expande-
retur, vix duodecimâ unius pedis parte Ocea-
ni altitudinem augetet, ut inito calculo Ric-
ciolius accuratissimè demonstravit (a): quî au-
tem fieri potest, ut ex eorundem fluminum
aquâ Æstus oriretur, cujus altitudo ad 10.
30. 60. 80., & alicubi etiam ad 120. pedes
ascendat?

XII. *Aristoteles autem, & Heraclitus Æstum
a Sole fieri autumant. Plurimos enim flatus
illum suâ secum vertigine circumflectere, qui-
bus ingruentibus, Atlanticumque mare protru-
dentibus, ipsum extumescere, Æstumque efficere,
quibus tandem sopitis, se se Æstum colligentem
cessare, idque esse reciprocationem (b).* Sed hæc
Aristotelis, & Heracliti Sententia facilè re-
vinci potest: primò quidem, quodd continuus
ille flatuum, halituum, vel aëris motus nul-
lâ ratione concedi debet, præsertim si a diur-
no Cœlorum motu cum Aristotele sit repeten-
dus; deinde verò quia maris Æstus admira-
bili lege, vel certâ periodo Lunæ motum,
aut phases ita consequitur, ut non a Solis mo-
tu, aut ab irregulari ventorum impetu, vel
inæquali vaporum copiâ desumi posse videatur.

XIII. Plurimi ex veteribus, recentiori-
busque Philosophis, ut miram Æstus origi-
nem, ejusque phænomena expediant, ad Tel-
luris motum confugiunt, quamvis in expli-
candi modo plurimum differant. *Seleucus enim
motum Terra tribuens ejus revolutioni, ac
motui, Lunam adversam ire, ait: cùmque ven-
tus, qui inter duo ista corpora intercipitur, in
diversas partes trahatur; idcirco illo incidente
in*

(a) *Geogr. lib. X. c. 7.* (b) *Plur. III. c. 18.*

in mare Atlanticum, ipsum mare simul moveri (a). Hinc autem faciliè apparet, quod in hac hypothefi variæ *Æstuum* inæqualitates fieri, vel explicari non possent; æqualiter enim ex adverso Telluris, & Lunæ motu compressus aër æqualem semper *Æstum* induceret; nisi fortasse hæc opinio ellipticum Lunæ vorticem, aliaque id genus cum Cartesio supponat, de quo inferiùs dicturi sumus. Porro ingeniosam hanc Seleuci sententiam imitati sunt ex recentioribus Origanus, Cæsalpinus, alique plurimi, qui ex motu Telluris *Æstus* originem variâ ratione repetendam esse arbitrantur.

XIV. Omnibus tamen in hac parte palmam præripuit Galileus, qui mirâ, & incredibili felicitate ex annuo, diurnoque Telluris motu reciprocum Oceani *Æstum* demonstravit. Illud est itaque a sapientissimo viro observatum, quod cùm Oceani aqua in alveis, sinibus, litoribus, veluti in vase, vel cymbulâ contineatur; sicuti si in aliquam partem vas, aut cymbula certo quodam velocitatis gradu impellatur, aqua eodem æquabili impetu, five celeritate maris motum sequetur: at si cymbula celerioreni repentiè motum concipiat, aqua eundem repentiè motum concipere non poterit, sed versùs puppim relabetur, & affurget. Quod si navis certâ quadam velocitate impulsâ motum remittat, ac lentiùs in eandem partem feratur; tum aqua ex concepto jam semel æquabili impetu in anteriorem navis partem impelletur, ibique similiter illisa intumescet: ita quoque in ipsis Oceani litoribus contingere oporteret, si Tellus ipsa modò celerius,

mo.

(a) *Plut. ibi.*

modò tardiùs in eandem partem moveretur : Rem verò his ferè legibus peragi , hoc est diurnum Telluris motum inæqualem esse , dum illa celeriùs , & tardiùs in eandem partem impellitur , ex ipsis Copernicanæ hypothefis principiis facilè demonstratur . Concipiatur etenim Terra A B C D* , quæ duplici quotidie motu feratur , diurno nimirum , quo circa se ipsam , vel proprium axem spatio 24. horarum convertitur ex A in B C D A , & annuo , quo circa solem , veluti centrum , torquetur ex E in F , qui motus annuus triplo celerior est diurno motu . Cùm uterque ex his motibus simul conjungitur , Terra nimirum annuo , simulque diurno motu ex occidente in orientem spatio 12. horarum , transfertur , tunc Terra celeriùs ferri debet : cùm verò Terra annuo quidem motu ex occidente in orientem , sed diurno ex oriente in occidentem convertitur , tum lentiùs progredietur . Itaque maris aqua posita in A , dum Terra celeri motu ex A in B feretur , versùs A , hoc est , versùs occidentalem partem , relabatur , & accessum , sive fluxum in illo litore efficiet ; at verò dum Terra post 12. horas ex opposito puncto C per D in A lentiori motu circumducetur , aqua in anteriorem partem , hoc est orientalem irruet , & refluxum efficiet , donec ad punctum A iterum rediens , & celeriùs acta affluxum iterum faciat . Atque hoc quidem ordine semel in die affluxus , & refluxus aquæ fieri deberet , cùm Tellus hæc opposita maximæ celeritatis , & tarditatis puncta attigerit . Verùm , cùm id non semel , sed

bis

* Fig. XV.

bis in die deprehendatur; id non ex Telluris motu, sed ex particularibus causis, præsertim verò ex alveorum, litorum, fretorum ordine, & loco oriri posse arbitratur Galileus: quemadmodum certè, ut inferiùs etiam ostensuri sumus, plurimæ Æstus irregularitates hinc inferri, & explicari debent. Vehementior autem Syzygiarum tempore maris Æstus efficitur, quòd, cùm Luna tunc Telluri proximior sit, quàm in Quadraturis, tota Telluris, ac Lunæ compages Soli proximior reddatur, adeoque celerius ab illo circumducatur; sicuti quò penduli longitudo minor est, eò celerius illud movetur, suasque vibrationes peragit. Uberior denique maris affluxus in æquinoctiis, quàm solstitiis, ex annui, diurnique motus complicatione oriri debet: cùm enim diurnus Telluris motus fiat circa polos æquatoris, annuus verò circa polos Eclipticæ; cùm Terra in æquinoctialibus punctis reperitur, uterque motus sit cum eadem directione; in tropicis verò, sive solstitialibus, motuum directiones ad angulum 23. 30. inclinantur, adeoque debilior ex illis motus componitur.

Ægrè tamen adduci quis poterit, ut constans adeo fluxus, & refluxus aquæ a solo Terrarum, fretorum, sinuumque loco, vel angustis, non in unico tantùm sinu, ut mediterraneo mari, sed in ipso quoque Oceano oriri posse videatur, ubi nulla fretorum angustia, litorum irregularitas deprehendatur.

Sed etiam si id liberè concedatur, quâ nam causâ fieri posse putabimus, ut aqua maris constanter adeo, ac veluti religiosè Lunæ periodum consequatur, ejusque phasès æmuletur? Certè si fluxus, & refluxus maris ex Terræ,

vel

vel aquæ motu modò celeriori, modò lentiori orietur, ut Galileus existimat, hoc est, si affluxus fieret, cùm Terra punctum A attigerit, defluxus verò, cùm pervenerit ad punctum B, cùm Terra diurno motu ab aliquo puncto digressa ad idein punctum post 24. horarum spatium revertatur, fluxus quoque, vel refluxus aquæ non nisi post spatium 24. horarum inciperet; cùm tamen, ut paullò superius est observatum, initium affluxûs integrâ ferè horâ singulis diebus retardetur. Quid verò, quòd levi nimium conjecturâ, non a Galileo quidem, qui id prorsus omiserat, sed ab iis, qui Galilei hypothesim amplectuntur, explicatum videtur, cur æquinoctiorum, aut Syzygiarum tempore longè majores, & uberiores sint affluxus, longè debiliores, exilioresque in solstitiis, & quadraturis, nisi hæc omnia ad Lunæ periodum referantur?

XV. Id optimè noverat egregius ille Philosophus Pytheas Massiliensis, qui Alexandri ætate Astronomiæ, & Philosophiæ studiis maximè floruit. Is etenim, ut est a Plutarcho memoratum: *maris accessus Luna incremento fieri dixit, decrementò autem recessus (a)*, ac si, dum Luna ex conjunctione Solis in oppositionem digreditur, sensimque splendidior efficitur, mare intumescat; dum verò ex oppositione in conjunctionem revertitur, detumescat. Sed mirari fortasse quis poterit, cur auctor ille maris Æstum in menstruas Lunæ phases retulerit, cùm planè compertum sit reciprocum maris Æstum bis in die contingere. Hinc non immeritò prorsus suspicatur

Gaf-

(a) *Plur. III. c. 17.*

Gassendus non accuratè opinionem hanc a Plutarcho memorari: cùm præsertim Pytheas sæpius Oceanum navigaverit, Thulem, extremam olim Orbis partem, repererit, ideoque varios Oceani motus, quàm qui maximè, exploratos habuerit. Coniicere est etiam Pytheam hac hypothefi, non nisi menstruum maris Æstum exponere voluisse; diurni verò, vel annui cauffas, & originem, aut ab illo non satis accuratè traditam, aut etiam a Plutarcho omiffam fore.

XVI. Atque hætenus quidem veterum Philosophorum industria progressa est, ut illorum accuratissimi admirabiles Oceani motus cum variâ Lunæ periodo, miro quodam ordine, constantiâ, ac veluti fœdere conjungi deprehenderint: quâ verò lege, quibusque viribus id fieri posset, aut in arcanâ Naturæ majestate latere sunt arbitrati, aut melioribus posterorum studiis inquirendum id reliquerunt. Qui verò liberius rem difficillimam exponere sunt aggressi, nonnisi tenues, inanes, levioresque conjecturas excogitarunt. Quo etenim pretio habendam esse putabimus opinionem Peripateticorum, qui occultæ qualitatis viribus id fieri posse arbitrantur, & hanc esse Lunæ conditionem existimant, ut humores omnes, præsertim verò Oceani aquas suo veluti imperio regat, impellat, easque, dum circa Tellurem diurno motu torquetur, abripiat, secumque circumducat? Certè, quod alibi sæpius est observatum, si hæc explicandi ratio sufficeret, quæ demum difficilis adeo, vel obscura quæstio oriri unquam posset, quæ facillimè dirimi, vel explicari non posset? Aut quo demum discrimine a rudioribus etiam

viris Philosophi distinguerentur; si, dum illi varios Oceani motus intuentes, incredibilem Naturæ vim, & effectus demirantur, nos nihil ulterius, quàm occultam esse illorum causam adderemus? Quamquam non id a nobis inquiritur, utrùm hæc vis Lunæ indita fuerit, ut maris æstum efficiat, cum omnibus hoc planè compertum, perspectumque sit; id verò potius inquirendum superest, quâ ratione, quibusque legibus hanc Luna vim exerat, & Oceani vicissitudines efficiat.

XVII. Complures itaque ad lucem ita confugiunt, ut illius radii, qui in Lunari superficie reflectuntur, ubi subiecti maris aquam, attigerint, illam pervadant, excitent, ac impellant: quo fieri posse arbitrantur, ut illa, veluti ebulliens ferveat, ac intumescat, ejusque rei argumento fore coniiciunt, quod, ubi lux uberior a Lunâ reflectitur, ostreae, animalium ossa magis turgescant, ac impleantur. Sed illis opponi facile potest, quod sive Luna pleno orbe fulgeat, sive tenuissimâ luce irradietur, sive nubibus obducta sit, sive eclipsim patiatur; eadem tamen æstuum varietas singulis diebus constanti periodo sequatur; ut omittam rariorem, leviolemque futuram, aquam Oceani, si Lunæ radiis, ac luce rarefieret, ac intumesceret.

XVIII. Eadem quoque ratio demonstrat, quod æstus maris oriri non potest ab halitibus illis, quos in maris alveo Lunæ calore excitari, rarefieri nonnulli opinantur; cum præsertim tanta halituum copia, vel vis esse non possit, cui maximam Oceani molem impellere, sustinere liceat. Perperam itaque id a Furnerio conjicitur, quod, sicuti in anima-

lium

lium corpore ex collectis iterum, irritatisque humoribus certâ quadam periodo febres, & paroxismi oriuntur, ita ex regulari quadam halituum commotione maris æstus oriri possit; neque enim certâ bituminis, vel halitus excitandi ratio definiri posse videtur, aut certè maris æstus in infimâ illius parte, vel alveo inciperet: cùm tamen aqua ibi tranquilla deprehendatur, dum in superficie vehementius impellitur, ac intumescit.

XIX. Alii magneticam, vel attracticem, quandam vim Lunæ concedunt, ut Keplerus, atque Neutonus, quâ subjectas Oceani aquas, dum illis imminet, ad se rapiat; cùmque Solem ejusdem virtutis participem velint, feliciter explicare videntur, cur in noviluniis, ac pleniluniis, dum utraque Lunæ, Solisque virtus conjungitur, & efficacius operatur, vehementiores æstus sequantur. Sed non solum hæc magnetica, vel attractiva virtus paulò liberius effingitur, verùm etiam explicandis Oceani motibus par esse non potest; vehementior enim affluxus esse deberet in Zonâ torridâ, cui perpendiculariter Luna Zodiacum percurrere immineret, quàm prope polos, quod experimento manifestissimè refragatur, ut ex phænomenis antea explicatis inferri potest.

XX. Incredibile est etiam, quàm miserè torqueantur Auctores illi, ut explicare possint, quomodo Luna, etiam cùm in hemisphærio inferiori reperitur, aquas maris attollere possit; ita ut 12. horarum spatio, Lunâ in oppositis meridiani punctis existente, fluxus, & refluxus Oceani producantur. Sunt qui ab iisdem Lunæ radiis id fieri posse arbitrantur,

qui a Lunâ in oppositas Cœli partes directi; ibique reflexi in Oceani superficiem incidunt, eamque commoveant. Verùm quis facilè non videat, aut nullos esse radios illos, aut debiles certè, ac inutiles esse; præsertim cùm ab interpositâ Tellure prohibeantur, nullâque ratione a cœlesti substantiâ, quam fluidam, spirabilemque supponimus, reflecti possint? Paullò verisimilior est illorum sententia; qui maris Æstum bis in die contingere posse opinantur, quòd aqua maris ab imminente Lunâ attracta, atque in tumorem collecta, dum sensim ab illius attractione deseritur, in oppositam partem refluat, relabaturque; ita ut ex. gr. dum Luna, ex meridiano in occidentem descendens, subjectas Oceani aquas attollit, ibique affluxum efficit; aqua, quæ priùs collecta fuerat, dum Luna ex oriente in meridianum accedebat; in orientem ipsum fluere debeat, ibique similiter affluxum causare: quemadmodum dum Luna in inferiori meridiano posita, non in subjectis solùm litoribus, sed in oppositis etiâ efficiet Æstum. Hæc ipsa tamen hypothesis plurimis difficultatibus premitur, præsertim verò, quod ille tumor, vel aquæ collectæ cumulus non deprehendatur; aut certè non eâ lege reflueret, ac detumesceret aqua, quæ hîc supponitur, ob interjecta plerumque litorâ, & freta, quæ communicationem, & diffusionem illam prohiberent. Affluxus denique in aliquo litore fieri videtur, non cùm Luna Oceani aquis imminet, sed potius cùm ab illo per integrum 6. horarum spatium digressa fuerit, ut experimentis ipsis ostenditur.

XXI. Sed explicandâ jam superest celeberrima,

rima, & ingeniosa Cartesii hypothesis, quã varios Oceani motus cum Lunæ periodo constanter adeo conjungit, ut omnium votis factis fecisse, difficillimamque quæstionem feliciter diremisse videri soleat. Is itaque supponit Tellurem diurno motu circa se ipsam ex occidente in orientem torqueri, secumque abripere, vel circumducere Lunam, quæ veluti comes Terræ, sive satelles in eodem terrestri vortice continetur. Supponit etiam Lunam proprio motu circa Tellurem gyrate, non in circulo, sed in ellipsi, vel evolutâ; in quâ proinde, cùm inæquales sint radii, inæqualis etiam futura sit Lunæ distantia a Terrâ: universum denique spatium, quod inter Lunam, ac Tellurem interponitur, repletum adeo, repletumque corporibus arbitratur, ut ne minimum quidem spatium reperiri contingat, quod inane sit, sive omni prorsus corpore destitutum. Concipiatur itaque ellipticus Terræ vortex * E F I K, in quo Luna menstruo motu periodum suam peragat ex occidente in orientem. Si universa Telluris superficies aquis undique obducta supponatur (perinde enim est ad explicandam Æstûs originem, an integer Telluris globus, an aliqua solùm ipsius pars Oceano obducta fuerit) facilè apparet, aqua, quod ubi punctum L sensim accedet in M, vehementius comprimetur ab æthere, sive subtili substantiâ: quæ cùm perenni motu circa Tellurem celerrimè moveatur, celerius adhuc ibi movetur, & fluit, ubi major est loci angustia; adeoque major aquæ moles sensim versùs occidentem L repellitur, ibique

M m 3

que

* Fig. XV.

que intumescens affluxum efficiet : cùm verò integro sex horarum spatio punctum L in M pervenerit, sensimque versùs orientem N Terra progredietur; tunc ætheris pressio decrescere incipiet, totidemque horis aqua liberior effecta refruere videbitur, seu versùs orientem affluere : ubi verò ex N aqua moveri incipiet versùs O , iterum comprimetur, ac versùs occidentem N relabetur, vel secundum fluxum efficiet, donec ex O moveatur in L, ideoque refruere, vel in orientem regredi videatur.

Cùm verò Luna proprio motu in orientem interim feratur, ejusque circuli minuta 50. singulis diebus percurrat, Æstus initium, quod in Lunâ in E, velut in horizonte, positâ contingit, sequenti die, cùm Lunæ globus per 50. minuta in F pervenerit, 50. minutis retardabitur : ut si horâ 15 contigerat, postero die horâ 15. cum 50. minutis incipere deprehendatur. Quandoquidem verò Luna, dum in conjunctione, vel oppositione Solis reperitur, extremas minoris diametri partes occupat, ideoque Telluri proximior est, & in quadraturis, in majoris diametri punctis, atque a Tellure remotior reperitur; majores erunt Æstus in syzygiis, quàm in quadraturis, quòd tunc vehementior adhuc sit Lunæ proximioris compressio.

Denique cùm Luna Æquinoctiorum tempore magis directè, vel perpendiculariter subiectas Oceani aquas premat, quàm in Solstitiis; ubi ad Cancrì, vel Capricorni tropicos declinaverit, majores etiam Æstus Æquinoctiorum, quàm Solstitiorum tempore fieri debent.

XXII. Atque istâ quidem hypothefi præci-

cipua, five generalia *Æstus* phœnomena explicare conatur *Cartefius*, in quâ egregiam Sapientissimi Viri solertiam mirari certè quis poterit, qui ex unico Telluris motu illustriora, adeoque difficiliora Naturæ myſteria circa gravitatis, ac *Æstus* originem exponere eſt aggreſſus: ac niſi pro rei dignitate rem numeris omnibus abſolutam reliquit; maximam tamen ingenii laudem ex mirâ hypotheſis felicitate meruit. Cetera verò phœnomena, vel accidentia, quæ in variis Oceani, vel Maris litoribus obſervantur, ex ipſâ litorum varietate, loco, vel ordine explicari facile poterunt.

Quod enim, ex. gr., in Aquitaniæ litore, Mare ſeptem horis affluat, & quinque reſſuat, in Canadenſi verò quinis horis Mare intumeſcat, ſeptem reliquis detumeſcat; ex litorum ſitu, vel interjectis Inſulis, & ſcopulis oriri poterit: neque enim æquabilis ille motus, quem antea ex Lunæ preſſione fieri oportere diximus, ſi tota Telluris ſuperficies aquis undique operta foret; fieri, vel diffundi poterit, ſi Oceani ſuperficies anfractuofis alvei ripis, infixis Oceano ſcopulis, inſulisque interjecta ſit.

Hinc etiam oritur, quod in Mediterraneo nullus ferè *Æſtus* deprehendatur, quia nimirum exundans, ac intumeſcens Oceani aqua, dum per anguſtias Gaditani freti illabitur, ac irrumpit; frangitur, retunditurque, & objectis Balearibus inſulis illiſa, æquabilem incrementi, vel *Æſtus* varietatem amittit: in Adriatico tamen ſinu, quâ liberior eſt aditus, æquabiliusque illabitur aqua, major *Æſtus* percipitur.

Quin etiam Oceani sinus, ut Persicus, Indicus, & Mare Tyrrhenum ipsum, mediocrem Æstum habere debent, quod illorum aqua non adeo vehementer comprimentis ætheris vim experiatur, neque, ob alvei angustias, liberè fluere, ac refluxere possit. Certè Mare Caspium, & Balticum, quæ, lacuum instar, nullam, aut minimam cum Oceano Telluri circumfuso connexionem fortiuntur, & mediocri sunt superficie, si ipsi Oceano comparentur, vix Æstu agitantur; quamvis in Mexicanâ Provinciâ palus quædam, & lacus in novâ Galliâ sensibilibus Æstum patiat: nisi fortasse verisimilius existimaveris id fieri, quod, cum a Tropicis, sive a Zodiaco, in quo Luna periodum suam peragit, plurimum distent, ab illâ, vel ab interjecto æthere obliquius, & debilius premantur: quemadmodum certè circa quædam Groelandiæ, Norvegiæ, ac Septentrionalis Oceani litora minor Æstus deprehenditur.

XXIII. Hæc, aliaque id genus innumera, reponere solent ii, quibus Cartesiana hæc hypothesis mirificè arriserit. Ingenuè tamen fatendum est plurima in hac etiam hypothesis desiderari, quæ perfici, vel reperiri vix potuerunt; plurima assumi, quæ, nisi falsa, dubia tamen jure, meritòque videantur; plurima denique perplexis adeo, tenuissimisque conjecturis inniti, ut obscuram adhuc, & incompertam Æstus originem asserere liceat.

1. Ut enim præteream Telluris motum admittere non posse (quamvis eadem prorsus phænomena sequi, & explicari possent, si motus ejusmodi Lunæ concedatur, cum perinde sit an, immotâ Lunâ, Tellus diurno motu,

tu,

tu, vel, immotâ Tellure, Luna circumducatur) illud a plerisque negari poterit, quod a Cartesio veluti certum supponitur, omnia nimirum ita corporibus referta esse, ut nullum spatium vacuum relinquatur.

2. Deinde verò, etiamsi omnia conferta sint, & perennis ille ætheris, sive subtilis substantiæ motus concedatur, non inde tamen inferri poterit, quod illa vehementer adeò subjectam Oceani aquam premat, ut ipsa fluere, ac refluere, in ingentem molem, ac veluti cumulum assurgere, ad incredibilem ferè distantiam diffundi possit. Certè si vehemens, & gravis adeo foret hæc ætheris pressio, non in aquâ solùm, sed in aliis etiam corporibus vim suam exerceret: præsertim verò Mercurium in barometro positum, aut aquam in anthliâ suspensam altiùs impelleret.


Ad hæc, si Oceani aqua altiùs intumesceret, cùm Luna Telluri proximior est, sive in minori diametro suæ orbitæ reperitur, id solo syzygiarum tempore fieri non deberet: quandoquidem Luna, dum Soli conjuncta, vel opposita est, in majoris etiam diametri extremo, vel a Tellure remotior interdum existit, ut ex parallaxi, vel majori ipsius magnitudine apparenti facilè demonstratur.

4. Postremò, cùm Æstûs origo ex solâ Lunæ præsentia repeti soleat, quia nimirum spatium inter Lunam, ac Terram contrahitur, & angustius efficitur, adeoque subtilis, ac ætherea substantia celerius excurrit, & subjectam aquam vehementiùs impellit; etiamsi Luna in maiori diametro posita foret, spatium tamen inter Lunam, ac Terram angustius fieret, adeoque æther adhuc celerius mo-

veretur. Certè dum Luna in superiori meridiani parte reperitur, non in subjectâ solum aquâ affluxum producit, sed oppositam quoque diametraliter Oceani partem comprimit, ac in illâ affluxum producit; quàm verò facilius id efficere poterit in aliquâ Oceani parte, quæ minùs a Lunâ removeatur, ejusque vires faciliùs experiatur? Ingeniosam itaque Cartesii hypothesim, dum melior, felicior, verisimilior non affulserit, si libeat, amplectamur; admirabilem tamen *Æstûs originem* humanæ mentis ingenio adhuc ereptam, occultam, ac maximâ veluti caligine circumseptam ingenuè fateamur.

CAP. XV.

De Fontium origine.

- I.  Ed Arcanam *æstûs originem*, ejusque periodum vix contemplati, ad celeberrimam quæstionem illam statim digredimur, quæ maximâ, & incredibiliferè ingeniorum contentione, opinionumque dissidio ita nuperrimè pertractata est, ut nihil uberius, nihil illustrius, nihil accuratius afferri unquam posse videatur; si vel experimenta, vel rationes consideres, quibus alterutra Philosophorum sententia acerrimè dimicavit. Nos verò, non partium studio, sed solo veritatis amore solitam methodum severiùs adhuc ita servabimus, ut opiniones omnes, quæ de Fontium origine apud Veteres, Recentioresque Philosophos
- cir-

circumferuntur, breviter quidem, sed, quo meliori poterit ordine, complectamur: cumque tres illæ potissimum, vel ab ipso Aristotele memorentur, quarum altera ab aëre, altera a Mari, altera denique a pluviis Fontium originem deducit; harum singulas, illarumque rationes hîc eodem ordine subjiciemus, eo sanè consilio, ut illarum verisimilior per sese facîle effulgeat.

II. Itaque, qui Fontium originem ex aëre repetendam esse opinantur, maximam aëris copiam in subterraneis specubus, sive speluncis abditam esse arbitrantur; qui vi frigoris in guttulas ita sensim concreſcat; ut illarum plurimæ simul conjunctæ tenuem aquæ rivulum componant, ac rivuli denique in unum coeuntes Fontem efficiant. Hanc Aristoteles ipse, quamvis opiniones etiam alias enumeraverit, amplexus est, quodd in humidioribus locis, sive in corporibus humenti, sadoque aëri expositis aqua in guttulas sensim concreſcat, adeoque in cavitatibus montium, ubi humidior, & uberior est aër, faciliùs illa colligatur, ac per aperta montium latera erumpat; unde ingentia flumina ex amplioribus montibus defluere conspiciuntur, ut ex. gr. Tanais ex Parnasso Asiæ monte, Tartessus, sive Bætis, & Ister ex Pyrenæis.

Sed quod ad horum quidem Fluviorum originem pertinet, turpissimè labitur Aristoteles, dum Parnassum in Asiâ collocat, & ex illo Tanaim deducit, quemadmodum Istrum ex Pyrenæis Galliæ montibus, cum certissimum sit Parnassum in Græciâ reperiri, Tanaim ex Moscorum finibus descendere, sicuti Tartessus, sive Bætis in Castellâ veteri exoritur.

III. Utinam verò felicius, meliorique methodo Fontium originem explicasset Aristoteles, neque illam hypothesim elegisset, quæ, cum falsa, & inutilis manifestissime deprehendatur, a Peripateticis ipsis meritò deferitur. Quis etenim faciliè intelligat, substantiam aëris in aquæ substantiam converti posse; ita ut duo substantiarum genera, quæ maximè inter se differunt, mutuò tamen unum ex altero fieri, dissimiles, atque contrarias qualitates induere possit? quod non a ratione solùm, sed etiam ab experimentis ipsis maximè abhorret. Id nempe Aristotelem mirificè fefellit, atque in sententiam illam abripuit, quòd guttulas in humidioribus locis, vel corporum superficie concrecentes ex aëre formatas esse putavit: cum tamen faciliè appareat, illas, non ex aëre, sed ex tenuissimis aquæ particulis fieri, quæ, cum aëre permixtæ sunt; sicuti rores, & pluvix, non ex aëre, sed ex aquæ particulis, sive vaporibus intermediâ aëris ipsius regione coalescentibus efformantur. Sed, etiamsi hæc aëris in aquam conversio concedatur, atque aëris, & aquæ elementa *Symbola* dicantur, aëri nimirum, & aquæ humiditas tribuatur; quamvis, ut alibi diximus, siccus potius videatur aër; impossibile est tamen, quod ex aëre condensato, vel concrecente Fontes, ac Flumina oriri possint. Cum etenim pluribus, & accuratissimis experimentis manifestissime demonstratur, ut Disput. II. Cap. 2. jam diximus, quod aëris, & aquæ densitas, aut gravitas eam proxime inter se rationem habeat, quæ est inter 1175. & 1. ut una aquæ guttula efformaretur ex aëre, necessaria foret aëris quantitas 1175. vi-

cibus major, adeoque ex totâ aëris substantiâ, quæ in speluncâ Terræ reperitur, vix tenuis rivulus efformaretur; quî verò fieri posset, ut ingentia Flumina, quæ vel in suâ origine, dum ex visceribus montium erumpunt, navigabilia sunt, ex aëre subterraneo concrescente oriuntur, si nec universa quidem aëris moles ad Fluvium aliquem efformandum par esse possit? Meritò itaque hæc Aristotelis opinio a Philosophis omnibus, ac Peripateticis ipsis rejicitur, eoque loco, vel pretio solet haberi, quo plurimæ illius sententiæ tenuissimis conjecturis innixæ, clarissimisque experimentis contrariæ haberi solent.

IV. Celebres itaque Philosophorum opiniones de Fontium origine, duæ solùm supersunt; altera nimirum, quæ ex mari, & altera, quæ ex pluviis, solutisque nivibus illam repetit. Et incredibile est certè, quâ rationum, & experimentorum ferie, quo Scriptorum inter se dissidentium numero alterutra defendatur. Prima Peripateticis omnibus probari nunc solet, quibus hac in parte Varenius, Cabæus, Cartesius, Bernoullius, Gullielminus, Ramazinius, Vodvardus, alique plurimi conjunguntur. Alteram verò Gassendus, Sedileus, Peraltius, Mariotte, Cassinus, & ne complures alios enumerem, nuperrimè Valisnerius, amplectuntur. Quis alteri palmam præripuerit, quæ melior, verisimilior opinio censenda sit, inferiùs apparebit. Utramque breviter, accuratè, & ingenuè exponamus.

V. Qui ex aquâ Maris originem Fontium repetunt, hanc esse Maris naturam existimant, ut non ab alveo, suisque litoribus coerceatur, sed per occulta quædam foramina veluti ex-

un-

undans, terræ substantiam penetret, ac veluti in rivulos, & subterranea Flumina divisum, in partes omnes uberrimè diffundatur. *Habet enim, ut ipsi quidem existimant, non tantum venas aquarum Terra, ex quibus corrivatis Flumina effici possint, sed & Amnes magnitudinis vasta, quorum aliis semper in occulto cursus est, donec aliquo sinu devorentur, alii sub aliquo lacu emergunt (a). Quod ita formasse Artifex Natura credi debet, ut, cum terra arida, & sicca constare per se, & sine humore non posset, nec rursus stare aqua, nisi sustinente terrâ; mutuo implexu jungerentur, hac sinus pandente, illâ verò permeante totam, venis, ut vinculis, discurrentibus, atque etiam in summis jugis erumpente (b);* cujus etiam argumento fore conjiciunt, ingentes lacus, qui in ipsis Terræ visceribus, præsertim verò in montium cavernis reperiuntur, subterlabentia Flumina, quale sub agro Mutinensi deprehenditur, Fontes, & puteos, in quibus, non falsedo solum, sed admirabiles etiam æstus vicissitudines ita observantur, ut intumescente Mari intumescant, decrescant decrescente, ceteraque id genus, quæ mox opportuniùs, & accuratiùs explicabuntur. Itaque dum celeri, perturbatoque impetu Maris aqua agitur, in occultos ejusmodi meatus impellitur, urgetur, ut ad ipsas montium radices perveniat.

VI. Atque hætenus quidem in exponendâ Maris diffusionem Philosophi omnes mirè conspirant; in explicandâ verò ratione, vel causâ, quâ Maris aqua ex montium radicibus ad

illo-

(a) Sen. III. c. 19. (b) Plin. II. c. 65.

illorum verticem, aut latera, quæ Maris superficie altiora sunt, contra Hydrostaticæ leges ascendere possit, ibique depositâ salsedine in dulces Fontes diffluere, plurimum inter se dissident. Alii nimirum, ut Plinius, ad varios Oceani motus, tempestatesque confugiunt, ut quemadmodum sanguis, dum cor contrahitur, ad singulas etiam superiores corporis partes impellitur; ita Mare celeri, perturbatoque impetu agitatam tantâ vi aquas per Terræ meatus impellat, ut illæ ad superiores etiam montium partes ascendere compellantur. Alii Telluris substantiam, spongiæ instar, aridam esse concipiunt, adeoque, sicuti aqua in cyatho contenta per spongiam, vel panni laciniam, cujus extrema pars aquam contingat, sensim elevatur, ac per ipsos laciniae poros, & interstitia serpit, ita Maris aqua ex montium radicibus ad illorum latera, & verticem per arescentem, spongiosamque Terræ substantiam attrahatur, & exsugatur; præsertim cum montes, excelsaque loca, quasi spongia elata paulatim quidem, sed multa in loca aquam reddant, eandemque stillantem contineant: magnam enim aquarum vim delatentem excipiunt.

VII. Plerique per subterraneum calorem, id fieri posse contendunt, ut in alembico, dum aqua calorem conceperit, purior, & levior illius pars a crassiori, graviorique secernatur, & sursum avolet; quod in ipsâ quoque Maris, & Fluminum aquâ, dum calore Solis in vapores convertitur, & ad mediam usque æris regionem ascendit, experimur; ita Ma-

ris

ris aqua Terræ visceribus inclusa, dum subterraneo calore rarefit, fervet, ac agitur, in vapores abire, sursum ascendere debeat, donec ad ipsa montium latera, ubi frigidior est aër, perveniens, sensim condensari, in guttas concrefcere, ac per aperta montium latera in rivos fluere possit: quod si aër externam Telluris superficiem ambiens paullo calidior sit, & Terræ pori ampliores fuerint, ut æstate contingit, tunc vapores ipsi liberius ex Telluris substantiâ erumpunt, per aërem avolant, adeoque Fontes arefcere deprehenduntur.

VIII. Quâ denique lege, vel causâ aqua Maris falsedinem, ac amarulentiam exuere possit, ut in ipsis montium verticibus dulcior effecta, in Fontibus deprehendatur, ex eodem ferè principio, vel hypothefi deducere solent. Dum enim, inquiunt, aqua Maris per tenues Terræ poros adigitur, illosque celeri, vario, perturbatoque motu pervadit; a tenuissimis falis particulis separatur, ita ut purior, ac dulcior ad montium radices accedat, & exinde per interna montium viscera traducta, ac veluti philtrata, purior adhuc in Fontes abeat: eâ ferè ratione, quâ si per panni lacinias, aut chartæ bibulæ frustum, aut testacei vasis latera aqua falsa trajiciatur; sal ab aquæ particulis ita secernitur, ut hæc, emissâ falsedine, purior, & dulcis evadat. Itaque Mare occulto itinere subit Terras, palam venit, secretò revertitur; colaturque, in transitu per multiplices terrarum anfractus verberatum amaritudinem ponit, & pravitatem saporis in tantâ soli varietate exuit, & in sinceram aquam transit. Et sanè dulcem contineri humorem in

Ma-

Mari, transmitti, & percolari constat ex eo experimento, quod si ex cerâ vâs tenui latere finxeris, idque annexâ lineâ in Mare demittas inane, die, ac nocte unâ dulcis humoris copiam intra se colliget (a).

IX. Quin etiam subterraneum calorem ad hanc aquæ salæ dulcedinem plurimùm conferre arbitrantur. Cùm enim vi caloris aqua in montium radicibus existens, ferveat, agitetur; puriores, ac leviores illius partes avolare debent, sursumque eniti, graviiores autem, crassioresque deorsum subsidere, atque ita dulcior, & levior ad montium latera ascendere, dum gravior salis particulis permixta in ipsis montium radicibus relinquitur.

Neque aliâ certè ratione roris, ac pluviae guttæ falsedinis expertes, dulcesque sunt, etsi ex falsis Oceani aquis oriantur, quàm, quodd tenuissimæ vaporum particulæ, quæ ex aquâ Maris vi caloris interni, radiisque Solaribus evehuntur, a crassioribus salis, & amarioris aquæ corpusculis secernantur; perennique aëris motu diu agitatæ, omnem ferè salis copiam exuentes, ad mediam denique aëris regionem rori, pluviisque dulcibus efformandis, dulces perveniant.

X. Atque ista quidem Peripatetici, Cartesiani, ceterique Philosophi, qui Fontium originem ex aquâ Maris repetendam esse arbitrantur: ac ne auctoritates ipsæ, vel aliud argumentorum genus deesse videatur, opinionem illam a pluribus, & celeberrimis Scripturarum testimoniis illustrari posse gloriantur.

Tom. IV.

N n

tur.

(a) *Plin. XXXI. c. 5. & Sen. III. c. 5. Vid. Arist. Hist. Anim. VIII. c. 2.*

tur . In illis Fontium origo, non aëri, non pluviis, aut nivibus, sed Oceano, sed aquæ Maris tribuitur . *Omnia flumina intrant in Mare, & Mare non redundat; ad locum unde exeunt flumina revertuntur, ut iterum fluant (a).*

Quodsi Patrum auctoritas, in explicandis præsertim Scripturarum testimoniis, maximo semper in pretio, & honore haberi debet; omnes in hoc illi mirè consentiunt, non aliunde Fontium originem, quàm ab Oceano desumi posse; idque pluribus in locis Augustinus, Basiliius, Ambrosius uberrimè demonstrarunt,

Quid itaque mirum, si hæc opinio omnium animis altè insedit? ut non alia propemodum vetustissimis illis temporibus memoretur, & Homerus ipse Oceanum esse dicat:

Ex quo omnes pariter fluvii, maria omnia manant,

Ex quo omnes fontes, omnes puteique profundi (b).

XI. Neque immeritò quidem hæc opinio Sapientissimis Viris unicè arrisit, cùm pluviarum aqua Fluviis, ac Fontibus efficiendis impar esse videatur. Quà etenim fieri potest, ut ex solâ pluviarum aquâ, quæ aliquibus præsertim annis mediocris, & exigua admodum decidit, ingentia Flumina oriantur; cùm ingentem illius partem arbores, herbæ, animalia, & arida Telluris substantia consumat, attrahat, & exsugat? Quod si liberius etiam concedatur, aquæ pluvialis copiam Fluminibus

(a) Eccl. cap. 1. ver. 7. (b) Iliad. φ. ver. 156.

bus efficiendis sufficere ; ab illâ tamen Fontes, & Flumina formari non poterunt, nisi Telluris substantiam pervadat, & in aliquibus locis, veluti conceptaculis, ita servetur, ut non tota simul erumpere, ac præceps effundi debeat, sed sensim, ac certâ ferè periodo fluere dicatur; cùm tamen pluvia torrentem quidem facere possit, ac soleat, non possit autem Fluvium æquabili intra suas ripas tenore labentem ; ac vix infra decempedum altitudinem terram penetret, neque ibi diutiùs coerceri posse videatur, ut perenni cursu per eadem montium latera semper effluere, ac in aridioribus etiam locis, annique temporibus, quibus rarò, vel nunquam pluvia decidit, vigere deprehendatur. Certè apud Trezenias est Fluvius Chrysorrhœa, qui, cùm desideratis per novem annos imbribus, Fontes omnes exaruiscent, in maximâ, & incredibili siccitate perennis fuit, ut a Pausania memoratur: quod in aliis etiam sæpius contigisse didicimus. Quid verò, quod antequam imbres, aut pluvia e Cœlo descenderet, Fontes in Telluris superficie reperiebantur, ut ex celebri Scriptorum loco manifestissimè demonstratur? *Non enim pluerat Dominus Deus super Terram (a), inquit, sed fons ascendebat e Terrâ irrigans universam superficiem Terra (b).* Quod si Fons ille, alijque plurimi, in quibus præsertim æstus, salsedo Maris deprenditur, non a pluviis, sed ab Oceano originem sortiuntur; quid ni singulos etiam Fontes, & Flumina ab ipsâ Maris aquâ repetenda esse dicemus?

(a) Gen. c. 2. ver. 5. (b) Ibid. ver. 6.

XII. Hactenus Cartesii, aliorumque sententias, nisi pro rei dignitate, quo meliori tamen ordine, & diligentia licuit, ingenuè complexi sumus: nullumque hac in parte argumenti genus prætermissum fore speramus, quod ab illis adhiberi consueverit. Locus ipse, susceptique operis ratio nos admonet, ut pari diligentia, ac fide illorum omnia argumenta, vel experimenta nunc asseramus, qui Fontium originem, non ex mari, sed ex pluviis, solutisque nivibus repetunt. Quandoquidem verò eâ plerumque methodo uti illi solent, ut oppositam opinionem rationibus, & experimentis tueantur, nos quoque hanc methodum imitati, priùs ostendemus quibus argumentis ostendi soleat, Fontes, & Flumina ab aquâ maris oriri non posse: deinde verò rationes illas, & experimenta asseremus, quibus ostendi posse videtur, a solâ nivium, pluviarumque copiâ Fontes omnes, ac Flumina oriri posse.

XIII. Illud itaque a Gassendo, & Valisnerio, &c. Peripateticis, & Cartesianis opponi solet, quod aqua maris neque eâ ratione diffundatur, quâ Peripatetici, vel Cartesiani arbitrantur; ac, si diffunderet, & uberrimè diffunderetur, ad montium culmina evehi, vel ascendere, aut certè falsedinem exuere, dulcisque fieri non posset, ideoque Fontium originem ab Oceano repeti non posse contendunt. Et, quod ad maris diffusionem attinet, quamvis Oceanus pluribus in locis per occultas quasdam voragines Telluris viscera pervadat, ut æstuantì lacu, qui in monte Stellâ in Hispaniâ reperitur, ac interdum etiam per ejusdem terræ poros philtretur, ac veluti per-

percoletur, ut ex Hallensibus, aliisque fodi-
nis salis, ex puteis falsis, & æstuantibus col-
ligitur; incredibile est tamen, quod ad ingen-
tem adeo distantiam effundi possit, ut ad mon-
tium radices, quæ pluribus aliquando millia-
riis ab Oceani litore distant, impellatur;
cùm præsertim Telluris substantia crassa,
gravis, & iners aquæ motui resistere, ejusque
impetum sensim minuere, & extinguere de-
beat. Quid, quod in ipsis etiam maris litori-
bus plerumque putei effodiuntur, qui dolci-
bus aquis ex proximo colle diffluentibus, non
verò falsis maris aquis repleri manifestissimè
deprehenduntur? Certè si mare puteis, Fonti-
busque efficiendis in partes omnes diffleret;
ubicumque Fontes, aut putei reperiuntur, il-
la maris diffusio appareret, quod tamen ex-
perimento repugnat; cùm illa non nisi qui-
busdam in locis appareat, quodque maximè
mirum est, aqua, sic ab Oceano diffusa false-
dinem, ac amarulentiam ita conservet, ut
nullâ vi dulcedinem contrahere possit.

XIV. Age verò, maximam aquæ copiam
ex maris alveo per subterraneos canales, te-
nuesque Telluris poros ad ipsas usque, vel
remotissimorum montium radices celeri, pe-
rennique motu diffundi liberaliter conceda-
mus: quo tamen impetu, aut quâ vi hanc
maris aquam in montium radicibus collectam
ad ipsa montium latera, vel culmina ascen-
dere posse putabimus? Certè cùm celeberrimis,
notissimisque Hydrostaticæ legibus in-
victè demonstratur, quod aquæ partes, ut
æquilibrium acquirant, æqualem prorsus al-
titudinem habere debeant, hoc est in eâdem
libellâ, vel horizontali lineâ reperiri, itaut

ne minimum quidem in altera syphonis parte, vel brachio altior existere possit; si aqua maris ex Oceano per occultos Terræ canales, ac recurvum veluti syphonem excurreret, dum ad montium radices erumperet, Telluris, & Oceani superficiem excedere non posset, multòque minùs ad montium altitudinem, quæ sex saltè milliaria superat, ascendere, & indè in Fontes diffluere videretur.

XV. Plurimæ quidem, & ingeniosæ sunt causæ, quibus hunc aquæ maris ascensum explicari solere jam diximus, sed plurimis tamen, gravissimisque difficultatibus illarum, singulæ premuntur. Quod enim Plinius ex variis Oceani tempestatibus, id fieri posse arbitratur, quibus aqua maris in Terræ poros vehementi impetu adigatur, ac impellatur; prorsus inutile censi debet: cùm neque ingens adeo plerumque sit Oceani agitatio, ut illius aqua ad mediocrem altitudinem in aëre libero assurgat, adeoque intra montium viscera, ubi maxima resistentia reperitur, ad plura milliaria possit impelli; deinde ubi mare certis quibusdam temporibus, aut locis nullâ tempestate agitur, aliqua in Fontibus inæqualitas deprehenderetur, quemadmodum certè in his observatur, qui, cùm in litore positi sint, Æstum maris accuratissimè sortiuntur.

Tellurem verò, spongiæ instar, Oceani aquas attrahere, exsugere, & ad ipsa montium cacumina sensim elevare vix ullâ ratione defendi poterit: quamvis enim in spongiâ, vel panni laciniis subiecta aqua sensim attrahi, vel potiùs ab externo aëre sensim impelli videatur; perperam tamen id ab ipsâ Telluris

ris

ris substantiâ per ingens adeo plurium milliarium spatium fieri posse putabitur. Primò quidem, quodd terræ profundioris substantia, non concisa, qualis in ipsius superficie colitur, sed argillosa, & cretacea; hoc est subtilioribus etiam aquæ particulis impervia reperitur, ut ingentia lapidum, marmorumque strata, de quibus inferiùs, omittam; deinde verò, quodd exigua solùm aquæ copia, tum in spongiâ, tum in panni laciniâ, tum etiam in terræ substantiâ penetrare, sursumque ascendere poterit; donec scilicet aquæ particulæ per terræ poros excurrentes, minoresque gravitatis vires exerentes, quippe, quæ a circumpositis terræ particulis, quibus adhærent, sustineantur; cum aëre, vel aquâ externâ æquiponderent, ut accuratiùs alibi diximus, cum de tubulis capillaribus ageretur. Ac certè, si tubulus vitreus cujuscunque libuerit amplitudinis, terrâ repleatur, ejusque extremitas in subjecti vasis aquam, infundatur, demergaturque; manifestissimè videbitur, aquam in tubulo tandiu per terræ poros sensim repere, quandiu ad exterioris aquæ altitudinem pervenerit; deinde verò ob arentem, spongiosamque terræ substantiam, ut ipsi coniiciunt, sive potiùs ob exterioris aëris pressionem, ad exiguam altitudinem supra aquæ superficiem elevari conspicietur; nullâ verò ratione, nulloque artificio fieri poterit, ut per alterum erecti tubuli orificium erumpat, & ad datam altitudinem perveniat:

XVI. Paullò verisimiliùs, atque felicitiùs illi opinantur, qui ex subterraneo calore maris aquam ita rarefieri posse existimant, ut le-

vior, & a crassioribus, gravioribusque salis permixti particulis liberior effecta, fursum avolare, celerique impetu ascendere possit, quemadmodum vapores in aëre, aut alembico vi caloris elevari conspiciamus. Plurima tamen huic etiam hypothesei opponi posse videntur, præsertim verò, quod, si aqua caloris vi fursum ascenderet, calida sentiretur:

Ad hæc ingenitus ille Telluris calor, ut alibi demonstravimus, non ubique semper existit, quin potius ipsa Terræ viscera frigida sunt, adeoque maris aquam ita rarefacere nequeunt, ut illa veluti ebulliens in vapores solvatur.

Sed quamvis etiam hic calor concedatur, adhuc explicari non poterit, quâ vi, maximoque impetu vapores illi argillosam terræ substantiam, quæ, ut experimentis apparet, aquæ particulis impervia deprehenditur, ita pervadere possit, ut ad altiora montium jurga ascendere, ibique erumpere videatur. Certè si tubulus ille terrâ repletus, de quo superius agebamus, in ferventis etiam ebullentisque aquæ vas demergatur; hæc in vapores abire, vel ipsius terræ substantiam pervadere non observatur, ut ad alteram tubuli extremitatem perveniat; quàm verò difficilius id fieri posse videtur ex tenui Telluris calore, in tantâ terræ mole, tantâque illius resistentiâ? Addi postremò poterit, quod, si maris aqua per terræ poros fursum ascendere dicatur, poterit etiam per illos sensim descendere, ut in vaporibus in aëre collectis fieri videmus; qui, dum simul vi frigoris in guttas concrefcunt, rursus per aërem dilabuntur: neque enim effingi poterit, subterraneos vapo-

res .

res in externâ terræ superficie vi frigoris concreſcentes, majores, craſſioresque fieri, & per tenues terræ poros deſcendere, vel penetrare non poſſe; cùm, ut inferiùs oſtendetur. pluvia ipſa terram altè penetret, & Peripatetici ipſi exiſtiment, maris aquam, licèt craſſiorem, gravioremque pluviali, per univerſam Telluris ſubſtantiam perenni motu diſfundi.

Nihil eſt autem, quod de ceteris explicandi rationibus ſolliciti ſimus, quas & inanes, & optimo philoſophandi generi contrarias, plerumque denique falſas eſſe nemo non videt. Quamvis itaque in explicando aquæ maris aſcenſu ſapientiſſimi illi viri mirificè torqueantur, ac in partes omnes ita ſe vertant, ut nullam hypotheſim intactam relinquant; maxima tamen, & incredibilis difficultas in illo adhuc ſupereſt, quæ vix, ac ne vix quidem aliquando dirimi, vel explicari poſſe videtur.

XVII. Atque utinam ſaltèm dirimere, & explicare poſſent quâ de cauſâ, quibuſque viribus maris aqua falſedinem, & amarulentiam exueret, ut ad montium culmina perveniens dulces ex illa Fontes fieri poſſent? Verùm, ſi res accuratè perpendatur, longè majorem hac in parte difficultatem oſtendi videtur. Facile eſt quidem philtrum in maris alveo, ſive litoribus eſſingere, quo puriores, & ſubtiliores aquæ particulæ a craſſioribus ſalis particulis ſecernantur, ita ut, ſubſidentibus in litore ſalis corpusculis, aqua per terræ poros liberior excurrat: ſed ægrè tamen concipitur, cur non ejusdem admirabilis philtri pori limo, bitumine, ſalinis ipſis particulis

lis ita obstruantur, ut denique aditum aquæ prorsus impedian, quod in Fluminum, puteorum, & stagnorum alveis, vel naturâ, vel arte fieri conspiciamus? Ad hæc, si Oceani aqua, quæ in primâ Fontium origine ex mari ad montium culmina accessit, per occultos terræ meatus excurrens in iis salis particulas reliquisset; posterior aqua, quæ sensim per eosdem canales, sive meatus illabitur, relictas salis particulas, ibique subsidentes secum abriperet; adeoque, cùm tota hæc subterranea aquarum via salibus undique referta, ac veluti confrata sit; incedibile est certè, quod eadem aqua permixtos antea sibi sales relinquat, non verò potius, si dulcis erat, falsedinem, ac amarulentiam concipiat.

XVIII. Illud etiam a Clarissimis Viris sæpius accuratissimè tentatum, omnibusque viribus exploratum est, quâ demum arte ex falsâ maris aquâ salis particulæ secerni possent, ut illa dulcior, potuique aptior efficeretur, unde maxima, & infinita ferè comoda oriri poterant. Sed, licèt omnia tentata fuerint, nunquam tamen ex voto res cessit, nunquam subtilioris, ac volatilis salis particulæ ab aquâ secerni, nunquam illa purior, aut dulcis evadere potuit; & quamvis Robertus Boyle, Valisnerius, alique eam aquæ maris dulcedinem hac arte concesserint, quæ gustui fontana videretur; experimento tamen, atque usu deprehensum est, effectus illos sensim in humano corpore ab illâ produci, qui a falsæ maris aquæ potu breviori temporis spatium oriri solent. Sic etiam est a Valisnerio observatum, quod intra concavas, excavatasque sphæras ex argillâ efformatas, ac undique

que clausas in aquâ maris fluitantes, exigua tandem aquæ copia sensim penetravit, quæ dulcis gustui apparebat, sed experimento tenuissimis salis particulis permixta deprehensa est: quemadmodum etiam concrectiones quædam ex salis particulis, sive *crystallizati* salis cumuli in internâ vasis superficie manifestissimè videbantur.

Quod si fortasse Peripatetici, alique repellant, id arte quidem fieri non posse, maximâ tamen, ac serè divinâ Naturæ vi præstari posse, in tantâ præsertim terrestris substantiæ extensione, quæ inter maris litora, ac Fontium originem reperitur; primò quidem opponi poterunt illa, quæ paullo superius urgebamus; deinde verò Peripateticis ipsis inquiri meritò potest, quanta nam terræ moles, aut extensio requiritur, ut aqua maris illam pervadens, salsedinem exuat, dulcesque ibi Fontes efficiat? Certè, quæcunque distantia ab illis definiatur, experimenta statim aderunt, quibus cum illa vix cohæreant. Pleurumque enim in exiguis Insulis, earumque litoribus Fontes aquæ dulcis effodiuntur, quæ nonnisi mediocri spatio a circumfusi Oceani aquis distent; alibi verò, in maximâ quoque ab Oceani litoribus distantia, falsi Fontes effodiuntur, neque ullâ proinde ratione intelligi posse videtur, cur in exiguâ adeo, brevique distantia salsedinem aliquando relinquat aqua; aliquando tamen salis particulis tenaciùs implexa, & adhærens ab illis separari non possit.

XIX. Sed subterraneus, inquiunt, calor Oceani aquam in montium radicibus existentem ita rarefacit, agit, & impellit, ut illa ebul-

ebulliens a salinis partibus sensim subsidentibus separetur, in tenuissimosque vapores soluta sursum ascendat, dulcesque Fontes efficiat. Verum ingentem adeo calorem in ipsis terræ visceribus paullo liberius effingi jam diximus; cum neque perenniter ibi accensus ignis ardeat, neque actualis calor observetur, neque aquæ calidæ ubique reperiantur, quæ tamen omnia concedi oporteret. Etiam si tamen insignis ille calor admitteretur, explicandum adhuc foret, cur aquæ calidæ, evaporatæque particulæ per terræ poros in montium visceribus transire possent, neque tamen concreverint ibi, hærentibusque salis corpusculis commisceri, novamque falsedinem contrahere; cur ingens adeo vaporum copia ad ipsa montium culmina tandem perveniat, quæ tot Fontibus, Fluviiisque efficiendis par esse possit; cur denique non æqualiter hyeme, ac æstate Fontes perenni tenore fluere videantur, quandoquidem in vehementioribus etiam æstatis caloribus exterior Telluris superficies longè frigidior esset, quàm interior illius substantia, in quâ maximus, & incredibilis ille calor reperitur ad aquæ vapores efficiendos, sursumque jugiter evehendos; adeoque in illâ vapores ipsi concreverint, & in guttas, & rivulos abire deberent.

XX. Quod si incredibilis illa, & infinita ferè vaporum copia per Terræ viscera ex aquâ maris attollitur, ut Cartesiani existimant; jam univèrsa ferè totius Oceani substantia consumpta foret. Quamvis enim Fontes a pluviis, sive ex vaporibus ex aëre decidentibus non efformarentur; accuratissimis tamen experimentis manifestissimè demonstratum

tum est, ut inferius ostendetur, quod ex Oceani superficie unius anni spatio tanta vaporum copia vi caloris educitur, quæ longè superat eam aquæ copiam, quæ pari temporis spatio in Oceanum ipsum a Fluviis, Fontibusque deferretur. Si igitur non ista solum vaporum, aut aquæ copia ex Oceano educeretur, quæ per aërem avolaret, ac in pluvias iterum descenderet, sed ingens insuper illius moles per subterraneos canales ad montium culmina ascenderet, unde Fontes omnes, & Flumina oriri possent; tota aquæ moles, quæ per aërem, & terram diffunderetur, solis Fontibus, Fluminibusque reparari non posset, adeoque maris aqua sensim decresceret, ac denique maximâ rerum pernicië evanesceret.

XXI. Quod, ut illustrius adhuc intelligi possit, simulque contra Cartesium, ceterosque demonstretur, quod sola pluviarum, niviumque aqua, Fontium, Fluminumque origini sufficere potest, quo maximè Valisnerii, aliorumque sententia confirmatur; altiùs, & ab ipsâ velut origine res repetenda videtur. Egregius itaque Philosophus D. Mariotte (a), ut hanc hypothesim de Fontium origine ex pluviis, nivibusque melioribus adhuc experimentis illustraret, ac uberrimè confirmaret, experiri voluit, an sola pluviarum, niviumque copia Fontibus, Fluviisque efficiendis par foret; cùmque universam aquæ copiam, quæ singulis horis, diebus, & annis a Sequanâ in mare deferretur, accuratissimè deprehendisset; hanc cum nivium, pluviarumque copiâ, quæ singulis annis in circumpositis eidem Sequanæ

re-

(a) *Traët. de motu Aquar. Par. I. dis. 2.*

regionibus decidere solet, inito calculo comparavit, reperitque longè majorem esse nivium, pluviarumque copiam, quàm tota aquæ moles, quæ a flumine in Oceanum illabitur: nimirum supposito, quod singulis annis novemdecim aquæ pollices in pluviam decidant, eâque velocitate mediocri Sequana in mare illabatur, ut singulis minutis 100. pedes excurrat, & 200000. cubicos pedes aquæ in Oceanum effundat, 856980000000. cubicos pedes excedet, hæc autem vix ad 105120000000. eisdem pedes perveniat; tum factò ad regiones alias, aliaque Flumina argumento, certò inferri posse demonstrat, quod aquarum copia in universam ex. gr. Galliam decidens Fluviiis omnibus, Fontibusque in eodem regno existentibus perenniter efficiendis sufficiat; quin etiam maxima illius pars herbis, animalibus nutriendis, ipsique Telluris substantiæ humectandæ supersit. Quod elegans Mariotte experimentum a Sedilæo, aliisque compluribus aliis in locis sæpius tentatum, ubique semper pluviarum, niviumque moles, Fontium, Fluminumque aquam longissimè superavit. Celebre autem in primis est illud, quod ab Hallejo nuperrimè peractum est; qui, cum vapores illos, qui ex solius Mediterranei maris superficiem singulis diebus evelluntur, & avolant, cum aquæ copiâ, quæ ex amplissimis Fluviiis Ibero, Tiberi, Pado, Danubio, Boristene, Tanai, Nilo, &c. in Mediterraneum ipsum illabuntur, comparasset; invicè demonstrat, quod universa Fluminum aqua vix ad tertiam illius aquæ partem accedit, quæ in vapores convertitur, atque in aëre, pluviis, nivibusque efficiendis concre-
scit.

fcit. Quantitas enim aquæ in vapores soluta 5285. milliones doliorum excedit, cùm a Fluminibus in mare nonnisi 1827. milliones deferantur. Itaque cùm vapores illi ad montium latera adiguntur, sensimque illorum poros subeant, possunt ibi concrefcere, vel in guttas abire, quæ diu in subterraneis conceptaculis conservatæ perennem Fontium cursum efficiant, in quo Halleii hypothesis de Fontium origine ab opinione aliorum distinguitur.

XXII. Quod si fortasse non eadem ubique sit Fontium, Fluminumque moles, sed in variis regionibus varia sit, ut a Geographis memoratur; ipsa quoque pluviarum, niviumque copia inæqualis ibi deprehenditur, longèque major in iis regionibus, quæ a largioribus Fluviis, frequentioribusque Fontibus irrigantur; sic ex. gr. Parisiis mediocris aquæ pluvix altitudo novemdecim pollicum definita est, cùm in plurimis Italiæ locis 50. pollices superest, & in aliquibus etiam ad 100. perveniat, ac universaliter mediocris illius altitudo 48. pollicum manifestissimè deprehendatur: hinc mirari certè non liceat, si plures in Italiâ Fluvii, longèque majores in mare ferantur, quàm in Galliâ; pluviarum enim, niviumque copia longè inæqualis, inæqualibus etiam Fontibus, Fluviisque efficiendis par esse potest.

Quæ cùm ita sint, intelligi facilè poterit, quod in explicandâ Fontium origine perperam, atque inutiliter ad aquas Oceani, subterraneos canales, & alembicos, ceteraque id genus alia plerique confugiant; cùm accuratissimis observationibus manifestissimè demonstratur, tertiam illius aquæ partem, quæ singulis

an-

annis in pluviam decedit, ad perennem Fluminum cursum sufficere, dum reliqua alendis, nutriendisque plantis, & animalibus infumatur.

XXIII. Sed explicandus postremò jam superest modus, quo pluviarum aqua, non torrentibus modò, ut Seneca dicebat, sed perennibus etiam Fluviorum Fontibus efficiendis conservari, distribuique possit, in quo maximam difficultatem positam esse Peripatetici suspicantur.

Ac primò quidem refellenda nobis videtur illorum opinio, qui pluviam infra Telluris superficiem nihil ferè, sive paucorum pedum spatio descendere arbitrantur, quòd plerumque post pluviam Telluris substantia arescere videatur. Experimentis itaque apparet, quod ad 500. saltèm pedum profunditatem aqua terram pervadit, quin etiam a metallorum fossoribus memoratur, aquam pluviarum intra paucos dies ad aliquot centenorum passuum profunditatem in terram penetrare (a), quod, licèt in eà terræ parte, quæ vomere scissa, & culta est, experiri non liceat, in montibus tamen, silvis, incultisque locis faciliùs observatur, ubi plurimi constantes, frequentesque meatus ex ipsâ Telluris superficie ad ingentem profunditatem continuari possunt, qui proinde a pluviis, sensimque liquatis nivibus ita pervadantur, ut maxima aquæ copia in subterranea loca feratur. Ubi verò tenuissimæ aquarum guttæ aliquam terrestris substantiæ veluti corticem penetraverint; si aut in argillam, quæ, cùm densior, viscosior sit,

(a) *Vid. Acta Lips. an. 1692,*

fit, aquæ impervia est, aut ingentia lapidum strata, quæ horizontaliter plerumque, aut nonnihil ad horizontem inclinata fore, jam diximus, aut denique in subterraneam specum incidant, tunc plures illius guttulæ in unum sensim concreſcent, & ex pluribus ita corrivatis, coëuntibusque rivulus efformabitur, qui rivulis aliis, dum sensim per montium latera labitur, conjunctus per apertas montium rimas effluere possit, Fontemque perennem efficere. Quod enim ingentes illæ cavitates infra Telluris superficiem contineantur, quibus veluti conceptaculis, cisternis, decedentes aquarum particulæ colligantur, diu conserventur, & per foramen aliquod exeant; & innumeris observationibus erudimur, atque a Peripateticis ipsis admititur: neque enim aliter vapores ex Oceano advenientes, ac per interna montium viscera sensim ascendentes simul concreſcere, Fontemque perennem efficere posse videntur.

XXIV. Ipsa quoque montium strata, ad hanc originem Fontium explicandam, & mirificè illustrandam plurimum conferunt. Hæc etenim strata, ut alibi de mirâ montium structurâ dicebamus, ita inclinata, recurva, simulque connexa sunt, ut aquas supernè defluentes colligere, ac in unum locum per declive deducere possint, ut exinde in Fontem profiliant. Id accuratissimè demonstravit, & subjectis etiam schematis eleganter exhibuit Valisnerius, addens innumeras observationes, plerumque a se factas, quibus ostenditur hic aquæ pluvix in Terræ viscera illapsus, aquarum collectio, ac denique conceptacula, quibus ita coerceantur, ut non tota simul ef-

Tom. IV.

Q. O

flue,

fluere, sed sensim per integrum anni spatium illabi queat. Neque nuperrimè solum hæc explicandi ratio usurpata est, sed antiquissimis etiam temporibus innotuerat. Aristoteles enim Philosophos illos, suppresso tamen nomine, commemorans, qui Fontium originem, ac varietatem ex pluviis repetendam esse putabant: *Auctores sunt, inquit, aquam a Sole evectam, & per imbrem demissam, collectam, sub terram, tanquam ex amplo alveo fluere, vel omnia Flumina ex uno alveo, vel aliud ex alio; nec interim ullum aqua genus creari, sed ex consusio in ejusmodi origines per hyemem, facto, hanc fluviorum vim effundi; ob eamque causam semper hyeme tumidiores eos rapi, quàm aestate; & alios perennes, alios non perennes esse. Quorum enim propter alvei vastitatem, collectitia, utque ita effluat, ut satis sit, nec ante consumatur, quàm hyeme repetat, hos perennes semper profluere; sed quorum angustiora sunt receptacula, hos propter aquarum exiguam prius exhauriri, quàm imber cælitus iterum dilabatur, inanito vase (a).*

XXV. Atque hinc innumera sunt, quæ explicari faciliè possunt, quamvis in aliorum opinionibus, vix, aut ægrè saltè expediantur.

I. Si etenim Fontes omnes, & Flumina ex solutis nivibus, pluviarumque copiâ oriuntur, faciliè apparet, quod ubi major, ac uberior nix hyeme, aut uberior pluvia deciderit, Fontes etiam, ac Flumina pleno, uberique cursu feruntur, ac alveos implent; si verò nix, pluviaque raræ, tennesque fuerint, Fontes

(a) Lib. I. Meteor. c. 13.

tes ipsi, Fluviique, aut arescunt, aut exiles adeo sunt, ut exiguam arenæ partem madefaciant: quod certè explicari non potest, nisi concedatur pluvias ita Telluris substantiam pervadere, ut in receptaculis quibusdà conservata Fontes augere possit, ut uberiores illi, tumidioreque erumpant.

2. Intellige etiam, quod in montibus, quorum culmina non terrâ, sed stratis lapideis obducta sunt, ut in celebri *Valestra*, plurimis licet antris, cavernisque pervia, jugis Genuensi litori circumpositis, montibus Carfi in Carinthiâ, aliisque pluribus, tenues, rarique Fontes reperiuntur; cùm tamen illi, si ab aquâ maris in vapores solutâ nascerentur, uberiores ibi futuri essent: quippe cùm vapores in frigidiori lapidum superficie faciliùs concreverent, neque per apertos terræ poros in aërem avolarent.

3. Illud etiam apertè colligitur, quod in exteriori montium vertice plerumque lacus, & stagnantes aquæ reperiuntur, nivibus etiam permixtæ, unde Fontes certâ quadam periodo ex ipsis montis lateribus oriantur, ut in sequenti Capite demonstrabitur. Rariores tamen in ipsis montium culminibus Fontes reperiuntur; quod aqua sensim per terræ poros ingressa descendat, quandiu vel strata, vel argillam, vel subterraneam cryptam non repperit.

Quod si fortasse in alicujus montis vertice Fons reperiatur, ut in Stiphonte colle prope Bononiam, aut in Vendâ in Euganeis jugis; illius origo non ex pluviis, nivibusque in subjecta ejusdem montis latera decidentibus, sed ex pluviis, ac nivibus, quæ in circum-

positos altiores montes decidens in Fontes abit, ac per occultos meatus, ac veluti recurvos syphones in ipso depressioris montis vertice erumpat. Quod etiam de Fontibus, puteisque in aliquâ Insulâ erumpentibus intelligi debet; illorum enim aqua, non ex circumposito Mari, ut diximus, sed ex proximis montibus est repetenda, ex quibus per canales ipsum Maris alveum subterlabentes deferatur.

Neque alia certè origo videtur esse uberrimi illius Fluvii, qui Mutinensem agrum subterlabitur. Quamvis enim Ramazinius, alique plurimi existimaverint, illud ab Adriatico, Mari originem suam sortiri; longè tamen verisimilius censerì debet cum Valisnerio hunc a pluviis, nivibusque solutis, quæ ab occultâ quadam voragine in circumpositis montibus absorbeantur, subjectamque vallis planitiem subterlabuntur, exoriri debere. Incredible est enim, quod si ingens adeo aquæ copia ex Adriatici sinûs alveo in Mutinensem regionem uberrimè, celerrimèque diffunderetur, hæc omnem salcedinem exuat, & omnino dulcis reperiatur; quod si Maris aqua per tenues Terræ poros, maximâ vi, impetuque ingrederetur, vix ibi a subtilioribus salis particulis, veluti in cribro, philtroque, sejungeretur; quantò difficiliùs id fieri poterit, si liberè, si longè, latèque difflueret. Illud etiam in hoc subterraneo Flumine innumeris experimentis est observatum; quod ubi puteus efodiatur, excavata nimirum fuerit terra ad 63. pedum Roman. altitudinem; ac terebrata argilla sex pedum, subterquam proximè aqua celeriter excurrit, per apertum illud foramen

men Fluminis aqua tantâ vi, tantoque impetu erumpit, ut non ad Terræ solum superficiem profiliat, sed altiùs quoque ad quinque pedum, ut Cassinus in Arcis-Urbanae Fonte,prehendit, altitudinem evehatur: quemadmodum etiam in Jucatum dulcis aquæ Fontem 30. passibus a litore dissitum supra Terram cubito 1. erumpere docet Gassendus. Id verò quam ratione, vel causâ fieri posse, putabimus, si Fluvius ille ab aquâ Maris oriatur? ex notissimis nimirum Hydrostaticæ legibus, tum aqua ad Maris libellam, hoc est vix ad Terræ superficiem ascenderet.

Quàm verò feliciter hæc omnia fieri, & explicari posse videntur, si cum Cassino, & Valisnerio, aliisque compluribus maximam pluviarum, niviumque copiam, quæ uberri- mē in extremis Mutinensis ditionis montibus Capharoniæ finitimis decedit, ac perenniter ferè montes obducit, infra Telluris superficiem sensim illabi, atque per occultos, amplioresque meatus, sive voragines ad subjectam vallem descendere concedatur; quod innumeris aliis observationibus confirmari, vel illustrari mirificè potest; præsertim verò in inferiori Austriâ, quæ a montibus, undique ambitur. Ejus etiam rei argumento esse potest, quod Fontes, Fluviique ex montium illorum lateribus effluentes exiles admodum, in frequentesque sint; si cum maximâ, & incredibili ferè nivium, pluviarumque copiâ, quæ in montibus illis colligitur, comparentur: adeoque necessarium omninò est, ut non mediocris illarum copia ad subterranei Fluminis originem absorbeatur. Quod autem hîc de Mutinensi Fluvio dictum est, de ceteris etiam sub-

terram labentibus intelligi faciliè poterit: eadem nempe illorum omnium causa, & origo censerì debet.

XXVI. Quid verò (ne quidquam omis-
se videamur) de miro illo Fonte suspicari li-
ceat, qui ascendebat de terrâ, & irrigabat;
etsi *Dominus nondum pluerat*? Præstaret for-
tasse de illo nihil reponere, quandoquidem
de primâ Telluris facie nihil certò definiri
potest. Burnetus, cujus hypothesim alibi ex-
posuimus, Fontes omnes a rore in aërem subla-
to, indeque decidente, ac in montium late-
ribus collecto: tunc Fontes omnes oriri puta-
vit. Sed Augustinus Platonem suum (a) hac
etiam in parte æmulatus, qui poëtice potius,
quàm philosophicè Fontium originem ex sub-
terraneâ abyssò, sive barathro deduxerat;
arbitratur, quod ubi Creator aquam sejunxit
ab aridâ, Terra longè, latèque subsidens, po-
tuit alias partes præbere concavas, quibus con-
fluentes, & concurrentes aquæ reciperentur, &
appareret arida, ex his partibus, unde humor
abscesserat. *Quod si ipsius abyssi magnitudinem,
eâ parte exceptâ, quod mare dicitur, & evidenti
amplitudine aqua, maris fluctibus Terram am-
bit, in eâ solâ parte, quam reconditis sinibus
Terra continet, unde se omnes Fontes, & om-
nes aqua diversis tractibus, venisque distribuunt,
& suis quicumque locis erumpunt, Fontem vo-
luit appellare Scriptura, non Fontes propter na-
tura unitatem; eumque per innumerabiles vias
introrum, atque rimarum ascendentem de Ter-
râ, & ubique dispertitis, quasi crinibus irri-
gantem omnem superficiem Terra, non continuâ*
spe-


(a) In Phadone.

specie tamquam maris, aut stagni, sed sicut videmus ire aquas per alveos Fluminis, flexusque rivorum, & eorum excessu vicina perfundere, quis non accipiat, nisi qui contentioso spiritu laborat (a)?

Itaque ex Augustini sententiâ Fontes omnes, qui terrestris Paradisi, ac universam faciliè Telluris faciem irrigabant, non ex aquâ maris, sed ex primigeniæ aquæ elemento, quod Terræ visceribus inclusum fuerat, oriebantur; quod a Peripateticorum, Cartesianorumque hypothese plurimùm dissidet, maximè verò cum Valisnerii, aliorumque opinione, cohæret. Sed jam ferè modum excessimus in inquirendâ Fontium origine: breviter itaque illorum virtutes, & accidentia complectamur, unde plurimus quoque superiori quæstioni splendor affulgebit.

C A P. XVI.

De variis Fontium Accidentibus. & Aquarum virtutibus.

I.  D unum postremò superest, ut explicatâ jam Fontium omnium naturâ, & origine, varias, ac admirabiles illorum virtutes, & accidentia complectamur, quæ apud veteres, recentioresque Philosophos illustria maximè haberi solent.

II. Ac ceteros quidem inter princeps locus

O o 4

cus

(a) *Lib. V. c. 10. de Gen. ad lit.*

cus Nilo concedi poterit, quem incolæ Mæ-
roes *tenebrosum* (a) Homerus *demissum divini-*
tus (b) appellavit; ipsius siquidem

Arcanum Natura caput non prodidit ulli,
Nec licuit populis parvum, te Nile, videre;
Amovitque sinus; & gentes maluit ortus
Mirari, quam nosse tuos (c).

Quamvis itaque Nili originem veteres om-
nes Philosophi maximo studio, & Regum au-
spiciis inquirere tentaverint, variasque hy-
potheses hac in parte admiserint, quæ a Plu-
tarcho, aliisque Scriptoribus memorantur (d);
nulla tamen ex ipsis, aut veram Nili origi-
nem, Fontesque prodidit, aut illius incremen-
ti causas ostendit. Hinc ex nuperrimis so-
lidum observationibus, constantique incolarum
testimonio compertum esse lætatur, Nili Fon-
tes, sive locum, in quo primum videri inci-
piat, apud Æthiopas Abyssinos haberi in eâ
Æthiopiæ parte, quæ *Goyama* regnum voca-
tur. Id enim David Æthiopum Rex datis
ad Clementem VII. Roman. Pontif., & E-
manuellem Lusitaniæ Regem Epistolis testa-
tus est, & ex Europæ nostræ Scriptoribus
Alvarez, Fernandus, Jovius, alique idem
confirmant (e): addentes insuper ex dupli-
ci ingenti lacu, quorum alter *Zemra*, al-
ter *Zabam* dicitur, ubi profundior est aqua,
& velut ebulliens vehementius erumpit, Ni-
lum oriri; quod ad veterem Ptolemei sen-
tentiam maximè accedit. Ceterum, quæ la-
cum origo, qui locus, an subterraneâ vora-
gine erumpant, sive ex proximis Æthiopum

mon-

(a) *Apud Diod. F.* (b) *Odiss. δ. v. 477.* (c) *Lucan. X.*
ver. 295. (d) *Vid. Sen. VI. c. 8.* (e) *Vid. Gassen, 6: 3.*

montibus aquas accipiant, nondum planè per-
spectum est; cùm lacus ipsi tantâ aquarum
copiâ undique exuberent, ut duo maria vi-
deantur, aditumque prohibeant: ut aliquâ
saltèm ex parte usurpari posse videatur, quod
jure, meritòque de suis olim temporibus ait
Poëta Phaetontis casum, exustamque terram
describens --

*Nilus in extremum fugit perterritus orbem,
Occulitque caput, quod adhuc latet (a).*

III. Quod autem ad incrementum Nili per-
tinet, celebre est illud ab Æstivi Solstitii tem-
pore, ad Autumnale Æquinoctium, hoc est,
trium serè mensium spatio, ita sensim augeri,
ut ex alveo erumpens universam Ægypti re-
gionem longè, latèque obducatur: unde maxi-
ma, tum ex congesto limo, quod secum abri-
pit Flumen, tum ex ingenti nitri copiâ, quo
refertum est, Ægyptii soli foecunditas oriri
potest.

Ceteris verò Philosophis in explicando Ni-
li incremento palmam præripuit Eudoxus,
qui, ut ex Sacerdotibus Ægyptiis acceperat,
*illius causam in pluvias referre se dixit, qua
quandiu Nilus exundat, in Æthiopia montes uber-
rimè decidunt: quod toto æstivo tempore quo-
tidie fieri Agatarcides etiam apud Diodorum
testatur (b).* Cùm etenim nobis est æstas, qui sub
Solstitiali circulo, vel Tropico Cancræ, degimus;
tunc illis, qui oppositam Zonam, & sub bru-
mali ad perpendicularum incolunt, est hyems;
adeoque Nili aqua alveos exuberans expatiatur
per Ægyptum. Atque hanc quidem veram, &
optimam causam esse, cur Nilus ab æstivo sol-

(a) Ovid. Metam. II. ver. 154. (b) Lib. II.

solstitio ad autumnale æquinoctium exuberet, quando nimirum Æthiopia hyemem patitur, quæ ab exeunte Majo in Septembris initium durat: non solum ostenditur ex eo, quod in nostris quoque regionibus Fontes, & Flumina hyeme, vel ex pluviis, vel ex solutis nivibus ampliora sint, verum etiam quod nuperrimis observationibus compertum sit, medio circiter Junio in Septembrem usque perennes ferè pluvias in Æthiopiæ montes decidere, ut non alla proinde causa, cur Nilus exuberet, inquiri debeat.

Id etiam illustrari, vel confirmari maxime potest, ex incremento Nigri alterius nimirum Fluminis, qui cum eodem tempore, eademque periodo, ac Nilus intumescere conspicitur: quod a Plinio quoque ita est observatum, ut *eandem esse dixerit Nigro Fluvio naturam, qua Nilo; non modò, quòd calamum, & papyrus, & easdem gignat animantes, verum etiam, quòd iisdem temporibus augeat* (a).

IV. Ad Nili naturam proximè accedit pluvius ille Novanus, qui in agro Pitinate trans Apenninum omnibus solstitiis torrens, brumâ siccatur (b), & alter Fons, qui in Pireneis, qui singulis horis per tres continuos menses a Majo, vel Junio, vel Julio auspicatos fluxum interrumpit; quemadmodum etiam Colli-Martiensis in Provinciâ fluviolus admodum exilis oclies in horâ fluere, ac refluere, inæqualibus tamen inter utrumque fluxum intervallis, conspicitur.

Novanus itaque fluvius ex illâ Appenninâ parte facillè oriri poterit, in quâ nives, non
nisi

(a) V. c. 8. (b) Plin, ibi.

nisi vehementiori calore Solis solvi, liquari-
que possunt, adeoque æstate solum, non hye-
me fluere conspicitur. Qui verò, aut ex Pi-
reneis montibus, aut ex Collemartio toties
interruptâ periodo excurrit, fortasse impedi-
tur a vento quodam in ipsis montium visce-
ribus contra orificium illud spirante, ex quo
paullatim aqua defluere debet, donec medio-
cris aquæ copia sensim collecta vi propriæ
gravitatis venti resistantiam superet, ac per
aperta montis latera tota dilabatur, Fieri etiam
potest, ut aqua Fontis illius paullatim ex gut-
tulis unâ concreascentibus efformetur, adeoque,
dum illæ sensim uniuntur, Fons fluere desinat;
incipiat verò liberè dilabi, cum mediocris il-
larum copia formata fuerit,

V. Atque hinc explicari fortasse poterit,
cur plurimi Fontes a litoribus dissiti, omnisque
falsedinis expertes, maris instar, fluere, ac re-
fluere, & varias æstûs vicissitudines subire vi-
deantur: neque enim in iis, qui dulces sunt,
ad occultam cum Oceano communicationem,
quæ in pluribus certè puteis, salisque Fonti-
bus prope mare existentibus conspicitur, hæc
omnia referri debent.

Ipsa quoque falsedo, quâ plurimi Fontes
imbuuntur, non ex aquâ maris, sed ex dis-
soluto sale, quem Terræ viscera præterhaben-
tes aquæ concipiunt, oriri potest; si etenim
Fons aliquis, dum ex interiori montium sub-
stantiâ sensim fluit, & per aperta demum la-
tera erumpit, per aliquam salis fodinam tran-
seat; plurimas indè particulas abripiet, quæ
cum tenuissimis aquæ particulis admixtæ sal-
sas illas efficiant. Neque aliâ ferè de causâ
plures, varique colores in aqua Fontium con-
spi-

spiciuntur, quàm quòd ex variis mineralium particulis, quibus illæ permiscentur, varios colores induere debent. Sic, quæ gypsum admixtum habent, albescunt; aliæ flavescent ab ochrà, rubescunt a rubricâ, ab atramento futorio nigrescent, alii denique ex mineralibus aliis, alium colorem accipiunt.

VI. Neque falsedo solùm, & color, verùm etiam virtutes omnes, quæ in variis Fontibus non sinè maximâ admiratione sunt observatæ, ex iis locis, quæ præterlabuntur aquæ, deduci debent; ut non immeritò ab Aristotele (a), Theophrasto (b), aliisque compluribus dictum fuerit: *Talis est aqua, qualis est terra, per quam transit*. Id experiri licet in iis præsertim Fontibus, quibus aliqua medica virtus inesse conspicitur, ut alii nervos emolliant, alii purgent viscera, alii sanguinis fluxum sistant, alii languentes artus corroborant, alii denique, ne singula complectamur, admirabiles alios effectus in humano corpore producant. Compertum est enim, quod singulæ virtutes illæ ex admixtis diversorum mineralium particulis oriuntur, ut alii Fontes sulphureas, atramentosas alii, alii nitrosas particulas contineant, quemadmodum pluri auri pigmentum, alii antimonium, alii sandracham admixtam habent, ut odor ipse, vel sapor manifestissimè ostendit. Hinc mirum esse non debet, si quibusdam aquis corpora corrodantur, ut aquis Stygiis in Thesaliâ, quibus Antipater, vel Jolla Antipatri filius, suâ, & magnâ infamiâ Aristotelis, Alexandrum lentâ veneni vi interemit; quibus-

(a) *De sens. & sensibil. c. 4.* (b) *de Plan. VI. c. 3.*

busdam aliis injecta corpora, aut bibentum viscera lapidescant, ut in iis, qui in Magnesiâ apud Sipylum Montem, in Stygiis Arcadiæ, & Euganeis collibus fluunt (a), quemadmodum etiam

Flumen habent Cicones, quod potum saxea reddit

Viscera, quod tactis inducit marmora rebus (b). in aliis etiam, ut in Lyncestiis aquis ea vis inest,

Quas quicumque parum moderato gutture traxit,

Haud aliter titubat, quam si mera vina bibisset (c).

cùm tamen contra in Arcadiâ

Clitorio quicumque sitim de fonte levavit,

Vina fugit, gaudetque meris abstemius undis (d).

Quid, quod Aristo Peripateticus Fontem in Insulâ Chio reperiri commemorat, cujus aquam, qui biberint, hebetes fiant, quemadmodum Æthiopici quoque Fontes celeberrimi sunt,

Quos si quis faucibus hausit,

Aut furit, aut patitur nimium gravitate soporem (e).

ac ne singula prosequar, Fons Lethes apud Orchemonium lacum in Bæotiâ, cujus aquas, qui semel attigerit, longa oblivio potat, hoc est omnium ferè obliviscitur. Hæc omnia, nimirum, ceteraque id genus ex admixti sulphuris, bituminis, alteriusque mineralis par-

(a) Vid. Plin. Lib. II. c. 103. & XXXI. c. 2. & 3. & Valis. de corp. Marin. (b) Ovid. Met. XV. v. 312. (c) Ibid. ver. 330. (d) Ibid. ver. 343. (e) Ibidem ver. 321.

particulis oriri poterunt, quæ tenues cerebri, nervorumque fibras obstruant, spiritus animales, illorumque motus perturbent, totamque corporis molem, quæ miro, divinoque, prorsus ordine, & connexione ita a Sapientissimo Artifice constituta est, ut si illa leviter perturbetur, omnem ferè elegantiam amittat.

VII. Quæ fieri certè potest, ut non fabulosa prorsus haberi debeant, quæ de Averno lacu a Poetis, Veteribusque Philosophis tradita sunt, aves nimirum, dum lacum supervolitant, extinctas in Avernum ipsum decidere, unde illi nomen factum sit, quod eleganter a Virgilio describitur, cum ait:

*Spelunca alta fuit, vastoque immanis biatu,
Scrupea, suta lacu nigro, nemorumque tenebris,*

Quam super baud ulla poterant impune volantes

*Tendere iter pennis, talis se se halitus atris
Faucibus effundens supera ad convexa ferebat,*

Unde locum Graii dixerunt nomine Avernum (a),

ubi longè verisimillimam effectus huiusmodi causam explicatam esse vides: aves nimirum venenatis, graveolentibusque halitibus ex subiecto lacu erumpentibus ita affici, perturbari, ut sui impotes deorsum decendant, atque ubi lacum attigerint, extinguantur.

Ac, ne tota Poetarum carminibus fides habeatur, Aristoteles ipse memorat lacum prope Eridanum fore, in quem supervolitantes aves

(a) *Æneid. VI. ver. 237.*

aves corruunt, indèque suspicatur Poëtas fabulatos esse, Phaetontem in aëre, vel Cœlo volitantem in Eridanum decidisse; quamvis, ut Sapientissimi Viri arbitrantur, locum illum Eridano proximum cum Averno lacu facilè confundit Aristoteles, quemadmodum alia, piurima contra Geographicas leges. Fontes alios, lacusque reperiri, qui venenatos, Averni instar, halitus exerant, certamque volucris perniciem asserant, ex innumeris exemplis, quæ a Lucretio, Plinio, ceterisque Scriptoribus asseruntur, manifestissimè ostenditur.

VIII. Longè tamen admirabilior est Jovis Fons in Dodone, qui, cum sit gelidus, & immensas faces extinguat, si extinctæ admoveantur, illas accendit; quod in alio quoque prope Gratianopolim in Galliâ contingere plerique memorant.

Id verò, quâ meliori, verisimiliorique ratione explicari posse putemus, quàm si ex Terrâ Fontibus illis subjectâ, vel circumpositâ resues vapores, & halitus erumpere concipiantur, qui oleaginosi, sulphurei, vel bituminosi cum sint, supra ejusdem aquæ superficiem concreescere, agitari, accendique possint? certè si candela nuper extincta alteri accensæ approximetur, antequam etiam ad mutuum contactum perveniant, hoc est extincta accensam faciem contingat; illa repente accenditur: quodd tenuissimæ partes ignis ex accensâ face exeuntes, ubi cum fumosis, calidisque halitibus adhuc ab extinctâ erumpentibus jungantur, mutud vires exerunt, ut indè celerior motus, agitatio, calor, & tandem ignis oriatur. Idque suadet etiam,

ex

fit, aquæ impervia est, aut ingentia lapidum strata, quæ horizontaliter. plerumque, aut nonnihil ad horizontem inclinata fore jam diximus, aut denique in subterraneam specum incidant, tunc plures illius guttulæ in unum sensim concreſcent, & ex pluribus ita corrivatis, coëuntibusque rivulus efformabitur, qui rivulis aliis, dum sensim per montium latera labitur, conjunctus per apertas montium rimas effluere possit, Fontemque perennem efficere. Quod enim ingentes illæ cavitates infra Telluris superficiem contineantur, quibus veluti conceptaculis, cisternis, decedentes aquarum particulæ colligantur, diu conserventur, & per foramen aliquod exeant; & innumeris observationibus erudimur, atque a Peripateticis ipsis admititur: neque enim aliter vapores ex Oceano advenientes, ac per interna montium viscera sensim ascendentes simul concreſcere, Fontemque perennem efficere posse videntur.

XXIV. Ipsa quoque montium strata, ad hanc originem Fontium explicandam, & mirifice illustrandam plurimum conferunt. Hæc etenim strata, ut alibi de mirâ montium structurâ dicebamus, ita inclinata, recurva, simulque connexa sunt, ut aquas supernè defluentes colligere, ac in unum locum per declive deducere possint, ut exinde in Fontem profiliant. Id accuratissimè demonstravit, & subjectis etiam schematis eleganter exhibuit Valisnerius, addens innumeras observationes, plerumque a se factas, quibus ostenditur hic aquæ pluvix in Terræ viscera illapsus, aquarum collectio, ac denique conceptacula, quibus ita coerceantur, ut non tota simul ef-

rietas, rerumque magnitudo vix patitur, ut quidpiam certò, constanterque definire possimus; sed in tantâ potiùs rerum caligine, gravibusque tenebris ferè undique circumfundimur; ut partim divinando, partim conjiciendo, & errando tenuem solùm verisimilitudinem confectemur, rarò tamen pulcherrimam veritatis faciem, quam tanto amore, tantoque studio sollicitè inquirimus, apertè contemplemur; idque unum mentem nostram, quæ, Naturâ duce, ad veritatem abripitur, mirificè recreat, quod illam tandem assequi, & incredibili, divinoque propemodum illius splendore perfundi nos aliquando posse speremus. Quamobrem sint ista, ut rerum natura libuit, aliis certa, aliis dubia, aliis probata, aliis damnanda (a); nos etenim, qui sequimur probabilis, nec ultra id, quod verisimile occurrerit, progredi possumus; & refellere sinè pertinaciâ, & refelli sinè iracundiâ parati sumus; neque nostra Disputationes quidquam aliud agunt, nisi, ut in utramque partem dicendo, audiendoque eliciant, & tanquam exprimant aliquid, quod aut verum sit, aut ad id quàm proximè accedat. Hoc autem liberiores, & solutiores sumus, quòd integra nobis est iudicandi potestas; neque, ut omnia, quæ præscripta, & quasi imperata sint, defendamus, necessitate ullâ cogimur (b).

(a) Plin. II. c. 53. (b) Cic. Tuscul. II.

F I N I S.

CAP. XI.

De Magnete .

I.



Eteris Lapidum, seu Metallo-
rum generibus adjungitur Ma-
gnes; cuius quidem virtus,
quâ ferrum ad se rapit, vel
ad alterutrum polum ipse
convertitur, admirabilis a-
deo, & occulta censei solet, ut *divina* (a),
solique Deo nota (b) vocari meruerit, ac Magnes
ipse a Veteribus (c) per antonomasiam *lapis*,
aut *Herculeus lapis* dicatur, quod, Herculis
instar, omnia superet; frequentius verò Ma-
gnes vocatur, sive quod primum in Magne-
siâ Macedonum Provincia repertus fuerit; sive
quod pastor quidam nomine Magnes, cum in
Ida monte greges, & armenta pasceret, cre-
pidarum clavis, aut ferreæ pastoralis pedi cu-
spidi hærentem lapidem ipsum deprehendit,
reique novitate in admirationem adductus in-
cognitam antea lapidis vim aliis ostendit.

II. Tres itaque Magnetis virtutes nostrâ
hac ætate satis accommodè distingui so-
lent, ad quas omnes illæ 34 facilè revocan-
tur, quæ sunt a Cartesio numeratæ (d). Al-
tera nimirum, quâ Magnes ferrum attrahit;
unde communiter virtus hæc *attractiva*, vel
attractrix vocari solet; alia deinde, quâ

P p 2

Ma-

(a) Gale. de Ther. ad Pison. & Avicen. de vir. cœr.
Tra. II. c. 16. (b) Aphrod. inis. Probl. (c) Plat. 5010
Plin. XXXI. c. 16. (d) Princ. IV. n. 145.

litas occulta, aut sympaticus influxus fidetur effingi debeat, quibus admirabiles Naturæ effectus explicentur, ut alibi ostendimus, cum de qualitatibus occultis ageremus.

IV. Recentiores ergo Philosophi solis Mechanicæ Philosophiæ principiis, & experimentis ipsis innixi directricem Magnetis virtutem ex substantiali particularum effluvio repetendam esse putarunt, quamvis non eundem explicandi modum singuli institerint, & a Gilberto plurimum differant. Hic enim, ut Magnetis naturam uberrimè illustraret, concipit universam Telluris molem esse veluti magnum quendam Magnetem, cujus exiguæ partes, ac, ut ipse ait, *Terella*, sint Magnetes illi, qui ex Terræ visceribus effodiuntur; unde in ipsis etiam, quemadmodum in globo Telluris, æquator, poli, &c. distinguuntur. Hinc autem fieri oportere arbitratur, ut globus Telluris eam directionem, quâ polos Mundi, vel Cœli respicit, & quam æquabiliter semper tuetur, etiam Magneti, qui ex Terrâ, veluti ipsius pars, foetus, & exigua Terra, avulsa, vel educta est, imprimere, communicare possit, adeoque Magnetem ipsum constanter ad arcticum polum convertere; ita ut si chartacæ, vel subereæ cymbulæ Magnes imponatur, hæc aquæ innatans aliquâ sui parte arcticum Mundi polum respicit, alterâ australem, unde facile cognosci, vel determinari possunt poli Magnetis. Sed Gilbertus ipse in Peripateticam sententiam dilabi ferè videtur, dum *occultam* qualitatem *sympaticam* a Tellure Magneti impressam supponit.

V. Ad veras itaque Naturæ leges magis accedere videntur illi, qui directionem illam

a tenuissimorum corpusculorum effluvio, quæ perenni motu ex Austro in Boream per lineas axi Terræ parallēlas, non internam modò Telluris substantiam pervadant, ejusque fibras, ac veluti venas percurrant, sed etiam circa externam illius superficiem moveantur.

1. Id non innui solùm, sed demonstrari etiam posse videtur, ex eo, quod metallorum fossiles fibras, ac veluti venas, quæ in subterraneis rupibus reperiuntur fere ex Austro in Boream dispositas experiantur; quod etiam in venis, aut fibris earum rupium, quibus exterior Terræ superficies componitur, observatur. Hinc ferrum, & Magnes, qui ferè semper circa ferri fodinas reperitur, ac igne laboratus in perfectissimum chalybem convertitur, dum adhuc in fodinis, ac Terræ visceribus reperiuntur, eam directionem fibrarum acquirunt, quam ex visceribus ipsis educta retineant, adeoque a corpusculis, quæ rapido, continuoque motu ab Austro feruntur in Boream, tandiu impelli, continuis ictibus urgeri, convertique debent, donec ipsæ particulæ, Magnetis fibras, aut poros antea formatos liberè, vel rectà ingrediantur, & Magnetem ipsum ad polum convertant. Irregularitates autem, phænomena, declinationes, quæ in Magnete observantur, cum eadem ferè ratione in Gassendi, quâ in Cartesianâ, vel Hugenianâ hypothesi inferiùs exponendâ salventur, hîc illa nunc omittenda putamus, ne eadem sæpiùs retexere videamur.

2. Perennis etiam hæc particularum magneticarum diffusio, & motus ex Austro in Boream, optimè, & invictè probari potest, ex eo, quod ferrum, etiamsi Magneti affricturn

non

non fuerit, dummodo per aliquod temporis spatium infra, vel supra Terram jacuerit, magneticâ vi statim imbuitur. Quia nimirum perenne corpusculorum effluuium ex Austro in Boream, insensibili quidem, sed maximo, vehementique motu, venti cujusdam instar, feratur, & Magnetis, aut ferri poros, quos certâ quadam, convenientique figurâ præditos, & conformatos, sibi congruentes repperit, ingrediatur, eosque ad polum dirigat. Lignum autem, argentum, marmor eam vim directricem recipere, vel experiri non possunt, quodd illorum fibræ, seu pori longè aliam, diversamque figuram habeant, quàm quæ recipiendis, trajiciendisque magneticis effluviis necessario requiritur.

VI. Ceteris autem in explicandâ Magnetis naturâ palmam præripuisse videtur Cartesius; eum ingeniosâ certè hypothesi ex ipsâ fere Mundi, vel Cartesiani Systematis principiis deductâ singulas illius proprietates explicari posse putavit. Supponit itaque Cartesius universam terrestrem hujus Vorticis materiam celeri, & æquabili motu circa proprium axem torqueri, dumque partes a polis Vorticis remotiores, sive circa Vorticis æquatorem, celerius, ob majorem circulum, quem peragere debent, moventur, ac majori vi centrifugâ, quam inde concipiunt, Vorticis latera impellunt, inde versùs polos, ubi minor est partium agitatio, & vis centrifuga defluunt, ac polos ipsos subeunt; ita ut plurimæ ab Austro in Boream, aliæ ex Borea in Austrum per lineas axi Vorticis, vel Terræ parallelas ferantur. Cùm verò tenuiores illius substantiæ partes interstitia, quæ inter globulos secundi e-

lementi vacua reliquuntur, replere debeant; figuram striatam, choleæ instar, acquirunt; dumque ex uno in alium polum a succedentibus impulsæ rectâ feruntur, interim circa se ipsas circulari motu torquentur; adeo ut motu composito cholearum instar, Terræ fibras, aut poros in similem figuram excavatos ingrediantur. Quandoquidem verò choleares illæ, sive striatæ particulae, iisque correspondentes Terræ meatus conici sunt, hoc est alterâ ex parte latiores, & apertiores, striatiores, & compressiores in aliâ, particulae, quæ Australem Terræ polum ingrediuntur, ad Borealem quidem perveniunt, sed inde per eosdem meatus in Australem regredi non possunt; quemadmodum etiam, quæ Borealem polum subeunt, & ex Australi erumpunt, non revertuntur, sed ubi particulae per Australem polum ingressæ ex Boreali eruperint, circa superficiem ejusdem Terræ ad Australem revertentur, ut per ipsum ingressæ ab Borealem iterum per Terræ viscera regrediantur; sicuti particulae per Borealem ingressæ, & ex Australi erumpentes circa superficiem Telluris ad Borealem iterum revertuntur, illumque subeunt. Quandoquidem ergo eadem fibrarum figura, dispositio, &c. quæ in toto globo Telluris conspicitur, in ipso quoque Magnete, veluti Terellâ quâdam impressa olim fuerat, dum illius fibræ in Terræ visceribus a perenni striatarum particularum motu pervaderentur, idem quoque striatæ materiæ circuitus circa Magnetem, ingressus, egressusque striatarum particularum ex uno in alterum polum Magnetis concedi debet; quo certè fieri oportet, ut Magnes ipse eam fibrarum directionem,

nem, quam semel in Terræ visceribus conceperat, ob incurrentium particularum impetum, etiam a Terraeductus conservet.

VII. Neque ex verisimili solum conjecturâ, cui Cartesiana hypothesis innititur, hic subtilis materiæ circuitus circa polos Magnetis inferri potest, sed pluribus etiam, accuratisque experimentis mirificè illustratur.

1. Si etenim circa Magnetem in globi formam contornatum, ut plerumque, adscriptis etiam polis, & æquatore, fieri solet, folium ritè circulariter excavatum circumponatur, ita ut folium ipsum per utrumque Magnetis polum, meridiani, vel horizontis instar, transeat, tunc scobs, sive ramenta, quæ ex ferro, vel chalybe ope limæ. abrafa fuerint, super folium ipsum temerè projecta circa Magnetem disponentur, ut ex uno in alterum polum circa Magnetis superficiem, villorum instar, hæere conspiciantur, & circa Magnetem ipsum exiguum veluti vorticem efformare. Quod si Magnetis venæ non rectâ ex uno in polum alium, sed obliquè, tortuosèque dirigantur, tunc ejusmodi ferri ramenta, non æquabili ductu, vel ordine circa Magnetem disponentur, sed eam potiùs directionem sortientur, quæ in venis ipsis reperitur.

2. Neque dissimile est aliud experimentum, quo acus ferrea Magneti proxima circa ipsum ita convertitur, ut si acûs ferreæ acies in australem Magnetis polum dirigatur, & ab hac directione dimoveatur, illam recuperet.

3. Sed illustriùs adhuc, & efficacius probari id potest ex acûs Magneticæ inclinatione. Compertum est enim, quod si in pyxide nauticâ acus ferrea, magneticâ vi nondum im-

buta, fulcro imponatur, hæc in æquilibrio horizonti parallela videbitur; at ubi acus ipsa Magneti affricta fuerit, & directricem vim conceperit, in septentrionalibus quidem locis illa pars acûs, quæ in septentrionem dirigitur, aliquantulum infra horizontem deprimitur, ut addendus sit australi cuspidi acûs globulus cerens, quo æquilibrium restituatur: quod si sub æquatore, hoc est in æquali ab utroque Terræ polo distantia, experimentum fiat, tunc, nihil deprimitur acus; at si trans æquatorem versûs Austrum ponatur pyxis, tunc elevatur quidem borealis cuspidis pars, & australis deprimitur. Id verò facillè intelligi potest, ubi revera ex polis Terræ, vel Magnetis exire corpuscula concipiantur, quæ circa superficiem ipsam Terræ, sive Magnetis gyrent; is enim illorum ordo futurus est, qualis in particulis ferri Magneti circumpositis efficitur, ut scilicet circa alterutrum polum proximiores, & depressiores sint, eandemque inclinationem acui, cujus fibras pervadunt, largiantur.

VIII. Id optimè noverat Hugenius, qui Cartesianam quidem hypothesim retinuit, sed aliqua tamen ab illâ rejecit, aliqua addidit, quibus illustrior, ac verisimilior fieret. Striata itaque Cartesii particulas, ex uno solum in alium polum, ut ex Austro in Boream, perenni, continuoque motu ferri putavit, quodum eadem particulae vel ferri, vel Magnetis fibras pervaderent, interiores fibrarum partes, quæ villorum instar, versûs utramque partem flexibiles, in Boream, ex. gr. ita inflexerint, atque inclinaverint, ut fibræ sic in Boream inclinatae iisdem particulis Magneticis regres-

sum

sum ex Botea in Austrum prohibuerint; quemadmodum ferè spicarum cuspides in unam partem inflexæ, in oppositam inflecti nequeunt.

IX. Sed, quæcumque hypothesis eligatur, in quâ directio Magnetis explicetur per effluvia corpusculorum, quæ Terræ, vel Magnetis fibras penetrent, eosque ex uno in alium polum convertant, explicari quoque facile poterit declinatio Magnetis, quæ primùm anno 1534. est observata; quodd in pluribus Terræ locis acus nautica non directè polum, vel boreum Cœli, vel horizontis cardinem respiciat, sed inæquali spatio ab illo deflectat, aut hinc inde declinet versùs ortum, aut occasum; quodque admirabilius adhuc haberi debet, in eodem quoque loco modò major, modò minor, & modò nulla sit acûs nauticæ declinatio, ut pluribus in locis, præsertim verò Parisiis est observatum. Inæqualitas autem illa, sive declinatio aliundè oriri non potest, quàm si in Terrâ fibrarum dispositio, vel ordo variari concipiatur, ita ut alicubi præcisè ex uno in alium polum ferantur, alibi nonnihil a polo deflectant. Cùmque, aut occulto motu Terræ, aut novæ ferri fodinæ productione, aut aliâ simili causâ interior ipsa fibrarum terrestrium dispositio variari in aliquâ regione possit, variari etiam poterit acûs Magneticæ declinatio. Quod si nulla ejusmodi mutatio contingat, acûs directio constanter conservabitur, ut pluribus in locis contingit, quæ accuratissimè observavit, & circumductâ lineâ in Globo terraqueo descripsit Hallejus.

X. Quod superest, agere incipiam quo fœdere fiat Natura, lapis hic ut ferrum ducere possit (a).

Al-

(a) Lutr. VI. v. 101.

Altera nimirum Magnetis virtus hic exponenda nobis occurrit, quâ ferrum attrahitur, cujus originem ita plerique Veteres explicarunt, ut plurimi inesse Magneti vim, & occultam qualitatem, quâ ferrum ipsum alliceret, existimarent; tumque se satisfecisse arbitrantur quærenti cur a Magnete ferrum trahatur, ubi dixissent hanc esse Magnetis virtutem, ut ferrum trahat; non iis fortasse multò sceliciores, qui Orphæum, atque Thaletem, sequuti sensum, amoremque magnetico lapidi concessere, ut rudes alias, obscurioresque antiquorum hypotheses, quæ apud Plutarchum legi poterunt, omittamus.

XI. Meliùs itaque, & accuratiùs Magnetice virtutis originem explicare videntur illi, qui ad tenuissima corpusculorum effluvia confugiunt. Sic enim Empedocles, atque Democritus ex Magnete tenuissimas particulas erumpere existimarunt (a), quibus abigeretur, & rarefieret aër interpositus, & subtiles etiam ferri particule ita excitarentur; ut in Magnetem niterentur, simulque ferrum sibi coharens, & implexum ad Magnetem abriperent. Neque alia fortasse fuisse videtur opinio Platonis (b); cum, etsi sententiam ille suam non satis exprefferit, posuisse tamen dicatur a Plutarcho (c) *effluxiones* quasdam, a quibus aër Magneti proximus ita rarefieret, ut facili vi rediens ad implendum vacuum ferrum ipsum corripere, & adduceret ad Magnetem; quod etiam a Ficino (d) Platonis Interprete confirmatur. Quid verò commemorem hanc Epicuri quoque sententiam fuisse, cum ille singulos

(a) ap. *Aptrod.* (b) in *Jone, & Tim.* (c) *Quæst. Platon.*
 (d) in *Tim.* c. 5.

los Naturæ effectus ad atomos, vel continua corpusculorum effluvia revocaverit?

XII. Hanc tamen Epicuri sententiam plurimis, gravissimisque difficultatibus implexam, & obnoxiam esse quis apertè non videat? Quod enim aërem Magneti, ferroque interjectum rarefieri, docet Epicurus, ideoque Magnetem ipsum, ac ferrum ab aëre circumposito, graviorique ad mutuum contactum impelli manifestè revincitur, tum quòd hæc aëris rarefactio nullâ ratione, vel experimento percipitur; tum etiam, quòd in machinâ pneumaticâ, educto etiam aëre, Magnete ferrum attrahitur, neque, variatâ aëris densitate, Magneticam vim variari observetur (a). Quod verò recurvis, hamatis, uncinatis atomis, veluti brachiolis, & ansulis quibusdam, Magnes, & ferrum devinciantur, omnino imaginarium censerì debet. Nititur quidem Gassendus illud exemplis, rationibusque tueri, vel illustrare, sed hæc tanti fortasse non sunt, ut vim illam atomis concessam, quâ liberè egredi, subire, moveri, implicari, resilire finguntur, aliquo verisimili argumento nobis ostendant. Facile est etiam Gassendo chordulas, ansulas, & uncinatas atomos comminisci, quæ ex Magnete erumpentes, ubi ad ferrum pervenerint, ejusque poros ingressæ fuerint, ferreis particulis implexæ, atque devinctæ, illas ad Magnetem abripiant, ac arreptâ veluti prædâ revertantur. Facile est etiam Magneti vim animali similem tribuere, ut quemadmodum canis ad objecti panis præsentiam, ita ferrum ad præsentiam Magnetis trahatur, impellaturque.

(a) Vid. *Lana Mag. Nat. & Artis, & Exper. Ac. Flor.*

que . Facile denique est tenuissimas particulas, quæ ex Magnete erumpant, cum spiritibus animalibus comparare, ita ut sicuti ipsi musculos contrahere, corpus movere, ingentia pondera sustinere possunt, ita Magnes ferrum arripere, impellere, sustinere dicatur, facile est, inquam, hæc, pluraque similia proponere, quod subtiliter certè, nec sinè maximâ ingenii, eruditionisque laude præstitit Gassendus, eadem tamen difficultas adhuc supererit, cum æquè obscura, vel obscurior etiam sit animalium spirituum operatio; aut, si hæc intelligi utcumque, non tamen liberè ad Magneticam vim transferri possit.

XII. Cartesii denique, & Hugenii hypothesis in explicandâ vi attractrice Magnetis unâ complecti possumus, quòd uterque ex eodem ferè principio vim directricem repetendam esse arbitretur. Subtiles itaque particulae, siue corpuscula, quæ jugiter ex Magnete, & ferro, vel ex utroque polo, juxta Cartesium, vel ex alterutro solùm, ut putat Hugenius, erumpunt, proximum aërem vehementer agitant, rarefaciunt, ita ut aër, qui inter Magnetem, & ferrum intercipitur, longè rarior, subtilior, levior evadat aëre, qui inter Magnetem, & ferrum reperitur. Posterior itaque hîc aër, juxta celebres gravitatis leges alibi explicatas, vim propriæ gravitatis exerit, Magnetem, ac ferrum urget, ac impellit donec ferrum ad Magnetem perveniat, ac illi jungatur: eo ferè modò, vel causâ, quâ si duæ accensæ facies approximentur, repentinè una in alteram inclinatur, ruit, ac utraque tandem in unam faciem conjungitur; quòd cum nimirum aër inter facies con-

ten.

tentus rarior, & levior evaserit, exterior aër vi gravitatis faces impellit, simulque conjungit.

XIV. Ita verò attractivæ virtutis phænomena Cartesius, & Hugenius explicant, ut ex perenni corpusculorum effluxu, quæ ex Magnete erumpunt ex Austro in Boream deducant, quod utraque magnetica vis a Magnete in ferrum transfertur, ita ut ferrum, quod Boreo, ex. gr. Magnetis polo affrictum fuerit, in Australem Mundi polum convertatur, aliudque ferrum allicere possit. Erumpentes enim Magneticæ particulæ exiguos contigui ferri poros subeunt, atque ita internas illius fibras inclinant, ut exitum sibi liberè efficiant, & ad aliud ferrum alliciendum perveniunt; cumque inde in Austrum, ob villorum inclinationem, vel chocleatam pororum figuram, regredi nequeant, eandem directionem, etiam ubi a Magnete sejunctum fuerit, in ferro conservant; quâ tamen magneticâ vi exiit ubi carDESCAT, quia nempe vehemens ille calor cum agitatione maximâ conjunctus fibrarum ordinem invertit, ac destruit.

1. Explicant etiam secundò cur ferrum, cui Magnetica vis impressa, vel communicata fuerit, dum ex. gr. a capulo in acumen supra Magnetem duceretur, magneticam vim prorsus amittat, si opposito ductu ex acumine in capulum Magneti affricetur; quemadmodum enim in primo casu magneticam vim ideo ferrum conceperat, quòd magnetica effluvia, illius fibras in certam partem inflexerant, dum opposito motu supra Magnetem ducitur, pristinum ordinem, ac directionem illæ recuperant; eo prorsus modo, quo si infra folium Magnes circumducatur, ferreæ scobis particulæ supra fo-

folium temerè injectæ certò quodam ordine disponuntur, & spiculorum, seu villorum instar, eriguntur; at si contrario motu Magnes infra folium ducatur, contrarium etiam situm scobis particulæ acquirunt.

2. Ex ipso quoque particularum magneticarum effluvio oriri debet, ut si duorum Magnetum poli cognomines, ex. gr. Borei, approximentur, alter ab alio repellitur; sin verò Boreus Australi exponatur, mutuis viribus, ac impetu alliciuntur. Cùm etenim in singulis Magnetibus fibræ ita dispositæ sint, ut Magnetica effluvia, sive particulæ, per aliquem illorum erumpentes, per eundem polum regredi nequeant, particulæ, quæ ex Boreali unius Magnetis polo egrediuntur, per Borealem alterius polum ingredi non possunt, adeoque in illum incidentes ipsum repellent. Quod intelligi etiam debet de duplici acu Magneticâ, quæ jam similem fibrarum ordinem, vel directionem, faciliè conceperit.

XV. Id unum postremò monendum superest, quod Magnes, si ferro, vel chalibe vestiatur, sive, ut ajunt, *armetur*, longè validius ferrum attrahit, attractumque sustinet.

Id verò non aliâ certè de causâ fieri posse concipitur, nisi quodd aut uberior Magnetica particularum copia tunc in ferrum irumpit, quæ antea circa Magnetis latera liberius resilientes evagabantur; aut quodd unius ferri meatus, sive pori tunc melius, atque tenaciùs meatibus alterius ferri cohæreant, quàm cohæreant ferrum Magneti; sive denique verisimilius, quia in pluribus punctis in mutuum contactum venit ferrum cum ferro, quàm ferrum cum Magnete.



